

नमो नमो निग्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१४

जीवाजीवाभिगम-तइयं

Proof correction is not done

मुनि दीपरत्नसागर

Date : / / 2012

Jain Agam Online Series-14

१४ गंथाणुककमो

कमंको	पडिवत्ति	उद्देसका	सुत्तं	गाहा	अणुककमो	पिढंको
१	पढमा-“दुविह”	-	१-४४	१-४	१-५१	002
२	दोच्चा-“तिविह”	-	४५-६५	५-	५२-७३	013
३	तच्चा-“चउव्विह”	-	-	-	-	-
-	-नेरइय	३	६६-९६	६-२४	७४-१२९	023
-	-तिरिक्खजोणिय	२	९७-१०६	-	१३०-१३९	035
-	-मणुस्साधिकारो	-	१०७-११४	२५-२६	१४०-१५१	039
-	-देवाधिकार	-	११५-	-	१५२-	048
-	(भवणवासी)	-	११६-१२२	-	१५३-१५९	048
-	-दीवसमुद्ध	-	१२४-१९१	२७-८३	१६९-३०४	059
-	-इंदियविसय	-	१९२-	-	३०५-	114
-	-देवाधिकार	-	१९३-	-	३०६-	114
-	-(जोइस)	-	१२३	-	३०७-	115
-	-(जोइस)	-	१९४-२०७	८४-८५	३०८-३२३	116
-	(वेमाणिय)	२	२०८-२२२	८६-८८	३२४-३४१	120
-	-ठिति, अंतर	-	२२३-२२४	-	३४२-३४३	126
४	चउत्थी-“पंचविह”	-	२२५-२२६	-	३४४-३४५	126
५	पंचमी-“छव्विह”	-	२२७-२४०	८९-९२	३४६-३६४	127
६	छट्ठी-“सत्तविह”	-	२४१-	-	३६५-	133
७	सत्तमी-“अट्ठविह”	-	२४२-	-	३६६-	134
८	अट्ठमी-“नवविह”	-	२४३-	-	३६७-	135
९	नवमी-“दसविह”	-	२४४-	-	३६८-	135
१०	सव्वजीव-पडिवत्ति	९	२४५-२७६	९३-	३६९-३९८	136
Proof correction is not done						

१४

जीवाजीवाभिगमं- तइयं उवंगसुत्तं

[[पढमा पडिवत्ती-दुविहपडिवत्ती]]

[१] नमो अरिहंताणं नमो सिद्धाणं नमो आयरियाणं नमो उवज्झायाणं नमो लोए सव्वसाहूणं, नमो उसभादियाणं चउवीसाए तित्थगराणं, इह खलु जिणमयं जिणाणुमयं जिणाणुलोमं जिणप्पणीतं जिणपरुवियं जिणक्खायं जिणाणुचिण्णं जिणपन्नत्तं जिणदेसियं जिणपसत्थं अनुवीइ तं सद्धमाणा तं पत्तियमामा तं रोएमाणा थेरा भगवंतो जीवाजीवाभिगमं नामज्झयणं पन्नवइसु ।

[२] से किं तं जीवाजीवाभिगमे, जीवाजीवाभिगमे दुविहे पन्नत्ते तं जहा- जीवाभिगमे य अजीवाभिगमे य ।

[३] से किं तं अजीवाभिगमे, अजीवाभिगमे दुविहे पन्नत्तं तं जहा- रूविअजीवाभिगमे य अरूविअजीवाभिगमे य ।

[४] से किं तं अरूविअजीवाभिगमे अरूविअजीवाभिगमे दसविहे पन्नत्ते तं जहा- धम्मत्थिकाए [धम्मत्थिकायस्सदेसे धम्मत्थिकायस्सपदेसा अधम्मत्थिकाए अधम्मत्थिकायस्सदेसे अधम्मत्थिकायस्सपदेसा आगासत्थिकाए आगासत्थिकायस्सदेसे आगासत्थिकायस्सपदेसा अद्धासमए] सेत्तं अरूविअजीवाभिगमे ।

[५] से किं तं रूविअजीवाभिगमे रूविअजीवाभिगमे चउव्विहे पन्नत्ते तं जहा- खंधा खंधदेसा खंधप्पएसा परमाणुपोग्गला ते समासओ पंचविहा पन्नत्ता तं जहा- वण्णपरिणया गंधपरिणया रसपरिणया फासपरिणया संठाणपरिणया जे वण्णपरिणता ते पंचविहा पन्नत्ता तं जहा- कालवण्णपरिणता नीलवण्णपरिणता लोहियवण्णपरिणता हालिद्ववण्णपरिणता सुक्किलवण्णपरिणता जे गंधपरिणता ते दुविहा पन्नत्ता तं जहा- सुब्धिगंधपरिणता य दुब्धिगंधपरिणता य जे रसपरिणता ते पंचविहा पन्नत्ता तं जहा- तित्तरसपरिणता कडुयरसपरिणता कसायरसपरिणता अंबिलरसपरिणता महुररसपरिणता जे फासपरिणता ते अट्ठविहा पन्नत्ता तं जहा- कक्कडफासपरिणता मउयफासपरिणता गरुयफासपरिणता लहुयफासपरिणता सीयफासपरिणता उसिणफासपरिणता निद्धफासपरिणता लुक्खफासपरिणता जे संठाणपरिणता ते पंचविहा पन्नत्ता तं जहा- परिमंडलसंठाणपरिणता वट्टसंठाणपरिणता तंससंठाणपरिणता चउरंससंठाणपरिणता आयतसंठाणपरिणता एवं ते जहा- पन्नवणाए सेत्तं रूविअजीवाभिगमे सेत्तं अजीवाभिगमे ।

[६] से किं तं जीवाभिगमे, जीवाभिगमे दुविहे पन्नत्ते तं जहा- संसारसमावण्णजीवाभिगमे य असंसारसमावण्णजीवाभिगमे य ।

[७] से किं तं असंसारसमावण्णजीवाभिगमे असंसारसमावण्णजीवाभिगमे दुविहे पन्नत्ते तं जहा- अनंतरसिद्धासंसारसमावण्णजीवाभिगमे य परंपरसिद्धासंसारसमावण्णजीवाभिगमे य से किं तं अनंतर-सिद्धासंसारसमावण्णजीवाभिगमे अनंतरसिद्धासंसारसमावण्णजीवाभिगमे पन्नरसविहे पन्नत्ते तं जहा-तित्थ-

सिद्धा [अतिथसिद्धा तित्थगरसिद्धा अतिथगरसिद्धा सयंबुद्धसिद्धा पत्तेयबुद्धसिद्धा बुद्धबोहियसिद्धा इत्थीलिंगसिद्धा पुरिसलिंगसिद्धा नपुंसकलिंगसिद्धा सलिंगसिद्धा अन्नलिंगसिद्धा गिहिलिंगसिद्धा एगसिद्धा] अनेगसिद्धा सेत्तं अनतरसिद्धा से किं तं परंपरसिद्धासंसारसमावण्णजीवाभिगमे परंपरसिद्धासंसारसमावण्ण-जीवाभिगमे अनेगविहे पन्नत्ते तं जहा- अपढमसमयसिद्धा-दुसमयसिद्धा जाव अनंतसमयसिद्धा से त्तं परंपर-सिद्धासंसारसमावण्णजीवाभिगमे सेत्तं असंसारसमावण्णजीवाभिगमे ।

[८] से किं तं संसारसमावण्णजीवाभिगमे संसारसमावण्णएसु णं जीवेसु इमाओ नव पडिवत्तीओ एवमाहिज्जंति तं जहा- एगे एवमाहंसु-दुविहा संसारसमावण्णगा जीवा पन्नत्ता एगे एवमाहंसु-तिविहा संसारसमावण्णगा जीवा पन्नत्ता एगे एवमाहंसु-चउव्विहा संसारसमावण्णगा जीवा पन्नत्ता एगे एवमाहंसु-पंचविहा संसारसमावण्णगा जीवा पन्नत्ता [एगे एवमाहंसु-छव्विहा संसारसमावण्णगा जीवा पन्नत्ता एगे एवमाहंसु-सत्तविहा संसारसमावण्णगा जीवा पन्नत्ता एगे एवमाहंसु-नवविहा संसारसमावण्णगा जीवा पन्नत्ता एगे एवमाहंसु]-दसविहा संसारसमावण्णगा जीवा पन्नत्ता ।

[९] तत्थ णं जेते एवमाहंसु दुविहा संसारसमावण्णगा जीवा पन्नत्ता ते एवमाहंसु तं जहा- तसा चेव थावरा चेव ।

[१०] से किं तं थावरा, थावरा तिविहा पन्नत्ता तं जहा- पुढविकाइया आउकाइया वणस्सइकाइया ।

[११] से किं तं पुढविकाइया, पुढविकाइया दुविहा पन्नत्ता तं जहा- सुहुमपुढविकाइया य बायरपुढविकाइया य ।

[१२] से किं तं सुहुमपुढविकाइया, सुहुमपुढविकाइया दुविहा पन्नत्ता तं जहा- पज्जत्तगा य अपज्जत्तगा य ।

[१३] सरीरोगाहण-संघयण-संठाणकसाय तह य हुंति सण्णाओ ।
लेसिंदिय-समुग्धाओ सण्णी वेए य पज्जत्ती ।
दिट्ठी दंसणनाणे जोगुवओगे तहा किमाहारे ।
उववाय-ठिई समुग्धाय-चवण-गइरागई चेव ।

[१४] तेसि णं भंते जीवाणं कइ सरीरगा पन्नत्ता गोयमा तओ सरीरगा पन्नत्ता तं जहा- ओरालिए तेयए कम्मए तेसि णं भंते जीवाणं केमहालिया सरीरोगाहणा पन्नत्ता गोयमा जहन्नेणं अंगुलासंखेज्जइभागं उक्कोसेणवि अंगुलासंखेज्जइभागं तेसि णं भंते जीवाणं सरीरा किं संघयणा पन्नत्ता गोयमा छेवट्टसंघयणा पन्नत्ता तेसि णं भंते जीवाणं सरीरा किं संठिया पन्नत्ता गोयमा मसूरचंदसंठियापन्नत्ता तेसि णं भंते जीवाणं कति कसाया पन्नत्ता गोयमा चत्तारि कसाया पन्नत्ता तं जहा- कोहकसाए माणकसाए मायाकसाए लोहकसाए तेसि णं भंते जीवाणं कति सन्नाओ पन्नत्ताओ गोयमा चत्तारि सन्नाओ पन्नत्ताओ तं जहा- आहारसन्ना [भयसनना मेहुणसन्ना] परिग्गहसन्ना तेसि णं भंते जीवाणं कइ लेसाओ पन्नत्ताओ गोयमा तिण्णि लेस्साओ पन्नत्ताओ तं जहा- कण्हेस्सा नीललेस्सा काउलेस्सा तेसि णं भंते जीवाणं कइ इंदियाइं पन्नत्ताइं गोयमा एगे फासिंदिए पन्नत्ते तेसि णं भंते जीवाणं कइ समुग्धया पन्नत्ता गोयमा तओ समुग्धया पन्नत्ता तं जहा- वेयणासमुग्धाए

कसायसमुग्धाए मारणंतियसमुग्धाए, ते णं भंते जीवा किं सण्णी असण्णी नो सण्णी असण्णी, ते णं भंते जीवा किं इत्थि-
पडिवत्ति-१

वेया पुरिसवेया नपुंसगवेया गोयमा नो इत्थिवेया नो पुरिसवेया नपुंसगवेया ।

तेसि णं भंते जीवाणं कइ पज्जत्तीओ पन्नत्ता गोयमा चत्तारि पज्जत्तीओ पन्नत्ताओ तं जहा- आहार-पज्जत्ती सरारपज्जत्ती इंदियपज्जत्ती आणपाणुपज्जत्ती, तेसिं णं भंते जीवाणं कइ अपज्जत्तीओ पन्नत्ताओ गोयमा चत्तारि अपज्जत्तीओ पन्नत्ताओ तं जहा- आहारअपज्जत्ती जाव आणापाणुअपज्जत्ती, ते णं भंते जीवा किं सम्मदिट्ठी मिच्छादिट्ठी सम्ममिच्छादिट्ठी गोयमा नो सम्मदिट्ठी मिच्छादिट्ठी नो सम्मामिच्छादिट्ठी तेणं भंते जीवा किं चक्खुदंसणी अचक्खुदंसणी ओहिंदंसणी केवलदंसणी गोयमा नो चक्खुदंसणी अचक्खुदंसणी नो ओहिंदंसणी नो केवलदंसणी ते णं भंते जीवा किं नाणी अन्नाणी गोयमा नो चक्खुदंसणी अचक्खुदंसणी नो ओहिंदंसणी नो केवलदंसणी ते णं भंते जीवा किं नाणी अन्नाणी गोयमा नो नाणी अन्नाणी नियमा दुअन्नाणी तं जहा- मइअन्नाणी सुयअन्नाणी य, ते णं भं जीवा किं मनजोगी वइजोगी कायजोगी गोयमा नो मनजोगी नो वइजोगी कायजोगी ते णं भंते जीवा किं सागारोवउत्ता अनागारोवउत्ता गोयमा सागारोवउत्तावि अनागारोवउत्तावि ते णं भंते जीवा किमाहारमाहारेंति गोयमा दव्वओ अनंतपएसियाइं दव्वाइं खेत्तओ असंखेज्जपएसोगाढाइं कालओ अण्णयरसमयद्विइयाइं भावओ वण्णमंताइं गंधमंताइं रसमंताइं फासमंताइं, जाइं भावओ वण्णमंताइं आहारेंति ताइं किं एगवण्णाइं आहारेंति दुवण्णाइं आहारेंति तिवण्णाइं आहारेंति चउवण्णाइं आहारेंति पंचवण्णाइं आहारेंति गोयमा ठाणमग्गणं पडुच्च एगवण्णाइंपि दुवण्णाइंपि तिवण्णाइंपि चउवण्णाइंपि पंचवण्णाइंपि आहारेंति विहाणमग्गणं पडुच्च कालाइंपि आहारेंति जाव अनंत-गुणकालाइं आहारेंति गोयमा एगगुणकालाइंपि आहारेंति जाव अनंतगुणकालाइंपि आहारेंति एवं जाव सुक्किलाइं, जाइं भावओ गंधमंताइं आहारेंति ताइं किं एगगंधाइं आहारेंति दुगंधाइं आहारेंति गोयमा ठाणमग्गणं पडुच्च एगगंधाइंपि आहारेंति दुगंधाइंपि आहारेंति विहाणमग्गणं पडुच्च सुब्भिगंधाइंपि आहारेंति दुब्भिगंधाइंपि आहारेंति, जाइं गंधओ सुब्भिगंधाइं आहारेंति ताइं किं एगगुणसुब्भिगंधाइं आहारेंति जाव अनंतगुणसुब्भिगंधाइं आहारेंति गोयमा एगगुणसुब्भिगंधाइंपि आहारेंति जाव अनंतगुणसुब्भिगंधाइंपि आहारेंति एवं दुब्भिगंधाइंपि, रसा जहा वण्णा।

जाइं भावओ फासमंताइं आहारेंति ताइं किं एगफासाइं आहारेंति जाव अट्ठफासाइं आहारेंति गोयमा ठाणमग्गणं पडुच्च नो एगफासाइं आहारेंति नो दुफासाइं आहारेंति नो तिफासाइं आहारेंति चउफासाइं आहारेंति पंचफासाइंपि जाव अट्ठफासाइंपि आहारेंति विहाणमग्गणं पडुच्च कक्खडाइंपि आहारेंति जाव लुक्खाइंपि आहारेंति जाइं फासओ कक्खडाइं आहारेंति ताइं किं एगगुणकक्खडाइं आहारेंति जाव अनंतगुणकक्खडाइं आहारेंति गोयमा एगगुणकक्खडाइंपि आहारेंति जाव अनंतगुणकक्खडाइंपि आहारेंति एवं जाव लुक्खा नेयव्वा, ताइं भंते किं पुट्ठाइं आहारेंति अणोगाढाइं आहारेंति गोयमा ओगाढाइं आहारेंति नो अणोगाढाइं आहारेंति ताइं भंते किमणंतरोगाढाइं आहारेंति परंपरोगाढाइं आहारेंति गोयमा अनंतरोगाढाइं आहारेंति नो परंपरोगाढाइं आहारेंति ताइं भंते किं अणूइं आहारेंति बायराइं आहारेंति गोयमा अणूइंपि आहारेंति बायराइंपि आहारेंति ताइं भंते किं उड्ढं आहारेंति अहे आहारेंति तिरियं आहारेंति गोयमा उड्ढंपि आहारेंति अहेवि आहारेंति तिरियंपि आहारेंति ताइं भंते किं आदिं आहारेंति मज्झे आहारेंति पज्जवसाणे

आहारेंति गोयमा आदिपि आहारेंति मज्झेवि आहारेंति पज्जवसाणेवि आहारेंति ताइं भंते किं सविसए
आहारेंति अविसए आहारेंति गोयमा सविसए आहारेंति नो अविसए आहारें ताइं भंते किं आनुपुच्चिं
पडिवत्ति-१

आहारेंति अनानुपुच्चिं आहारेंति गोयमा आनुपुच्चिं आहारेंति नो अनानुपुच्चिं आहारेंति ताइं भंते किं
तिदिसिं आहारेंति चउदिसिं आहारेंति पंचदिसिं आहारेंति छद्दिसिं आहारेंति गोयमा निव्वाधाएणं छद्दिसिं
वाघायं पडुच्च सिय तिदिसिं सिय चउदिसिं सिय पंचदिसिं ।

ओसण्णकारणं पडुच्च वण्णओ कालाइं नीलाइं जाव सुक्किलाइं गंधओ सुब्धिगंधाइ
दुब्धिगंधाइं रसओ तित्त जाव महुराइं फासओ कक्खड-मउय जाव निद्धलुक्खाइं तेसिं पोराणे वण्णगुणे
जाव फासगुणे विप्परिणामइत्ता परिपीलइत्ता परिसाडइत्ता परिविद्धसइत्ता अण्णे अपुच्चे वण्णगुणे
गंधगुणे रसगुणे फासगुणे उप्पाइत्ता आयसरीरखेतोगाढे पोग्गले सव्वप्पणयाए आहारमाहारेंति ते णं भंते
जीवा कओहिंतो उववज्जंति-किं नेरइएहिंतो उववज्जंति तिरिक्खमणुस्स-देवेहिंतो उववज्जंति गोयमा नो
नेरइएहिंतो उववज्जंति तिरिक्खजोणिएहिंतो उववज्जंति मणुस्सेहिंतो उवज्जंति मणुस्सेहिंतो अकम्मभूमग-
असंखेज्जवासाउयवज्जेहिंतो उववज्जंति वक्कंतीउववाओ भाणियव्वो, तेसिं णं भंते जीवाणं केवइयं कालं
ठिई पन्नत्ता गोयमा जहण्णेणं अंतोमुहुत्तं उक्कोसेणवि अंतोमुहुत्तं ते णं भंते जीवा
मारणंतियसमुग्धाएणं किं समोहया मरंति असमोहया मरंति गोयमा समोहयावी मरंति असमोहयावि मरंति
ते णं भंते जीवा अनंतरं उव्वट्ठित्ता कहिं गच्छंति कहिं उववज्जंति किं नेरइएसु उववज्जंति
तिरिक्खजोणिएसु उववज्जंति मणुस्सेसु उववज्जंति नो देवेसु उववज्जंति जइ तिरिक्खजोणिएसु
उववज्जंति किं एगिंदिएसु उववज्जंति जाव पंचिंदिएसु उववज्जंति गोयमा एगिंदिएसु उववज्जंति जाव
पंचेदियतिरिक्खजोणिएसु उववज्जंति असंखेज्जवासाउयवज्जेसु पज्जत्तापज्जत्तएसु उववज्जंति मणुस्सेसु
अकम्मभूमग-अंतरदीवग-असंखेज्जवासाउयवज्जेसु पज्जत्तापज्जत्तएसु उववज्जंति, ते णं भंते जीवा
कतिगतिया कति आगतिया पन्नत्ता गोयमा दुगतिया दुआगतिया परित्ता असंखेज्जा पन्नत्ता
समणाउसो से त्तं सुहुमपुढविकाइया ।

[१५] से किं तं बायरपुढविकाइया बायरपुढविकाइया दुविहा पन्नत्ता तं जहा-
सण्हबायरपुढविकाइया य खरबायरपुढविकाइया य ।

[१६] से किं तं सण्हबायरपुढविकाइया सण्हबायरपुढविकाइया सत्तविहा पन्नत्ता तं
जहा- कण्हमत्तिया भेओ जहा- पन्नवणाए जाव-ते समासओ दुविहा पन्नत्ता तं जहा- पज्जत्तगा य
अपज्जत्तगा यय तेसिं णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा-
ओरालिए तेयए कम्मए तं चेव सव्वं नवरं-चत्तारि लेसाओ अवसेसं जहा- सुहुमपुढविकाइयाणं आहारो
नियमा छद्दिसिं उववाओ तिरिक्खजोणिय-मणुस्स-देवेहिंतो देवेहिं जाव सोहम्मसाणेहिंतो ठिई जहण्णेणं
अंतोमुहुत्तं उक्कोसेणं बावीसं वाससहस्साइं, ते णं भंते जीवा मारणंतियसमुग्धाएणं किं समोहया मरंति
असमोहया मरंति गोयमा समोहयावि मरंति असमोहयावि मरंति, ते णं भंते जीवा अनंतरं उव्वट्ठित्ता कहिं
गच्छंति कहिं उववज्जंति - किं नेरइएसु उववज्जंति पुच्छा गोयमा नो नेरइएसु उववज्जंति
तिरिक्खजोणिएसु उवज्जंति मणुस्सेसु उववज्जंति नो देवेसु उववज्जंति तं चेव जाव
असंखेज्जवासाउयवज्जेहिंतो उववज्जंति ते णं भंते जीवा कतिगतिया कतिआगतिया पन्नत्ता गोयमा

दुगतिया तिआगतिया परित्ता असंखेज्जा पन्नत्ता समणाउसो से त्तं बायरपुढविकाइया से त्तं पुढविकाइया ।

[१७] से किं तं आउक्काइया आउक्काइया दुविहा पन्नत्ता तं जहा- सुहुम-आउक्काइया य बायरआउक्काइया य सुहुमआउक्काइया दुविहा पन्नत्ता तं जहा- पज्जत्ता य अपज्जत्ता य तेषिं णं भंते जीवाणं कइ सरीरया पन्नत्ता गोयमा तओ सरीरया पन्नत्ता तं जहा- ओरालिए तेयए कम्मए जहेव सुहुम-

पडिवत्ति-१

पुढविकाइयाणं नवरं-थिवुगसंठिया पन्नत्ता सेसं तं चेव जाव दुगइया दुआगतिया परित्ता असंखेज्जा पन्नत्ता से त्तं सुहुमआउक्काइया ।

[१८] से किं तं बायरआउक्काइया बायरआउक्काइया अनेगविहा पन्नत्ता तं जहा- ओसा हिमे जाव जे यावण्णे तहप्पगारा ते समासओ दुविहा पन्नत्ता तं जहा- पज्जत्ता य अपज्जत्ता य तं चेव सव्वं नवरं-थिवुगसंठिया चत्तारि लेसाओ आहारो नियमा छदिसिं उववाओ तिरिक्खजोणि-मणुस्स-देवेहिंतो ठिती जहन्नेणं अंतोमुहुत्तं उक्कोसेणं सत्तवाससहस्साइं सेसं तं चेव जहा- बायरपुढविकाइया जाव दुगतिया तिआगतिआ परित्ता असंखेज्जा पन्नत्ता समणाउसो सेत्तं बायरआउक्काइया सेत्तं आउक्काइया ।

[१९] से किं तं वणस्सइकाइया वणस्सइकाइया दुविहा पन्नत्ता तं जहा- सुहुमवणस्सइकाइया य बायरवणस्सइकाइया य ।

[२०] से किं तं सुहुमवणस्सइकाया सुहुमवणस्सइकाइया दुविहा पन्नत्ता तं जहा- पज्जत्तगा य अपज्जत्तगा य तहेव नवरं-अणित्थंसंठिया दुगतिया दुआगतिया अपरित्ता अनंता अवसेसं जहा- पुढविकाइयाणं से तं सुहुमवणस्सइकाइया ।

[२१] से किं तं बायरवणस्सइकाइया बायरवणस्सइकाइया दुविहा पन्नत्ता तं जहा- पत्तेयसरीरवायरवणस्सइकाइया य साहारणसरीबायरवणस्सइकाइया य ।

[२२] से किं तं पत्तेयसरीरबायरवणस्सइकाइया पत्तेयसरीरबायरवणस्सइकाइया दुवालसविहा पन्नत्ता तं जहा -

[२३] रुक्खा गुच्छा गुम्मा लत्ताय वल्लीय पव्वगा चेव ।

तण वलय हरिय ओसहि जलरुह कुहणा य बोधव्वा ॥

[२४] से किं तं रुक्खा रुक्खा दुविहा पन्नत्ता तं जहा- एगट्ठिया य बहुबीया य, से किं तं एगट्ठिया एगट्ठिया अनेगविहा पन्नत्ता तं जहा- निबंब जंबु कोसंब साल अंकोल्ल पीलु सेलू य जाव पुन्नाग नागरुक्खे सीवणि तहा असोगे य जे यावण्णे तहप्पगारा एतेसि णं मूलावि असंखेज्जजीविया एवं कंदा खंधा तया साला पवाला पत्ता पत्तेयजीवा पुप्फाइं अणेगजीवाइं फला एगट्ठिया से तं एगट्ठिया, से किं तं बहुबीया, बहुबीया अनेगविहा पन्नत्ता तं जहा- अत्थिय-तेंदुय-उंबर-कविट्ठे आमलग-फणस-दाडि-नग्गोह-काउंबरीय-तिलय-लउय-लोद्धे धवे जे यावण्णे तहप्पगारा एतेसि णं मूलावि असंखेज्जजीविया जाव फला बहुबीयगा सेत्तं बहुजी-यगा सेत्तं रुक्खा एवं जहा पन्नवणाए तहा भाणियव्वं जाव जे यावण्णे तहप्पगारा सेत्तं कुहणा ।

[२५] नाणाविहसंठाणा रुक्खाणं एगजीविया पत्ता ।

खंधोवि एगजीवो ताल-सरल-नालिणी ॥

[२६] जह सगलसरिसवाणं सिलेसमिस्साण वट्टिया वट्टी ।

पत्तेयसरीराणं तहहोति सरीरसंघाया ॥

[२७] जह वा तिलप्पडिया बहुएहिं तिलेहिं संहित्ता संती ।

पत्तेयसरीराणं तह होतिसरीरसंघाया ॥

[२८] सेत्तं पत्तेयसरीरबायरवणस्सइकाइया ।

[२९] से किं तं साहारणसरीरबायरवणस्सइकाइया साहारणसरीरबायरवणस्सइकाइया अनेग-
पडिवत्ति-१

विहा पन्नत्ता तं जहा- आलुए मूलए सिंगबेरे हिरिलि सिरिलि सिस्सिरिलि किट्टिया छिरिया छीरविरालिया कण्हकंदे वज्जकंदे सूरणकंदे खेलूडे भद्दमोत्था पिंडहलिद्ध लोही नीहू थीहू अस्सकण्णी सीहकण्णी सीउंढी मुसंढी जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तत्थ णं जेते अपज्जत्तगा ते णं असंपत्ता तत्थ णं जेते पज्जत्तगा तेसिं वण्णादेसेणं गंधादेसेणं रसादेसेणं फासादेसेणं सहस्सग्गसो विहाणाइं संखेज्जाइ जोणिप्पमुहसयसहस्साइं पज्जत्तगणिस्साए अपज्जत्तगा वक्कमंति-जत्थ एगो तत्थ सिय संखेज्जा सिय असंखेज्जा सिय अनंता तेसिं णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा- ओराले तेयए कम्मए तहेव जहा- बायरपुढविकाइयाणं नवरं-सरीरगाहणा जहन्नेणं अंगुलस्स असंखेज्जइभागं उक्कोसेणं सातिरेगं जोयणसहस्सं सरीरगा अणित्थंसंठिया ठिती जहन्नेणं अंतोमुहुत्तं उक्कोसेणं दसवाससहस्साइं जाव दुगइया तिआगइया अपरित्ता अनंता पन्नत्ता सेत्तं बायरवणस्सइकाइया सेत्तं वणस्सइकाइया सेत्तं थावरा ।

[३०] से किं तं तसा तसा तिविहा पन्नत्ता तं जहा- तेउक्काइया वाउक्काइया ओराला तसा पाणा ।

[३१] से किं तं तेउक्काइया तेइउक्काइया दुविहा पन्नत्ता तं जहा- सुहुमतेउक्काइया य बायरतेउक्काइया य ।

[३२] से किं तं सुहुमतेउक्काइया सुहुमतेउक्काइया जहा- सुहुमपुढविकाइया नवरं-सरीरगा सूइकलावसंठिया एगगइया दुआगइया परित्ता असंखेज्जा पन्नत्ता सेसं तं चेव सेत्तं सुहुमतेउक्काइया ।

[३३] से किं तं बादरतेउक्काइया बादरतेउक्काइया अनेगविहा पन्नत्ता तं जहा- इंगाले जाव तत्थ नियमा असंखेज्जा तेसीं णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा- ओरालिए तेयए कम्मए सेसं तं चेव सरीरगा सूइकलावसंठिया तिण्णि लेस्सा ठिती जहन्नेणं अंतोमुहुत्तं उक्कोसेणं तिण्णि राइंदियाइं तिरियमणुस्सेहिंतो उववाओ सेसं तं चेव जाव एगतिया दुआगतिया परित्ता असंखेज्जा पन्नत्ता सेत्तं बादरतेउक्काइया सेत्तं तेउक्काइया ।

[३४] से किं तं वाउक्काइया वाउक्काइया दुविहा पन्नत्ता तं जहा-सुहुम-वाउक्काइया य बायरवाउक्काइया य सुहुमवाउक्काइया जहा- तेउक्काइया नवरं-सरीरगा पडागसंठिया एगगतिया दुआगतिया परित्ता असंखेज्जा सेत्तं सुहुमवाउक्काइया, से किं तं बादरवाउक्काइया बादर वाउक्काइया अनेगविहा पन्नत्ता तं जहा- पाईणवाते पडीणवाते जाव सुद्ध वाते जे यावण्णे तहप्पगारा ते समासतो दुविहा पन्नत्ता तं जहा- पज्जत्तगा य अपज्जत्तगा य तत्थ णं जे ते अपज्जत्तगा ते णं असंपत्ता तत्थणं जे ते पज्जत्तगा एतिसिं णं वण्णादेसेणं गंधादेसेणं रसादेसेणं फासादेसेणं सहस्सग्गसो विहाणाइं

संखेज्जाइं जोणिप्पमुहसयसहस्साइं पज्जत्तगणिस्साए अप्पजत्तगा वक्कमंति-जत्थ एगो तत्थ नियमा असंखेज्जा तेसि णं भंते जीवाणं कति सरीरगा पन्नत्ता गोयमा चत्तारि सरीरगा पन्नत्ता तं जहा-ओरालिए वेउव्विए तेयए कम्मए सरीरगा पडागसंठिया चत्तारि समुग्धाया वेयणासमुग्धाए कसायसमुग्धाए मारणंतियसमुग्धाए वेउव्वियसमुग्धाए आहारो निव्वाघाएणं छद्दिसिं वाघायं पडुच्च सिय चउदिसिं पंचदिसिं उववाओ देवमणुयनेरइएसु नत्थि ठिती जहण्णेणं अंतोमुहुत्तं उक्कोसेणं तिण्णि वाससहस्साइं सेसं तं चेव एगगतिया दुआगतिया परित्ता असंखेज्जा पन्नत्ता समणाउसो सेत्तं बायरवाउक्काइया सेत्तं वाउक्काइया ।

[३५] से किं तं ओराला तसा पाणा ओराला तसा पाणा चउव्विहा पन्नत्ता तं जहा-बेइंदिया
पडिवत्ति-१

तेइंदिया चउरिंदिया पंचेदिया ।

[३६] से किं तं बेइंदिया बेइंदिया अनेगविहा पन्नत्ता तं जहा- पुलाकिमिया जाव समुदल्लिक्खा जे यावण्णे तहप्पगारा ते समासओ दुविहा पन्नत्ता तं जहा- पन्नत्तगा य अपज्जत्तगा य तेसि णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा- ओरालियए तेयए कम्मे तेसि णं भंते जीवाणं केमहालिया सरीरोगाहणा पन्नत्ता गोयमा जहण्णेणं अंगुलासंखेज्जइभागं उक्कोसेणं बारसजोयणाइं छेवट्टसंघयणा हुंडसंठिया चत्तारि कसाया चत्तारि सण्णाओ तिण्णि लेसाओ दो इंदिया तओ समुग्धाया-वेयणा कसायामारणंतिया नोसण्णी असण्णी नपुंसगवेयगा पंच पज्जत्तीओ पंच अपज्जत्तीओ सम्मच्चिद्वीवि मिच्छादिद्वीवि नो सम्मामिच्छादिद्वीवि नो चक्खुदंसणी अचक्खुदंसणी नो ओहिदंसणी नो केवलदंसणी, ते णं भंते जीवा किं नाणी अन्नाणी गोयमा नाणीवि अन्नाणीवि जे नाणी ते नियमा दुन्नाणी तं जहा- आभिणिबोहियनाणि य सुयनाणि य जे अन्नाणी ते नियमा दुअन्नाणी-मइअन्नाणी य सुयअन्नाणी य नो मनजोगी वइजोगी कायजोगी सागरोवउत्तावि अनागरोवउत्तावि आहारो नियमा छद्दिसिं उववाओ तिरियमणुस्सेसु नेरइयदेवअसंखेज्जवासाउयवज्जेसु ठिती जहण्णेणं अंतोमुहुत्तं उक्कोसेणं बारस संवच्छराणि समोहयावि मरंति असमोहयावि मरंति कहिं गच्छति नेरइयदेवअसंखेज्जवा-साउयरवज्जेसु गच्छंति दुगइया दुआगइया परिता असंखेज्जा सेत्तं बेइंदिया ।

[३७] से किं तं तेइंदिया तेइंदिया अनेगविहा पन्नत्ता तं जहा- ओवइया रोहिणिया जाव हत्थिसौंडा जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तहेव जहा- बेइंदियाणं नवरं-सरीरोगाहणा उक्कोसेणं तिण्णि गाउयाइं तिण्णि इंदिया ठिती जहण्णेणं अंतोमुहुत्तं उक्कोसेणं एगूणपन्नराइंदियाइं सेसं तहेव दुगइया दुआगइया परित्ता असंखेज्जा पन्नत्ता से तं तेइंदिया ।

[३८] से किं तं चउरिंदिया चउरिंदिया अनेगविहा पन्नत्ता तं जहा- अंधिया पोत्तिया जाव गोमयकीडा जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जगा य तेसिं णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं चेव नवरं-सरीरोगाहणाउक्कोसेणं चत्तारि गाउयाइं इंदियाइं चत्तारि चक्खुदंसणी अचक्खुदंसणी ठिई उक्कोसेणं छम्मासा सेसं जहा तेइंदियाणं जाव असंखेज्जा पन्नत्ता से तं चउरिंदिया ।

[३९] से किं तं पंचेदिया पंचेदिया चउव्विहा पन्नत्ता तं जहा- नेरइया तिरिक्खजोणिया मणुस्सा देवा ।

[४०] से किं तं नेरइया नेरइया सत्तविहा पन्नत्ता तं जहा- रयणप्पभापुढविनेरइया जाव अहेसत्तमपुढविनेरइया ते समासओ दुविहा पन्नत्ता तं जहा- पज्जत्तगा य अपज्जत्तगा य तेसि णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा- वेउव्विए तेयए कम्मए तेसि णं भंते जीवाणं केमहालिया सरीरोगाहणा पन्नत्ता गोयमा दुविहा सरीरोगाहणा पन्नत्ता तं जहा- भवधारणिज्जा य उत्तरवेउव्विया य तत्थ णं जासा भवधारणिज्जासा जहण्णेणं अंगुलस्स असंखेज्जइभागं उक्कोसेणं पंचधणुसयाइं तत्थ णं जासा उत्तरवेउव्विया सा जहण्णेणं अंगुलस्स संखेज्जइभागं उक्कोसेणं धणुसहस्सं तेसि णं भंते जीवाणं सरीरा किंसंधयणी पन्नत्ता गोयमा छण्हं संघयणाणं असंघयणी-नेवढ्ढी नेव छिरा नेव ण्हारू नेव संघयणमत्थि जे पोग्गल अणिट्ठा अकंता अप्पिय असुभा अमणुण्णा अमणामा ते तेसिं संघतत्ताए परिणमंति तेसि णं भंते जीवाइणं सरीरा किंसंठिया पन्नत्ता गोयमा दुविहा पन्नत्ता तं जहा-

पडिवत्ति-१

भवधारणिज्जा य उत्तरवेउव्विया य तत्थ णं जेते भवधारणिज्जा ते हुंडसंठिया तत्थ णं जेते उत्तरवेउव्विया तेवि हुंडसंठिया पन्नत्ता चत्तारि कसाया चत्तारि सण्णाओ तिण्णि लेसाओ पंचइंदिया चत्तारि समुग्धाया आइल्ला सण्णीवि असण्णीवि नपुंसगवेया छप्पज्जत्तीओ छ अपज्जत्तीओ तिविहा दिट्ठी तिण्णि दंसणा नाणीवि अन्नाणीवि जे नाणी ते नियमा तिन्नाणी तं जहा- आभिणिबोहियणाणी सुयनाणी ओहिनाणी जे अन्नाणी ते अत्थेगइया दुअन्ना-णी अत्थेगइया तिअन्नाणी जे य दुअन्नाणी ते नियमा मइअन्नाणी सुयअन्नाणी य जे तिअन्ना-णी ते नियमा मइअन्नाणी य सुयअन्नाणी य विभंगनाणी य, तिविहे जोगे दुविहे उवओगे छद्दिसिं आहारो ओ-सण्णकारणं पडुच्च वण्णओ कालाइं जाव सव्वप्पणयाए आहारमाहारैति उववाओ तिरियमणुस्सेसु ठिती जहन्नेणं दसवाससहस्साइं उक्कसोणं तेत्तीससागरोवमाइं दुविहा मरंति उव्वट्ठणा भाणियव्वा जओ आगया नवरि संमुच्छिमेसु पडिसेहो दुगइया दुआगइया परित्ता असंखेज्जा पन्नत्ता समणाउसो से तं नेरइया ।

[४१] से किं तं पंचेदियतिरिक्खजोणिया पंचेदियतिरिक्खजोणिया दुविहा पन्नत्ता तं जहा- संमुच्छिपंचेदियतिरिक्खजोणिया य गब्भवक्कंतियपंचेदियतिरिक्खजोणिया य ।

[४२] से किं तं संमुच्छिमपंचेदियतिरिक्खजोणिया संमुच्छिमपंचेदियतिरिक्खजोणिया तिविहा पन्नत्ता तं जहा- जलयरा थलयरा खहयरा ।

[४३] से किं तं जलयरा जलयरा पंचविहा पन्नत्ता तं जहा- मच्छगा कच्छभा मगरा गाहा सुंसुमारा से किं तं मच्छा एवं जहा- पन्नवणाए जाव जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तेसि णं भंते जीवाणं कति सरीरगा पन्नत्ता गोयमा तओ सरीरगा पन्नत्ता तं जहा- ओरालिए तेयए कम्मए सरीरोगाहणा जहन्नेणं अंगुलस्स असंखेज्जइभागं उक्कोसेणं जोयणसहस्सं छेवट्ठसंघयणी हुंडसंठिया चत्तारि कसाया सण्णाओवि, लेसाओ तिण्णि इंदिया पंच, समुग्धाया तिण्णि, नो सण्णी असण्णी नपुंसगवेया पज्जत्तीओ अपज्जत्तीओ य पंच, दो दिट्ठीओ दो दंसणा दो नाणा दो अन्नाणा दुविहे जोगे दुविहे उवओगे, आहारो छद्दिसिं, उववाओ तिरियमणुस्सहिंतो न देवेहिंतो नो नेरइएहिंतो तिरिएहिंतो असंखेज्जवासाउयवज्जेहिंतो अकम्मभूमगअंतरदीवग असंखेज्जवा-

साउयवज्जेसु मणुस्सेसु ठिती जहन्नेणं अंतोमुहुत्तं उक्कोसेणं पुव्वकोडी मारणंतियसमुग्धाएणं दुविहावि मरंति अनंतरं उव्वट्ठित्ता कहिं नेरइएसुवि तिरिक्खजोणिएसुवि मणुस्सेसुवि देवेसुवि नेरइएसु रयणप्पहाए सेसेसु पडिसेहो तिरिएसु सव्वेसु उववज्जंति संखेज्जवासाउएसुवि असंखेज्जवासाउएसुवि चउप्पएसु पक्खीसुवि मणुस्सेसु सव्वेसु कम्मभूमिएसु नो अकम्मभूमिएसु अंतरदीवएसुवि संखेज्जवासाउएसुवि असंखेज्जवासाउएसुवि पज्जत्तएसुवि अपज्जत्तएसुवि देवेसु जाव वाणमंतरा चउगइया दुआगइया परित्ता असंखेज्जा पन्नत्ता से तं जलयर-संमुच्छिपंचेदिय-तिरिक्खजोणिया ।

[४४] से किं तं थलयरसंमुच्छिम पंचेदियतिरिक्खजोणिया थलयरसंमुच्छिमपंचेदियतिरिक्ख-जोणिया दुविहा पन्नत्ता तं जहा- चउप्पयथलयरसंमुच्छिमपंचेदियतिरिक्खजोणिया परिसप्पसंमुच्छिमपंचे-दियतिरिक्खजोणिया से किं तं चउप्पयथलयरसंमुच्छिमपंचेदियतिरिक्खजोणिया चउप्पयथलयरसंमुच्छिम-पंचेदियतिरिक्खजोणिया चउव्विहा पन्नत्ता तं जहा- एगखुरा दुखुरा गंडीपया सणप्फया जाव जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तओ सरीरगा ओगाहणा जहन्नेणं अंगुलस्स असंखेज्जइभागं उक्कोसेणं गाउयपुहत्तं ठिती जहन्नेणं अंतोमुहुत्तं उक्कोसेणं चउरासीइ-

पडिवत्ति-१

वाससहस्साइं सेसं जहा- जलयराणं जाव चउगतिया दुआगतिया परित्ता असंखेज्जा पन्नत्ता सेत्तं चउप्पय-थलयरसंमुच्छिमपंचेदियतिरिक्खजोणिया से किं तं थलयरपरिसप्पसंमुच्छिमा थलयरपरिसप्पसंमुच्छिमा दुविहा पन्नत्ता तं जहा- उरपरिसप्प-संमुच्छिमा भुयपरिसप्पसंमुच्छिमा से किं तं उरपरिसप्पसंमुच्छिमा उरपरिसप्पसंमुच्छिमा चउव्विहा पन्नत्ता तं जहा- अही अयगरा आसालिया महोरगा से किं तं अही, अही दुविहा पन्नत्ता तं जहा- दव्वीकरा य मउलिणो य से किं तं दव्वीकरा दव्वीकरा अनेगविहा पन्नत्ता तं जहा- आसिविसा जाव सेत्तं दव्वीकरा से किं तं मउलिणो मउलिणो अनेगविहा पन्नत्ता तं जहा- दिव्वा गोणसा जाव से तं मउलिणो सेत्तं अही से किं तं अयगरा अयगरा एगागारा पन्नत्ता से तं अयगरा से किं तं आसालिया आसालिया जहा- पन्नवणाए ।

से किं तं महोरगा [महोरगा जहा- पन्नवणाए से तं महोरगा] जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तं चेव नवरि-सरीरोगाहणा जहन्नेणं अंगुलस्स असंखेज्जइभागं उक्कोसेणं जोयणपुहत्तं ठिती जहन्नेणं अंतोमुहुत्तं उक्कोसेणं तेवण्णं वाससह-स्साइं सेसं जहा- जलयराणं जाव चउगतिया दुआगतिया परित्ता असंखेज्जा से तं उरपरिसप्पा से किं तं भुयपरिसप्प-संमुच्छिमथलयरा भुयपरिसप्पसंमुच्छिमथलयरा अनेगविहा पन्नत्ता तं जहा- गोहा नउला जाव जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य सरीरोगाहणा जहन्नेणं अंगुलस्स असंखेज्जइभागं उक्कोसेणं धणुपुहत्तं ठिती उक्कोसेणं बाया-लीसं वाससहस्साइं सेसं जहा- जलयराणं जाव चउगतिया दुआगतिया परित्ता असंखेज्जा पन्नत्ता से तं भुयपरिसप्पसंमुच्छिमा से तं थलयरा, से किं तं खहयरा खहयरा चउव्विहा पन्नत्त तं जहा-चम्म-पक्खी लोमपक्खी समुग्गपक्खी विततपक्खी से किं तं चम्मपक्खी चम्मपक्खी अनेगविहा पन्नत्त तं जहा-वग्गुली जाव जे यावण्णे तहप्पगारा से तं चम्मपक्खी, से किं तं लोमपक्खी लोमपक्खी अनेगविहा पन्नत्ता तं जहा- ढंका जाव जे यावण्णे तहप्पगारा से तं लोमपक्खी, से किं तं समुग्गपक्खी समुग्ग-पक्खी एगागारा पन्नत्ता जहा- पन्नवणाए एवं विततपक्खी जाव जे यावण्णे तहप्पगारा ते समासओ

दुविहा पन्नत्ता तं जहा- पज्जत्तगा य अपज्जत्तगा य नाणत्तं सरीरोगाहणा जहन्नेणं अंगुलस्स असंखेज्ज-इभागं उक्कोसेणं धणुपुहत्तं ठिती उक्कोसेणं बावत्तरिं वाससहस्साइं सेसं जहा जलय-राणं जाव चउगतिया दुआगतिया परित्ता असंखेज्जा पन्नत्ता से तं खहयरसंमुच्छिमतिरिक्खजोणिया से तं संमुच्छिपंचेदियतिरिक्खजोणिया ।

[४५] से किं तं गब्भवक्कंतियपंचेदियतिरिक्खजोणिया गब्भवक्कंतियपंचेदियतिरिक्खजोणि-या तिविहा पन्नत्ता तं जहा- जलयरा थलयरा खहयरा ।

[४६] से किं तं जलयरा जलयरा पंचविहा पन्नत्ता तं जहा- मच्छा कच्छभा मगरा गाहा सुंसुमारा सव्वेसिं भेदो भाणियव्वो तहेव जहा- पन्नवणाए जाव जे यावण्णे तहप्पगारा ते समासओ दुविहा पन्नत्ता तं जहा- पज्जत्तगा य अपज्जत्तगा य तेसिं णं भंते जीवाणं कति सरीरगा पन्नत्ता गोयमा चत्तारि सरीरगा पन्नत्ता तं जहा- ओरालिए वेउव्विए तेयए कम्मए सरीरोगाहणा जहन्नेणं अंगुलस्स असंखेज्ज-इभागं उक्कोसेणं जोयणसहस्सं छव्विहसंघयणी पन्नत्ता तं जहा- वइरोसभनारायसंघयणी उसभनाराय-संघयणी नारायसंघयणी अद्धनारायसंघयणी किलियासंघयणी छेवइसंघयणी छव्विहसंठिया पन्नत्ता तं जहा- समचउरंससंठिया नग्गोहपरिमंडले साति खुज्जे वामणे हुंडे चत्तारि कसाया चत्तारि सण्णाओ छ लेस्साओ, पंच इंदिया पंच समुग्धाया आइल्ला सण्मी नो असण्णी तिविहवेया छपज्जत्तीओ छअपज्जत्तीओ पडिवत्ति-१

दिट्ठी तिविहावि तिण्णि दंसणा नाणीवि अन्नाणीवि-जे नाणी ते अत्थेगइया दुन्नाणी अत्थेगइया तिन्नाणी जे दुन्नाणी ते नियमा आभिणिबोहियनाणी य सुयनाणी ये जे तिन्नाणी ते नियमा आभिणि-बोहियनाणी सुयनाणी ओहिनाणी य एवं अन्नाणीवि, जोगे तिविहे उवओगे दुविहे आहारो छदिसिं उववाओ नेरइएहिं जाव अहेसत्तमा तिरिक्खजोणिएसु सव्वेसु असंखेज्जवासाउयवज्जेसु मणुस्सेसु अकम्मभूमग-अंतरदीवग-असंखेज्जवासाउवज्जेसु देवेसु जाव सहस्सारो ठिती जहण्णेणं अंतोमुहुत्तं उक्कोसेणं पुव्वकोडी दुविहावि मरंति अनंतरं उव्वट्ठित्ता नेरइएसु जाव अहेसत्तमा तिरिक्खजोणिएसु मणुस्सेसु सव्वेसु देवेसु जाव सहस्सारो चउगतिया चउआगतिया परित्ता असंखेज्जा पन्नत्ता से तं जलयरा ।

[४७] से किं तं थलयरा थलयरा दुविहा पन्नत्ता तं जहा- चउप्पया य परिसप्पा य से किं तं चउप्पया चउप्पया चउव्विहा पन्नत्ता तं जहा- एगखुरा सो चेव भेदो जाव जे यावण्णे ते समासओ दुविहा पन्नत्ता तं जहा- पज्जत्तगा य अपज्जत्तगा य चत्तारि सरीरा ओगाहणा जहन्नेणं अंगुलस्स असं-खेज्ज-इभागं उक्कोसेणं छ गाउयाइं ठिती जहन्नेणं अंतोमुहुत्तं उक्कोसेणं तिण्णि पलिओवमाइं नवरं-उव्वट्ठित्ता नेरइएसु चउत्थपुढविं ताव गच्छंति सेसं जहा जलयराणं जाव चउगतिया चउआगतिया परित्ता असंखिज्जा पन्नत्ता से तं चउप्पया से किं तं परिसप्पा परिसप्पा दुविहा पन्नत्ता तं जहा- उरपरिसप्पा य भुयपरिसप्पा य से किं तं उरपरिसप्पा उरपरिसप्पा तहेव आसालियवज्जो भेदो भाणियव्वो सरीरा चत्तारि ओगाहणा जहन्नेणं अंगुलस्स असंखेज्ज-इभागं उक्कोसेणं जोयणसहस्सं ठिती जहन्नेणं अंतोमुहुत्तं उक्कोसेणं पुव्वकोडी उव्वट्ठित्ता नेरइएसु जाव पंचमं पुढविं ताव गच्छंति तिरिक्खमणुस्सेसु सव्वेसु देवेसु जाव सहस्सारो सेसं जहा- जलयराणं जाव चउगतिया चउआगतिया परित्ता असंखेज्जा से तं उरपरिसप्पा से किं तं भुयपरिसप्पा भुयपरिसप्पा भेदो तहेव चत्तारि सरीरा ओगाहणा जहन्नेणं अंगुलस्स असंखेज्ज-इ-

भागं उक्कोसेणं गाउयपुहत्तं ठिती जहन्नेणं अंतोमुहत्तं उक्कोसेणं पुव्वकोडी सेसेसु ठाणेसु जहा- उरपरि- सप्पा नवरं-दोच्चं पुढविं गच्छंति से तं भुयपरिसप्पा से तं थलयरा ।

[४८] से किं तं खहयरा खहयरा चउव्विहा पन्नत्ता तं जहा- चम्मपक्खी तहेव भेदो ओगाहणा जहन्नेणं अंगुलस्स असंखेज्जइभागं उक्कोसेणं धणुपुहत्तं ठिती जहन्नेणं अंतोमुहत्तं उक्कोसेणं पलिओवमस्स असंखेज्जइभागो सेसं जहा- जलयराणं नवरं-तच्चं पुढविं गच्छंति जाव से तं खहयरगब्भ- वक्कंतियपंचेंदियतिरिक्खजोणिया से तं तिरिक्खजोणिया ।

[४९] से किं तं मणुस्सा मणुस्सा दुविहा पन्नत्ता तं जहा- संमुच्छिममणुस्सा य गब्भवक्कंतियमणुस्सा य कहि णं भंते संमुच्छिममणुस्सा संमुच्छंति गोयमा अंतो मणुस्सखेत्तो जाव अंतोमुहत्ताउया चेव कालं करंति तेसिं णं भंते जीवाणं कति सरीरगा पन्नत्ता गोयमा तिण्णि सरीरगा पन्नत्ता तं जहा- ओरालिए तेयए कम्मए संघयण-संठाण-कसाय-सण्णा-लेसा जहा बेइंदियाणंइंदिया पंच समुग्धाया तिण्णि असण्णी नंपुसगा अपज्जत्तीओ पंच, दिट्ठि दंसण-अन्नाण-जोग-उवओगा जहा- पुढविकाइयाणं आधारो जहा- बेइंदियाणं उववातो नेरइय-देव-तेउ-वाउ-असंखाउवज्जो अंतोमुहत्तं ठिती समोहतावि असमोहतावि मरंति कहिं गच्छंति नेरइय-देव-असंखेज्जाउवज्जेसु दुआगतिया दुगतिया परित्ता असंखेज्जा पन्नत्ता समणाउसो से तं संमुच्छिममणुस्सा से किं तं गब्भवक्कंतियमणुस्सा गब्भवक्कंतिय- मणुस्सा तिविहा पन्नत्ता तं जहा- कम्मभूमगा अकम्मभूमगा अंतरदीवगा एवं मणुस्सभेदो भाणियव्वो हा- पन्नवणाए जाव छउमत्था य केवली य ते समासओ दुविहा पन्नत्ता तं जहा- पज्जत्तगा य अपज्जत्तगा य पडिवत्ति-१

तेसिं णं भंते जीवाणं कति सरीरगा पन्नत्ता गोयमा पंच सरीरगा पन्नत्ता तं जहा- ओरालिए जाव कम्मए सरीरोगाहणा जहन्नेणं अंगुलस्स असंखेज्जइभागं उक्कोसेणं तिण्णि गाउयाइं छच्चेव संघयणी छच्चेव संठिया ते णं भंते जीवा किं कोहकसाई जाव लोभकवासाई अकसाई गोयमा सव्वेवि ते णं भंते जीवा किं आहारसण्णोवउत्ता जाव नोसण्णोवउत्ता गोयमा सव्वेवि ।

ते णं भंते जीवा किं कण्हलेसा जाव अलेसा गोयमा सव्वेवि सोइंदियवउत्ता जाव नोइंदियव-उत्तावि सत्त समुग्धाया तं जहा- वेयणासमुग्धाए जाव केवलिसमुग्धाए सण्णीवि नोसण्मीनोअसण्णीवि इत्थियवेयावि जाव अवेयावि पंच पज्जत्ती पंच अपज्जत्ती तिविहावि दिट्ठी चत्तारि दंसणा नाणीवि अन्नाणीवि-जे नाणी ते अत्थेगतिया दुनाणी अत्थेगतिया तिनाणी अत्थेगतिया चउनाणी अत्थेगतिया एगणाणी जे दुन्नाणी ते नियमा आभिणिबोहियनाणी सुयनाणी य जे तिन्नाणी ते आभिणिबोहियनाणी सुयनाणी ओहिनाणी य अहवा आभिणिबोहियनाणि मणपज्जवनाणी य जे एगनाणी ते नियमा केवलनाणी एवं अन्नाणीवि दुअन्नाणी तिअन्नाणी मणजोगीवि वइकायजोगीवि अजोगीवि दुविहे उवओगे आहारो छद्दिसिं उववाओ अहेसत्तम-तेउवाउअसंखेज्जवासाउयवज्जेहि ठिती जहण्णेणं अंतोमुहत्तं उक्कोसेणं तिण्णि पलिओवमाइं दुविहावि मरंति उव्वट्ठित्ता नेरइयाइसु जाव अनुत्तरोववाइसु अत्थेगतिया सिज्झंति बुज्झंति मुच्चंति परिनिव्वायंति सव्वदुक्खाणं अंतं करंति ते णं भंते जीवा कतिगतिया कतिआगतिया पन्नत्ता गोयमा पंचगिताय चउआगतिया परित्ता संखेज्जा पन्नत्ता सेत्तं मणुस्सा ।

[५०] से किं तं देवा देवा चउव्विहा पन्नत्ता तं जहा- भवणवासी वाणमंतरा जोइसिया वेमाणिया एवं भंदो भाणियव्वो जहा- पन्नवणाए ते समासओ दुविहा पन्नत्ता तं जहा- पज्जत्तगा य

अपज्जत्तगा य तेसि णं तओ सरीरगा-वेउव्विए तेयए कम्मए ओगाहणा दुविहा-भवधारणिज्जा य उत्तरवेउव्विया य तत्थ णं जासा भवधारणिज्जा सा जहन्नेणं अंगुलस्स असंखेज्जइभागं उक्कोसेणं सत्त रयणीओ तत्थ णं जासा उत्तरवेउव्विया सा जहन्नेणं अंगुलस्स संखेज्जइभागं उक्कोसेणं जोयणसयसहस्सं सरीरगा छण्हं संघयणाणं असंघयणी-नेवट्ठी नेव छिरा नेव ण्हारू जे पोग्गला इट्ठा कंता पिया सुभा मणुण्णा मणामा ते तेसिं सरीरसंघायत्ताए परिणमंति किंसंठिया गोयमा दुविहा पन्नत्ता तं जहा- भवधारणिज्जा य उत्तरवेउव्विया य तत्थ णं जेते भवधारणिज्जा ते णं समचउरंस संठिया पन्नत्ता तत्थ णं जेते उत्तरवेउव्विया ते णं नाणासंठाणसंठिया पन्नत्ता चत्तारि कसाया चत्तारि सण्णा छ लेस्साओ पंच इंदिया पंच समुग्धाया सण्णीवि असण्णीवि इत्थिवेदावि पुरिसवेदावि नो नपुंसगवेया पज्जत्तीओ अपज्जत्तीओ पंच, दिट्ठी तिण्णि, तिण्णि दंसणा नाणीवि अन्नाणीवि-जे नाणी ते नियमा तिन्नाणी अन्नाणी भयणाए, दुविहे उवओगे तिविहे जोगे आहारो नियमा छदिसिं ओसण्णकारणं पडुच्च वण्णओ हालिदसुक्किलाइं जाव आहारमाहारंति उववाओ तिरियमणुस्सेसु ठिती जहन्नेणं दस वाससहस्साइं उक्कोसेणं तेत्तीसं सागरोवमाइं दुविहावि मरंति उव्वट्ठित्ता नो नेरइएसु गच्छंति तिरियमणुस्सेसु जहासंभवं नो देवेसु गच्छंति दुगतिया दागतिया परित्ता असंखेज्जा पन्नत्ता से तं देवा से तं पंचेदिया सेत्तं ओराला तसा पाणा ।

[५१] थावरस्स णं भंते केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेणं बावीसं वाससहस्साइं ठिती पन्नत्ता तसस्स णं भंते केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेणं तेत्तीसं सागरोवमाइं ठिती पन्नत्ता थावरे णं भंते थावरेत्ति कालओ केवच्चिरं होइ पडिवत्ति-१

गोयमा जहन्नेणं अंतोमुहुत्तं उक्कोसेणं अनंतं कालं-अनंताओ उस्सप्पिणीओ ओसप्पिणीओ कालओ खेत्तओ अनंता लोया असंखेज्जा पुग्गलपरियट्ठा ते णं पुग्गलपरियट्ठा आवलियाए असंखेज्जइभागो तसे णं भंते तसेत्ति कालओ केवच्चिरं होइ गोयमा जहन्नेणं अंतोमुहुत्तं उक्कोसेणं असंखेज्जं कालं-असंखेज्जाओ उस्सप्पिणीओ ओसप्पिणीओ कालओ खेत्तओ असंखेज्जा लोगा थावरस्स णं भंते केवइकालं अंतरं होइ गोयमा जहा- तससंचिट्ठणाए तसस्स णं भंते केवइकालं अंतरं होइ गोयमा जहन्नेणं अंतोमुहुत्तं उक्कोसेणं वणस्सइकालो एएसि णं भंते तसाणं थावराण य कयरे कयरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा तसा थावरा अनंतगुणा से तं दुविहा संसारसमावण्णगा जीवा पन्नत्ता ।

◦ पढमा पडिवत्ती समत्ता ◦

◦ मुनि दीपरत्नसागरेण संशोधिताः सम्पादिताश्च पढमा पडिवत्ति समत्ता ◦

॥ दोच्चा पडिवती-तिविहपडिवति ॥

[५२] तत्थ जेते एवमाहंसु तिविहा संसारसमावण्णगा जीवा पन्नत्ता ते एवमाहंसु तं जहा- इत्थी पुरिसा नपुंसगा ।

[५३] से किं तं इत्थीओ, इत्थीओ तिविहाओ पन्नत्ताओ तं जहा- तिरिक्खजोणित्थीओ मणुस्सित्थीओ देवित्थीओ से किं तं तिरिक्खजोणित्थीओ तिरिक्खजोणित्थीओ तिविहाओ पन्नत्ताओ तं

जहा- जलयरीओ थलयरीओ खहयरीओ, से किं तं जलयरीओ जलयरीओ पंचविहाओ पन्नत्ताओ तं जहा- मच्छीओ जाव सुंसुमारीओ से तं जलयरीओ से किं तं थलयरीओ थलयरीओ दुविहाओ पन्नत्ताओ तं जहा- चउप्पईओ य परिसप्पीओ य से किं तं चउप्पईओ चउप्पईओ चउव्विहाओ पन्नत्ताओ तं जहा- एगखुरीओ जाव सणप्फईओ से तं चउप्पयथलयरतिरिक्खजोणित्थीओ से किं तं परिसप्पीओ परिसप्पीओ दुविहाओ पन्नत्ताओ तं जहा- उरपरिसप्पीओ य भुयपरिसप्पीओ य से किं तं उरपरिसप्पीओ उरपरिसप्पीओ तिक्खिहाओ पन्नत्ताओ तं जहा अहीओ अयगरीओ महोरगीओ य सेत्तं उरपरिसप्पीओ से किं तं भुयपरि-सप्पीओ भुयपरिसप्पीओ अनेगविहाओ पन्नत्ताओ तं जहा- गोहीओ नउलीओ सेधाओ सल्लीओ सरडीओ सरंधीओ साराओ खाराओ पवलाइयाओ चउप्पइयाओ मूसियाओ मुगुंसियाओ घरोलियाओ जाहियओ छीरबिरालियाओ सेत्तं भुयपरिसप्पीओ से किं तं खहयरीओ खहयरीओ चउव्विहाओ पन्नत्ताओ तं जहा- चम्मपक्खीओ जाव विततपक्खीओ सेत्तं खहयरीओ सेत्तं तिरिक्खजोणित्थीओ ।

से किं तं मणुस्सित्थियाओ मणुस्सित्थियाओ तिक्खिहाओ पन्नत्ताओ तं जहा- कम्मभूमयाओ अकम्मभूमियाओ अंतरदीवियाओ से किं तं अंतरदीवियाओ अंतरदीवियाओ अट्ठावीसइविहाओ पन्नत्ताओ तं जहा- एगूरुइयाओ आभासियाओ जाव सुद्धदंताओ सेत्तं अंतरदीवियाओ से किं तं अकम्मभूमियाओ अकम्मभूमियाओ तीसतिविहाओ पन्नत्ताओ तं जहा- पंचसु हेमवएसु पंचसु एरण्णवएसु पंचसु हरिवासेसु पंचसु रम्मगवासेसु पंचसु देवकुरासु पंचसु उत्तरकुसारं सेत्तं अकम्मभूमियाओ से किं तं कम्मभूमियाओ कम्मभूमियाओ पन्नरसविहाओ पन्नत्ताओ तं जहा- पंचसु भरहेसु पंचसु एरवएसु पंचसु महाविदेहेसु सेत्तं कम्मभूमगमणुस्सित्थीओ सेत्तं मणुस्सित्तीओ, से किं तं देवित्थियाओ देवित्थियाओ चउव्विहाओ पन्नत्ताओ तं जहाभवणवासिदेवित्थियाओ वाणमंतरदेवित्थियाओ जोइसियदेवित्थियाओ वेमाणियदेवित्थियाओ से किं तं भवणवासिदेवित्थियाओ भवणवासिदेवित्थियाओ दसविहाओ पन्नत्ताओ तं जहा- असुरकुमारभवणासिदे-
पडिवत्ति-२

वित्थियाओ जाव थणियकुमारभवणवासिदेवित्थियाओ से तं भवणवासिदेवित्थियाओ से किं तं वाणमंतरदे-
वित्थियाओ वाणमंतरदेवित्थियाओ अट्ठविहाओ पन्नत्ताओ तं जहा- पिसायवाणमंतरदेवित्थियाओ जाव गंधव्ववाणमंतरदेवित्थियाओ से तं वाणमंतरदेवित्थियाओ से किं तं जोइसियदेवित्थियाओ जोइसियदे-
वित्थियाओ पंचविहाओ पन्नत्ताओ तं जहा- चंदविमाणजोइसियदेवित्थियाओ सूर-गह-नक्खत-ताराविमाण-
जोइसिय देवित्थियाओ सेत्तं जोइसियदेवित्थियाओ से किं तं वेमाणियदेवित्थियाओ वेमाणियदेवित्थियाओ
दुविहाओ पन्नत्ताओ तं जहा- सोहम्मकप्पवेमाणियदेवित्थियाओ ईसाम-कप्पवेमाणियदेवित्थियाओ सेत्तं
वेमाणिय-देवित्थायाओ ।

[५४] इत्थीणं भंते केवतियं कालं ठिती पन्नत्ता गोयमा एगेणं आदेसेमं-जहन्नेणं
अंतोमुहुत्तं उक्कोसेणं पणपन्नं पलिओवमाइं एक्केणं आदेसेण-जहन्नेणं अंतोमुहुत्तं उक्कोसेणं नव
पलिओवमाइं एगेणं आदेसेणं जहण्णेणं अंतोमुहुत्तं उक्कोसेणं सत्त पलिओवमाइं एगेणं आदेसेणं-जहन्नेणं
अंतोमुहुत्तं उक्कोसेणं पन्नासं पलिओवमाइं ।

[५५] तिरिक्खजोणित्थीणं भंते केवतियं कालं ठिती पन्नत्ता गोयमा जहन्नेणं अंतोमुहुत्तं
उक्कोसेणं तिण्णि पलिओवमाइं जलयरतिरिक्खजोणित्थीणं भंते केवतियं कालं ठिती पन्नत्ता गोयमा
जहन्नेणं अंतोमुहुत्तं उक्कोसेणं पुव्वकोडी चउप्पयथलयरतिरिक्खजोणित्थीणं भंते केवतियं कालं ठिती

पन्नत्ता गोयमा जहा तिरिक्खजोणित्थीओ, उरपरिसप्पथलयरतिरिक्खजोणित्थीणं भंते केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेणं पुव्वकोडी एवं भुयपरिसप्पतिरिक्खजोणित्थीओ एवं खहयरतिरिक्खत्थीणं जहन्नेणं अंतोमुहुत्तं उक्कोसेणं पलिओवमस्स असंखेज्जइभागो मणुस्सित्थीणं भंते केवतियं कालं ठिती पन्नत्ता गोयमा खेत्तं पडुच्च जहन्नेणं अंतोमुहुत्तं उक्कोसेणं तिण्णि पलिओवमाइं धम्मचरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी कम्मभूमयमणुस्सित्थीणं भंते केवतियं कालं ठिती पन्नत्ता गोयमा खेत्तं पडुच्च जहन्नेणं अंतोमुहुत्तं उक्कोसेणं तिण्णि पलिओवमाइं धम्मचरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी भरहेरवयकम्मभूमगमणुस्सित्थीणं भंते केवतियं कालं ठिती पन्नत्ता गोयमा खेत्तं पडुच्च जहन्नेणं अंतोमुहुत्तं उक्कोसेणं तिण्णि पलिओवमाइं धम्मचरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी, पुव्वविदेहअवरविदेहकम्मभूमगमणुस्सित्थीणं भंते केवतियं कालं ठिती पन्नत्ता गोयमा खेत्तं पडुच्च जहन्नेणं अंतोमुहुत्तं उक्कोसेणं पुव्वकोडी धम्मचरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी, अकम्मभूमगमणुस्सित्थीणं भंते केवतियं कालं ठिती पन्नत्ता गोयमा जम्मणं पडुच्च जहन्नेणं देसूणं पलिओवमं पलिओवमस्स असंखेज्जइभागेणं ऊणगं उक्कोसेणं पलिओवमं सहरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी, हरिवासरम्मगवास-अकम्मभूमगमणुस्सित्थीणं भंते केवतियं कालं ठिती पन्नत्ता गोयमा जम्मणं पडुच्च जहन्नेणं देसूणाइं दो पलिओवमाइं पलिओवमस्स असंखेज्जइभागेणं ऊणयाइं उक्कोसेणं दो पलिवओवमाइं सहरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी ।

देवकुरुउत्तरकुरुकम्मभूमगमणुस्सित्थीणं भंते केवतियं कालं ठिती पन्नत्ता गोयमा जम्मणं पडुच्च जहन्नेणं देसूणाइं तिण्णि पलिओवमाइं पलिओवमस्स असंखेज्जइभागेणं ऊणयाइं उक्कोसेणं तिण्णि पलिओवमाइं सहरणं पडुच्च जहन्नेणं अंतोमुहुत्तं उक्कोसेणं देसूणा पुव्वकोडी, अंतरदीवगअकम्म-भूमगमणुस्सित्थीणं भंते केवतियं कालं ठिती पन्नत्ता गोयमा जम्मणं पडुच्च जहन्नेणं देसूणं पलिओव-पडिवत्ति-२

मस्स असंखेज्जइभागं पलिओवमस्स असंखेज्जइभागेणं ऊणयं उक्कोसेणं पलिओवमस्स असंखेज्जइभागं सहरणं पडुच्चजहन्नेणं अंतोमुहुत्तं उक्कोसेणं देसूणा पुव्वकोडी, देवित्थीणं भंते केवतियं कालं ठिती पन्नत्ता गोयमा जहन्नेणं दसवाससहस्साइं उक्कोसेणं पणपन्नं पलिओवमाइं, भवणवासिदेवित्थीणं भंते केवतियं कालं ठिती पन्नत्ता गोयमा जहन्नेणं दसवाससहस्साइं उक्कोसेणं अद्धपंचमाइं पलिओवमाइं एवं असुर-कुमारभवणवासिदेवित्थियाए नागकुमार-भवणवासिदेवित्थियाए जहन्नेणं दसवाससहस्साइं उक्कोसेणं देसूणाइं पलिवओमाइं एवं सेसाणवि जाव थणियकुमारीणं वाणमंतरीणं जहन्नेणं दसवाससहस्साइं उक्कोसेणं अद्धपलिओवमं जोइसियदेवित्थीणं भंते केवतियं कालं ठिती पन्नत्ता गोयमा जहन्नेणं अद्धभाग-पलिओवमं उक्कोसेणं अद्धपलिओवमं पन्नासाए वाससहस्सेहिं अब्भहियं चंदविमाणजोइसियदेवित्थीणं जहन्नेणं चउभागपलिओवमं उक्कोसेणं तं चेव, सूरिविमाणजोइसियदेवित्थीणं जहन्नेणं चउभागपलिओवमं उक्कोसेणं अद्धपलिओवमं पंचहिं वाससएहिमब्भहियं गहविमाणजोइसियदेवित्थीणं जहन्नेणं चउभाग-पलिओवमं उक्कोसेणं चउभागपलिओवमं सातिरेगं तारा-विमाणजोइसियदेवित्थीणं जहन्नेणं अद्धभाग-पलिओवमं उक्कोसेणं सातिरेगं अद्धभागपलिओवमं वेमाणियदेवित्थीणं जहन्नेणं पलिओवम उक्कोसेणं पणपन्नं पलिओवमाइं सोहम्मकप्पवेमाणिय-देवित्थीणं भंते केवतियं कालं ठिती पन्नत्ता गोयमा जहन्नेणं

पलिओवमं उक्कोसेणं सत्त पलिओवमाइं ईसामदेवित्थीणं जहण्णेणं सातिरेगं पलिओवमं उक्कोसेणं नव पलिओवमाइं ।

[५६] इत्थी णं भंते इत्थित्ति कालओ केवच्चिरं होइ गोयमा एक्केणादेसेण-जहन्नेणं एक्कं समयं उक्कोसेणं दसुत्तरं पलिओवमसयं पुव्वकोडिपुहत्तमब्भहियं एक्केणादेसेण-जहन्नेणं एक्कं समयं उक्कोसेणंअद्वारस पलिओवमाइं पुव्वकोडीपुहत्तमब्भहियाइं एक्केणादेसेण-जहन्नेणं एक्कं समयं उक्कोसेणं चउद्दस पलिओवमाइं पुव्वकोडिपुहत्तमब्भहियाइं एक्केणादेसेणजहन्नेणं एक्कं समयं उक्कोसेणं पलिओवमसयं पुव्वकोडीपुहत्तमब्भहियं एक्केणादेसेण-जहण्णेणं एक्कं समयं उक्कोसेणं पलिओवमपुहत्तं पुव्वकोडीपुहत्तमब्भहियं, तिरिक्खजोणित्थी णं भंते तिरिक्खजोणित्थित्ति कालओ केवच्चिरं होइ गोयमा जहन्नेणं अंतोमुहुत्तं उक्कोसेणं तिण्णि पलिओवमाइं पुव्वकोडीपुहत्तमब्भहियाइं जलयरीए जहण्णेणं अंतोमुहुत्तं उक्कोसेणं पुव्वकोडीपुहत्तं चउप्पयथलयरीए जहा ओहियाए उरपरिसप्पि-भुयपरिसप्पित्थीणं जहा जलयरीणं खहयरीए जहण्णेणं अंतोमुहुत्तं उक्कोसेणं पलिओवमस्स असंखेज्जइभागेणं पुव्वकोडिपुहत्तमब्भहियं मणुस्सित्थी णं भंते कालओ केवच्चिरं होइ गोयमा खेत्तं पडुच्च जहण्णेणं अंतोमुहुत्तं उक्कोसेणं तिण्णि पलिओवमाइं पुव्वकोडीपुहत्तमब्भहियाइं धम्मचरणं पडुच्च जहण्णेणं एक्कं समयं उक्कोसेणं देसूणा पुव्वकोडी एवं कम्मभूमियावि भरहेरवयावि नवरं-खेत्तं पडुच्च जहण्णेणं एक्कं समयं उक्कोसेणं देसूणा पुव्वकोडी पुव्वविदेहेअवरविदेहित्थीणं खेत्तं पडुच्च जहन्नेणं अंतोमुहुत्तं उक्कोसेणं पुव्वकोडीपुहत्तं धम्मचरणं पडुच्च जहन्नेणं एक्कं समयं उक्कोसेणं देसूणा पुव्वकोडी अकम्मभूमिकमणुस्सित्थी णं भंते अकम्मभूमि-कमणुस्सित्थित्ति कालओ केवच्चिरं होइ गोयमा जम्मणं पडुच्च जहण्णेणं देसूणं पलिओवमं पलिओवमस्स असंखेज्जइभागेणं ऊणं उक्कोसेणं तिण्णि पलिओवमाइं संहरणं पडुच्च जहण्णेणं अंतोमुहुत्तं उक्कोसेणं-तिण्णि पलिओवमाइं देसूणाए पुव्वकोडीए अब्भहियाइं ।

हेमवएरण्णवए अकम्मभूमिकमणुस्सित्थी णं भंते हेमवएरण्णवए अकम्मभूमिकमणुस्सित्थित्ति कालओ केवच्चिरं होइ गोयमा जम्मणं पडुच्च जहन्नेणं देसूणं पलिओवमं पलिओवमस्स असं-पडिवत्ति-२

खेज्जइभागेणं ऊणगं उक्कोसेणं पलिओवमं संहरणं पडुच्च जहन्नेणं अंतोमुहुत्तं उक्कोसेणं पलिओवमं देसूणाए पुव्वकोडीए अब्भहियं हरिवासरम्मगवास अकम्मभूमिगमणुस्सित्थी णं भंते हरिवासरम्मगवास-अकम्मभूमिगमणुस्सित्थित्ति कालओ केवच्चिरं होइ गोयमा जम्मणं पडुच्च जहन्नेणं देसूणाइं दो पलिओमाइं पलिओवमस्स असंखेज्जइभागेणं ऊणगाइं उक्कोसेणं दो पविओवमाइं संहरणं पडुच्च जहण्णेणं अंतोमुहुत्तं दो पलिओवमाइं देसूणपुव्वकोडिमब्भहियाइं उत्तरकुरुदेवकुरुअकम्मभूमिगमणुस्सित्थी णं भंते उत्तरकुरुदेवकुरु अकम्मभूमिगमणुस्सित्थित्ति कालओ केवच्चिरं होइ गोयमा जम्मं पडुच्च जहण्णेणं देसूणाइं तिण्णि पलिओवमाइं पलिओवमस्स असंखेज्जइभागेणं ऊणगाइं उक्कोसेणं तिण्णि पलिओवमाइं संहरणं पडुच्च जहन्नेणं अंतोमुहुत्तं उक्कोसेणं तिण्णि पलिओवमाइं देसूणाए पुव्वकोडीए अब्भहियाइं अंतर-दीवाकम्मभूमिग-मणुस्सित्थी णं भंते अंतरदीवाकम्मभूमिगमणुस्सित्थित्ति कालओ केवच्चिरं होइ गोयमा जम्मणं पडुच्च जहन्नेणं देसूणं पलिओवमस्स असंखेज्जइभागेणं पलिओवमस्स असंखेज्जइभागेणं ऊणं उक्कोसेणं पलिओवमस्स असंखेज्जइभागेणं संहरणं पडुच्च जहन्नेणं अंतोमुहुत्तं उक्कोसेणं पलिओवमस्स असंखेज्जइभागेणं देसूणाए पुव्वकोडीए अब्भहियं देवित्थीणं भंते देवित्थित्तिकालओ जच्चेवसंचिदुणा ।

[५७] इत्थीणं भंते केवतियं कालं अंतरं होइ गोयमा जहण्णेणं अंतोमुहुत्तं उक्कोसेणं अनंतं कालं-वणस्सइकालो एवं सव्वासिं तिरिक्खत्थीणं मणुस्सित्थीए खेत्तं पडुच्च जहण्णेणं अंतोमुहुत्तं उक्कोसेणं वणस्सइकालो धम्मचरणं पडुच्च जहण्णेणं एककं समयं उक्कोसेणं अनंतं कालं-जाव अवड्ढपोग्गलपरियट्ठं देसूणं एवं जाव पुव्वविदेहे-अवरविदेहियाओ अकम्मभूमिगमणुस्सित्थीणं भंते केवतियं कालं अंतरं होइ गोयमा जम्मणं पडुच्च जहण्णेणं दसवाससहस्साइं अंतोमुहुत्तमब्भहियाइं उक्कोसेणं वणस्सइकालो संहरणं पडुच्च जहण्णेणं अंतोमुहुत्तं उक्कोसेणं वणस्सइकालो एवं जाव अंतरदीवियाओ देवित्थियाणं सव्वासिं जहण्णेणं अंतोमुहुत्तं उक्कोसेणं वणस्सइकालो ।

[५८] एयासि णं भंते तिरिक्खजोणित्थियाणं मणुस्सित्थियाणं देवित्थियाणं य कतरा कतराहितो अप्पा वा बहुया वा तुल्ला वा विसेसाहिया वा गोयमा सव्वत्थोवाओ मणुस्सित्थियाओ तिरिक्खजोणियाओ असंखेज्जगुणाओ देवित्थियाओ असंखेज्जगुणाओ एयासि णं भंते तिरिक्खजोणित्थियाणं-जलयरीणं थलयरीणं खहयरीणं य कतरा कतराहितो अप्पा वा जाव विसेसाहिया वा गोयमा सव्वत्थोवाओ खहयरतिरिक्खजोणित्थियाओ थलयरतिरिक्खजोणित्थियाओ संखेज्जगुणाओ जलयरतिरिक्खजोणित्थियाओ संखेज्जगुणाओ एयासि णं भंते मणुस्सित्थीणं-कम्मभूमियाणं अकम्मभूमियाणं अंतरदीवियाणं य कतरा कतराहितो अप्पा वा जाव विसेसाहिया वा गोयमा सव्वत्थोवाओ अंतरदीवग अकम्मभूमिगमणुस्सि-त्थियाओ देवकुरुउत्तरकुरुअकम्मभूमिगमणुस्सित्थियाओ दोवि तुल्लाओ संखेज्जगुणाओ हरिवासरम्मगवास-अकम्मभूमिगमणुस्सित्थियाओ दोवि तुल्लाओ संखेज्जगुणाओ हेमवएरण्णवयअकम्मभूमिगमणुस्सि-त्थियाओ दोवि तुल्लाओ संखेज्जगुणाओ भरहेरवयकम्मभूमिगमणुस्सित्थियाओ दोवि तुल्लाओ संखेज्जगुणाओ पुव्वविदेहेअवरविदेहकम्मभूमिगमणुस्सित्थियाओ दोवि तुल्लाओ संखेज्जगुणाओ एयासि णं भंते देवित्थियाणंभवनवासिणीणं वाणमंतरीणं जोइसिणीणं वेमाणिणीणं य कतरा कतराहितो अप्पा वा जाव विसेसाहिया वा गोयमा सव्वत्थोवाओ वेमाणियदेवित्थियाओ भवनवासिदेवित्थियाओ असंखेज्जगुणाओ, वाणमंतरदेवित्थियाओ असंखेज्जगुणाओ जोइसियदेवित्थियाओ संखेज्जगुणाओ,

एयासि णं भंते तिरिक्खजोणित्थियाणं-जलयरीणं थलयरीणं खहयरीणं मणुस्सित्थियाणं-पडिवत्ति-२

कम्मभूमियाणं अकम्मभूमियाणं अंतरदीवियाणं देवित्थियाणं-भवनवासिणीणं वाणमंतरीणं जोइसिणीणं वेमाणिणीय कतरा कतराहितो अप्पा वा जाव विसेसाहिया वा गोयमा सव्वत्थोवाओ अंतरदीवगअकम्म-भूमिगमणुस्सित्थियाओ देवकुरुउत्तरकुरुअकम्मभूमिगमणुस्सि-त्थियाओ दोवि तुल्लाओ संखेज्जगुणाओ हरिवासरम्मगवासअकम्मभूमिगमणुस्सित्थियाओ दोवि तुल्लाओ संखेज्जगुणाओ हेमवएरण्णवयअकम्म-भूमिगमणुस्सित्थियाओ दोवि तुल्लाओ संखेज्जगुणाओ भरहेरवयकम्मभूमिगमणुस्सित्थियाओ दोवि तुल्लाओ संखेज्जगुणाओ पुव्वविदेहअवरवि-देहकम्मभूमिगमणुस्सित्थियाओ दोवि तुल्लाओ संखेज्जगुणाओ वेमाणियदेवित्थियाओ असंखेज्जगुणाओ भवणासेदेवित्थियाओ असंखेज्जगुणाओ खहयरतिरिक्खजोणि-त्थियाओ असंखेज्जगुणाओ थलयरतिरिक्खजोणित्थियाओ संखेज्जगुणाओ जलयरतिरिक्खजोणित्थियाओ संखेज्जगुणाओ वाणमंतरदेवित्थियाओ संखेज्जगुणाओ जोइसियदेवित्थियाओ संखेज्जगुणाओ ।

[५९] इत्थिवेदस्स णं भंते कम्मस्स केवतियं कालं बंधिती पन्नत्ता गोयमा जहन्नेणं सागरोवमस्स दिवड्ढो सत्तभागो पलिओवमस्स असंखेज्जइभागेणं ऊणो उक्कोसेणं पन्नरस

सागरोवमकोडा-कोडीओ पन्नरस वाससयाइं अबाहा अबाहूणिया कम्मठिती कम्मणिसेओ, इत्थिवेदे णं भंते किंपगारे पन्नत्ते गोयमा फुंफुअग्गिसमाणे पन्नत्ते सेत्तं इत्थियाओ ।

[६०] से किं तं पुरिसा तिविहा पन्नत्ता तं जहा- तिरिक्खजोणियपुरिसा मणुस्सपुरिसा देवपुरिसा से किं तं तिरिक्खजोणियपुरिसा तिरिक्खजोणियपुरिसा तिविहा पन्नत्ता तं जहा- जलयरा थलयरा खहयरा इत्थिभेदो भाणियव्वो जाव खहयरा सेत्तं खहयरा सेत्तं तिरिक्खजोणियपुरिसा से किं तं मणुस्सपुरिसा मणुस्सपुरिसा तिविहा पन्नत्ता तं जहा- कम्मभूमगा अकम्मभूमगा अंतरदीवगा सेत्तं मणुस्सपुरिसा से किं तं देवपुरिसा देवपुरिसा चउव्विहा पन्नत्ता तं जहा- इत्थिभेदो भाणियव्वो जाव सव्वट्ठसिद्धा ।

[६१] पुरिसस्स णं भंते केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेणं तेत्तीसं सागरोवमाइं तिरिक्खजोणियपुरिसाणं मणुस्सपुरिसाणं जाव चेव इत्थीणं ठिती सा चेव भाणियव्वा देवपुरिसाणवि जाव सव्वट्ठसिद्धाणं ति ताव ठिती जहा पन्नवणाए तहा भा० ।

[६२] पुरिसे णं भंते पुरिसेत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं सागरोवमसयपुहत्तं सातिरेगं तिरिक्खजोणियपुरिसे णं भंते कालओ केवच्चिरं होइ गोयमा जहन्नेणं अंतोमुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं एवं तहेव संचिद्धणा जहा इत्थीणं जाव खहयरतिरिक्खजोणियपुरिसस्स संचिद्धणा मणुस्सपुरिसाणं भंते कालओ केवच्चिरं होइ गोयमा खेत्तं पडुच्च जहन्नेणं अंतोमुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं धम्मचरणं पडुच्च जहण्णेणं अंतोमुहुत्तं उक्कोसेणं देसूणा पुव्वकोडी एवं सव्वत्थ जाव पुव्वविदेह-अवरविदेह-कम्मभूमग-मणुस्सपुरिसाणं अकम्मभूमगमणुस्सपुरिसाणंजहा अकम्मभूमिकमणुस्सिस्थीणं जाव अंतरदीवगाणं जच्चेव ठिती सच्चेव संचिद्धणा जाव सव्वट्ठसिद्धगाणं ।

[६३] पुरिसस्स णं भंते केवतियं कालं अंतरं होइ गोयमा जहन्नेणं एककं समयं उक्कोसेणं वणस्सतिकालो तिरिक्खजोणियपुरिसाणं जहन्नेणं अंतोमुहुत्तं उक्कोसेणं वणस्सतिकालो एवं जाव खहयरतिरिक्खजोणियपुरिसाणं, मणुस्सपुरिसाणंभंते केवतियं कालं अंतरं होइ गोयमा खेत्तं पडुच्च जहण्णेणं अंतोमुहुत्तं उक्कोसेणं वणस्सतिकालो धम्मचरणं पडुच्च जहन्नेणं एककं समयं उक्कोसेणं अनंतं कालं-

पडिवत्ति-२

अनंताओ उस्सप्पिणीओ जाव अवड्ढपोग्गलपरियट्ठं देसूणं कम्मभूमकाणं जाव विदेहो जाव धम्मचरणे एक्को समओ सेसं जहित्थीणं जाव अंतरदीवकाणं देवपुरिसाणं जहण्णेणं अंतोमुहुत्तं उक्कोसेणं वणस्सति-कालो, भवणवासिदेवपुरिसाणं ताव जाव सहस्सारो जहण्णेणं अंतोमुहुत्तं उक्कोसेणं वणस्सतिकालो, आणतदेवपुरिसाणं भंते केवतियं कालं अंतरं होइ गोयमा जहन्नेणं वासपुहत्तं उक्कोसेणं वणस्सतिकालो एवं जाव गेवेज्जदेवपुरिसस्सवि अनुत्तरोववातियदेवपुरिस्स जहण्णेणं वासपुहत्तं उक्कोसेणं संखेज्जाइं सागरो-वमाइं साइरेगाइं ।

[६४] अप्पाबहुयाणि जहेवित्थीणं जाव-एतेसि णं भंते देवपुरिसाणं-भवणवासीणं वाणमंतराणं जोतिसियाणं वेमाणियाणं य कतरे कतरेहिंतो अप्पा वा जाव विसेसाहिया वा गोयमा सव्वत्थोवा वेमाणिय-देवपुरिसा भवणवइदेवपुरिसा असंखेज्जगुणा वाणमंतरदेवपुरिसा असंखेज्जगुणा जोतिसियदेवपुरिसा संखेज्जगुणा एतेसि णं भंते तिरिक्खजोणियपुरिसाणं-जलयराणं थलयराणं खहयराणं मणुस्सपुरिसाणं-

कम्मभूमगाणं अकम्मभूमगाणं अंतरदीवगाणं देवपुरिसाणं-भवण-वासीणं जाव वेमाणियाणं सोधम्माणं जाव सव्वडुसिद्धगाणं य कतरे कतरेहिंतो अप्पा वा जाव गोयमा सव्वथोवा अंतरदीवगअकम्मभूमगमणुस्स-पुरिसा देवकुरुउत्तर-कुरुअकम्मभूमगमणुस्सपुरिसा दोवि संखेज्जगुणा हरिवासरम्मगवासअकम्मभूमगमणुस्सपुरिसा दोवि संखेज्जगुणा हेमवतहेरण्णवतवासअकम्मभूमगमणुस्सपुरिसा दोवि संखेज्जगुणा भरहेर-वतवास-कम्मभूमगमणुस्सपुरिसा दोवि संखेज्जगुणा पुव्वविदेहे-अवरविदेहकम्म-भूमगमणुस्सपुरिसा दोवि संखेज्जगुणा अनुत्तरोववातिय-देवपुरिसा असंखेज्जगुणा उवरिमगेविज्जदेवपुरिसा संखेज्जगुणा मज्झिमगे-विज्जदेवपुरिसा संखेज्जगुणा हेट्ठिमगेविज्जदेवपुरिसा संखेज्जगुणा अच्चुयकप्पे देवपुरिसा संखेज्जगुणा जाव आणतकप्पे देवपुरिसा संखेज्जगुणा सहस्सारे कप्पे देवपुरिसा असंखेज्जगुणा महासुक्के कप्पे देवपुरिसा असंखेज्जगुणा जाव माहिंदे कप्पे देवपुरिसा असंखेज्जगुणा सणकुमारकप्पे देवपुरिसा असंखेज्जगुणा ईसाणकप्पे देवपुरिसा असंखेज्जगुणा सोधम्मे कप्पे देवपुरिसा संखेज्जगुणा भवणवासिदेवपुरिसा संखेज्जगुणा जलयरतिरिक्खजोणिय-असंखेज्जगुणा थलयरतिरिक्खजोणियपुरिसा संखेज्जगुणा जलयरति-रिक्खजोणियपुरिसा संखेज्जगुणा वणमंतरदेवपुरिसा संखेज्जगुणा जोतिसियदेवपुरिसा संखेज्जगुणा ।

[६५] पुरिसवेदस्स णं भंते केवतियं कालं बंधट्ठिती प. गोयमा जहन्नेणं अट्ठ संवच्छराणि उक्कोसेणं दस सागरोवमकोडाकोडीओ दसवाससयाइं अबाहा अबाहूणिया कम्मट्ठिती कम्मणिसेओ, पुरिसवेदे णं भंते किंपकारे पन्नत्ते गोयमा दवग्गिजालसमाणे पन्नत्ते सेत्तं पुरिस ।

[६६] से किं तं नपुंसगा तिविहा पन्नत्ता तं जहा- नेरइयनपुंसगा तिरिक्खजोणियनपुंसगा मणुस्सजोणियनपुंसगा से किं तं नेरइयनपुंसगा से किं तं तिरिक्खजोणियनपुंसगा तिरिक्खजोणियनपुंसगा पंचविधा पन्नत्ता तं जहा- एगिंदियतिरिक्खजोणियनपुंसगा जाव पंचिंदियतिरिक्खजोणियनपुंसगा से किं तं एगिंदि-यतिरिक्खजोणियनपुंसगा एगिंदियतिरिक्खजोणियनपुंसगा पंचविधा पन्नत्ता तं जहा- पुढविकाइया जाव वणस्सतिकाइया से तं एगिंदियतिरिक्खजोणियनपुंसगा से किं तं बेइंदियतिरिक्खजोणियनपुंसगा वेइंदियतिरिक्खजोणियनपुंसगा अनेगविधा पन्नत्ता से तं बेइंदियतिरिक्खजोणिया, एवं तेइंदियावी चउरिंदि-यावि, से किं तं पंचेदियतिरिक्खजोणियनपुंसगा पंचेदियतिरिक्खजोणियनपुंसगा तिविधा पन्नत्ता तं जहा- जलयरा थलयरा खहयरा से किं तं जलयरा जलयरा सो चेव इत्थिभेदो आसालियसहितो भाणियव्वो से तं

पंचेदियतिरिक्खजोणियनपुंसगा से किं तं मणुस्सनपुंसगा मणुस्सनपुंसगा तिविधा पन्नत्ता तं जहा-
कम्म-

पडिवत्ति-२

भूमगा अकम्म-भूमगा अंतरदीवगा भेदो भाणियव्वा ।

[६७] नपुंसगस्स णं भंते केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेणं तेत्तीसं सागरोवमाइं नेरइयनपुंसगस्स णं भंते केवतियं कालं ठिती पन्नत्ता गोयमा जहन्नेणं दसवाससहस्साइं उक्कोसेणं तेत्तीसं सागरोवमाइं सव्वेसिं ठिती भाणियव्वा जाव अधेसत्तमापुढविनेरइया तिरिक्खजोणियनपुंसगस्स णं भंते केवतियं कालं ठिती पन्नत्ता गोयमा जहण्णेणं अंतोमुहुत्तं उक्कोसेणं पुव्वकोडी एगिंदियतिरिक्खजोणियनपुंसगस्स जहण्णेणं अंतोमुहुत्तं उक्कोसेणं बावीसं वाससहस्साइं पुढविकाइयएगिंदियतिरिक्खजोणियनपुंसगस्स जहण्णेणं अंतोमुहुत्तं उक्कोसेणं बावीसं वाससहस्सां सव्वेसिं एगिंदियनपुंसगाणं ठिती भाणियव्वा बेइंदियतेइंदियचउरिंदियनपुंसगाणं ठिती भाणियव् गोयमा जहण्णेणं

अंतोमुहुत्तं उक्कोसेणं पुव्वकोडी एवं जलयरतिरिक्खजोणियनपुंसग-चउप्पदथलयर-उरगपरि-सप्पभुयग-परिसप्प-खहयरतिरिक्खजोणियनपुंसगस्स सव्वेसिं जहण्णेणं अंतोमुहुत्तं उक्कोसेणं पुव्वकोडी मणुस्सनपुंसगस्स णं भंते केवतियं कालं ठिती पन्नत्ता गोयमा खेत्तं पडुच्च जहन्नेणं अंतोमुहुत्तं उक्कोसेणं पुव्वकोडी धम्मचरणं पडुच्च जहण्णेणं अंतोमुहुत्तं उक्कोसेणं देसूणा पुव्वकोडी कम्मभूमगभरहेरवयपुव्वविदेह-अवर-विदेहमणुस्सनपुंसगस्सवि तहेव अकम्मभूमग-मणुस्सनपुंसगस्स जम्मणं पडुच्च जहण्णेणं अंतोमुहुत्तं उक्कोसेणं अंतोमुहुत्तं साहरणं पडुच्च जहण्णेणं अंतोमुहुत्तं उक्कोसेणं देसूणा पुव्वकोडी एवं जाव अंतरदीगाणं नपुंसए णं भंते नपुंसएत्ति कालतो केवच्चिरं होइ गोयमा जहण्णेणं एकं समयं उक्कोसेणं वणस्सइकालो ।

नेरइयनपुंसए णं भंते नेरइयनपुंसएत्ति कालतो केवच्चिरं होइ गोयमा जहण्णेणं दस वासस-हस्साइं उक्कोसेणं तेत्तीसं सागरोवमाइं एवं पुढवीए ठिती भाणियव्वा तिरिक्खजोणियनपुंसए णं भंते तिरिक्खजोणियनपुंसएत्ति कालतो केवच्चिरं होइ गोयमा जहन्नेणं अंतोमुहुत्तं उक्कोसेणं वणस्सतिकालो एवं एगिंदियनपुंसगस्स वणस्सतिकाइयस्सवि एवमेव सेसाणं जहण्णेणं अंतोमुहुत्तं उक्कोसेणं असंखेज्जं कालं-असंखेज्जाओ उस्सप्पिणि-ओसप्पिणीओ कालतो खेत्तओ असंखेज्जा लोया वेइंदियतेइंदियचउरिंदिय-नपुंसगाणं य जहण्णेणं अंतोमुहुत्तं उक्कोसेणं संखेज्जं कालं पंचिंदियतिरिक्खजोणियनपुंसए णं भंते पंचिंदि-यतिरिक्खजोणियन-पुंसएत्ति कालतो केवच्चिरं होइ गोयमा जहण्णेणं अंतोमुहुत्तं उक्कोसेणं पुव्व-कोडिपुहत्तं एवं जल-यरतिरिक्खचउप्पदथलचरउरपरिसप्पभुयपरिसप्पमहोरगाणवि, मणुस्सनपुंसगस्स खेत्तं पडुच्च जहन्नेणं अंतोमुहुत्तं उक्कोसेणं पुव्वकोडिपुहत्तं धम्मचरणं पडुच्च जहण्णेणं एकं समयं उक्कोसेणं देसूणा पुव्वकोडी एवं कम्मभूमगभरहेरवयपुव्वविदेहअवरविदेहेसुवि भाणियव्वं अकम्मभूमग-मणुस्सनपुंसए जाव जम्मणं पडुच्च जहण्णेणं अंतोमुहुत्तं उक्कोसेणं मुहुत्तपुहत्तं साहरणं पडुच्च जहण्णेणं अंतोमुहुत्तं उक्कोसेणं देसूणा पुव्वकोडी एवं सव्वेसिं जाव अंतरदीवगाणं, नपुंसगस्स णं भंते केवतियं कालं अंतरं होइ गोयमा जहण्णेणं अंतोमुहुत्तं उक्कोसेणं सागरोवमसयपुहत्तं सातिरेगं नेरइयनपुंसगस्स जहण्णेणं अंतोमुहुत्तं उक्कोसेणं वणस्सइकालो रयणप्पभावपुढवीनेरइयन-पुंसगस्स जहण्णेणं अंतोमुहुत्तं उक्कोसेणं वणस्सइकालो एवं सव्वेसिं जाव अधेसत्तमा, तिरिक्खजोणियनपुंसगस्स जहन्नेणं अंतोमुहुत्तं उक्कोसेणं सागरोवमसयपुहत्तं सातिरेगं एगिंदियतिरिक्खजोणियनपुंसगस्स जहण्णेणं अंतोमुहुत्तं उक्कोसेणं दो सागरोवमसहस्साइं संखेज्जवासमब्भियाइं पुढविआउतेउवाऊणं जहण्णेणं अंतोमुहुत्तं उक्कोसेणं वणस्सइकालो असंखेज्जा लोया बेइंदियादीणं जाव खहयराणं जहन्नेणं अंतोमुहुत्तं उक्कोसेणं वणस्सतिकालो मणुस्सनपुंसगस्स खेत्तं पडुच्च पडिवत्ति-२

जहन्नेणं अंतो-मुहुत्तं उक्कोसेणं वणस्सतिकालो धम्मचरणं पडुच्च जहण्णेणं एगं समयं उक्कोसेणं अनंतं कालं जाव अवइडपोगलपरियट्टेसूणं एवं कम्मभूमकस्सवि भरतेरवतस्स पुव्वविदेहअवरविदेहेकस्सवि अकम्मभूमकमणुस्सनपुंसगस्स णं भंते केवतियं कालं अंतरं होइ गोयमा जम्मणं पडुच्च जहण्णेणं अंतोमुहुत्तं उक्कोसेणं वणस्सतिकालो संहरणं पडुच्च जहन्नेणं अंतोमुहुत्तं उक्कोसेणं वणस्सतिकालो एवं जाव अंतरदीवत्ति ।

[६८] एतेसि णं भंते नेरइयनपुंसगाणं तिरिक्खजोणियनपुंसगाणं मणुस्सनपुंसगाणं य कतरे कतरेहिंतो जाव वा गोयमा सव्वत्थोवा मणुस्सनपुंसगा, नेरइयनपुंसगा असंखेज्जगुणा तिरिक्खजोणियनपुंसगा अनंतगुणा एतेसि णं भंते नेरइयनपुंसगाणं-रयणप्पहापुढविनेरइयनपुंसगाणं जाव अहेसत्तमपुढविणेरइयनपुंसगाणं य करे कतरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा अहेसत्तमपुढविनेरइयनपुंसगा छट्ठपुढविणेरइयनपुंसगा असंखेज्जगुणा जाव दोच्चपुढविनेरइयनपुंसगा असंखेज्जगुणा इमीसे रयणप्पभाए पुढवीए नेरइयनपुंसगा असंखेज्जगुणा एतेसि णं भंते तिरिक्खजोणियनपुंसगाणं-एगिंदियतिरिक्खजोणियं नपुंसगाणं पुढविकाइयएगिंदियतिरिक्खजोणियनपुंसगाणं जाव वणस्सतिकाइयएगिंदियतिरिक्खजोणियनपुंसगाणं बेइंदियतेइंदियचउरिंदियतिरिक्खजोणियनपुंसगाणं पंचेदियतिरिक्खजोणियनपुंसगाणं-जलयराणं थलयराणं खहयराणं य कतरे कतरेहिंतो जाव विसेसाहिया वा गोयमा सव्वत्थोवा खहयरतिरिक्खजोणियनपुंसगा थलयरतिरिक्खजोणियनपुंसगा संखेज्जगुणा जलयरतिरिक्खजोणियनपुंसगा संखेज्जगुणा चउरिंदियतिरिक्खजोणियनपुंसगा विसेसाहिया तेउक्काइयएगिंदियतिरिक्खजोणियनपुंसगा असंखेज्जगुणा पुढविकाइयएगिंदियतिरिक्खजोणियनपुंसगा विसेसाहिया आऊ विसेसाहिया वाउ विसेसाहिया वणस्सतिकाइएगिंदियतिरिक्खजोणियनपुंसगा अनंतगुणा ।

एतेसि णं भंते मणुस्सनपुंसगाणं-कम्मभूमिनपुंसगाणं अकम्मभूमिनपुंसगाणं अंतरदीवग्गनपुंसगाणं य कतरे कतरेहिंतो जाव विसेसाहिया वा गोयमा सव्वत्थोवा अंतरदीवमअकम्मभूमगणुस्सनपुंसगा देवकुरुउत्तरकुरुअकम्मभूमगा दोवि संखेज्जगुणा एवं जाव पुव्वविदेहअवरविदेहकम्मभूमगा दोवि संखेज्जगुणा एतेसि णं भंते नेरइयनपुंसगाणं-रयणप्पभापुढविनेरइयनपुंसगाणं जाव अधेसत्तमापुढविनेरइयनपुंसगाणं तिरिक्खजोणियनपुंसगाणं-एगिंदियतिरिक्खजोणियाणं पुढविकाइयएगिंदियतिरिक्खजोणियनपुंसगाणं जाव वणस्सतिकाइय बेइंदियतेइंदियचउरिंदियतिरिक्खजोणियनपुंसगाणं पंचेदियतिरिक्खजोणियनपुंसगाणं-जलयराणं थलयराणं खहयराणं मणुस्सनपुंसगाणं-कम्मभूमिगाणं अकम्मभूमिगाणं अंतरदीवगाणं य कतरे कतरेहिंतो जाव विसेसाहिया वा गोयमा सव्वत्थोवा अधेसत्तमपुढविनेरइयनपुंसगा छट्ठपुढविनेरइयनपुंसगा असंखेज्जगुणा जाव दोच्चपुढविनेरइयनपुंसगा असंखेज्जगुणा अंतरदीवगमणुस्सनपुंसगा असंखेज्जगुणा देवकुरुउत्तरकुरुअकम्मभूमिगमणुस्सनपुंसगा दोवि संखेज्जगुणा जाव पुव्वविदेहअवरविदेहकम्मभूमगमणुस्सनपुंसगा दोवि संखेज्जगुणा रयणप्पभापुढविनेरइयनपुंसगा असंखेज्जगुणा खहयरावि असंखेज्जगुणा थलयरा संखेज्जगुणा जलयरपंचेदियतिरिक्खजोणियनपुंसगा संखेज्जगुणा चउरिंदियतिरिक्खजोणियनपुंसगा विसेसाहिया तेइंदियावि विसेसाहिया बेइंदियावि विसेसाहिया तेउक्काइएगिंदियतिरिक्खजोणियनपुंसगा असंखेज्जगुणा पुढविकाइयएगिंदियतिरिक्खजोमियनपुंसगा विसेसाहिया आउक्काइय विसेसाहिया वुक्काइय विसेसाहिया वणस्सइकाएगिंदियतिरिक्खजोणियनपुंसगा अनंतगुणा ।

[६९] नपुंसगवेदस्स णं भंते कम्मस्स केवतियं कालं बंधठिती पन्नत्ता गोयमा जहण्णेणं पडिवत्ति-२

सागरोवमस्स दोण्णि सत्तभागा पलिओवमस्स असंखेज्जतिभागेणं ऊणगा उक्कोसेणं वीसं सागरोवमकोडाकोडीओ दोण्णि य वाससहस्साइं अबाधा अबाहूणिया कम्मठिती कम्मनिसेगो, नपुंसगवेदे णं भंते किंपगारे पन्नत्ते गोयमा महानगरदाहसमाणे पन्नत्ते समणाउसो से तं नपुंसगा ।

[७०] एतासि णं भंते इत्थीणं पुरिसाणं नपुंसगाणं य कतरे कतरेहिंतो अप्पा वा जाव विसेसाहिया वा गोयमा सव्वत्थोवा पुरिसा, इत्थीओ संखेज्जगुणाओ नपुंसगा अनंतगुणा एतासि णं भंते

तिरिक्खजोण इत्थीणं तिरिक्खजोणियपुरिसाणं तिरिक्खजोणियनपुंसगाणं य कतरे कतरेहिंतो जाव विसेसाहिय व गोयमा सव्वत्थोवा तिरिक्खजोणियपुरिसा तिरिक्खजोणियइत्थीओ संखेज्जगुणाओ तिरिक्खजोणियनपुंसगा अनंतगुणा एतासि णं भंते मणुस्सिस्थीणं मणुस्सपुरिसाणं मणुस्सनपुंसगाणं य कतरे कतरेहिंदो जाव विसेसाहिया वा गोयमा सव्वत्थोवा मणुस्सपुरिसा मणुस्सिस्थीओ संखेज्जगुणाओ मणुस्सनपुंसगा असंखेज्जगुणा एतासि णं भंते देविस्थीणं देवपुरिसाणं नेरइयनपुंसगाणं य कतरे कतरेहिंतो जाव विसेसाहिया वा गोयमा सव्वत्थोवा नेरइयनपुंसगा देवपुरिसा असंखेज्जगुणा देविस्थीओ संखेज्जगुणाओ एतासि णं भंते तिरिक्खजोणित्थीणं तिरिक्खजोणियपुरिसाणं नेरइयनपुंसगाणं य कतरे कतरेहिंतो जाव विसेसाहिया वा गोयमा सव्वत्थोवा मणुस्सपुरिसा मणुस्सिस्थीओ संखेज्जगुणाओ मणुस्सनपुंसगा असंखेज्जगुणा नेरइयनपुंसगा असंखेज्जगुणा तिरिक्खजोणियपुरिसा असंखेज्जगुणा तिरिक्खजोणित्थियाओ संखेज्जगुणाओ देवपुरिसा संखेज्जगुणा देविस्थियाओ संखेज्जगुणाओ तिरिक्खजोणियनपुंसगा अनंतगुणा ।

एतासि णं भंते तिरिक्खजोणित्थीणं-जलयरीणं थलयरीणं खहयरीणं तिरिक्खजोणियपुरिसाणं-जलयराणं थलयराणं खहयराणं तिरिक्खजोणियनपुंसगाणं-एगिंदियतिरिक्खजोणियनपुंसगाणं पुढविकाइयएगिंदियतिरिक्खजोणियनपुंसगाणं जाव वणस्सतिकाइयएगिंदियतिरिक्खजोणियनपुंसगाणं वेइंदियतिरिक्खजोणियनपुंसगाणं जाव पंचेंदियतिरिक्खजोणियनपुंसगाणं-जलयराणं थलयराणं कतरे कतरेहिंतो जाव विसेसाहिया वा गोयमा सव्वत्थोवा खहयरतिरिक्खजोणियपुरिसा खहयरतिरिक्खजोणित्थियाओ संखेज्जगुणाओ थलयरपंचेंदियतिरिक्खजोणियपुरिसा संखेज्जगुणा थलयरपंचेंदियतिरिक्खजोणित्थियाओ संखेज्जगुणाओ जलयरतिरिक्खजोणियपुरिसा संखेज्जगुणाओ जलयरतिरिक्खजोणित्थियाओ संखेज्जगुणाओ खहयरपंचेंदियतिरिक्खजोणियनपुंसगा असंखेज्जगुणा थलयरपंचेंदिया संखेज्जगुणा जलयरा संखेज्जगुणा चउरिंदियतिरिक्खजोणियनपुंसगा विसेसाहिया तेइंदियनपुंसगा विसेसाहिया बेइंदियनपुंसगा विसेसाहिया आउक्काइयनपुंसगा विसेसाहिया वाउइक्काइयनपुंसगा विसेसाहिया वणस्सतिकाइयएगिंदियतिरिक्खजोणियनपुंसगा अनंतगुणा एतासि णं भंते मणुस्सिस्थीणं कम्मभूमियाणं अकम्मभूमियाणं अंतरदीवियाणं मणुस्सपुरिसाणं-कम्मभूमगाणं अकम्मभूमगाणं अंतरदीवगाणं य कतरे कतरेहिंदो जाव विसेसाहिया वा गोयमा अंतरदीवगा मणुस्सिस्थियाओ मणुस्सपुरिसा य एते णं दोण्णि वि तुल्ला सव्वत्थोवा देवकुरुत्तरकुरुअकम्मभूमिगमणुस्सिस्थियाओ मणुस्सपुरिसा एते णं दोण्णिवि तुल्ला संखेज्जगुणा हरिवासरम्मगवासअकम्मभूमिगमणुस्सिस्थियाओ मणुस्सपुरिसा य एते णं दोण्णिवि तुल्ला संखेज्जगुणा हेमवतहेरवण्णवतअकम्मभूमिगमणुस्सपुरिसा दोवि संखेज्जगुणा भरहेरवतकम्मभूमिगमणुस्सिस्थियाओ दोवि संखेज्जगुणाओ पुव्वविदेहअवरविदेहकम्मभूमिगमणुस्सपुरिसा दोवि संखेज्जगुणा पुव्वविदेहअवरविदेहकम्मभूमिगमणुस्सिस्थियाओ दोवि संखेज्जगुणाओ अंतरदीवगमणुस्सनपुंसगा असंपडिवत्ति-२

खेज्जगुणा देवकुरुत्तरकुरुअकम्मभूमिगमणुस्सनपुंसगा दोवि संखेज्जगुणा हरिवासरम्मगवासअकम्मभूमिगमणुस्सनपुंसगा दोवि संखेज्जगुणा हेमवतहेरवण्णवतअकम्मभूमिगमणुस्सनपुंसगा दोवि संखेज्जगुणा भरहेरवतकम्मभूमिगमणुस्सनपुंसगा दोवि संखेज्जगुणा पुव्वविदेहअवरविदेहकम्मभूमिगमणुस्सनपुंसगा दोवि संखेज्जगुणा ।

एतासि णं भंते देवित्थीणं-भवणवासिणीणं वाणमंतरीणं जोइसिणीणं वेमाणिणीणं देवपुरिसाणं-भवणवासीणं जाव वेमाणियाणं सोधम्मकाणं जाव गेवेज्जकाणं अनुत्तरोववातियाणं नेरइय-नपुंसगाणं-रयणप्पभापुढविनेरइयनपुंसगाणं जाव अहेसत्तमपुढविनेरइयनपुंसगाणं कतरे कतरेहिंतो जाव विसेसाहिया वा गोयमा सव्वत्थोवा अनुत्तरोववातियदेवपुरिसा उवरिमगेवेज्जदेवपुरिसा संखेज्जगुणा तहेव जाव आणतेकप्पे देवपुरिसा संखेज्जगुणा अहेसत्तमाए पुढवीए नेरइयनपुंसगा असंखेज्जगुणा छट्ठीए पुढवीए नेरइयनपुंसगा असंखेज्जगुणा सहस्सारे कप्पे देवपुरिसा असंखेज्जगुणा महासुक्के कप्पे देवपुरिसा असंखेज्जगुमा पंचमाएपुढवीए नेरइयनपुंसगा असंखेज्जगुणा लंतएकप्पे देवपुरिसा असंखेज्जगुणा चउत्थीए पुढवीए नेरइया असंखेज्जगुणा बंभलोएकप्पे देवपुरिसा असंखेज्जगुणा तच्चाए पुढवीए नेरइयनपुंसगा असंखेज्जगुणा माहिंदेकप्पे देवपुरिसा असंखेज्जगुणा सणंकुमारे कप्पे देवपुरिसा असंखेज्जगुणा दोच्चाएपुढवीए नेरइया असंखेज्जगुणा ईसाणेकप्पे देवपुरिसा असंखेज्जगुणा ईसाणेकप्पे देवित्थियाओ संखेज्जगुणाओ सोधम्मेकप्पे देवपुरिसा संखेज्जगुणा सोधम्मेकप्पे देवित्थियाओ संखेज्जगुणाओ भवणवासिदेवपुरिसा असंखेज्जगुणा भवणवासिदेवित्थियाओ संखेज्जगुणाओ इमीसे रयणप्पभापुढवीए नेरइया असंखेज्जगुणा वाणमंतरदेवपुरिसा असंखेज्जगुणा वाणमंतरदेवित्थियाओ संखेज्जगुणाओ जोति-सियदेवपुरिसा संखेज्जगुणा जोतिसियदेवित्थियाओ संखेज्जगुणाओ, एतासि णं भंते तिरिक्खजोणित्थीणं-जलयरीणं थलयरीणं खहयरीणं तिरिक्खजोणियपुरिसाणं-जलयराणं थलयराणं खहयराणं तिरिक्खजोणिय-नपुंसगाणं एगिंदियतिरिक्खजोणियनपुंसगाणं-पुढविक्काइएगिंदियतिरिक्खजोणियनपुंसगाणं आउक्काय-एगिंदियतिरिक्खजोणियनपुंसगाणं जाव वणस्सतिकाइएगिंदियतिरिक्खजोणियनपुंसगाणं बेइंदियतिरिक्ख-जोणियनपुंसगाणं जाव पंचेदियतिरिक्खजोणियनपुंसगाणं-जलयराणं थलयराणं खहयराणं मणुस्सि-त्थीणं-कम्मभूमियाणं अकम्मभूमियाणं अंतरदीवियाणं मणुस्सपुरिसाणं-कम्मभूमगाणं देवि-त्थीणं-भवणवासिणीणं वाणमंतरीणं जोतिसिणीणं वेमाणिणीणं देवपुरिसाणं-भवणवासीणं वाण-मंतराणं जोतिसियाणं वेमाणियाणं सोधम्मकाणं जाव गेवेज्जकाणं अनुत्तरोववातियाणं नेरइयन-पुंसगाणं-रयणप्पभापुढवि जाव अहेसत्तमपुढवि-नेरइयनपुंसगाणं य कतरे कतरेहिंतो जाव विसेसाहिया वा ।

गोयमा अंतरदीवगअकम्मभूमिगमणुस्सि-त्थीओ मणुस्सपुरिसा य एते णं दोवि तुल्ला सव्वत्थोवा देवकुरुउत्तरकुरुअकम्मभूमगणुस्सि-त्थीओ पुरिसा य एते णं दोवि तुल्ला संखेज्जगुणा एवं हरिवसरम्मगवासअकम्मभूमिगमणुस्सि-त्थीओ एवं हेमवतहेरणवय भरहेरवयकम्मभूमगमणुस्सपुरिसा दोवि संखेज्जगुणा भरहेरवतकम्मभूमिगमणुस्सि-त्थीओ दोवि संखेज्जगुणाओ पुव्वविदेहअवरविदेहकम्म-भूमगमणुस्सपुरिसा दोवि संखेज्जगुणा पुव्वविदेहअवरविदेहकम्मभूमिगमणुस्सि-त्थियाओ दोवि संखेज्ज-गुणाओ अनुत्तरोववातियदेवपुरिसा असंखेज्जगुणा उवरिमगेवेज्जा देवपुरिसा संखेज्जगुणा जाव आणत्तेकप्पे देवपुरिसा संखेज्जगुणा अधेसत्तमाएपुढवीए नेरइयनपुंसगा असंखेज्जगुणा छट्ठीएपुढवीए नेरइयनपुंसगा असंखेज्जगुणा सहस्सारेकप्पे देवपुरिसा असंखेज्जगुणा महासुक्केकप्पे देवपुरिसा असंखेज्जगुणा पंचमाए पडिवत्ति-२

पुढवीए नेरइयनपुंसगा असंखेज्जगुणा लंतए कप्पे देवपुरिसा असंखेज्जगुणा चउत्थीए पुढवीए नेरइयनपुंसगा असंखेज्जगुणा बंभलोए कप्पे देवपुरिसा असंखेज्जगुणा तच्चाए पुढवीए नेरइयनपुंसगा असंखेज्जगुणा माहिंदेकप्पे देवपुरिसा असंखेज्जगुणा सणंकुमारेकप्पे देवपुरिसा असंखेज्जगुणा दोच्चाए-

पुढवीए नेरइयनपुंसगा असंखेज्जगुणा अंतरदीवगअकम्मभूमगमणुस्सनपुंसगा असंखेज्जगुणा देवकुरुउत्तर-
 कुरुअकम्मभूमगमणुस्सनपुंसगा दोवि संखेज्जगुणा एवं जाव विदेहत्ति ईसाणेकप्पे देवपुरिसा
 असंखेज्जगुणा ईसाणेकप्पे देवत्थियाओ संखेज्जगुणाओ सोधम्मकेप्पे देवपुरिसा संखेज्जगुणा सोहम्मकेप्पे
 देवित्थियाओ संखेज्जगुणाओ भवणवासिदेवपुरिसा असंखेज्जगुणा भवणावासिदेवित्थियाओ संखेज्जगुणाओ
 इमीसे रयण-प्पभाएपुढवीए नेरइयनपुंसगा असंखेज्जगुणा खहयरतिरिक्खजोणियपुरिसा संखेज्जगुणा
 खहयरतिरिक्ख-जोणित्थियाओ संखेज्जगुणाओ थलयरतिरिक्खजोणियपुरिसा संखेज्जगुणा थलयरतिरिक्ख-
 जोणित्थियाओ संखेज्जगुणाओ जलयरतिरिक्खजोणियपुरिसा संखेज्जगुणा जलयरतिरिक्खजोणित्थियाओ
 संखेज्जगुणाओ वाणमंतरदेवपुरिसा संखेज्जगुणा वाणमंतरदेवित्थियाओ संखेज्जगुणाओ जोतिसियदेवपुरिसा
 संखेज्जगुणा जोतिसियदेवित्थियाओ संखेज्जगुणाओ खहयरपंचेदियतिरिक्खजोणियनपुंसगा असंखेज्जगुणा
 थलयरनपुंसगा संखेज्जगुणा जलयरनपुंसगा संखेज्जगुणा चतुरिंदियनपुंसगा विसेसाहिया तेइंदियनपुंसगा
 विसेसाहिया बेइंदियनपुंसगा विसेसाहिया तेउक्काइयएगिंदियतिरिक्खजोणियनपुंसगा असंखेज्जगुणा
 पुढविकाइनपुंसगा विसेसाहिया आउक्काइएनपुंसगा विसेसाहिय वाउक्काइयनपुंसगा विसेसाहिया
 वणस्सतिकाइयनपुंसगा अनंतगुणा ।

[७१] इत्थीणं भंते केवतियं कालं ठिती पन्नत्ता गोयमा एगेणं आएसेणं जहा पुव्विं भणियं
 एवं पुरिस्सवि नपुंसगस्सवि संचिद्धणा पुणरवि तिण्हंपि जहा पुव्विं भणिया अंतरंपि तिण्हंपि जहा पुव्विं
 भणियं [तहा नेयव्वं] ।

[७२] तिरिक्खजोणित्थियाओ तिरिक्खजोणियपुरिसेहिंतो तिगुणाओ तिरूवाहियाओ
 मणुस्सित्थियाओ मणुस्सपुरिसेहिंतो सत्तावीसतिगुणाओ सत्ताविसतिरूवाहियाओ देवित्थियाओ
 देवपुरिसेहिंतो बत्तीसइगुणाओ बत्तीसइरूवाहियाओ सेत्तं तिविधा संसारसमावण्णगा जीवा प. ।

[७३] तिविहेसु होइ भेओ ठिई य संचिद्धणंतरप्पबहुं ।
 वेदाण य बंधठिती वेओ ह किंपगारो उ ॥

• मुनि दीपरत्नसागरेण संशोधिताः सम्पादिताश्च बीडआ पडिवत्ति समत्ता •

• तच्चापडिवत्ती-चउव्विहपडिवत्ती •

□ “नेरइय”- पढमो उद्देशो □

[७४] तत्थ जेते एवमाहंसु चउव्विधा संसारसमावण्णगा जीवा पन्नत्ता ते एवमाहंसु तं
 जहा- नेरइया तिरिक्खजोणिया मणुस्सा देवा ।

[७५] से किं तं नेरइया नेरइया सत्तविधा पन्नत्ता तं जहा- पढमापुढविनेरइया जाव
 सत्तमापुढवीनेरइया ।

[७६] पढमा णं भंते पुढवी किंनामा किंगोत्ता पन्नत्ता गोयमा धम्मा नामेणं रयणप्पभा
 गोत्तेणं दोच्चा णं भंते पुढवी किंनामा किंगोत्ता पन्नत्ता गोयमा वंसा नामेणं सक्करप्पभा गोत्तेणं एवं
 व

पडिवत्ति-३

एत्तेणं अभिलावेणं सव्वासिं पुच्छा नामाणि इमाणि सेलातच्चा अंजणाचउत्थी रिद्धापंचमी मधाछट्ठी
 माधवतीसत्तमा जाव तमतमा गोत्तेणं पन्नत्ता ।

[७७] [धम्मा वंसा सेला अंजण रिद्धा मधा य माधवती ।

सत्तण्हं पुढवीणं एए नामा उ नायव्वा] ॥

[७८] [रयणा सक्कर वालुय पंका धूमा तमा तम-तमा य ।

सत्तण्हं पुढवीणं एए गोत्ता मुणेयव्वा] ॥

[७९] इमा णं भंते रयणप्पभापुढवी केवतिया बाहल्लेण गोयमा इमा णं रयणप्पभापुढवी असिउत्तरे जोयणसयसहस्सं बाहल्लेणं एवं एतेणं अभिलावेणं इमा गाहा अनुगंतव्वा ।

[८०] आसीतं बत्तीसं अट्ठावीसं तहेव वीसं च ।

अट्ठारस सोलसगं अट्ठुत्तरमेव हिट्ठिमिया ॥

[८१] इमा णं भंते रयणप्पभापुढवी कतिविधा पन्नत्ता गोयमा तिविधा पन्नत्ता तं जहा- खरकंडे पंकबहुलेकंडे आवबहुलेकंडे इमीसे णं भंते रयणप्पभाए पुढवीए खरकंडे कतिविधे पन्नत्ते गोयमा सोलसविधे पन्नत्ते तं जहा- रयणे वड्ढे वेरुलिए लोहितकखे मसारगल्ले हंसगब्भे पुलए सोयंधिए जोतिरसे अंजणे अंजणपुलए रयते जातरूवे अंके फलिहे रिद्धे कंडे, इमीसे णं भंते रयणप्पभाए पुढवीए रयणकंडे कतिविधे पन्नत्ते गोयमा एगागारे पन्नत्ते एवं जाव रिद्धे इमीसे णं भंते रयणप्पभाए पुढवीए पंकबहुलेकंडे कतिविधे पन्नत्ते गोयमा एगागारे पन्नत्ते एवं आवबहुलेकंडे कतिविधे पन्नत्ते गोयमा एगागारे पन्नत्ते सक्करप्पभा णं भंते पुढवी कतिविधा पन्नत्ता गोयमा एगागारा पन्नत्ता एवं जाव अहेसत्तमा ।

[८२] इमीसे णं भंते रयणप्पभाए पुढवीए केवतिया निरयावाससयसहस्सा प. गोयमा तीसं निरयावाससयसहस्सा प. एवं एतेणं अभिलावेणं सव्वासिं पुच्छा इमा गाहा अनुगंतव्वा ।

[८३] तीसा य पन्नवीसा पन्नरस दसेव तिण्णि य हवन्ति ।

पंचूणसयसहस्सं पंचेव अनुत्तरा नरगा ॥

[८४] जाव अहेसत्तमाए पंच अनुत्तरा महतिमहालया महाणरगा पन्नत्ता तं जहा- काल महाकाले रोरुए महारोरुए अपतिट्ठाणे ।

[८५] अत्थि णं भंते इमीसे रयणप्पभाए पुढवीए अहेघ णोदधीति वा घणवातेति वा तनुवातेति आ ओवासंतरेति वा हंता अत्थि एवं जाव अहेसत्तमाए ।

[८६] इमीसे णं भंते रयणप्पभाए पुढवीए खरकंडे केवतियं बाहल्लेणं पन्नत्ते गोयमा सोलसजोयणसहस्साइं बाहल्लेणं पन्नत्ते इमीसे णं भंते रयणप्पभाए पुढवीए रयणकंडे केवतियं बाहल्लेणं पन्नत्ते गोयमा एकं जोयणसहस्सं एवं जाव रिद्धे इमीसे णं भंते रयणप्पभाए पुढवीए पंकबहुले कंडे केवतियं बाहल्लेणं पन्नत्ते गोयमा चउरासीतिजोयणसहस्साइं इमीसे णं भंते रयणप्पभाए पुढवीए आवबहुले कंडे केवतियं बाहल्लेणं पन्नत्ते गोयमा असीतिजोयणसहस्साइं इमीसे णं भंते रयणप्पभाए पुढवीए घणोदही केवतियं बाहल्लेणं पन्नत्ते गोयमा वीसं जोयणसहस्साइं इमीसे णं भंते रयणप्पभाए पुढवीए घणवाते केवतियं बाहल्लेणं पन्नत्ते गोयमा असंखेज्जाइं जोयणसहस्साइं एवं तणुवातेवि ओवासंतरेवि सक्करप्पभाए णं भंते पुढवीए घणोदही केवतियं गोयमा वीसं जोयणसहस्साइं सक्करप्पभाए पुढवीए घणवाते केवतिए बाहल्लेणं पन्नत्ते गोयमा असंखेज्जाइं जोयणसहस्साइं एवं तणुवातेवि ओवासंतरेवि

जहा-

सक्करप्पभाए

पडिवत्ति-३

पुढवीए एवं जाव अधेसत्तमाए ।

[८७] इमीसे णं भंते रयणप्पभाए पुढवीए असीउत्तरजोयणसतसहस्सबाहल्लाए खेत्तच्छेएणं छिज्जमाणीए अत्थि दव्वाइं वण्णतो काल-नील-लोहित-हालिद्ध-सुक्किलाइं गंधतो सुरभिगंधाइं दुब्भिगंधाइं रसतो तित्त-कडुय-कसाय-अंबिल-महुराइं फासतो कक्खड-मउय-गरुय-लहु-सीत-उसिण-निद्ध-लुक्खाइं संठाणतो परिमंडल-वट्ट-तंस-चउरंस-आययसंठाणपरिणयाइं अण्णमण्णबद्धाइं अण्णमण्णपुट्ठाइं अण्ण-मण्णओगाढाइं अण्णमण्णसिणेहपडिबद्धाइं अण्णमण्णघडत्ताए चिट्ठंति हंता अत्थि इमीसे णं भंते रयणप्प-भाए पुढवीए खरकंडस्स सोलसजोयणसहस्सबाहलस्स खेत्तच्छेएणं छिज्जमाणस्स अत्थि दव्वाइं जाव हंता अत्थि, इमीसे णं भंते रयणप्पभाए पुढवीए रयणनामगस्स कंडस्स जोयणसहस्सबाहल्लस्स खेत्तच्छेएणं छिज्जमाणस्स तं चेव जाव हंता अत्थि एवं जाव रिद्धस्स इमीसे णं भंते रयणप्पभाए पुढवीए पंकब-हुलस्स कंडस्स चउरासीजिजोयणसहस्सबाहल्लस्स खेत्तच्छेएणं छिज्जमाणस्स तं चेव एवं आवबहुलस्सवि असीतिजोयणसहस्सबाहल्लस्स इमीसे णं भंते रयणप्पभाए पुढवीए घणोदधिस्स वीसं जोयणसहस्स-बालहस्स खेत्तच्छेएणं तहेव एवं घणवातस्स असंखेज्जजोयणसहस्सबाहल्लस्स तहेव तणुवतस्स ओव-संतरस्सवि तं चेव सक्करप्पभाए णं भंते पुढवीए बत्तीसुत्तरजोयणसतसहस्सबाहल्लाए खेत्तच्छेएणं छिज्ज-माणीए अत्थि दव्वाइं वण्णतो जाव अण्णमण्णघडत्ताए चिट्ठंति हंता अत्थि एवं घणोदहिस्स वीसजोयण-सहस्सबाहल्लस्स घणवातस्स असंखेज्जजोयणसहस्सबाहल्लस्स एवं जाव ओवासंतरस्स जहा-सक्कर-प्पभाए एवं जाव अहेसत्तमाए ।

[८८] इमा णं भंते रयणप्पभा पुढवी किंसंठिता पन्नत्ता गोयमा झल्लरि संठिता पन्नत्ता इमीसे णं भंते रयणप्पभाए पुढवीए खरकंडे किंसंठिते पन्नत्ते गोयमा झल्लरिसंठिते पन्नत्ते रयणकंडे किंसंठिते पन्नत्ते गोयमा झल्लरिसंठिए पन्नत्ते एवं जाव रिद्धे एवं पंकबहुलेवि एवं आवबहुलेवि घणोदधीवि घणवाएवि तनुवाएवि ओवासंतरेवि-सव्वे झल्लरि-संठिता पन्नत्ता सक्करप्पभा णं भंते पुढवि किंसंठिता पन्नत्ता गोयमा झल्लरिसंठिता पन्नत्ता सक्क-रप्पभाए णं भंते पुढवीए घणोदधी झल्लरिसंठिते पन्नत्ते एवं जाव ओवासंतरे जहा- सक्करप्पभाए एवं जाव अहेसत्तमाएवि ।

[८९] इमीसे णं भंते रयणप्पभाए पुढवीए पुरत्थिमिल्लाओ चरिमंताओ केवतियं अबाधाए लोयंते पन्नत्ते गोयमा दुवालसहिं जोयणेहिं अबाधाए लोयंते पन्नत्ते एवं दाहिणिल्लातो पच्चत्थिमिल्लातो उत्तरिल्लातो सक्करप्पभाए णं भंते पुढवीए पुरत्थिमिल्लातो चरिमंतातो केवतियं अबाधाए लोयंते पन्नत्ते गोयमा तिभागूणेहिं तेरसहिं जोयणेहिं अबाधाए लोयंते पन्नत्ते एवं चउदिसिंपि वालुयप्पभाए णं भंते पुढवीए पुरत्थिमिल्लातो पुच्छा गोयमा सतिभागेहिं तेरसहिं जोयणेहिं अबाधाए लोयंते, एवं चउदिसिंपि एवं सव्वासिं चउसुवि दिसासु पुच्छित्त्वं-पंकप्पभाए चोद्धसहिं जोयणेहिं अबाधाए लोयंते, पंचमए तिभागूणेहिं पन्नरसहिं जोयणेहिं अबाधाए लोयंते पन्नत्ते, छट्ठीएसतिभागेहिं पन्नरसहिं जोयणेहिं अबाधाए लोयंते, सत्तमीए सोलसहिं जोयणेहिं अबाधाए लोयंते पन्नत्ते एवं जाव उत्तरिल्लातो इमीसे णं भंते रयणप्पभाए पुढवीए पुरत्थिमिल्ले चरिमंते कतिविधे पन्नत्ते गोयमा तिविहे तं जहा- घणोदधिवलए घणवातवलए तनु-वातवलए इमीसे णं भंते रयणप्पभाए पुढवीए दाहिणिल्ले चरिमंते कतिविधे, गोयमा तिविधे पन्नत्ते तं जहा- घणोदधिवलए घणवायवलए तनुवायवलए एवं जाव उत्तरिल्ले एवं सव्वासिं जाव अधेसत्तमाए उत्तरिल्ले ।

पडिवत्ति-३

[९०] इमीसे णं भंते रयणप्पभाए पुढवीए घणोदधिवलय केवतियं बाहल्लेणं पन्नत्ते गोयमा छ जोजयणाणि बाहल्लेणं पन्नत्ते सक्करप्पभाए पुढवीए घणोदधिवलय केवतियं बाहल्लेणं पन्नत्ते गोयमा सतिभागाइं छजोयणाइं बाहल्लेणं, वालुयप्पभाए गोयमा तिभागूणाइं सत्त जोजयणाइं बाहल्लेणं, एवं एतेणं अभिलावेणं-पंकप्पभाए सत्त जोजयणाइं बाहल्लेणं, धूमप्पभाए सतिभागाइं सत्त जोजयणाइं तमतमप्पभाए अट्ठ जोजयणाइं इमीसे णं भंते रयणप्पभाए पुढवीए घणवायवलय केवतियं बाहल्लेणं पन्नत्ते गोयमा अट्ठपंचमाइं जोजयणाइं बाहल्लेणं सक्करप्पभाए पुच्छा गोयमा कोसूणाइं पंच जोजयणाइं बाहल्लेणं एवं एतेणं अभिलावेणं-वालुयप्पभाए पंच जोजयणाइं बाहल्लेणं पंकप्पभाए सक्कोसाइं पंच जोजयणाइं बाहल्लेणं धूमप्पभाए अट्ठछट्ठाइं जोजयणाइं बाहल्लेणं तमप्पभाए कोसूणाइं छ जोजयणाइं बाहल्लेणं अहेसत्तमाए छ जोजयणाइं बाहल्लेणं इमीसे णं भंते रयणप्पभाए पुढवीए तनुवायवलय केवतियं बाहल्लेणं पन्नत्ते गोयमा छक्कोसेणं बाहल्लेणं, एवं एतेणं अभिलावेणं-सक्करप्पभाए सतिभागे छक्कोसे बाहल्लेणं वालुयप्पभाए तिभागूणे सत्तकोसं बाहल्लेणं पंकप्पभाए पुढवीए सत्तकोसं बाहल्लेणं धूमप्पभाए सतिभागे सत्तकोसे बाहल्लेणं तमप्पभाए तिभागूणे अट्ठकोसे बाहल्लेणं अधेसत्तमाए पुढवीए अट्ठकोसे बाहल्लेणं इमीसे णं भंते रयणप्पभाए पुढवीए घणोदधिवलयस्स छज्जोयण-बाहल्लस्स खेत्तच्छेएणं छिज्जमाणस्स अत्थि दव्वाइं वण्णतो काल-नील-लोहित-हालिद्ध-सुक्किलाइं जाव हंता अत्थि ।

सक्करप्पभाए णं भंते पुढवीए घणोदधिवलयस्स सतिभागछजोयणबाहल्लस्स खेत्तच्छेदेणं छिज्जमाणस्स जाव हंता अत्थि एवं जाव अधेसत्तमाए जं जस्स बाहल्लं इमीसे णं भंते रयणप्पभाए पुढवीए घणवातवलयस्स अट्ठपंचमजोयणबाहल्लस्स खेत्तच्छेदेणं छिज्जमाणस्स जाव हंता अत्थि एवं अत्थि एवं जाव अहेसत्तमाए जं जस्स बाहल्लं एवं तनुवायवलयस्सवि जाव अधेसत्तमाए जं जस्स बाहल्लं इमीसे णं भंते रयणप्पभाए पुढवीए घणोदधिवलय किसंठिते पन्नत्ते गोयमा वट्ठे वलयागारसंठाणसंठिते पन्नत्ते जे णं इमं रयणप्पभं पुढविं सव्वतो संपरिक्खिवित्ताणं चिट्ठति इमीसे णं भंते रयणप्पभाए पुढवीए घणवातवलय किसंठिते पन्नत्ते गोयमा वट्ठे वलयागार, जे णं इमीसे णं रयणप्पभाए पुढवीए घणोदधिवलयं सव्वतो समंता संपरिक्खिवित्ताणं चिट्ठइ एवं जाव अहेसत्तमाए घणवातवलय, इमीसे णं भंते रयणप्पभाए पुढवीए तनुवातवलय किसंठिते पन्नत्ते गोयमा वट्ठे वलयागार जे णं इमीसे रयणप्पभाए पुढवीए घणवातवलयं सव्वतो समंता संपरिक्खिवित्ताणं चिट्ठइ एवं जाव अधेसत्तमाए तनुवातवलय इमा णं भंते रयणप्पभा पुढवी केवतियं आयामविकखंभेणं केवतियं परिकखेवेणं पन्नत्ता गोयमा असंखेज्जाइं जोजयणसहस्साइं आयाम-विकखंभेणं असंखेज्जाइं जोजयणसहस्साइं परिकखेवेणं पन्नत्ते एवं जाव अधेसत्तमा इमा णं भंते रयणप्पभा पुढवी अंते य मज्झो य सव्वत्थ समा बाहल्लेणं पन्नत्ता हंता गोयमा एवं जाव अधेसत्तमा ।

[९१] इमीसे णं भंते रयणप्पभाए पुढवीए सव्वजीवा उववण्णपुव्वा सव्वजीवा उववण्णा गोयमा इमीसे णं रयमप्पभाए पुढवीए सव्वजीवा उववण्णपुव्वा नो चेवणं सव्वजीवा उववण्णा एवं जाव अहेसत्तमाए इमा णं भंते रयणप्पभा पुढवी सव्वजीवेहिं विजट्ठपुव्वा सव्वजीवेहिं विजट्ठा गोयमा इमा णं रयणप्पभा पुढवी सव्वजीवेहिं विजट्ठपुव्वा नो चेव णं सव्वजीवविजट्ठा एवं जाव अधेसत्तमा इमीसे णं भंते रयणप्पभाए पुढवीए सव्वपोग्गला पविट्ठलुव्वा सव्वपोग्गला पविट्ठा गोयमा सव्वपोग्गला पविट्ठपुव्वा नो चेव णं सव्वपोग्गला पविट्ठा एवं जाव अधेसत्तमाए, इमा णं भंते रयणप्पभा पुढवी सव्वपोग्गलेहिं पडिवत्ति-३

विजढपुव्वा सव्वपोग्गला विजढा गोयमा सव्वपोग्गलेहिं विजढपुव्वा नो चेव णं सव्वपोग्गलेहिं विजढा एवं जावअधेसत्तमा ।

[९२] इमा णं भंते रयणप्पभा पुढवी किं सासता असासता गोयमा सिय सासता सिय असासता से केणट्ठेणं भंते एवं वुच्चइ-सिय सासता सिय असासता गोयमा दव्वड्डयाए सासता वणपज्जवेहिं गंधपज्जवेहिं रसपज्जवेहिं फासपज्जवेहिं असासता से तेणट्ठेणं गोयमा एवं वुच्चति-सिय सासता सिय असासता एवं जाव अधेसत्तमा, इमा णं भंते रयणप्पभा पुढवी कालतो केवच्चिरं होइ गोयमा न कयाइ न आसि न कयाइ नत्थि न कयाइ न भविस्सति भुविं य भवइ य भविस्सति य धुवा नियमा सासया अक्खया अव्वया अवट्ठित्ता निच्चा एवं जाव अधेसत्तमा ।

[९३] इमीसे णं भंते रयणप्पभाए पुढवीए रयणस्स कंडस्स उवपिल्लातो चरिमंताओ हेट्ठिल्ले चरिमंते एस णं केवतियं अबाधाए अंतरे पन्नत्ते गोयमा एककं जोयणसहस्सं अबाधाए अंतरे पन्नत्ते इमीसे णं भंते रयणप्पभाए पुढवीए रयणस्स कंडस्स उवरिल्लातो चरिमंताओ वइरस्स कंडस्स उवरिल्ले चरिमंते एस णं केवतियं अबाधाए अंतरे पन्नत्ते गोयमाएककं जोयणसहस्सं, इमीसे णं भंते रयणप्पभाए पुढवीए रयणस्स कंडस्स उवरिल्ला चरिमंताओ वइरस्स कंडस्स हेट्ठिल्ले चरिमंते एस णं केवतियं अबाधाए अंतरे पन्नत्ते गोयमा दो जोयणसहस्साइं अबाधाए अंतरे पन्नत्ते एवं कंडे-कंडे दो दो आलावगा जाव रिड्डस्स कंडस्स हेट्ठिल्ले चरिमंते सोलस जोयणसहस्साइं अबाधाए अंतरे पन्नत्ते इमीसे णं भंते रयणप्पभाए पुढवीए रयणस्स कंडस्स उवरिल्लाओ चरिमंताओ पंकबहुलस्स कंडस्स उवरिल्ले चरिमंते एस णं केवतियं अबाधाए अंतरे पन्नत्ते गोयमा सोलस जोयणसहस्साइं, हेट्ठिल्ले चरिमंते एककं जोयणस-यसहस्सं आवबहुलस्स उवरिल्ले एककं जोयणसयसहस्सं हेट्ठिल्ले चरिमंते असीउत्तरं जोयणसय-सहस्सं घणोदहिस्स उवरिल्ले असिउत्तरजोयणसयसहस्सं हेट्ठिल्ले चरिमंते दो जोयणसयसहस्साइं, इमीसे णं भंते रयणप्पभाए पुढवीए घणवातस्स उवरिल्ले चरिमंते दो जोयणसयसहस्साइं हेट्ठिल्ले चरिमंते असंखेज्जाइं जोयणसयसहस्साइं इमीसे णं भंते रयणप्पभाए पुढवीए तनुवातस्स उवरिल्ले चरिमंते असंखेज्जाइं जोयणसयसहस्साइं अबाधाए अंतरे हेट्ठिल्लेवि असंखेज्जाइं जोयणसयसहस्साइं एवं ओवासंतरेवि,

दोच्चाए णं भंते पुढवीए उवरिल्लाओ चरिमंताओ हेट्ठिल्ले चरिमंते एस णं केवतियं अबाधाए अंतरे पन्नत्ते गोयमा बत्तीसुत्तरं जोयणसयसहस्सं, दोच्चाए धणोदधिस्सुवरिल्ले चरिमंते एवं चेव हेट्ठिल्ले चरिमंते बावण्णुत्तरं जोयणसतसहस्सं घणतनुवातोवासंतराणं जहा रयणाए, तच्चाए उवरिल्लाओ चरिमंताओ हेट्ठिल्ले चरिमंते अट्ठावीसुत्तरं जोयणसतसहस्सं अबाधाए अंतरे पन्नत्ते घणोदधिस्स उवरिल्ले चरिमंते एवं चेव हेट्ठिल्ले अड्यालीसुत्तरं जोयणसतसहस्सं सेसं जहा रयणाए चउत्थीए हेट्ठिल्लातो उवरिल्ले वीसुत्तरं जोयणसतसहस्सं अबाधाए अंतरे पन्नत्ते घणोदधिस्स उवरिल्ले एवं चेव हेट्ठिल्ले चत्तालीसुत्तरं जोयणसतसहस्सं सेसं जहा रयणाए पंचमाए उवरिल्लातो हेट्ठिल्ले अट्ठारसुत्तरं जोयणसतसहस्सं अबाधाए अंतरे पन्नत्ते घणोदधिस्सुवरिल्ले एवं चेव हेट्ठिम अट्ठतीसुत्तरं जोयणसतसहस्सं सेसं जहा- रयणाए छट्ठीए उवरिमातो हेट्ठिमं सोलसुत्तरं जोयणसतसहस्सं अबाधाए अंतरे पन्नत्ते घणोदधिस्स उवरिमं एवं चेव हेट्ठिल्ले छत्तीसुत्तरं जोयणसतसहस्सं सेसं जहा- रयणाए सत्तमाए हेट्ठिल्लातो उवरिल्ले अट्ठुत्तरं जोयणसतसहस्सं अबाधाए अंतरे पन्नत्ते घणोदधिस्स उवरिमं एवं चेव हेट्ठिमं

अट्ठावीसुत्तरं

पडिवत्ति-३

जोयणसतसहस्सं सेसं जहा- रयणाए एस णं भंते पुढवीए उवरिल्लातो चरिमंतातो उवासंतरस्स हेड्डिल्ले चरिमंते केवतियं अबाधाए अंतरे पन्नत्ते गोयमा असंखेज्जाइ जोयणसहस्साइ अबाधाए अंतरे पन्नत्ते ।

[९४] इमा णं भंते रयणप्पभा पुढवी दोच्चं पुढविं पणिहाय बाहल्लेणं किं तुल्ला विसेसाहिया संखेज्जगुणा वित्थारेणं किं तुल्ला विसेसहीणा संखेज्जगुणहीणा गोयमा इमा णं रयणप्पभा पुढवी दोच्चं पुढविं पणिहाय बाहल्लेणं नो तुल्ला विसेसाहिया नो संखेज्जगुणा वित्थारेण नो तुल्ला विसेसहीणा नो संखेज्जगुणहीणा दोच्चा णं भंते पुढवी तच्चं पुढविं पणिहाय बाहल्लेणं किं तुल्ला एवं चेव भाणितव्वं एवं तच्चा चउत्थी पंचमी छट्ठी, छट्ठी णं भंते पुढवी सत्तमं पुढविं पणिहाय बाहल्लेणं किं तुल्ला विसेसाहिया संखेज्जगुणा एवं चेव भाणियव्वं सेवं भंते सेवं भंते ।

◦ तच्चाए पडिवत्तिए नेरइअस्स पढमो उद्देसओ समत्तो ◦

□ 'नेरइय' -बीओ-उद्देसो □

[९५] कइ णं भंते पुढवीओ पन्नत्ताओ गोयमा सत्त पुढवीओ पन्नत्ताओ तं जहा- रयणप्पभा जाव अहेसत्तमा इमीसे णं भंते रयणप्पभाए पुढवीए असीउत्तरजोयणसयसहस्सबाहल्लाए उवरिं केवतियं ओगाहित्ता हेट्ठा केवइयं वज्जित्ता मज्झे केवतिए केवतिया निरयावाससयसहस्सा पन्नत्ता गोयमा इमीसे णं रयणप्पभाए पुढवीए असीउत्तरजोयणसयसहस्सबाहल्लाए उवरिं एगं जोयणसहस्सं ओगाहित्ता हेट्ठावि एगं जोयणसहस्सं वज्जित्ता मज्झे अडहत्तरे जोयणसयसहस्से एत्थ णं रयणप्पभाए पुढवीए नेरइयाणं तीसं निरयावाससयसहस्साइं भवंतित्तिमक्खाया ते णं नरगा अंतो वट्ठा बाहिं चउरंसा जाव असुभा नरएसु वेयणा एवं एणं अभिलावेणं उवजुंजिऊण भाणियव्वं ठाणप्पयाणुसारेणं जत्थ जं बाहल्लं जत्थ जत्तिया वा नरयावाससयसहस्सा जाव अहेसत्तमाए पुढवीए अहेसत्तमाए मज्झिमं केवतिए कति अनुत्तरा महइमहालया महानिरया पन्नत्ता एवं पुच्छित्तव्वं वागरेयव्वंपि तहेव छट्ठि सत्तमासु काऊअगणिवण्णाभा भाणियव्वा ।

[९६] इमीसे णं भंते रयणप्पभाए पुढवीए नरका किंसंठिया पन्नत्ता गोयमा दुविहा पन्नत्ता तं जहा- आवलियपविट्ठा य आवलियबाहिरा य तत्थ णं जेते आवलिय पविट्ठा ते तिविहा पन्नत्ता तं जहा- वट्ठा तंसा चउरंसा तत्थ णं जेते आवलियबाहिरा ते नानासंठाणसंठिया पन्नत्ता तं जहा- अयकोट्टसंठित्ता पिट्ठपणगसंठित्ता कंडूसंठिता लोहीसंठिता कडाहसंठिता थालीसंठिता पिहडगसंठिता किण्हसंठिता उडवसंठिता मुरवसंठिता मुयंगसंठिता नंदिमुयंगसंठिता आलिंगकसंठिता सुघोससंठिता ददरयसंठिता पणवसंठिता पडहसंठिता भेरिसंठिता झल्लरीसंठिता कुत्तुबकसंठिता नालिसंठिता एवं जाव तमाए, अहेसत्तमा णं भंते पुढवीए नरका वट्ठे य तंसा य ।

[९७] इमीसे णं भंते रयणप्पभाए पुढवीए नरका केवतियं बाहल्लेणं गोयमा तिण्णि जोयणसहस्साइं, हेट्ठघणा सहस्सं मज्झेझुसिरासहस्सं उप्पिं संकुइया सहस्सं एवं जाव अहेसत्तमाए इमीसे णं भंते रयणप्पभाए पुढवीए नरका केवतियं आयामविकखंभेणं केवइयं परिकखवेणं पन्नत्ता गोयमा दुविहा, संखेज्जवित्थडा य असंखेज्जवित्थडा य तत्थ णं जेते संखेज्जवित्थडा ते णं संखेज्जाइं जोयणसहस्साइं आयामविकखंभेणं संखेज्जाइं जोयणसहस्साइं परिकखवेणं तत्थ णं जेते असंखेज्जवित्थडा ते णं असंखेज्जाइं जोयणसहस्साइं आयामविकखंभेणं असंखेज्जाइं जोयणसहस्साइं परिकखवेणं एवं जाव तमाए, अहेसत्तमां णं भंते पुच्छा गोयमा दुविहा-संखेज्जवित्थडे य असंखेज्जवित्थडा य तत्थ णं जेसे संखेज्ज-पडिवत्ति-३

वित्तडे से णं एककं जोयणसयसहस्सं आयामविकखंभेणं तिण्णि जोयणसयसहस्साइं सोलस सहस्साइं दोण्णि य सत्तावीसे जोयणसए तिण्णि कोसे य अद्वावीसं च धणुसतं तेरस य अंगुलाइं अद्धंगुलयं च किंचिविसेसाधिए परिकखेवेणं तत्थ णं जेते असंखेज्जवित्थडा ते णं असंखेज्जाइं जोयणसहस्साइं परिकखेवेणं तत्थ णं जेते असंखेज्जवित्थडा ते णं असंखेज्जाइं जोयणसहस्साइं आयामविकखंभेणं असंखेज्जाइं जोयणसहस्साइं परिकखेवेणं इमीसे णं भंते रयणप्पभाए पुढवीए नरया केरिसया वण्णेणं पन्नत्ता गोयमा काला कालोभासा गंभीरलोमहरिसा भीमा उत्तासणया परमकिण्हा वण्णेणं एवं जाव अधेसत्तमा पुढवीए ।

[९८] इमीसे णं भंते रयणप्पभाए पुढवीए नरका केरिसया गंधेणं पन्नत्ता गोयमा से जहानामए अहिमडेति वा गोमडेति वा सुणमडेति वा मज्जारमडेति वा मणुस्समडेति वा महिसमडेति वा मूसगडेति वा आसमडेति वा हत्थिमडेति वा सीहमडेति वा वग्घमडेति वा विगमडेति वा दीवियमडेति वा मयकुहिय-विणङ्ग-कुणिमवावण्मदुरभिगंधे असुइविलीणविगय-बीभच्छदरिसणिज्जे किमिजालाउलसंसत्ते भवेयारूवे सिया नो इण्ठे सम्भे गोयमा इमीसे णं रयणप्पभाए पुढवीए नरगा एत्तो अणिट्ठतरका चेव अकंततरका चेव जाव अमणामतरका चेव गंधेणं पन्नत्ता एवं जाव अधेसत्तमाए पुढवीए इमीसे णं भंते रयणप्पभाए पुढवीए नरया केरिसया फासेणं पन्नत्ता गोयमा से जहानामए असिपत्तेइ वा खुरपत्तेइ वा कलंबचीरियापत्तेइ वा सत्तग्गेइ वा कुंतग्गेइ वा तोमरग्गेति नारायग्गेति वा सूलग्गेति वा लउलग्गेति वा भिंडिमालग्गेति वा सूचिकलावेति वा विच्छुकंटएति वा कवियच्छूति वा इंगालेति वा जालेति वा मुम्मुरेति वा अच्चिति वा अलाएति वा सुद्धागणीइ व भवे एयारूवे सिया नो तिण्ठे सम्भे गोयमा इमीसे णं रयणप्पभाए पुढवीए नरगा एत्तो अणिट्ठतरका चेव जाव अमणातरका चेव फासे णं पन्नत्ता एवं जाव अधेसत्तमाए पुढवीए इमीसे णं भंते रयणप्पभाए पुढवीए नरका केमहालया पन्नत्ता गोयमा अयण्णं जंबुद्धीवे दीवे सव्वदीवसमुद्धानं सव्वब्भंतरए सव्वखुड्डाए वट्ठे तेल्लापूवसंठाणसंठिते वट्ठे रथचक्कवालसंठाणसंठिते वट्ठे पुक्खरकणियासंठाणसंठिते वट्ठे पडिपुन्नचंदसंठाणसंठिते एककं जोयणसतसहस्सं आयामविकखंभेणं जाव किंचिविसेसाधिए परिकखेवेणं देवे णं महिइढीए जाव इणामेव-इणामेत्तिकट्ठु इमं केवलकप्पं जंबुद्धीवं दीवं तिहिं अच्छरानिवाएहिं तिसत्तक्खुत्तो अनुपरियट्ठित्ताणं हव्वमागच्छेज्जा से णं देवे ताए उक्किट्ठाए जाव दिव्वाए देवगतीए वीतिवयमाणे-वीतिवयमाणे जहण्णेणं एगाहं वा दुयाहं वा तियाहं वा उक्कोसेणं छम्मासेणं वीतिवएज्जा-अत्थेगतिए वीतिवएज्जा अत्थेगतिए नो वीतिवएज्जा एमहालता णं गोयमा इमीसे णं रयणप्पभाए पुढवीए नरगा पन्नत्ता एवं जाव अधेसत्तमाए नवरंअधेसत्तमाए अत्थेगतियं नरगं वीतिवएज्जा अत्थेगइए नरगे नो वीतिवएज्जा ।

[९९] इमीसे णं भंते रयणप्पभाए पुढवीए नरगाकिंमया पन्नत्ता गोयमा सव्ववइरामया पन्नत्ता तत्थ णं नरएसु बहवे जीवा य पोग्गला य अवक्कमंति विउक्कमंति चयंति उववज्जंति सासता णं ते नरगा दव्वट्ठयाए वण्णपज्जवेहिंजावफासपज्जवेहिं असासया एवं जाव अहेसत्तमाए ।

[१००] इमीसे णं भंते रयणप्पभाए पुढवीए नेरइया कतोहिंतो उववज्जंति-किं असण्णीहिंतो उववज्जंति सरीसिवेहिंतो, पक्खीहंतो, चउप्पएहिंतो, उरगेहिंतो, हत्थियाहिंतो, मच्छमणुएहिंतो उववज्जंति गोयमा असण्णीहिंतो उववज्जंति जाव मच्छमणुएहिंतो वि उववज्जंति ।

[१०१] असण्णी खलु पढमं दोच्चं च सीरसिवा ततिया पक्खी ।

पडिवत्ति-३

सीहा जंति चउत्थिं उरगा पुण पंचमिं जंति ।।

[१०२] छट्ठिं च इत्थीयाओ मच्छा मणुया य सत्तमिं जंति जाव अधेसत्तमाए पुढवीए नेरइया नो असण्णीहिंतो जाव नो इत्थियाहिंतो उववज्जंति मच्छमणुस्सेहिंतो उववज्जंति इमीसे णं भंते रयणप्पभाए पुढवीए नेरइया एक्कसमएणं केवतिया उववज्जंति गोयमा जहण्णेणं एक्को वा दो वा तिण्णि वा उक्कोसेणं संखेज्जा वा असंखिज्जा वा एवं जाव अधेसत्तमाए इमीसे णं भंते रयणप्पभाए पुढवीए नेरइया समए-समए अवहीरमाणा-अवहीरमाणा केवतिकालेणं अवहिता सिता गोयमा ते णं असंखेज्जा समए-समए अवहीरमाणा-अवहीरमाण असंखेज्जाहिं उस्सप्पिणी-ओसप्पिणीहं अवहीरंति नो चेव णं अवहिता सिता जाव अधेसत्तमा इमीसे णं भंते रयणप्पभाए पुढवीए नेरइयाणं केमहालिया सरीरोगाहणा, दुविहा भवधारणिज्जा य उत्तरवेउव्विया य तत्थ णं जासा भवधारणिज्जा सा जहण्णेमं अंगुलस्स असंखेज्जतिभागं उक्कोसेणं सत्तधणूइं तिण्णि य रयणीओ छच्च अंगुलाइं तत्थ णं जासा उत्तरवेउव्विया सा जहण्णेणं अंगुलस्स संखेज्जतिभागं उक्कोसेणं पन्नररसधणूइं अइढाइज्जातो रयणीओ उत्तरवेउव्विया जहण्णेणं अंगुलस्स संखेज्जभागं उक्कोसेणं एक्कतीसं धणूइं एक्का रयणी तच्चाए भवधारणिज्जे एक्कतीसंधणूइं एक्का रयणी उत्तरवेउव्विया बावद्धिधणूइं दोण्णि रयणीओ चउत्थीए भवधारणिज्जे बावद्धिधणूइं दोण्णि य रयणीओ उत्तरवेउव्विया पणवीसंधणुसयं पंचमीए भवधारणिज्जे पणवीसंधणुसयं त्तरवेउव्विया अइढाइज्जाइं धणुसयाइं छट्ठीए भवधारणिज्जा अइढाइज्जाइं धणुसयाइं उत्तरवेउव्विया पंचधणुसयाइं सत्तमाए भवधारणिज्जा पंचधणुसयाइं उत्तरवउव्विए धणुसहस्सं ।

[१०३] इमीसे णं भंते रयणप्पभाए पुढवीए नेरइयाणं सरीरया किसंधयणी पन्नत्ता गोयमा छण्हं संघयणाणं असंधयणी-नेवट्ठी नेव छिरा नवि ण्हारू जे पोग्गला अणिट्ठा जाव अमणामा ते तेसिं सरीरसंघायत्ताए परिणमंति एवं जाव अधेसत्तमाए इमीसे णं भंते रयणप्पभाए पुढवीए नेरइयाणं सरीरा किसंठिता पन्नत्ता गोयमा दुविहा, भवधारणिज्जा य उत्तरवेउव्विया य तत्थ णं जेते भवधारणिज्जा ते हुंडसंठिया जेते उत्तरवेउव्विया तेविं हुंडसंठिया पन्नत्ता एवं जाव अहेसत्तमाए, इमीसे णं भंते रयणप्पाए पुढवीए नेरइयाणं सरीरगा केरिसगा वण्णेणं पन्नत्ता गोयमा काला कालोभासाजाव परमकिण्हा वण्णेणं पन्नत्ता एवं जाव अहेसत्तमाए, इमीसे णं भंते रयणप्पभाए पुढवीए नेरइयाणं सरीरया केरिसया गंधेणं पन्नत्ता गोयमा से जहानामए अहिमडेइ वा तं चेव जाव अहेसत्तमाए इमीसे णं भंते रयणप्पभाए पुढवीए नेरइयाणं सरीरया केरिसया फासेणं पन्नत्ता गोयमा फुडितच्छविविच्छविया खरफरुस-झाम-झुसिरा पन्नत्ता एवं जाव अधेसत्तमाए ।

[१०४] इमीसे णं भंते रयणप्पभाए पुढवीए नेरइयाणं केरिसया पोग्गला ऊसासत्ताए परिणमंति गोयमा जे पोग्गला अणिट्ठा जाव अमणामा ते तेसिं ऊसासत्ताए परिणमंति एवं जाव अहेसत्तमाए एवं आहारस्सवि सत्तसुवि इमीसे णं भंते रयणप्पभाए पुढवीए नेरइयाणं कति लेसाओ पन्नत्ताओ गोयमा एक्का काउलेसा पन्नत्ता एवं सक्करप्पभाएवि वालुयप्पभाए पुच्छा दो लेसाओ पन्नत्ताओ तं जहा- नीललेसा काउलेसा य ते बहुतरगा जे काउलेसा ते थोवतरगा जे नीललेस्सा पंकप्पभाए पुच्छा एक्का नीललेसा पन्नत्ता धूमप्पभाए पुच्छा गोयमा दो लेस्साओ पन्नत्ताओ तं जहा- किण्हलेस्सा य नीललेस्सा य ते बहुतरका जे नीललेस्सा ते थोवतरका जे किण्हलेसा, तमाए पुच्छा गोयमा एक्का किण्हलेस्सा अधेसत्तमाए एक्का परमकिण्हलेस्सा इमीसे णं भंते रयणप्पभाए पुढवीए नेरइया किं सम्म-

दिट्ठी मिच्छदिट्ठी सम्मामिच्छदिट्ठी गोयमा सम्मदिट्ठी वि मिच्छदिट्ठीवि सम्मामिच्छदिट्ठीवि एवं जाव अहेसत्तमाए इमीसे णं भंते रयणप्पभाए पुढवीए नेरइया किं नाणी अन्नाणी गोयमा नाणीवि अन्नाणीवि जे नाणी ते नियमा तिन्नाणी तं जहा- आभिणिबोहियनाणी सुयनाणी अवधिनाणी जे अन्नाणी ते अत्थेगतिया दुअन्नाणी अत्थेगइया तिअन्नाणी जे दुअन्नाणी ते नियमा मतिअन्नाणी य सुयअन्नाणी य जे तिअन्नाणी ते नियमा मतिअन्नाणी सुयअन्नाणी विभंगनाणीवि सेसा णं नाणीवि अन्नाणीवि तिण्णि जाव अधेसत्तमाए इमीसे णं भंते रयणप्पभाए किं मणजोगी वइजोगी कायजोगी तिण्णिवि एवं जाव अहेसत्तमाए इमीसे णं भंते रयणप्पभाए पुढवीए नेरइया किं सागरोवउत्ता अणागारोवउत्ता गोयमा सागरोवउत्तावि अणागारोवउत्तावि एवं जाव अहेसत्तमाए पुढवीए इमीसे णं भंते रयणप्पभाए पुढवीए नेरइया ओहिणा केवतियं खेत्तं जाणंति-पासंति गोयमा जहन्नेणं अद्धुगाउयाइं उक्कोसेणं चत्तारि गाउयाइं सक्करप्पभाए जहण्णेणं तिन्नि गाउयाइं उक्कोसेणं अद्धुगाइं एवं अद्धुगाउयं परिहायति जाव अधेसत्तमाए जहण्णेणं अद्धुगाउयं उक्कोसेणं गाउयं इमीसे णं भंते रयणप्पभाए पुढवीए नेरइयाणं कति समुग्घाता पन्नत्ता गोयमा चत्तारि समुग्घाता पन्नत्ता तं जहा- वेदणासमुग्घाए कसायसमुग्घाए मारणंतियसमुग्घाए वेउव्वियसमुग्घाए एवं जाव अहेसत्तमाए ।

[१०५] इमीसे णं भंते रयणप्पभाए पुढवीए नेरइया केरिसयं खुहप्पिवासं पच्चणुब्भवमाणा विहरंति गोयमा एगमेगस्स णं रयणप्पभापुढविनेरइयस्स असब्भावपट्ठवणाए सववोदधी वा सव्वपोग्गले वा आसगंसि पक्खिवेज्जा नो चेव णं से रयणप्पभाए पुढवीए नेरइए तित्ते वासिता वितण्हे वा सिता एरिसया णं गोयमा रयणप्पभाए नेरइया खुधप्पिवासं पच्चणुब्भवमाणा विहरंति एवं जाव अधेसत्तमाए इमीसे णं भंते रयणप्पभाए पुढवीए नेरइया किं एकत्तं पभू विउव्वित्तए पुहत्तं पभू विउव्वित्तए गोयमा एगत्तंपि पभू विउव्वित्तए एगत्तं विउव्वेमाणा एगं महं मोग्गररूवं वा मुसुंढिरूवं वा एवं-मोग्गर-मुसुंढि-करवत-असि-सत्ती-हल-गता-मुसल-चक्का नाराय-कुंत-तोमर-सूल-लउड-भिंडमाला य जाव भिंडमालरूवं वा पुहत्तं विउव्वेमाणा मोग्गररूवाणि वा जाव भिंडमालरूवाणि वा ताइं संखेज्जाइं नो असंखेज्जाइं संबद्धाइं नो असंबद्धाइं सरिसाइं नो असरिसाइं विउव्वंति विउव्वित्ता अण्णमण्मस्स कायं अभिहणमाणा-अभिहणमाणा वेयणं उदीरंति-उज्जलं विउलं पगाढं कक्कसं कडुयं फरुसं निडुरं चंडं तिव्वं दुक्खं दुग्गं दुरहियासं एवं जाव धमप्पभाए छट्ठसत्तमासु णं पुढवीसु नेरइया बहू महंताइं लोहियकुंथुरूवाइं वइरामयतुंडाइं गोमयकीडसमाणाइं विउव्वंति विउव्वित्ता अन्नमन्नस्स कायं समतुरंगेमाणा-समतुरंगेमाणा खायमाणा-खायमाणा सयपोरागकिमिया विव चालेमाणा-चालेमाणा अंतो-अंतो अनुप्पविसमाणा-अनुप्पविसमाणा वेदणं उदीरंति-उज्जलं जाव दुरहियासं इमीसे णं भंते रयणप्पभाए पुढवीए नेरइया किं सीतवेदणं वेदंति उसिणवेदणं वेदंति सीओसिणवेदणं वेदंति गोयमा नो सीयं वेदणं वेदंति उसिणं वेदणं वेदंति नो सीतोसिणं वेदणं वेदंति एवं जाव वालुयप्पभाए पंकप्पभाए पुच्छा गोयमा सीयंपि वेदणं वेदंति उसिणंपि वेदणं वेदंति नो सीओसिणवेदणं वेदंति ते बहुतरगा जे उसिणं वेदणं वेदंति ते थोवतरगा जे सीतं वेदणं वेदंति, धूमप्पभाए पुच्छा गोयमा सीतंपि वेदणं वेदंति उसिणंपि वेदणं वेदंति नो सीओसिणवेदणं वेदंति ते बहुतरगा जे सीतवेदणं वेदंति ते थोवतरका जे उसिणं वेदणं वेदंति, तमाए सीयं वेदणं वेदंति नो उसिणं वेदणं वेदंति नो सीतोसिणं वेदंति एवं अहेसत्तमाए नवरं-परमसीयं ।

इमीसे णं भंते रयणप्पभाए पुढवीए नेरइया केरिसयं निरयभवं पच्चणुभवमाणा विहरंति

गोयमा ते णं तत्थ निच्चं भीता निच्चं छुहिया निच्चं तत्था निच्चं तसिता निच्चं उव्विग्गा निच्चं उपप्पुआ निच्चं परमसुभमउलमणुबद्धं निरयभवं पच्चणुभवमाणा विहरंति एवं जाव अधेसत्तमाए अहेसत्तमाए णं पुढवीए पंच अनुत्तरा महतिमहालया महानरगा पन्नत्ता तं जहा- काले महाकाले रोरुए महारोए अप्पतिट्ठाणे तत्थ इमे पंच महापुरिसा अनुत्तरेहिं दंडसमादाणेहिं कालमासे कालं किच्चा अप्पतिट्ठाणे नरए नेरइयत्ताए उवण्णा तं जहा- रामे जमदग्गिपुत्ते दढाऊलेच्छतिपुत्ते वसू उवरिचरे सुभूमे कोरव्वे बंभदत्ते चुलणिसुते ते णं तत्थ वेदणं वेदंति-उज्जलं विउलं जाव दुरहियासं, उसिणवेदणिज्जेसु णं भंते नरएसु नेरइया केरिसयं उसिणवेदणं पच्चणुभवमाणा विहरति गोयमा से जहानामए-कम्मरदारए सिता-तरुणे बलवं जुगवं जुवाणे अप्पायंके थिरग्गहत्थे दढपाणि-पाय-पास-पिट्ठंतरोरुपरिणए घणनिचिय-वलियवट्ठखंधे चम्मेट्ठग-दुघण-मुट्ठियसमाहयनिचियगायगत्ते उरस्सबलसमण्णागए तलजमलजुयलाहूं लंघण-पवण-जवण-पमद्वणसमत्थे छेए दक्खे पट्ठे कुसले मेहावी निउणसिप्पोवगए एगं महं अयपिंडं उदगवारगसमाणं गहाय तं ताविय-ताविय कोट्टिय-कोट्टिय जाव एगाहं वा दुयाहं वा तियाहं वा उक्कोसेमं अद्धमासं साहणेज्जा से णं तं सीतं सीतीभूतं अओमएणं संडासएणं गहाय असब्भावपट्ठवणाए उसिणवेदणिज्जेसु नरएसु पक्खिवेज्जा से णं तं उम्मिसियणिमिसियंतरेणं पुनरवि पच्चुद्धरिस्सामित्तिकट्ठु पविरायमेव पासेज्जा पविलीणमेव पासेज्जा पविद्धत्थमेव पासेज्जा नो चेव णं संचाएति अविरायं वा अविलीणं वा अविद्धत्थ वा पुनरवि पच्चुद्धरित्तए से जहा- वा मत्तमातंगे दुपाए कुंजरे सट्ठिहयणे पढमसरयकालसमयंसि वा चरमनिदायघकालसमयंसि वा उण्हाभिहए तण्हाभिहए दवग्गिजालाभिहए आउरे झूसिए पिवासिए नुब्बले किलंते एक्कं महं पुक्खरिणिं पासेज्जा-चाउक्कोणं समतीरं अनुपुव्वसुजायवप्प-गंभीर-सीतलजलं संछण्णपत्तभिसमुणालं बहुउप्पल-कुमुद-नलिण-सुभग-सोगंधिय-पुंडरीय-सयपत्त-सहस्सपत्त-केसर-फुल्लोवचियं छप्पयपरिभुज्जमाणकमलं अच्छविमलसलिलपुन्नं परिहत्थभमंत-मच्छकच्छमं अणेगस-उणगणमिहुणय-विरचिय-सद्दुन्नइयमहुरसरनाइयं तं पासइ पासित्ता तं ओगाहइ ओगाहित्ता से णं तत्थ उण्हंपि पविणेज्जा तण्हंपि पविणेज्जा खुहंपि पविणेज्जा जरंपि पविणेज्जा दाहंपि पविणेज्जा निट्ठाएज्जा वा पयलाएज्ज वा सतिं वा रतिं वा धितिं वा मतिं वा उवलभेज्जा सीए सीयभूए संकसमाणे-संकसमाणे साया-सोक्खबहुले यावि विहरेज्जा एवामेव गोयमा असब्भावपट्ठवणाए उसिणवेदणिज्जेहिंतो नरएहिंतो नेरइए उव्वट्ठिए समाणे जाइं इमाइं मणुस्सलोयंसि भवंति तं जहा-गोलियालिंछाणि वा सौंडियालिंछाणि वा भंडियालिंछाणि वा तिलागणीति वा तुसागणीति वा भुसागणीति वा नलागणीति वा अयागराणि वा तंबागराणि वा तउयागराणि वा सीसागराणि वा रुप्पागराणि वा सुवण्णागराणि व इट्ठावाएति वा कुंभारा-वेति वा कवेल्लुयावाएति वा लोहारंबरिसेति वा जंतवाडचुल्लीति वा-तत्ताइं समजोतिभूयाइं फुल्लकिंसुय-समाणाइं उक्कासहस्साइं विणिम्मुयमाणाइं जालासहस्साइं पमुच्चामाणाइं इंगालसहस्साइं पविक्खिरमाणाइं अंतो-अंतो हुहुयमाणाइं चिट्ठंति ताइं पासइ पासित्ता ताइं ओगाहइ ओगाहित्ता से णं तत्थ उण्हंपि पविणेज्जा जाव यावि विहरेज्जा भवेयारूवे सिया नो इणट्ठे समट्ठे गोयमा उसिणवेदणिज्जेसु नरएसु नेरइया एत्तो अणिट्ठतरिय चेव उसिणवेदणं पच्चणुभवमाणा विहरंति ।

सीयवेदणिज्जेसु णं भंते नरएसु नेरइया केरिसयं सीयवेदणं पच्चणुभवमाणा विहरंति गोयमा से जहानामए कम्मरदारए सिया तरुणे जुगवं बलवं जाव निउणसिप्पोवगते एगं महं अयपिंडं दगवारसमाणं गहाय ताविय-ताविय कोट्टिय-कोट्टिय जाव एगाहं व दुयाहं वा तियाहं वा उक्कोसेणं मासं

साहणेज्जा से णं तं उसिणं उसिणभूतं अयोमएणं संडासएणं गहाय असब्भावपट्टवणाए सीयवेदणिज्जेसु नरएसु पक्खिवेज्जा से तं उम्मिसियनिमिसियंतरेणं पुनरवि पच्चुद्धरिस्सामीति कट्ठु पविरायमेव पासेज्जा जाव नो चेव णं संचाएज्जा पुनरवि पच्चुद्धरित्ते से जहानामए मत्तमायंगे जाव सायासोक्खबहुले यावि विहरेज्जा एवामेव गोयमा असब्भावपट्टवणाए सीतवेदणेहिंतो नरएहिंतो नेरइए उव्वट्टिए समाणे जाइं इमाइं इहं माणुस्सलोए हवंति तं जहा- हिमाणि वा हिमपुंजाणि वा हिमपडलाणि वा हिमकूडाणि वा सीयाणि वा सीयपुंजाणि वा सीयपडलाणि वा सीयकूडाणि वा तुसाराणि वा तुसारपुंजाणि वा तुसारपडलाणि वा तुसारकूडाणि वा ताइं पासति पासित्ता ताइं ओगाहति ओगाहित्ता से णं तत्थ सीतंपि पविणेज्जा तण्हंपि पविणेज्जा खुहंपि पविणेज्जा जरंपि पविणेज्जा दाहंपि पविणेज्जा निद्धाएज्ज वा पयलाएज्जा वा जाव उसिणे उसिणभूए संकसमाणे-संकसमाणे सायासोक्खबहुले यावि विहरेज्जा गोयमा सीयवेयणिज्जेसु नरएसु नेरइया एत्तो अणिट्ठतरियं चेव सीतवेदणं पच्चणुभवमाणा विहरंति ।

[१०६] इमीसे णं भंते रयणप्पभाए पुढवीए नेरइयाणं केवतियं कालं ठिती पन्नत्ता गोयमा जहण्णेणवि उक्कोसेणवि ठिती भाणितत्त्वा जाव अधेसत्तमाए ।

[१०७] इमीसे णं भंते रयणप्पभाए पुढवीए नेरइया अनंतरं उव्वट्टियं कहिंगच्छंति कहितं उववज्जंति-किं नेरइयसु उववज्जंति किं तिरिक्खजोणिएसु उववज्जंति एवं उव्वट्टणा भाणितत्त्वा जहा-वक्कंतीए तहा इहवि जाव अहेसत्तमाए ।

[१०८] इमीसे णं भंते रयणप्पभाए पुढवीए नेरइया केरिसयं पुढविफासं पच्चणुभवमाणा विहरंति गोयमा अणिट्ठं जाव अमणामं एवं जाव अहेसत्तमाए इमीसे णं भंते रयणप्पभाए पुढवीए नेरइया केरिसयं आउफासं पच्चणुभवमाणा विहरंति गोयमा अणिट्ठं जाव अमणामं एवं जाव अहेसत्तमाए एवं जाव वणप्फतिफासं अधेसत्तमाए पुढवीए, इमा णं भंते रयणप्पभापुढवी दोच्चं पुढविं पणिहाय सव्वमहंतिया-बाहल्लेणं सव्वक्खुड्डिया सव्वंतेसु हंते गोयमा इमा णं रयणप्पभापुढवी दोच्चं पुढविं पणिहाय जाव सव्वक्खुड्डिया सव्वंतेसु हंता गोयमा इमा णं रयणप्पभापुढवी दोच्चं पुढविं पणिहाय जाव सव्वक्खुड्डिया सव्वंतेसु दोच्चा णं भंते पुढवी तच्चं पुढविं पणिहाय सव्वमहंतिया बाहल्लेणं पुच्छा हंता गोयमा दोच्चा णं पुढवी जाव सव्वक्खुड्डिया सव्वंतेसु एवं एएणं अभिलावेणं जाव छट्ठिया पुढवी अहेसत्तमं पुढविं पणिहाय सव्वक्खुड्डिया सव्वंतेसु ।

[१०९] [इमीसे णं भंते रयणप्पभाए पुढवीए निरयपरिसामंतेसु जे पुढविक्काइया जाव वणप्फतिकाइया ते णं भंते जीवा महाकम्मतरा चेव महाकिरियतरा चेव महाआसवतरा चेव महावेयणतरा चेव हंता गोयमा इमीसे णं रयणप्पभाए पुढवीए निरयपरिसामंतेसु तं चेव जाव महावेदणतरा चेव एवं जाव अधेसत्तमा] ।

[११०] इमीसे णं भंते रयणप्पभाए पुढवीए तीसाए नरयावाससयसहस्सेसु इक्कमिक्कंसि निरयावासंसि सव्वेपाणा सव्वेभूया सव्वेजीवा सव्वेसत्ता पुढवीकाइयत्ताए जाव वणस्सइ-काइयत्ताए नेरइयत्ताए उववन्नपुव्वा हंता गोयमा असतिं अदुवा अनंतखुत्तो एवं जाव अहेसत्तमाए [पुढवीए] ।

[१११] पुढवीं ओगाहित्ता नरगा संठाणमेव बाहल्लं ।

विक्खंभपरिक्खेवे वण्णो गंधो य फासो य ॥

[११२] तेसिं महालयत्तं उवमा देवेण होइ कायव्वा ।

- जीवा य पोग्गला वक्कमंति तह सासया निरया ॥
 [११३] उववायपरीमाणं अवहारुच्चत्तमेव संघयणं ।
 संठाणवण्णगंधे फासे ऊसासमाहारे ॥
 [११४] लेसा दिट्ठी नाणे जोगुवओगे तहा समुग्धाए ।
 तत्तो य खुप्पिवासा विउव्वणा वेयणा य भए ॥
 [११५] उववाओ पुरिसाणं ओवम्मं वेयणाए दुवाहए ।
 ठिइ उव्वट्ठण पुढवी उववाओ सव्वजीवाणं ॥
 [११६] एयाओ संगहणि गाहाओ ।

० तच्चाए पडिवत्तिए नेरइअस्स बीओ उद्देसओ समत्तो ०

॥ “नेरइय” तइओ-उद्देसो ॥

[११७] इमीसे णं भंते रयणप्पभाए पुढवीए नेरइया केरिसयं पोग्गलपरिणामं पच्चणुभवमाणा विहरंति गोयमा अणिट्ठं जाव अमणामं एवं जाव अहेसत्तमाए [एवं-वेदणा-लेस्स-खुहा-पिवासा-वाहि-उस्सास-अनुताव-कोह-मान-माया-लोह-आहारसण्णा-भयसण्णा-मेहुणसण्णा-परिग्गहसण्णा-पोग्गल-परिणामाइं] ।

- [११८] एत्थ किर अतिवयंती नरवसभा केसवा जलचरा य ।
 रायाणो मंडवलिया जे य महारंभकोडुंबी ॥
 [११९] भिन्नमुहुत्तो नरएसु तिरियमणुएसु होंति चत्तारि ।
 देवेसु अद्धमासो उक्कोस विउव्वणा भणिया ॥
 [१२०] जे पोग्गला अणिट्ठा नियमा सो तेसि होई आहारो ।
 संठाणं तु अणिट्ठं नियमा हुंडं तु नायव्वं ॥
 [१२१] असुभा विउव्वणा खलु नेरइयाणं तुं होइ सव्वेसिं ।
 वेउव्वियं सरीरं असंघयण हुंडसंठाणं ॥
 [१२२] अस्साओ उववण्णो अस्साओ चेव चयइ निरयभवं ।
 सव्वपुढवीसु जीवो सव्वेसु ठिइविसेसेसुं ॥
 [१२३] उववाएण व सायं नेरइओ देवकम्मणा वावि ।
 अज्झवसाणनिमित्तं अहवा कम्माणुभावेणं ॥
 [१२४] नेरइयाणुप्पाओ उक्कोसं पंचजोयणसयाइं ।
 दुक्खेणभिद्दुयाणं वेयणसयसंपगाढाणं ॥
 [१२५] अच्छिनिमीलियमेत्तं नत्थि सुहं दुक्खमेव अनुबद्धं ।
 नरए नेरइयाणं अहोनिंसं पच्चमाणाणं ॥
 [१२६] तेयाकम्मसरीरा सुहुमसरीरा य जे अपज्जत्ता ।
 जीवेणं मुक्कमेत्ता वच्चंति सहस्ससो भेयं ॥
 [१२७] अतिसीतं अतिउण्हं अतितिण्हा अतिखुहा अतिभयं वा ।

निरए नेरइयाणं दुक्खसयाइं अविस्सामं ॥
[१२८] एत्थ य भिन्नमुहुत्तो पोग्गल असुहा य होइ अस्साओ
।

उववाओ उप्पाओ अच्छि सरीरा उ बोद्धव्वा ॥
[१२९] से तं नेरइया ।

• तच्चाए पडिवत्तिए तइओ उद्देसो समत्तो •

॥ “तिरिक्खजोणिय” पढमो-उद्देसो ॥

[१३०] से किं तं तिरिक्खजोणिया तिरिक्खजोणिया पंचविधा पन्नत्ता तं जहा- एगिंदियतिरिक्खजोणिया जाव पंचिंदियतिरिक्खजोणिया य से किं तं एगिंदियतिरिक्खजोणिया एगिंदियतिरिक्खजोणिया पंचविहा पन्नत्ता तं जहा- पुढविकाइयएगिंदियतिरिक्खजोणिया जाव वणस्सइकाइयएगिंदियतिरिक्खजोणिया से किं तं पुढविकाइयएगिंदियतिरिक्खजोणिया, दुविहा पन्नत्ता तं जहा- सुहुमपुढविकाइयएगिंदियतिरिक्खजोणिया बादरपुढविकाइयएगिंदियतिरिक्खजोणिया य से किं तं सुहुमपुढविकाइयएगिंदियतिरिक्खजोणिया, दुविहा पन्नत्ता तं जहा- पज्जत्तसुहुमपुढविकाइयएगिंदियतिरिक्खजोणिया दुविहा पन्नत्ता तं जहा- पज्जत्तबादरपुढविकाइयएगिंदियतिरिक्खजोणिया अपज्जत्तबादरपुढविकाइयएगिंदियतिरिक्खजोणिया से तं बादरपुढविकाइयएगिंदियतिरिक्खजोणिया से तं पुढविकाइयएगिंदिया, से किं तं आउक्काइयएगिंदियतिरिक्खजोणिया, दुविहा पन्नत्ता एवं जहेव पुढविकाइयाणं तहेव आउकायभेदो एवं जाव वणस्सतिकाइया से तं वणस्सइकायएगिंदियतिरिक्खजोणिया, से किं तं बेइंदियतिरिक्खजोणिया बेइंदियतिरिक्खजोणिया दुविधा पन्नत्ता तं जहा- पज्जत्तगबेइंदियतिरिक्खजोणिया अपज्जत्तगबेइंदियतिरिक्खजोणिया से तं बेइंदियतिरिक्खजोणिया एवं जाव चउरिंदिया, से किं तं पंचेदियतिरिक्खजोणिया तिविहा पन्नत्ता जलयर पंचेदिय तिरिक्खजोणिया थलयर पंचेदियतिरिक्खजोणिया खहयरपंचेदियतिरिक्खजोणिया से किं तं जलयरपंचेदियतिरिक्खजोणिया, दुविहा पन्नत्ता तं जहा- संमुच्छिमजलयरपंचेदियतिरिक्खजोणिया य गब्भवक्कंतियजलयरपंचेदियतिरिक्खजोणिया य से किं तं संमुच्छिमजलयरपंचेदियतिरिक्खजोणिया, दुविहा पन्नत्ता तं जहा- पज्जत्तगसंमुच्छिमजलयचपंचेदियतिरिक्खजोणिया से किं तं गब्भवक्कंतियजलयरपंचेदियतिरिक्खजोणिया दुविहा पन्नत्ता तं जहा- पज्जत्तगगब्भवक्कंतियजलयरपंचेदियतिरिक्खजोणिया से तं जलयरपंचेदियतिरिक्खजोणिया से किं तं थलयरपंचेदियतिरिक्खजोणिया दुविधा पन्नत्ता तं जहा- चउप्पयथलयरपंचेदियतिरिक्खजोणिया परिसप्पथलयरपंचेदियतिरिक्खजोमिया से किं तं चउप्पदथलयरपंचेदियतिरिक्खजोणिया, दुविहा पन्नत्ता तं जहा- संमुच्छिमचउप्पथलयरपंचेदियतिरिक्खजोणिया गब्भवक्कंतियचउप्पयथलयर-पंचेदियतिरिक्खजोणिया य जहेव जलयराणं तहेव चउक्कतो भेदो सेत्तं चउप्पदथलयरपंचेदियतिरिक्खजोणिया से किं तं परिसप्पथलयरपंचेदियतिरिक्खजोणिया, दुविहा पन्नत्ता तं जहा- उरपरिसप्पथलयरपंचेदियतिरिक्खजोणिया भुयपरिसप्पथलयरपंचेदियतिरिक्खजोणिया से किं तं उरपरिसप्पथलयरपंचेदियतिरिक्खजोणिया, दुविहा पन्नत्ता तं जहा- जहेव जलयराणं तहेव चउक्कतो भेदो एवं भूयपरिसप्पाणवि

भाणियतत्त्वं से तं भुयपरिसप्पथलयरपंचेदियतिरिक्खजोणिया से तं थलयरपंचेदियतिरिक्खजोणिया से किं तं खहयरपंचेदियतिरिक्खजोणिया दुविहा पन्नत्ता तं जहा- संमुच्छिमखहयरपंचेदियतिरिक्खजोणिया गब्भ- पडिवत्ति-३

वक्कंतियखहयरपंचेदियतिरिक्खजोणिया य से किं तं संमुच्छिमखहयरपंचेदियतिरिक्खजोणिया दुविहा पन्नत्ता तं जहा- पज्जत्तगसंमुच्छिमखहयरपंचेदियतिरिक्खजोणिया अपज्जत्तगसंमुच्छिमखहयरपंचेदिय- तिरिक्खजोणिया य एवं गब्भवक्कंतियावि जाव पज्जत्तगगब्भवक्कंतियावि अपज्जत्तगगब्भवक्कंतियावि खहयरपंचेदियतिरिक्खजोणियाणं भंते कतिविधे जोणिसंगहे पन्नत्ते गोयमा तिविहे जोणिसंगहे पन्नत्ते तं जहा- अंडया पोयया संमुच्छिमा अंडया तिविधा पन्नत्ता तं जहा- इत्थी पुरिसा नपुंसगा, पोतया तिविधा पन्नत्ता तं जहा- इत्थी पुरिसा नपुंसगा तत्थ णं जेते संमुच्छिमा ते सव्वे नपुंसगा ।

[१३१] एतेसिं णं भंते जीवाणं कति लेसाओ पन्नत्ताओ गोयमा छल्लेसाओ पन्नत्ताओ तं जहा- कण्लेसा जाव सुक्कलेसा ते णं भंते जीवा किं सम्मदिट्ठी मिच्छदिट्ठी सम्मामिच्छदिट्ठी गोयमा सम्मदिट्ठीवि मिच्छदिट्ठीवि सम्मामिच्छदिट्ठीवि ते णं भंते जीवा किं नाणी अन्नाणी गोयमा नाणीवि अन्नाणीवि-तिण्णि नाणाइं तिण्णि अन्नाणाइं भयणाए ते णं भंते जीवा किं मणजोगी वड्जोगी कायजोगी गोयमा तिविधावि ते णं भंते जीवा किं सागरोवउत्ता अणागारोवउत्ता गोयमा सागरोवउत्तावि अणागारोवउत्तावि ते णं भंते जीवा कओ उववज्जंति-किं नेरइएहिंतो उववज्जंति तिरिक्खजोणिएहिंतो उववज्जंति पुच्छा गोयमा असंखेज्जवासाउयअकम्मभूमग-अंतरदीवगवज्जेहिंतो उववज्जंति तेसिं णं भंते जीवाणं केवतियं कालं ठिती पन्नत्ता गोयमा जहण्णेणं अंतोमुहुत्तं उक्कोसेणं पलिओवमस्स असंखेज्जतिभागं तेसिं णं भंते जीवाणं कति समुग्धाता पन्नत्ता गोयमा पंच समुग्धाता पन्नत्ता तं जहा- वेदणासमुग्धाए जाव तेयासमुग्धाए ते णं भंते जीवा मारणंतियसमुग्धाएणं किं समोहता मरंति असमोहता मरंति गोयमा समोहतावि मरंति असमोहतावि मरंति ते णं भंते जीवा अनंतरं उव्वट्ठित्ता कहिं गच्छंति कहिं उववज्जंति-किं नेरइएसु उववज्जंति तिरिक्खजोणिएसु उववज्जंति पुच्छा गोयमा एवं उव्वट्ठणा भाणियव्वा जहा- वक्कंतीए तहेव, तेसिं णं भंते जीवाणं कति जातीकुलकोडिजोणीपमुहसयसहस्सा पन्नत्ता गोयमा बारस जातीकुलकोडीजोणीपमुहसयसहस्सा [जोणीसंगहेस्सादिट्ठी नाणे य जोग उवओगे उववायठिईसमुग्धाय चयणं जातीकुलविधी ३] भुयपरिसप्पथलयरपंचेदियतिरिक्खजोणियाणं भंते कतिविधे जोणीसंगहे पन्नत्ते गोयमा तिविहे जोणीसंगहे पन्नत्ते तं जहा- अंडया पोयया संमुच्छिमा एवं जहा खहयराणं तहेव नाणत्तंजहण्णेणं अंतोमुहुत्तं उक्कोसेणं पुव्वकोडी उव्वट्ठित्ता दोच्चं पुढविं गच्छंति एवं जातीकुलकोडीजोणीपमुहसतसहस्सा भवंतीति मक्खायं सेसं तहेव उरपरिसप्पथलयरपंचेदियतिरिक्ख- जोणियाणं भंते पुच्छा चहेव भूयपरिसप्पाणं तहेव नवरं-ठिती जहण्णेणं अंतोमुहुत्तं उक्कोसेणं पुव्वकोडी उव्वट्ठित्ता जाव पंचमिं पुढविं गच्छंति दस जातीकुलकोडीजोणीपमुहसयसहस्सा चउप्पयथलयरपंचेदिय- तिरिक्खजोणियाणं पुच्छा गोयमा दुविधे जोणीसंगहे पन्नत्ते तं जहा- पोयया य संमुच्छिमा य पोयया तिविधा पन्नत्ता तं जहा- इत्थी पुरिसा नपुंसगा तत्थ णं जेते संमुच्छिमा ते सव्वे नपुंसगा तेसिं णं भंते जीवाणं कति लेस्साओ पन्नत्ताओ सेसं जहा- पक्खीणं नाणत्तं-ठिती जहण्णेणं अंतोमुहुत्तं उक्कोसेणं तिण्णिपलिओवमाइं उव्वट्ठित्ता चउत्थिं पुढविं गच्छंति दस जातीकुलकोडी जलयरपंचेदियतिरिक्खजोणिया पुच्छा जहा- भुयपरिसप्पाणं नवरं-उव्वट्ठित्ता जाव अधेसत्तमिं पुढविं अद्धतेरस जातीकुलकोडीजोणीपमुह [सयसहस्सा] पन्नत्ता चउरिंदियाणं भंते कति जातीकुलकोडीजोणिपमुह-सतसहस्सा पन्नत्ता गोयमा नव

जातीकुलकोडीजोणीपमुहसयसहस्सा समक्खाया तेइंदियाणं पुच्छा गोयमा अट्ट जातीकुल [कोडीजोणी-पमुहसयसहस्सा] समक्खाया बेइंदियाणं भंते कइ जातीकुल कोडीजोणीपमुहसतसहस्सा पुच्छा गोयमा सत्त पडिवत्ति-३

जातीकुलकोडीजोणीपमुह [सतसहस्सा समक्खाया]

[१३२] कइ णं भंते गंधंवा कइ णं भंते गंधगसया पन्नत्ता गोयमा सत्त गंधंवा सत्त गंधगसया पन्नत्ता कइ णं भंते पुप्फजातीकुलकोडीजोणीपमुहसयसहस्सा पन्नत्ता गोयमा सोलस पुप्फजाती-कुलकोडीजोणीपमुहसयसहस्सा पन्नत्ता तं जहा- चत्तारि जलजा णं चत्तारि थलजाणं चत्तारि महारुक्काणं चत्तारि महागुम्मियाणं कति णं भंते वल्लीओ कति वल्लिसता पन्नत्ता गोयमा चत्तारि वल्लीओ चत्तारि वल्लीसता पन्नत्ता कति णं भंते लत्ताओ कति लतासता पन्नत्ता गोयमा अट्ट लताओ अट्ट लतासता पन्नत्ता कति णं भंते हरियकाया कति हरियकायसया पन्नत्ता गोयमा तओ हरियकाया तओ हरिकायसया पन्नत्ता फलसहस्सं च बँटबद्धाणं फलसहस्सं च नालबद्धाणं ते सव्वे हरितकायमेव समयरंति ते एवं समणुगम्ममाणा-समणुगम्ममाणा समणुगाहिज्जमाणा-समणुगाहिज्जमाणा समणुपेहिज्जमाणा-समणु-पेहिज्जमाइणा समणुचिंतिज्जमाणा-समणुचिंतिज्जमाणा एसु चेव दोसु काएसु समयरंति तं जहा- तसकाए चेव थावरकाए चेव एवमेव सपुव्वावरेणं आजीवदिट्ठंतेणं चउरासीति जातिकुलकोडीजोणीप-मुहसतसहस्सा भवंतीति मक्खाया ।

[१३३] अत्थि णं भंते विमाणाइं अच्चीणि अच्चियावत्ताइं अच्चिप्पभाइं अच्चिकंताइं अच्चिवण्णाइं अच्चिलेस्साइं अच्चिज्झयाइं अच्चिसिंगाइं अच्चिसिद्धाइं अच्चिकूडाइं अच्चुत्तरावडिंसगाइं हंता अत्थि ते णं भंते विमाणा केमहालता पन्नत्ता गोयमा जावतिए णं सूरिए उदेति जावइएणं च सूरिए अत्थमेति एवतियाइं तिण्णोवासंतराइं अत्थेगतियस्स देवस्स एगे विक्कमे सिता से णं देवे ताए उक्किट्ठाए तुरियाए जाव दिव्वाए देवगतीए वीतीवयमाणे-वीतीवयमाणे जहण्णेणं एकाइं वा दुयाइं वा उक्कोसेणं छम्मासे वीतीवएज्जा-अत्थेगतियं विमाणं वीतीवएज्जा अत्थेगतियं विमाणं नो वीतीवएज्जा एमहालता णं गोयमा ते विमाणा पन्नत्ता समणाउसो अत्थि णं भंते विमाणाइं सोत्थीणि सोत्थियावत्ताइं सोत्थियपभाइं सोत्थियकंताइं सोत्थियवण्णाइं सोत्थियलेसाइं सोत्थियज्झयाइं सोत्थिसिंगाइं सोत्थिकूडाइं सोत्थिसिद्धाइं सोत्थुत्तरावडिंसगाइं हंता अत्थि ते णं भंते विमाणा केमहालता पन्नत्ता गोयमा [जावतिए णं सूरिए उदेति जावइएणं च सूरिए अत्थमेति] एवतियाइं पंच ओवासंतराइं अत्थेगतियस्स देवस्स एगे विक्कमे सिता से णं देवे ताए उक्किट्ठाए जाव देवगतीए वीतीवयमाणे-वीतीवयमाणे जाव समणाउसो, अत्थि णं भंते विमाणाइं कामाइं कामावत्ताइं [कामप्पभाइं कामकंताइं कामवण्णाइं कामलेस्साइं कामज्झयाइं कामसिंगाइं कामकूडाइं कामसिद्धाइं] कामुत्तरावडिंसयाइं हंता अत्थि ते णं भंते विमाणा केमहालता पन्नत्ता गोयमा [जावतिए णं सूरिए उदेति जावइएणं च सूरिए अत्थमेति एवतियाइं सत्त ओवासंतराइं अत्थेगतियस्स देवस्स एगे विक्कमे सिता से णं देवे ते उक्किट्ठाए जाव समणाउसो] अत्थि णं भंते विमाणाइं विजयाइं वेजयंताइं जयंताइं अपराजिताइं हंता अत्थि ते णं भंते विमाणा केमहालता पन्नत्ता गोयमा जावतिए णं सूरिए उदेति जावइए णं च सूरिए अत्थमेति एवइयाइं नव ओवासंतराइं [अत्थेगतियस्स देवस्स एगे विक्कमे सि से णं देवे ताए उक्किट्ठाए जाव देवगतीए वीतीवयमाणे-वीतीवयमाणे जहण्णेणं एकाहं वा दुयाहं वा उक्कोसेणं छम्मासे वीतीवएज्जा] नो चेव णं ते विमाणे वीईवएज्जा एमहालताणं विमाणा पन्नत्ता समणाउसो ।

[[तिरिक्खजोणिय-बीओ उद्देसो]]

[१३४] कतिविहा णं भंते संसारसमावण्णगा जीवा पन्नत्ता गोयमा छव्विहा संसारसमावण्णगा जीवा-पुढविकाइया जाव तसकाइया से किं तं पुढविकाइया दुविहा पन्नत्ता तं सुहुमपुढविकाइया बायर-पुढविकाइया से किं तं सुहुमपुढविकाइया दुविहा पज्जत्तगा य अपज्जत्तगा य से तं सुहुमपुढविकाइया से किं तं बदारपुढविकाइया दुविहा पज्जत्तगा य अपज्जत्तगा य एवं जहा- पन्नवणाए, सण्हा सत्तविहा पन्नत्ता, खरा अनेगविहा पन्नत्ता जाव असंखिज्जा से तं बारपुढविकाइया से तं पुढविकाइया एवं चेव जइ पन्नवणाए तहेव निरवसेसं भाणियव्वं जाव वणप्फइकाइया एवं जत्थेको तत्थ सिय संखिज्जा सिय असंखिज्जा सित अनंता से तं बादरवणस्सइकाइया से तं वणप्फइकाइया, से किं तं तसकाइया चउविहा पन्नत्ता तं बेइंदिया जाव पंचिंदिया से किं तं बेइंदिया अणेगविहा पन्नत्ता एवं जहेव पन्नवणे तहेव निरवसेसं भाणियव्वं ति जाव सव्वइसिद्धगा देवा से तं अनुत्तरोववाइया से तं देवा से त्तं पंचिंदिया से त्तं तसकाइया ।

[१३५] कतिविधा णं भंते पुढवी पन्नत्ता गोयमा छव्विहा पुढवी पन्नत्ता तं जहा-सण्हुपुढवी सुद्धपुढवी वालुयापुढवी मणोसिलापुढवी सक्करापुढवी खरुवुढवी, सण्हुपुढवीणं भंते केवतियं कालं ठिती पन्नत्ता गोयमा जहण्णेणअंतोमुहुत्तं उक्कोसेणं एगं वाससहस्सं सुद्धपुढवीपुच्छा गोयमा जहण्णेणं अंतोमुहुत्तं उक्कोसेणं बारस वाससहस्साइं, वालुयापुढवीपुच्छा गोयमा जहण्णेणं अंतोमुहुत्तं उक्कोसेणं चोद्धसवास-सहस्साइं मणोसिलापुढवीपुच्छा गोयमा जहण्णेणं अंतोमुहुत्तं उक्कोसेणं सोलस वाससहस्साइं सक्करापुढ-वीपुच्छा गोयमा जहण्णेणं अंतोमुहुत्तं उक्कोसेणं अद्वारस वाससहस्साइं खरपुढवीपुच्छा गोयमा जहण्णेणं अंतोमुहुत्तं उक्कोसेणं बावीसं वाससहस्साइं नेरइयाणं भंते केवतियं कालं ठिती पन्नत्ता गोयमा जहण्णेणं दस वाससहस्साइं उक्कोसेणं तेत्तीसं सागरोवमाइं ठितीपदं सव्वं भाणियव्वं जाव सव्वइसिद्धदेवत्ति जीवे णं भंते जीवेत्तिं कालत्तो केवच्चिरं होइ गोयमा सव्वद्धं पुढविकाइए णं भंते पुढविकाइएत्ति कालतो केवच्चिरं होति गोयमा सव्वद्धं एवं जाव तसकाइए ।

[१३६] पडुप्पन्नपुढविकाइया णं भंते केवतिकालस्स निल्लेवा सिता गोयमा जहण्णपदे असंखेज्जाहिं उस्सप्पिणिओसप्पिणीहिं उक्कोसपदेवि असंखेज्जाहिं उस्सप्पिणी-ओसप्पिणीहिं-जहण्णपदातो उक्कोसपए असंखेज्जगुणा एवं जाव पडुप्पन्नवुक्काइया, पडुप्पन्नवणप्फकाइया णं भंते केवतिकालस्स निल्लेवा सिता गोयमा पडुप्पन्नवणप्फकाइयाणं नत्थि निल्लेवणा, पडुप्पन्नतसकाइया णं भंते केवतिकालस्स निल्लेवा सिया, पडुप्पन्नतसकाइया जहण्णपदे सागरोवमसतपुहत्तस्स उक्कोसपदेवि सागरोवमसत-पुहत्तस्स-जहण्णपदा उक्कोसपदे विसेसाहिया ।

[१३७] अविसुद्धलेस्से णं भंते अणगारे असमोहतेणं अप्पाणेणं अविसुद्धलेस्सं देवं देविं अणगारं जाणइ-पासइ गोयमा नो इण्ढे समढ्ढे, अविसुद्धलेस्से णं भंते अणगारे असमोहतेणं अप्पाणेणं विसुद्धलेस्सं देवं देविं अणगारं जाणइ-पासइ गोयमा नो इण्ढे समढ्ढे, अविसुद्धलेस्से णं भंते अणगारे समोहतेणं अप्पाणेणं अविसुद्धलेस्सं देवं देविं अणगारं जाणति-पासति गोयमा नो इण्ढे समढ्ढे,

अविसुद्धलेस्से णं भंते अणगारे समोहतेणं अप्पाणेणं विसुद्धलेस्सं देवं देविं अणगारं जाणति-पासति गोयमा नो तिण्हे समहे, अविसुद्धलेस्से णं भंते अणगारे समोहतासमोहतेणं अप्पाणेणं अविसुद्धलेस्सं देवं देविं पडिवत्ति-३

अणगारं जाणति-पासति गोयमा नो तिण्हे समहे, अविसुद्धलेसेणं भंते अणगारे समोहता समोहतेणं अप्पाणेणं विसुद्ध लेसं देवं देविं अणगारं जाणति पासति गोयमा नो तिण्हे समहे विसुद्धलेस्से णं भंते अणगारे असमोहतेणं अप्पाणेणं अविसुद्धलेस्सं देवं देविं अणगारं जाणति-पासति हंता जाणति पासति जहा- अविसुद्धलेस्सेणं छाआलावगा एवं विसुद्ध लेस्सेणं वि छाआलावगा भाणितच्चा जाव विसुद्धलेस्से णं भंते अणगारे समोहतासमोहतेणं अप्पाणेणं विसुद्धलेस्सं देवं देविं अणगारं जाणति-पासति हंता जाणति-पासति ।

[१३८] अण्णउत्थिया णं भंते एवमाइक्खंति एवं भासेंति एवं पन्नबेंति एवं परूवेंति-एवं खलु एगे जीवे एगेणं समएणं दो किरियाओ पकरेति तं जहा- सम्मत्तकिरियं च मिच्छत्तकिरियं च जं समयं सम्मत्तकिरियं पकरेति तं समयं मिच्छत्तकिरियं पकरेति जं समयं मिच्छत्तकिरियं पकरेति तं समयं सम्मत्तकिरियं पकरेति सम्मत्तकिरियापकरणताए मिच्छत्तकिरियं पकरेति मिच्छत्तकिरियापकरणताए सम्मत्तकिरियं पकरेति एवं खलु एगे जीवे एगेणं समएणं दो किरियाओ पकरेति तं जहा- सम्मत्तकिरियं च मिच्छत्तकिरियं च से कहमेयं भंते एवं गोयमा जण्णं ते अण्णउत्थिया एवमाइक्खंति जाव एवं परूवेंति-एवं खलु एगे जीवे एगेणं समएणं दो किरियाओ पकरेति तहेव जाव सम्मत्तकिरियं च मिच्छत्तकिरियं च जेते एवमाहंसु तं णं मिच्छा अहं पुण गोयमा एवमाइक्कामि जाव परूवेमि-एवं खलु एगे जीवे एगेणं समएणं एगं किरियं पकरेति तं जहा- सम्मत्तकिरियं वा मिच्छत्तकिरियं वा जं समयं सम्मत्तकिरियं पकरेति नो तं समयं मिच्छत्तकिरियं पकरेति जं समयं मिच्छत्तकिरियं पकरेति नो तं समयं सम्मत्तकिरियं पकरेति सम्मत्तकिरियाप-करणयाए नो मिच्छत्तकिरियं पकरेति मिच्छत्तकिरियापकरणयाए नो सम्मत्तकिरियं पकरेति एवं खलु एगे जीवे एगेणं समएणं एगं किरियं पकरेति तं जहा- सम्मत्तकिरियं वा मिच्छत्तकिरियं वा ।

[१३९] से तं चउविहपडिवत्ते तिरिक्ख जोणिय उद्देसओ बीओ समत्तो ।

• तच्चाए पडिवत्तीए तिरिक्खजोणिअस्स बीओ उद्देसओ समत्तो •

[[मणुस्साधिगारो]]

[१४०] से किं तं मणुस्सा दुविहा पन्नत्ता तं जहा- संमुच्छिममणुस्सा य गब्भवक्कंतिय-मणुस्सा य से किं तं संमुच्छिममणुस्सा संमुच्छिममणुस्सा एगागारा पन्नत्ता कहि णं भंते संमुच्छिम-मणुस्सा संमुच्छंति गोयमा अंतोमणुस्सखेत्ते जहा- पन्नवणाए जाव अंतोमुहुत्तद्वाउया चेव कालं पकरेंति सेत्तं संमुच्छिममणुस्सा ।

[१४१] से किं तं गब्भवक्कंतियमणुस्सा गब्भवक्कंतियमणुस्सा तिविधा पन्नत्ता तं जहा- कम्मभूमगा अकम्मभूमगा अंतरदीवगा ।

[१४२] से किं तं अंतरदीवगा अंतरदीवगा अद्वावीसतिविधा पन्नत्ता तं जहा- एगोरुया आभासिता वेसाणिया हयकण्णा गयकण्णा गोकण्णा सक्कुलिकण्णा आयंसमुहा मैदमुहा अयोमुहा गोमुहा

आसमुहा हत्थिमुहा सीहमुहा वग्धमुहा आसकण्णा सीहण्णा अकण्णा कण्णापाउरणा उक्कामुहा मेहमुहा विज्जुमुहा विज्जुदंता घणदंता लड्ढदंता गूढदंता सुद्धदंता ।

[१४३] कहि णं भंते दाहिणिल्लाणं एगोरुयमणुस्साणं एगोरुयदीवे नामं दीवे पन्नत्ते गोयमा जंबुद्धीवे दीवे मंदरस्स पव्वयस्स दाहिणे णं चुल्लहिमवंतस्स वासधरपव्वयस्स उत्तरपुरत्थिमिल्लओ चरिमं-पडिवत्ति-३

ताओ लवणसमुद्धं तिण्णि जोयणसयाइं ओगहित्ता एत्थ णं दाहिणिल्लाणं एगोरुयमणुस्साणं एगोरुयदीवे नामं दीवे पन्नत्ते-तिण्णि जोयणसयाइं आयामविकखंभेणं नव एगूणपन्ने जोयणसए किंचि विसेसेण परिकखेणं से णं एगाए पउमवरवेदियाए एगेणं च वनसंडेणं सव्वओ समंता संपरिकखित्ते सा णं पउमवरवेदिया अद्ध जोयणाइं उड्ढं उच्चत्तेणं पंच धणुसयाइं विकखंभेणं एगोरुयदीवं समंता परिकखेणं पन्नत्ता तीसे णं पउमवरवेदियाए अयमेयारूवे वण्णावासे पन्नत्ते तं जहा- वड्डरामया निम्मा एवं वेतियावण्णओ जहा- रायपसेणिए तहा भाणियव्वो ।

[१४४] सा णं पउमवरवेतिया एगेणं वणसंडेणं सव्वो समंता संपरिकखित्ता से णं वणसंडे देसूणाइं दो जोयणाइं चक्कवालविकखंभेणं वेतियासमेणं परिकखेणं पन्नत्ते से णं वणसंडे किण्हे किण्होभासे एवं जहा- रायपसेणियवनसंडवण्णओ तहेव निरवसेसं भाणियव्वं तणा य वण्णगंध फासो सद्धो तणाणं बावीओ उप्पायपव्वया पुढविसिलापट्टगा य भाणितव्वा जाव तत्थ णं बहवे वाणमंतरा देवा य देवीओ य आसयंति जाव विहरंति [वण्णत्तो पउमवरवेड्या-वणसंडामं जाव तत्थ णं बहवे वाणमंतरा देवा य देवीओ य आसयंति सयंति चिद्धंति निसीयंति तुयद्धंति रमंति ललंति कीलंति मोहंति पुरा पोराणाणं सुचिण्णाणं सुपरक्कंताणं सुभाणं कडाणं कम्माणं कल्लाणाणं कल्लाणं फलवित्तिविसेसं पच्चणुभवमाणा विहरंति ।

[१४५] एगोरुयदीवस्स णं भंते केरिसए आगार भावपंडोयारे पन्नत्ते गोयमा बहुसमरमणिज्जे भूमिभागे पन्नत्ते से जहानामए-आलिंगपुक्खरेति वा एवं सयणिज्जे भाणितव्वे जाव पुढविसिलापट्टगंसि तत्थ णं बहवे एगोरुयदीवया मणुस्सा य मणुस्सीओ य आसयंति जाव विहरंति एगोरुयदीवे णं दीवे तत्थ-तत्थ देसे तहिं तहिं बहवे उद्दालका मोद्दालका रोद्दालका कतमाला नट्टमाला सिंगमालाल संखमाला दंतमाला सेलमालगा नाम दुमगणा पन्नत्ता समणाउसो कुसविकुसविसुद्धरुक्खमूला मूलमंता कंदमंतो जाव बीयमंतो पत्तेहिं य पुप्फेहि य अच्छण-पडिच्छण्णा सिरीए अतीव-अतीव सोभेमाणा उवसोभेमाणा चिद्धंति एगोरुयदीवे णं दीवे तत्थ रुक्खा बहवे हेरुयालवणा भेरुयालवणा मेरुयालवणा सेरुयालवणा सालवणा सरलवणा सत्तपन्नवणा पूयफलिवणा खज्जूरिवणा नालिएरिवणा कुसविकुसवि जाव चिद्धंति एगोरुयदीवे णं तत्थ बहवे तिलया लवया नग्गोहा जाव रायरुक्खा नंदिरुक्खा कुसविकुसवि जाव चिद्धंति एगोरुयदीवे णं तत्थ बहूओ पउमलयओ नागलयाओ जाव सामलयाओ निच्चं कुसुमियाओ एवं लयावण्णओ जहा- उववाइए जाव पडिरूवाओ एगोरुयदीवे णं तत्थ बहवे सेरियागुम्मा जाव महाजातिगुम्मा ते णं गुम्मा दसद्धवण्णं कुसुमं कुसुमेति जेणं वायविहुयग्गसाला एगोरुयदीवस्स बहुसमरमणिज्जभूमिभागं मुक्कपुप्फ-पुंजोवयारकलियं करेंति एगोरुयदीवे णं तत्थ बहूओ वनराईओ पन्नत्ताओ ताओ णं वनराईओ किण्हाओ किण्होभासाओ जाव रम्माओ महामेहनिगुरुंबभूताओ जाव महंती गंधद्धुणिं मुयंताओ पासादी-याओ एगोरुयदीवे तत्थ बहवे मत्तंगा नाम दुमगणा पन्नत्ता समणाउसो जहा- से चंदप्पभमणिसिलगा-वरसीधु-पवरवारुणि-सुजातफल-पत्त-पुप्फ-चोय-निज्जाससार-बहुदव्व जत्तीसंभार-कालसंधियआसवा महुमेरग-रिद्धाभ-

दुद्धजाति-पसन्न-तेल्लग-सताउखजूरमुद्धियासार-कविसायणसुपक्कखोयरसवरसुरा-वण्ण-रसगंधफरि-जुत्त-बलवीरियपरिणामा मज्जविही य बहुप्पगारा तहेव ते मत्तंगयावि दुमगणा अणेगबहुविविहवीससा-परिणयाए मज्जविहीए उववेया फलेहिं पुन्ना वि विसट्ठं ति कुसविकुसविसुद्धरुक्खमूला जाव चिट्ठंति ।

एगोरुयदीवे तत्थ बहवे भिंगंगा नाम दुमगणा पन्नत्ता समणाउसो जहा- से वारहघडकरग-पडिवत्ति-३

कलसक्ककरियपंचाणिउल्लंकवद्धणिसुपइट्ठकविट्ठपारीचसगभिंंगारकरोडिसरंगगपत्ता घोसगाणल्लग ववलिय-अवपदकगवालकाविचित्तवट्ठकमणिवट्ठकसिप्परवोरपिणया कंचणमणिरयणभत्तिविचित्ता भाजणविही बहुप्प-गारा तहेव ते भिंगंगयावि दुमगणा अणेगबहुविविहवीससापरिणताए भाजणविहीए उववेया फलेहिं पुन्नावि विसट्ठंति कुसविकुस जाव चिट्ठंति एगुरुयदीवे णं तत्थ बहवे तुडियंगा नाम दुमगणा पन्नत्ता समणाउसो जहा- से

आलिंणपणपडहददरकरडिडिंडिमभंभातहोरभंकणियखरमुहिमुयंगसंखियपरिल्लयपव्वगापरिवायणिवं-सवेणुवीणा सुघोसग विपंचिमहतिकच्छविरिकिसतकतलतालकंसालतालकसंपत्ता आतोज्जविही य निउण-गंधव्वसमयकुसलेहिं फंदिया तिट्ठाणकरणसुद्धा तहेव ते तुडियंगयावि दुमगणा अणेगबहुविविधवीससा-परिणयाए ततघणझुसिराए चउव्विहाए आतोज्जविहीए उववेया फलेहिं पुन्ना विव विसट्ठंति कुसविकुस जाव चिट्ठंति एगुरुयदीवे णं तत्थ बहवे दीवसिहा नाम दुमगणा पन्नत्ता समणाउसो जहा- से संझाविरागसमए नवनिहिपतिणेवदीवियाचक्कवालविंदे पभूयवट्ठिपलित्तणेहिं वणिउज्जालियतिमिरमदए कणगणिगर कुसुमियपारिजायघणप्पगासे कंचणमणिरयणविमल-महरिहतवणिज्जुज्जलविचित्तदंडाहिं दीवियाहिं सहसापज्जालिऊसवियणिद्धतेयदिप्पंतविमलगहगणसमप्पहाहिं वितिमिरकरसूरपसरिउज्जोव-चिल्लियाहिं जालाओज्जलपहसियाभिरामाहिं सोभमाणे तहेव ते दीवसिहावि दुमगणा अणेगबहुवि-विहवीससापरिणयाए उज्जोयविहीए उववेया फलेहिं कुसविकुस जाव चिट्ठंति ।

एगुरुयदीवे णं तत्थ बहवे जोइसिया नाम दुमगणा पन्नत्ता समणाउसो जहा- से अचिरुग्ग-यसरयसूरमंडलपडंतउक्कासहस्सदिप्पंतविज्जुलहुयवहनिद्धमजालियनिद्धंतधोयत-त्ततवणिज्जकिंसुयासोगजवा-सुयणकुसुमविउलियपुंजमणिरयणकिरणजच्चहिंगुलुयनियररूवाइरेगरूवा तहेव ते जोतिसियावि दुमगणा अणेगबहुविविहवीससापरिणयाए उज्जोयविहीए उववेया सुहलेस्सा मंदलेस्सा मंदातवलेस्सा कूडा इव ठाणठिया अन्नमन्नसमोगाढाहिं लेस्साहिं साए पभाए सपदेसे सव्वओ समंता ओभासंति उज्जवेति पभासंति कुसविकुसवि जाव चिट्ठंति एगुरुयदीवे णं तत्थ बहवे चित्तंगा नाम दुमगणा पन्नत्ता समणाउसो जहा- से पेच्छाघरे विचित्ते रम्मे वरकुसुमदाममालुज्जललेसा भासंतमुक्कपुप्फपुंजोवयारकलिए विरल्लिय-विचित्तमल्लसिरिसमुदयप्पगब्भे गंधिमवेढिमपूरिमसंघाइमेणं मल्लेणं छेयासिप्पियविभागरइएण सव्वतो चेव समणुबद्धे पविरललंबंतविप्पइट्ठेहिं पंचवण्णेहिं कुसुमदामेहिं सोभमाणे वणमालकतग्गए चेव दिप्पमाणे तहेव ते चित्तंगयावि दुमगणा अणेगबहुविहवीससापरिणया मल्लविहीए उववेया कुसविकुसिवि जाव चिट्ठंति एगोरुयदीवे तत्थ बहवे चित्तरसा नाम दुमगणा पन्नत्ता समणाउसो जहा से सुगंधवरकलमसालि-तंदुलविसिट्ठणिरुवहतदुद्धरद्धे सारयघयगुडखंडमहुमेलिए अतिरसे परमण्णे होज्ज उत्तमवण्णगंधमंते रण्णे जहा- वा वि चक्कवट्ठिस्स होज्ज निउणेहिं सूयपुरिसेहिं सज्जिए चउरकप्पसेयसित्ते इव ओदणे कलमसालिणिव्वत्तिए विपक्के सवप्फमिउविससयगलसित्थे अणेगसालणगसंजुत्ते अहवा पडिपुन्नदव्वुवक्खडे सुसक्कए वण्णगंधरसफरिसजुत्तबलिविरयपरिणाम इंदियलवद्धणे खुप्पिवासमहणे

पहाणगुलकदियखंड-मच्छंडिघओवणीएव्वं मोयगे सण्हसमियगब्भे हवेज्ज परमइड्ढगसंजुत्ते तहेव ते चित्तरसावि दुमगणा अणेगबहुविविहवीससापरिणयाभोजमविहीए उववेया कुसविकुसवि जाव चिट्ठंति ।

एगोरुयदीवे तत्त बहवे मणियंगानाम दुमगणा पन्नत्ता समणाउसो जहा- से हारद्धहारवेट्ठण-
गमउडकुंडलवासुत्तगहेमलालमणिजालकणगजालगसुत्तगउच्चितियकडाखड्डियएगावा -
लिकंठसुत्तमगरगउरत्थ-गेबेज्जसेणिसत्तगचूलामणिकणगतिलगफुल्लगसिद्धत्थियकण्णवालिससिसूरुसभ
चक्कगतलभंगयतुडियत्थमा-
पडिवत्ति-३

लगवलकखदीणारमालिया चंदसूरमालिया हरिसयकेयूरवलय-पालबअंगुलेज्जगकंचीमेहलाकलावपयरकपाय-
जालघंटिखिंखिणिरयणोरुजालच्छुडियवरणेउरचलणमालिया कणगणिगरमालियाकंचणमणिरयणभत्तिचित्तव्व
भूसणविधि बहुप्पगारा तहेवते मणियंगावि दुमगणा अणेगबहुविविह वीससापरिणताएभूसणविहीए उववेया
कुसविकुस जाव चिट्ठंति एगोरुयदीवे तत्थ बहवे गेहागारा नाम दुमगणा पन्नत्ता समणाउसो जहा- से
पागारट्टालगचरियदारगोपुरपासायाकासतलमंडवएगसालगविसालगतिसालगचउसालगगब्भधरमोहणधरवलभिघ
रचित्तसालगमालियभत्तियधरवट्ठंतसचउरंसणंदियावत्तंसठियायतपंडुरतलमुंडमालहम्मियं अहव णं धवलहर-
अद्धमागहविब्भमसेलद्धसेलसंठियकूडागारेड्डसुविहिकोड्डगअणेगघरसरणलेणआवाणविडंगजालवंदणिजजूहअपवर
ककवोतालिचंदालियरूवविभत्तिकलिता भवणविही बहुविकप्पा तहेव तेगेहागारावि दुमगणा अणेगबहुवि-
विधवीससापरिणया सुहारुहाण सुहोत्ताराए सुहनिक्कमणप्पवेसाए दद्धरसोपाणपंतिकलिताए पडिरिक्काए सुह-
विहाराए मणाणुकूलाए भवणविहीए उववेया कुसविकुसावे जाव चिट्ठंति ।

एगोरुयदीवे तत्थबहवे अणिगणा नामं दुमगणा पन्नत्ता समणाउसो जहा- से आइगणखोम-

तणुयकंबलदुगुल्लकोसेज्जकालमिगपट्टजचीणंसुयवत्तत्ताव-

रणातवारवाणगपच्छुन्नाभरणचित्तसहिणगकल्लाण-

गभिंमहेलकज्जलबहुवण्णरत्तीपीतसुक्कलमक्खयमितलोमहप्परल्लगअवरुतरा

सिंधुउसभदामिलवंगकलिंगन-लिणतंतुमयभत्तिचित्ता वत्थविहि बहुप्पकारा हवेज्ज वरपट्टणुग्गता
वण्णरगकलिता तहेव ते अणिगणावि दुमगणा अणेगबहुविविहवीससापरिणताए उववेया कुसविकुस जाव
चिट्ठंति एगोरुयदीवे णं भंते दीवे मणुयाणं केरिसए आगारभावपडोयारे पन्नत्ते गोयमा ते णं मणुया
अनुवमतरसोमचारूवा भोगुत्तमा भोग-लक्खणधरा भोगसस्सिरीया सुजायसव्वंगसुंदरंगा
सुपड्डियकुम्मचारुचलणा रत्तुप्पलपत्तमउयसुकुमाल-कोमलतला
नगणगरमगरचक्ककहरंकलक्खणंकियचलणा अनुपुव्वसुहायंगुलिया उन्नयतणुतंबणिद्धणक्खा
संठियसुसलिड्डगूढगुप्फा एणीकुरुविंदावत्तवट्ठाणुपुव्वजंघा सामुग्गणिमग्गगूढजाणू गतससणसुजातसण्णि-भोरू
वरवारणमत्ततुल्लविक्कमविलासितगति सुजातवरतुरगगुज्झदेसा आइण्णहतोव्व निरुवलेवा पमुइवर-
तुरगसीहइरेगवट्ठियकडी सोहयसोणिंदमुसलदप्पणणिगरितवरकणगच्छरुसरिसवरवइरवलितमज्झा उज्जुय-
समसंहितसुजातजच्चतणुकिंसणणिद्धआदेज्जलडहसुकुमालमउयरमणिज्जरोमराईंगावत्तयपयाहिणावत्ततरंग
भंगुर रविकिरण तरुणबोधियआकोसयंतपउमगंभीरवगडणाभा झसविहगसुजातपीणकुच्छी झसोदरा सुइकरणा
पम्हवियडणाभा सण्णयपासा संगतपासा सुंदरपासा सुजातपासा मितमाइयपीणरइयपासा अकरुंडयकणगरुय-
गनिम्मलसुजातनिरुवहयदेहधारी पसत्थबत्तीसलक्खणधरा कणगसिलातलुज्जलपसत्थ समतलउवचिय-
विच्छिण्णपिहलवच्छा सिरिवच्छंकियवच्छा पुरवरफलिहवट्ठियभुया भुयगीसरविपुलभोगआयाणफलिह-

उच्छूढदीहबाहू जुगसन्निभपीणरतियपीवरपउडुसंठियउववियधणथिरसुबद्धसुसलिद्वपव्वसंधी रत्ततलोवइत-
मउयमंसलपसत्थलक्खणसुजाय अच्छिद्वजालपाणी पीवरवट्टियसुजायकोमलवरंगुलीया तंबतलिणसुतिरु-
इरणिद्वणक्खा चंदपाणिलेहा सूरपाणिलेहा संखपाणिलेहा चक्कपाणिलेहा दिसासोवत्थियपाणिलेहा चंदसूर-
संखचक्कदिसासोवत्थियपाणिलेहा अणेगवरलक्खणुत्तमपसत्थसुविरइयपाणिलेहा वरमहिसवराहसीहसदूलउ-
सभणागवरविउलउन्नतमइंदखंधा चउरंगुलसुप्पमाणकंबुसरिसगीवा अवट्टितसुविभत्तसुजातचित्तमंसू मंसल-
संठियपसत्थसदूलविपुलहणुया ओतवितसिलप्पवालबिंबफलसन्निभाहरोट्टा पंडुरससिसगलविमलनिम्मल-
संखदधिधणगोखीरफेणदगरयमुणालियाधवलदंतसेढी अखंडदंता अफुडियदंता अविरलदंता सुसिणिद्धदंता
सुजातदंता एगदंतसेढिव्व अणेगदंता हुतवहनिद्धंतधोततत्ततवणिज्जरत्ततलतालुजीहा
गरुलायतउज्जुतुंगणासा

पडिवत्ति-३

अवदालियपोंडरीकणयणा कोकासितधवलपत्तलच्छा आणमियचारुइलकिण्हपूराइसंठियसंगतआयतसुजाततणु-
कसिणनिद्धभुमया अल्लीणप्पमाणजुत्तसवणा सुसवणा पीणमंसलकवोलदेसभागा अचिरुग्गयबालचंदसंठिय-
पसत्थविच्छिन्नसमणिडाला उडुवतिपडिपुन्नसोमवदणा छत्तागारुत्तमंगदेसा धणणिचियसुबद्धलक्खणुणय-
कूडागारणिभपिंडियसिरि हुवतवहनिद्धंतधोततत्ततवणिज्जकेसंतकेसभूमी सामलिपोंडधणाणिचिछोडियामिउ-
विसयपसत्थ सुहुमलक्खणसुगंधसुंदर भुयमोयगभिंणलीलकज्जलपहडुभमरगणि णिद्धणिकुंरुंबनिचियकुं-
चियपयाहिणावत्तमुद्धसिरया लक्खणवज्जणगुणोववेया सुजायसुविभत्तसंगतंगा पासाइया दरिसणिज्जा अभि-
रूपपडिरूवा ।

ते णं मणुया हस्सरा हंसस्सरा कोंचस्सरा नंदिधोसा सीहस्सरा सीहघोसा मंजुस्सरा
मंजुघोसा सुस्सरा सुस्सरनिग्घोसा छायाउज्जोतियगमंगा वज्जरिसभनारायसंघयणा समचउरंसंठाणसंठिया
सिणद्धछवी निरायंका उत्तमपसत्थअइसेसनिरुवमतणू जल्लम-लकलंकसेयरयदोसवज्जियसरीरा निरुवमलेवा
अनुलोमवाउवेगा कंकग्गहणी कवोतपरिणामा सउणीपोसपिडुंतरोरुपरिणता विग्गहियउन्नयकुच्छी पउमुप्प-
लसरिसगंधणिस्साससुरभिवयणा अद्धधणुसयऊसिया तेसिं मणुयाणं चउसट्ठी पिडिकरंडगा पन्नत्ता
समणाउसो ते णं मणुया पगतिभद्दगा पगतिविणीया पगतिउवसंता पगतियपयणुकोहमाणमायालोभा मिउम-
द्ववसंपन्ना अलीणा भद्दगा विणीया अप्पिच्छा असंनिहिसंचिया अचंडा विडिमंतरपरिवसणा जहिच्छिय-
कामगामिणो य ते मणुयगणा पन्नत्ता समणाउसो तेसि णं भंते मणुयाणं केवतिकालस्स आहारद्वे
समुप्पज्जति गोयमा चउत्थभत्तस्स आहारद्वे समुप्पज्जति एगोरुयमणुईणं भंते केरिसए आगारभावपडोयारे
पन्नत्ते गोयमा ताओ णं मणुईओ सुजायसव्वंगसुंदरीओ पहाणमहिलागुणेहिं जुत्ता अचंचंतविसप्प-
माणपउमसूमालकुम्मसंठितविसिद्धचलणा उज्जुमउयपीवर निरंतरपुडुसुसाहतचलणंगुलीओ अचुण्ण-
यरतियतलिणितंबसुतिणिद्धनखा रोमरहियवट्टलडुसंठियअजहण्णपसत्थलक्खणअकोप्पजंधजुतला सुणि-
म्मियसुगूढजाणुमंसालसुबद्धसंधी कयविकखंभातिरेगसंठियणिव्वणसूमालउय कोमलअविरलहतसुजातवट्ट-
पीवरनिरंतरोरू अट्टावयवीचि पट्टसंठियपसत्थिविच्छिन्नपिहुलसोणी वदणायामप्पमाणदुगुणितविसाल-
मंसलसुबद्धजघण वरधारणीओ वज्जविराइयपसत्थलक्खनिरादरा तिवलिवलियतणुणमियमज्झिआओ उज्जु-
यसमसंहित-जच्चतणुकसिणणिद्धआदेज्जलडसुविभत्तसूजातसोभंतरुलरमणिज्जरोमराई गंगावत्तयपयाहिणाव-
त्तरंगभंगुरविकिरणतरुणबोधियआकोसाइंतपउमगंभीरविगडनाभी अनुब्भडपसत्थ पीणकुच्छी सण्णयपासा
संगयपासा सुजायपासा मियमाईयपीणरइयपासा अकरुडुयकणगरुयगनिम्मलसुजा-यणिरुवहयगातलट्ठी

कंचणकलसामयाणसमसंहियसुजातलडूचूय आमोलगजमलगुजगलवट्टिय अच्चुण्णयकतियसंठियपयो-धराओ
भुजंगअणुपुव्वतणुयगोपुच्छवट्टसमसहियनमियआइज्जललियवाहा तंबणहा मंसलगहत्था
पीवरकोमलवरंगुलीओ निद्धपाणिलेहा रविससिखचक्कसोत्थियविभत्तसुविरतियपाणिलेहा पीणुण्णयकक्ख-
वक्खवत्थिप्पदेसा पडिपुन्नगलकवोला चउरंगुलसुप्पमाणकंबुवरसरिसगीवा मंसलसंठियपसत्थहगुणा दालिम-
पुप्फप्पगासपीवरपलंबकुंचियवराधरा सुंदरोत्तरोद्धा दधिदगरयचंदकुंदवासंतिमउलअच्छिद्धविमलदसणा रत्तुप्प-
लपत्तमउयसूमालतालुजीहा कणयरमउलअकुडिलअब्भुग्गयउज्जुतुंगणासा सारयणवकमलकुमुदकुवलयविमल-
उसदलणिगरसरसलक्खणअंकियकंतणयणा पत्तलघवलायततंबलोयणाओ आणामितचावरुइल-किण्हब्भराइ-
संठियसंगतआयसुजायतणुकसिणिद्धभुमगा अल्लीणपमाणजुत्तसवणा सुसवणा पीणमद्वरमणिज्जगंडलेहा
चउरंसपसत्थसमणिडाला कोमुतिरयणिकरविमलपिपुन्नसोम्मवयणा छत्तुन्नयउत्तिमंगा कुडिलसुसिणिद्ध-
पडिवत्ति-३

दीहसिरया

छत्तज्झयजूवथूभदामिणि

कमंडलुकलसवाविसोत्थियपडागजवमच्छकुम्मरहवरमगरसुकथालअंकुस-
अट्ठावयवीईसुपइडुकमऊरसिरियाभिसेयतोरणमेइयनइउदधिवरभवणगिरिवआयंसललियगय-उसभसीहचम-
रउत्तमपसत्थबत्तीसलक्खणधरीओ हंससरिसगईओ कोइलमुहरगिरिसूसराओ कंताओ सव्वस्स अनुमयाओ
ववगयवलिपलियवंग-दुव्वण्णवाहीदोभग्गसोगमुक्का उच्चत्तेण य नराणथोवूणमूसियाओ सब्भावसिंणारचारु-
वेसा संगतहसियभणियचेट्ठियविलाससंलावणिउणजुत्तो वयारकुसला सुंदरथणजघणवयणकरचरणनयण-
लवण्णवण्णरूवजोवणविलासकलिया नंदणवणविवरचारिणीउव्व अच्छराओ अच्छेरगपेच्छणिज्जा पासाइतातो
दरिसणिज्जातो अभिरूवाओ पडिरूवाओ ।

तासि णं भंते मणुईणं केवतिकालस्स आहारद्वे समुप्पज्जति गोयमा चउत्थभत्तस्स आहारद्वे
समुप्पज्जति ते णं भंते मणुया किमाहारमाहारैति गोयमा पुढविपुप्फफलाहारा ते मणुयगणा पन्नत्ता
समणाउसो तीसे णं भंते पुढवीए केरिसए अस्साए पन्नत्ते गोयमा से जहानामए गुलेति वा खंडेति वा
सक्काराति वा मच्छंडियाति वा भिसकंदेतिवा पप्पडमोततेति वा पुप्फउत्तराइ वा पउमुत्तराइ वा
अकोसिताति वा विजताति वा महाविजयाइ वा पायसोवमाइ वा उवमाइ वा अणोवमाइवा चउरक्के गोखीरे
चउठाणपरिणए गुडखंडमच्छंडिउवणीए मंदग्गिकदिए वण्णेणं उववेए जाव फासेणं भवेतारूवे सिता नो इणद्वे
समद्वे तीसे णं पुढवीए एत्तो इट्ठयराए चेव जाव मणामतराए चेव आसाए णं पन्नत्ते तेसि णं भंते
पुप्फफलाणं केरिसए अस्साए पन्नत्ते गोयमा से जहानामए रण्णो चाउरंतचक्कवट्टिस्स कल्लाणे
पवरभोयणे सतसहस्सनिप्फन्ने वण्णेणं उववेए गंधेणं उववेए रसेणं उववेए फासेणं उववेए अस्सायणिज्जे
वीसायणिज्जे दीवणिज्जे दप्पणिज्जे बीहणिज्जे मयणिज्जे सव्विंदियगायपल्हायणिज्जे भवेतारूवे सिता नो
तिणद्वे समद्वे तेसि णं पुप्फफलाणं एत्तो इट्ठतराए चेव जाव अस्साए णं पन्नत्ते, ते णं भंते मणुया
तमाहारेत्ता कहिं वसहिं उव्वैति गोयमा रुक्खगेहालता णं ते मणुयगणा पन्नत्ता समणाउसो ते णं भंते
रुक्खा किसंठिया पन्नत्ता गोयमा कूडागारसंठिया पेच्छाघरसंठिया छत्तागारसंठिता झयसंठिया थूमसंठिया
तोरणसंठिया गोपुरवेतियपालगसंठिया अट्ठालगसंठिया पासायसंठिया हम्मिमतलसंठिया गवक्खसंठिया
वालग्गपोतियसंठिया अण्णे तत्थ बहवे वरभवणसयणासणविसिद्धसंठाणसंठिया सुभसीतलच्छाया णं ते
दुमगणा पन्नत्ता ।

समणाउसो अत्थि णं भंते एगोरुयदीवे दीवे गेहातिं गेहाययणातिं वा नो तिण्ढे समढ्ढे रुक्खगेहालया णं ते मणुयगणा पन्नत्ता समणाउसो अत्थि णं भंते एगोरुयदीवे गामाति वा नगराति वा जाव सन्निवेसाति वा नो तिण्ढे समढ्ढे जहच्छियकामगामिणो णं ते मणुयगणा पन्नत्ता समणाउसो अत्थि णं भंते एगूरुयदीवे असीइ वा मसीइ वा विवणीइ वा पणीइ वा वाणिज्जाइ वा नो तिण्ढे समढ्ढे ववगयअसिमसिकिसिविवणिवणिज्जा णं ते मणुयगणा पन्नत्ता समणाउसो अत्थि णं भंते एगूरुयदीवे हिरण्णेति वा सुवण्णेति वा कंसेति वा दूसेति वा मणीति वा मुत्तिएति वा विपुलधणकणगरतमणिमोत्तिय-संखसिलप्पवालसंतसारसावएज्जे वा हंता अत्थि नो चेव णं तेसिं मणुयाणं तिव्वे ममत्तिभावे समुप्पज्जति अत्थि णं भंते एगोरुयदीवे रायाति वा जुवरायाति वा ईसरेति वा तलवरेइ वा मांडबिएति वा कोडुंबिएति वा इब्भेति वा सेट्ठीति वा सेणावतीति वा सत्थवाहेति वा नो तिण्ढे समढ्ढे ववगयइ-डिढसककारा णं ते मणुयगणा पन्नत्ता समणाउसो अत्थि णं भंते एगूरुयदीवे दासाइ वा पेसाइ वा सिस्साइ वा भयगाइ वा भाइल्लगाइ वा कम्मगराइ वा भोगपुरिसाइ वा नो इण्ढे समढ्ढे ववगयआभिओगिया णं ते मणुयगणा पडिवत्ति-3

पन्नत्ता समणाउसो अत्थि णं भंते एगोरुयदीवे दीवे माताति व पियाति वा भायाति वा भइणीति व भज्जाति वा पुत्ताति वा धूयाइ वा सुण्हाति वा हंता अत्थि नो चेव णं तेसिं णं मणुयाणं तिव्वे पेज्जबंधणे समुज्जति पयणुपेज्जबंधणा णं ते मणुयगणा पन्नत्ता समणाउसो अत्थि णं भंते एगोरुयदीवे अरीति वा वेरियाति वा घायगाति वा वहगाति वा पडिणीइ वा पच्चमित्ताति वा नो इण्ढे समढ्ढे ववगयवेराणुबंधा णं ते मणुयगणा पन्नत्ता समणाउसो अत्थि णं भंते एगोरुयदीवे मित्ताति वा वतंसाति वा घडिताति वा सहीति वा सुहियाति वा महाभागाति वा संगतियाति वा नो तिण्ढे समढ्ढे ववगतपेम्मा ते मणुयगणा पन्नत्ता समणाउसो ।

अत्थि णं भंते एगोरुयदीवे आवाहाति वा विवाहाति वा जन्नाति वा सद्धाति वा थालिया-काति वा चोलोवणतणाति वा सीमंतोवणतणाइ वा पितिपिंडनिवेणाइ वा नो इण्ढे समढ्ढे ववगयआवाह-विवाहजन्नसद्धथालिपागचोलोवणतणसीमंतोवणतणपितिपिंडनिवेदणा णं ते मणुयगणा पन्नत्ता समणाउसो अत्थि णं भंते एगोरुयदीवे इंदमहाइ वा रुद्धमहाइ वा खंदमहाइ वा सिवमहाइ वा वेसमणमहाइ वा मुगुंदमहाइ वा नागमहाइ वा जक्खमहाइ वा भूतमहाइ वा कूवमहाइ वा तलागणदिमहाइ वा दहमहाइ वा पव्वयमहाइ वा चेइयमहाइ वा रुक्कंसियणमहि वा थूभमहाइ वा नो इण्ढे समढ्ढे ववगयमहामहिमा णं ते मणुयगणा पन्नत्ता समणाउसो अत्थि णं भंते एगोरुयदीवे दीवे नडपिच्छाइ वा नट्टपेच्छाइ वा मल्लपेच्छाइ वा मुट्ठियपेच्छाइ वा विडंबगपेच्छाइ वा कहगपेच्छाइ वा पवगपेच्छाइ वा अक्खाइगपेच्छाइ वा लासगपेच्छाइ वा लंखपे मंखपे तूणइल्लपे तुंववीणपेच्छाइ वा मागहपेच्छाइ वा कावपे जल्लपि कहयापेच्छाइ वा नो इण्ढे समढ्ढे ववगयकोउहल्ला ण ते मणुयगणा पन्नत्ता समणाउसो अत्थि णं भंते एगोरुयदीवे सगडाइ वा रहाइ वा जाणाइ वा जुग्गाइ वा गिल्लीइ वा पिल्लीइ वा थिल्लीइ वा पवहणाइ वा सलीयाइवा संदमाणियाइ वा नो तिण्ढे समढ्ढे पादचारविहारिणो णं ते मणुयगणा पन्नत्ता समणाउसो अत्थि णं भंते एगोरुयदीवे आसाइ वा हत्थीइ वा उट्टाइ वा गोणाइ वा महिसाइ वा खराइ वा अवीइ वा एलगाइ वा हंता अत्थि नो चेव णं तेसिं मणुयाणं परिभोगत्ताए हव्वमागच्छति अत्थि णं भंते एगोरुयदीवे गोवीइ वा महिसीइ वा उट्ठीइ वा अयाइ वा एलगाइ वा हंता अत्थि नो चेव णं तेसिं मणुयाणं

परिभोगत्ताए हव्वामागच्छंति अत्थि णं भंते एगुरुयदीवे दीवे सीहाइ वा वग्धाइ वा दीवि-याइ वा अच्छाइ वा परस्सराइ वा सियालाइ वा विडालाइ वा सुणगाइ वा कोलसुणगाइ वा कोकंतियाइ वा ससगाइ वा चित्तलाइ वा चिल्ललगाइ वा हंता अत्थि नो चेव णं ते अण्णमण्णस्स तेसिं वा मणुयाणं किंचि आवाहं वा पवाहं वा उप्पायंति छविच्छेयं वा करंति पगइभद्दगा णं ते सावयगणा पन्नत्ता समणाउसो ।

अत्थि णं भंते एगुरुयदीवे दीवे सालीइ वा वीहीइ वा गोहुमाइ वा उक्खूइ वा जवाइ वा तिलाइ वा हंता अत्थि नो चेव णं तेसिं मणुयाणं परिभोगत्ताए हव्वामागच्छंति अत्थि णं भंते एगुरुयदीवे दीवे गत्ताइ वा दरीइ वा पाइ वा घंसीइ वा भिगूइ वा उवाएइ वा विसमेइ वा धूलीइ वा रेणूइ वा पंकेइ वा चलणीइ वा नो इण्ठे सम्भे एगुरुयदीवे णं दीवे बहुसमरणिज्जे भूमिभागे पन्नत्ते समणाउसो अत्थि णं भंते एगुरुयदीवे दीवे खाणूइ वा कंटएइ वा हीरएइ वा सक्कराइ वा तणपत्तकयवराइ वा असुई वा पूईआति वा दुब्भिगंधाइ वा अचोक्खाइ वा नो इण्ठे सम्भे ववगयखाणुकंटकहीरसक्करतणकयवरअसुइपूइय-दुब्भिगंधमचोक्खवज्जिए णं ओगुरुयदीवे पन्नत्ते समणाउसो अत्थि णं भंते एगुरुयदीवे दीवे दंसाइ वा मसगाइ वा पिसुगाइ वा जूवाइ वा लिक्खाइ वा ढिंकुणाइ वा नो तिण्ठे सम्भे ववगयदंसमसगपिसुत-पडिवत्ति-३

जूतलिक्खढिंकुणपरिवज्जिए णं एगुरुयदीवे पन्नत्ते समणाउसो अत्थि णं भंते एगुरुयदीवे अहीइ वा अयगराइ वा मोहरगाइ वा हंता अत्थि नो चेव णं ते अन्नमन्नस्स तेसिं वा मउयाणं किंचि आवाहं वा पवाहं वा छविच्छेयं वा पकरंति पगइभद्दगा णं ते वालगणा पन्नत्ता समणाउसो अत्थि णं भंते गुरुयदीवे गहदंडाइ वा गहमुसलाइ वा गहगज्जियाइ वा गहजुद्धाइ वा गहसंधाडगाइ वा गहअवसव्वाइ वा अब्भाइ वा अब्भरुक्खाइ वा संझाइ वा गंधव्वनगराइ वा गज्जियाइ वा विज्जुयाइ वा उक्कापायाइ वा दिसादाहाइ वा निग्घाताइ वा पंसुविट्ठीति वा जूवागाइ वा जक्कालित्ताइ वा धूमियाइ वा महियाइ वा रउग्घायाइ वा चंदोवरागाइ वा सूरुवरागाइ वा चंदपरिवेसाइ वा सूरपरिवेसाइ वा पडिचंडाइ वा पडिसूराइ वा इंदधणूइ वा उदगमच्छाइ वा अमोहाइ वा कविहसियाइ वा पाईणवायाइ वा पडीणवायाइ वा जाव सुद्धवायाइ वा गामदाहाइ वा नगरदाहाइ वा जाव सण्णिवेसदाहाइ वा पाणक्खयजणक्खयकुलसक्खयधणक्खयवसणूत-मणारियाइ वा नो इण्ठे सम्भे ।

अत्थि णं भंते एगुरुयदीवे दीवे डिंभाइ वा डमराइ वा कलहाइ वा बोलाइ वा खाराइ वा वेराइ वा विरुद्धारज्जाइ वा नो इण्ठे सम्भे ववगयडिंबडमरकलहबोलखारवेरविरुद्धरज्जविवज्जिया णं ते मणुयगणा पन्नत्ता समणाउसो अत्थि णं भंते एगुरुयदीवे दीवे महाजुद्धाइ वा महासंगामाइ वा महासत्थ-पडणाइ वा महापुरिसपहाणाइ वा महारुधिरपडणाइ वा नागावाणाइ वा खेणवाणाइ वा तामसवाणाइ वा दुब्भूइयाइ वा कुलरोगागइ वा गामरोगाइ वा नगररोगाइ वा मंडलरोगाइ वा सीसवेयणि वा अच्छिवेयणि वा कण्णवेयणाइ वा नक्खवेयणाइ वा नक्कवेयणाइ वा दंतवेयणाइ वा कासाइ वा सासाइ वा सोसाइ वा जराइ वा दाहाइ वा कच्छूइ वा कुट्ठाइ वा दगोवराइ वा इअरिसाइ वा अजीरगाइ वा भगंदलाइ वा इंदग्गहाइ वा खंदग्गहाइ वा कुमारग्गहाइ वा नागग्गहाइ वा जक्खग्गहाइ वा भूयग्गहाइ वा उव्वेवग्गहाइ वा धनुग्गहाइ वा एगाहियाइ वा बेयाहियाइ वा तेयाहियाइ वा चाउत्थगाहियाइ वा हिययसूलाइ वा मत्थगसूलाइ वा पाससूलाइ वा तुच्छिसूलाइ वा जोणिसूलाइ वा गाममारीइ वा जाव सन्निवेसमारीइ वा पाणक्खय जाव वसणभूतमणायरिय वा नो इण्ठे सम्भे ववगयरोगायंका णं ते मणुयगणा पन्नत्ता समणाउसो अत्थि णं

भंते एगुरुयदीवे दीवे अइवासाइ वा मंदवासाइ वा सुवुड्डीय वा मंदवुड्डीय वा उदवाहाइ वा पवाहाइ वा दगुब्भैयाइ वा दगुप्पीलाइ वा गामवाहाइ वा जाव सन्निवेसवाहाइ वा पाणक्खय जाव वसणभूतमणारियाइ वा नो इमट्टे समट्टे ववगयदगोवद्धवा णं ते मणुयगणा पन्नत्ता समणाउसो अत्थि णं भंते एगुरुयदीवे अयागराइ वा तंबागराइ वा जाव वसुहाराइ वा, हिरण्ण वासाइ वा जाव चुण्णवासाइ वा खीरवुड्डीति वा रयणवुड्डीति वा सुवण्णवुड्डीति वा तहेव जाव चुण्णवुड्डीति वा सुकालाइ वा दुक्कालाइ वा सलुभिक्षाइ वा दुभिक्षाइ वा अप्पग्धाइ वा महग्धाइ वा कयाइ वा विक्कयाइ वा अण्णिहीइ वा संचायाइ वा निधीइ वा निहाणाइ वा चिरपोराणाइ वा पहीणसामियाइ वा पहीणसेउयाइ वा पहीणगोत्तागराइं जाइं इमाइं गामागरण गरखेडकब्बडमडंबदोण-मुहपट्टणासमसंवाहसन्निवेसेसु सिंघाड जाव वणगिहेसु सन्निक्खित्ताइं चिट्ठंति नो इणट्टे समट्टे एगुरुयदीवे णं भंते दीवे मणुयाणं केवतियं कालं ठिती पन्नत्ता गोयमा जहन्नेणं पलिओवमस्स असंखेज्जइभागं असंखेज्जतिभागेणं ऊणगं उक्कोसेणं पलिओवमस्स असंखेज्ज-तिभागं ते णं भंते मणुया कालमासे कालं किच्चा कहिं गच्छंति कहिं उववज्जंति गोयमा ते णं मणुया छम्मासावसेसाउया मिहुणयाइं पसवंति अउणासीइं राइंदियाइं मिहुणाइं सारक्खंति संगोवंति य साराक्खित्ता उस्ससित्ता निस्ससित्ता कासित्ता छीतित्ता उक्किट्ठा अव्वहिया अपरियाविया सुहंसुहेणं कालमासे कालं पडिवत्ति-३

अण्णयरेसु देवलोएसु देवत्ताए उववत्ता भवंति देल्लोगपरिग्गहिया णं ते मणुयगणा पन्नत्ता समणुसो ।

कहिं णं भंते दाहिणिल्लाणं आभासियमणुस्साणं आभासियदीवे नामं दीवे पन्नत्ते गोयमा जंबुद्धीवे दीवे मंदरस्स पव्वयस्स दाहिणेणं चुल्लहिमंवत्तस्स वासधरपव्वयस्स पुरत्थिमिल्लाओ चरिमंताओ दाहिणपुरत्थि मिल्लेणं लवणसमुद्धं तिण्णि जोयणसयाइं ओगाहित्ता एत्थ णं दाहिणिल्लाणं आभासियमणुस्साणं आभासियदीवे नामं दीवे पन्नत्ते सेसं जहा एगूरुयाणं कहि णं भंते दाहिणिल्लाणं णंगोलियमणुस्साणं णंगोलियदीवे नामं दीवे पन्नत्ते गोयमा जंबुद्धीवे दीवे मंदरस्स पव्वयस्स दाहिणेणं चुल्लहिमंवत्तस्स वासधरपव्वयस्स पच्चत्थिमिल्लाओ चरिमंताओ दाहिणपच्चत्थिमिल्लेणं लवणसमुद्धं तिण्णि जोयणसयाइं ओगाहित्ता एत्थ णं दाहिणिल्लाणं णंगोलियमणुस्साणं णंगोलियदीवे नामं दीवे पन्नत्ते सेसं जहा- एगूरुयाणं कहि णं भंते दाहिणिल्लाणं वेसाणियमणुस्साणं वेसाणिय दीवे नामं दीवे पन्नत्ते गोयमा जंबुद्धीवे दीवे मंदरस्स पव्वयस्स दाहिणेणं चुल्लहिमंवत्तस्स वासधरपव्वयस्स पच्चत्थिमिल्लाओ चरिमंताओ उत्तरपच्चत्थिमिल्लेणं लवणसमुद्धं तिण्णि जोयणसयाइं ओगाहित्ता एत्थ णं दाहिणिल्लाणं वेसाणियमणुस्साणं वेसाणियदीवे नामं दीवे पन्नत्ते सेसं जहा एगूरुयाणं ।

[१४६] कहि णं भंते दाहिणिल्लाणं हयकण्णमणुस्साणं हयकण्णदीवे नामं दीवे पन्नत्ते गोयमा एगूरुयदीवस्स पुरत्थिमिल्लाओ चरिमंताओ उत्तरपुरत्थिमिल्लेणं लवणसमुद्धं चत्तारि जोयणसयाइं ओगाहित्ता एत्थ णं दाहिणिल्लाणं हयकण्णमणुस्साणं हयकण्णदीवे नामं दीवे पन्नत्ते-चत्तारि जोयणसयाइं आयाम-विक्खंभेणं बारस पन्नट्ठ जोयणसया किंचिविसेसाहिया परिक्खेवेणं सेसं जहा- एगूरुयाणं कहि णं भंते दाहिणिल्लाणं गयकण्णमणुस्साणं गयकण्णदीवे नामं दीवे पन्नत्ते गोयमा आभासियदीवस्स पुरत्थिमिल्लाओ चरिमंताओ दाहिणपुरत्थिमिल्लेणं लवणसमुद्धं चत्तारि जोयणसयाइं ओगाहित्ता एत्थ णं दाहिणिल्लाणं गयकण्णमणुस्साणं गयकण्णदीवे नामं दीवे पन्नत्ते सेसं जहा- हयकण्णाणं एवं गोकण्णाणं वि-णंगूलियदीवस्स पच्चत्थिमिल्लाओ चरिमंताओ दाहिणपच्चत्थिमेणं लवणसमुद्धं चत्तारि जोयणसयाइं ओगाहिता एत्थ णं गोकण्णमणुस्साणं गोकण्णदीवे नामं दीवे पन्नत्ते

सेसं जहा- हयकण्णाणं सक्कुलकण्णाणं-वेसाणियदीवस्स पच्चत्थिमिल्लाओ चरिमंताओ उत्तरपच्चत्थिमेणं लवणसमुद्धं चत्तारि जोयणसयाइं ओगाहिल्ला एत्थ णं दाहिणिल्लाणं सक्कुलिकण्णमणुस्साणं सक्कुलिकण्णदीवे नामं दीवे पन्नत्ते सेसं जहा- हयकण्णाणं आयंसमुहाणं पुच्छा हयकण्णदीवस्स उत्तरपुरत्थिमिल्लाओ चरिमंताओ पंच जोयणसयाइं ओगाहिल्ला एत्थ णं दाहिणिल्लाणं आयंसुह मणुस्साणं आयंसमुहदीवे नामं दीवे पन्नत्ते पंच जोयणसयिं आयामविकखंभेणं आसमुहाईणं छ सया आसकण्णाईणं सत्त उक्कामुहाईणं अट्ठ घणदंताईणं जाव नव जोयणसयाइं ।

[१४७] एगुरुयपरिक्खेवो नव चेव सयाइ अउणपन्नाइं ।

बारस पन्नद्वाइं हयकण्णाणं परिक्खेवो ॥

[१४८] आयंसमुहाईणं पन्नरसेकासीए जोयणसए किंचिविसेसाहिए परिक्खेवेण एवं एतेणं कमेणं उव्वज्जिय नेयव्वा चत्तारि एगप्पमाणा नाणत्तं ओगाहे विकखंभे परिक्खेवे पढम बितिय ततिय चउक्काणं ओग्गहो विकखंभो परिक्खेवो य भणिओ चउत्थे चउक्के छ जोयणसयाइं आयामविकखंभेणं अट्ठार सत्ताणउए जोयणसए परिक्खेवेणं पंचमचउक्के सत्त जोयणसयाइं आयामविकखंभेणं बावीसं तेरसुत्तरे जोयणसए परिक्खेवेणं छट्ठचउक्के अट्ठ जोयणसयाइं आयामविकखंभेणं पणवीसं अगुणत्तीसे जोयणसते

पडिवत्ति-३

परिक्खेवेणं सत्तमचउक्के नव जोयणसयाइं आयाम विकखंभेणं दो जोयणसहस्साइं अट्ठपन्नत्ताले जोयणसए परिक्खेवेणं ।

[१४९] जस्स य जो विकखंभो ओगाहो तस्स तत्तिओ चेव ।

पढम पीयाण परिरतो ऊणो सेसाण अहिओउ ॥

[१५०] सेसा जहा एगुरुयदीवस्स जाव सुद्धदंतदीवे देवलोगपरिग्गहा णं ते मणुयगणा पन्नत्ता समणाउसो, कहिं णं भंते उत्तरिल्लाणं एगुरुयमणुस्साणं एगुरुयदीवे नामं दीवे पन्नत्ते गोयमा जंबुद्धीवे दीवे मंदरस्स पव्वयस्स उततरेणं सिहरिस्स वासधरपव्वयस्स पुरत्थिमिल्लाओ चरिमंताओ लवणसमुद्धं तिणिण जोयणसयाइं ओगाहिल्ला एत्थ णं उत्तरिल्लाणं एगुरुयमणुस्साणं एगुरुयदीवे नामं दीवे पन्नत्ते तहेव उत्तरेणं विभासा भाणितव्वा से तं अंतरदीवग्गा ।

[१५१] से किं तं अकम्मभूमगमणुस्सा अकम्मभूमगमणुस्सा तीसविधा पन्नत्ता तं जहा- पचहिं हेमवएहिं [पंचहिं हिरण्णवएहिं पंचहिं हरिवासेहिं पंचहिं रम्मगवासेहिं पंचहिं देवकुरुहिं] पंचहिं उत्तरकुरुहिं सेत्तं अकम्मभूमगा से किं तं कम्मभूमगा कममभूमगा पन्नरसविधा पन्नत्ता तं जहा- पंचहिं भरहेहिं पंचहिं एरवएहिं पंचहिं महाविदेहेहिं ते समासतो दुविहा पन्नत्ता तं जहा- आरिया मिलेच्छा एवं जहा- पन्नवणापदे जाव सेत्तं आरिया सेत्तं गब्भवक्कंतिया सेत्तं मणुस्सा ।

◦ तच्चाए पडिवत्तीए मणुस्साधिगारो समत्तो ◦

॥ देवाधिकारो ॥

[१५२] से किं तं देवा देवा चउव्विहा पन्नत्ता तं जहा- भवणवासी वाणमंतरजोइसिया वेमाणिया ।

[१५३] से किं तं भवणवासी भवणवासी दसविहा पन्नत्ता तं जहा- असुरकुमार जहा- पन्नवणापदे देवाणं भेदो तहा भाणितव्वो जाव अनुत्तरोववाइया पंचविधा पन्नत्ता तं जहा- विजयवेजयंत जाव सव्वट्ठसिद्धगा सेत्तं अनुत्तरोववाइया ।

[१५४] कहि णं भंते भवणवासिदेवाणं भवणा पन्नत्ता कहिं णं भंते भवणवासी देवा परिवसंति गोयमा इमीसे रयणप्पभाए पुढवीए असीउतरजोयणसयसहस्सबाहल्लाए एवं जहा- पन्नवणाए जाव भवणा पासादीया दरिसणिज्जा अभिरूवा पडिरूवा एत्थ णं भवणवासीणं देवाणं सत्त भवणकोडीओ बावत्तरिं भवणावाससयसहस्सा भवंतित्तिमक्खाता तत्थ णं बहवे भवणवासी देवा परिवसंति-असुरा नाग सुवण्णा य जहा- पन्नवणाए जाव विहरंति ।

[१५५] कहि णं भंते असुरकुमारणं देवाणं भवणा पन्नत्ता पुच्छा एवं जहा- पन्नवणा ठाणपदे जाव विहरंति कहि णं भंते दाहिणिल्लाणं असुरकुमारदेवाणं भवणा पुच्छा एवं जहा- ठाणपदे जाव चमरे एत्थ असुरकुमारिंदे असुरकुमारराया परिवसति जाव विहरति ।

[१५६] चमरस्स णं भंते असुरिंदस्स असुरकुमाररणो कति परिसाओ पन्नत्ताओ गोयमा तओ परिसाओ पन्नत्तो तं जहा- समिता चंड जाया अब्भित्तिया समिता मज्झिमिया चंडा बाहिरिया जाया चमरस्स णं भंते असुरिंदस्स असुरकुमाररणो अब्भित्तियाए परिसाए कति देवसाहस्सीओ पन्नत्ताओ मज्झिमियाए परिसाए कति देवसाहस्सीओ पन्नत्ताओ बाहिरियाए परिसाए कति देवसाहस्सीओ पन्नत्ताओ

पडिवत्ति-३

गोयमा चमरस्स णं भंते असुरिंदस्स असुरकुमाररणो अब्भित्तियाए परिसाए चउवीसं देवसाहस्सीओ पन्नत्ताओ मज्झिमियाए परिसाए अट्ठावीसं देवसाहस्सीओ बाहिरियाए परिसाए बत्तीसं देवसाहस्सीओ चमरस्स णं भंते असुरिंदस्स असुरकुमाररणो परिसाए देविसया पुच्छा गोयमा चमरस्स णं असुरिंदस्स असुरकुमाररणो अब्भित्तियाए परिसाए अट्ठुट्ठा देविसया पन्नत्ता मज्झिमियाए परिसाए तिण्णि देविसया पन्नत्ता बाहिरियाए अट्ठाइज्जा देविसया पन्नत्ता चमरस्स णं भंते असुरिंदस्स असुरकुमाररणो अब्भित्तियाए परिसाए देवाणं कालं ठिती पुच्छा देवीणं कालं ठिती पुच्छा गोयमा चमरस्स णं असुरिंदस्स असुरकुमाररणो अब्भित्तियाए परिसाए देवाणं अट्ठाइज्जाइं पलिओवमाइं ठिती पन्नत्ता मज्झिमियाए परिसाए देवाणं दो पलिओवमाइं ठिती पन्नत्ता बाहिरियाए परिसाए देवाणं दिवड्ढं पलिओवमं ठिती पन्नत्ता अब्भित्तियाए परिसाए देवीणं दिवड्ढं पलिओवमं ठिती पन्नत्ता मज्झिमियाए परिसाए देवीणं पलिओवमं ठिती पन्नत्ता बाहिरियाए परिसाए देवीणं अट्ठपलिओवमं ठिती पन्नत्ता से केणट्ठेणं भंते एवं वुच्चति-चमरस्स असुरिंदस्स असुरकुमाररणो तओ परिसाओ पन्नत्ताओ तं जहा- समिया चंडा जाया, अब्भित्तिया समिया मज्झिमिया चंडा बाहिरिया जाया गोयमा चमरस्स णं असुरिंदस्स असुरकुमाररणो अब्भित्तरपरिसा देवा वाहिता हव्वमागच्छंति नो उव्वाहिता मज्झिमपरिसा देवा बाहिता हव्वमागच्छंति अब्बाहितावि, बाहिरपरिसा देवा अव्वाहिता हव्वमागच्छंति अदुत्तरं च णं गोयमा चमरे असुरिंदे असुरकुमारराया अन्नयरेसु उच्चावएसु कज्ज-कोडुंबेसु समुप्पन्नेसु अब्भित्तियाए परिसाए सद्धिं सम्मुइसंपुच्छणाबहुले विहरइ मज्झिमियाए परिसाए सद्धिं पयं पवंचेमाणे-पवंचेमाणे विहरति बाहिरियाए परिसाए सद्धिं पयं पचंडे-माणे-पचंडेमाणे विहरति से तेणट्ठेणं गोयमा एवं वुच्चइ-चमरस्स णं असुरिंदस्स

असुरकुमाररण्णो तओ परिसाओ पन्नत्ताओ समिया चंडा जाया अब्भित्तारिया समिया मज्झिमिया चंडा बाहिरिया जाया ।

[१५७] कहि णं भंते उत्तरिल्लाणं असुरकुमाराणं भवणा पन्नत्ता जहा- ठाणपदे जाव बली एत्थ वडरोयणिंदे वडरोयणराया परिवसति जाव विहरति बलिस्स णं भंते वडरोयणिंदस्स वडरोयणरण्णो कति परिसाओ पन्नत्ताओ गोयमा तिण्णि परिसाओ पन्नत्ताओ तं जहा- समिया चंडा जाया अब्भित्तारिया समिया मज्झिमिया चंडा बाहिरिया जाया बलिस्स णं भंते वडरोयणिंदस्स वडरोयणरण्णो अब्भित्तारियाए परिसाए कति देवसहस्सा पन्नत्ता मज्झिमियाए परिसाए कति देवसहस्सा पन्नत्ता जाव बाहिरियाए परिसाए कति देविसया पन्नत्ता गोयमा बलिस्स णं वडरोयणिंदस्स वडरोयणरण्णो अब्भित्तारियाए परिसाए वीसं देवसहस्सा पन्नत्ता मज्झिमियाए परिसाए चउवीसं देवसहस्सा पन्नत्ता बाहिरियाए परिसाए अट्ठावीसं देवसहस्सा पन्नत्ता अब्भित्तारियाए परिसाए अद्धपंचमा देविसया पन्नत्ता मज्झिमियाए परिसाए चत्तारि देवसया पन्नत्ता बाहिरियाए परिसाए अद्धुट्ठा देविसया पन्नत्ता बलिस्स ठितीए पुच्छा जाव बाहिरियाए परिसाए देवीणं केवतियं कालं ठिती पन्नत्ता गोयमा बलिस्स णं वडरोयणिंदस्स वडरोयणरण्णो अब्भित्तारि-याए परिसाए देवाणं अद्धु पलिओवमा ठिती पन्नत्ता मज्झिमाए परिसाए तिण्णि पलिओवमाइं ठिती पन्नत्ता बाहिरियाए परिसाए देवाणं अट्ठाइज्जाइं पलिवओवमाइं ठिती पन्नत्ता अब्भित्तारियाए परिसाए देवीणं अट्ठाइज्जाइं पलिओवमाइं ठिती पन्नत्ता मज्झिमियाए परिसाए देवीणं दो पलिओवमाइं ठिती पन्नत्ता बाहिरियाए देवीणं दिवड्ढं पलिओवमं ठिती पन्नत्ता सेसं हा- चमरस्स असुरिंदस्स असुरकुमाररण्णो।

[१५८] कहि णं भंते नागकुमाराणं देवाणं भवणा पन्नत्ता जहा- ठाणपदे जाव दाहिणिल्लावि पुच्छियव्वा जाव धरणे इत्थ नागकुमारिंदे नागकुमारराया परिवसति जाव विहरति धरणस्स णं भंते नाग-पडिवत्ति-३

कुमारिंदस्स नागकुमाररण्णो कति परिसाओ पन्नत्ताओ गोयमा तिण्णि परिसाओ ताओ चेव जहा-चमरस्स धरणस णं भंते नागकुमारिंदस्स नागकुमाररण्णो अब्भित्तारियाए परिसाए कति देवसहस्सा पन्नत्ता जाव बाहिरियाए परिसाए कति देवीसया पन्नत्ता गोयमा धरणस्स णं नागकुमारिंदस्स नागकुमाररण्णो अब्भित्तारियाए परिसाए सट्ठिं देवसहस्साइं मज्झिमियाए परिसाए सत्तरिं देवसहस्साइं बाहिरियाए असीतिदेवसहस्साइं अब्भित्तारियाए परिसाए पन्नत्तरं देविसतं पन्नत्तं मज्झिमियाए परिसाए पन्नासं देविसतं पन्नत्तं बाहिरियाए परिसाए पणवीसं देविसतं पन्नत्तं धरणस्स णं नागकुमारिंदस्स नागकुमाररण्णो अब्भित्तारियाए परिसाए देवाणं केवतियं कालं ठिती पन्नत्ता मज्झिमियाए परिसाए देवाणं केवतियं कालं ठिती पन्नत्ता बाहिरियाए परिसाए देवाणं केवतियं कालं ठिती पन्नत्ता अब्भित्तारियाए परिसाए देवीणं केवतियं कालं ठिती पन्नत्ता मज्झिमियाए परिसाए देवीणं केवतियं कालं ठिती पन्नत्ता बाहिरियाए परिसाए देवीणं केवतियं कालं ठिती पन्नत्ता गोयमा धरणस्स णं नागकुमारिंदस्स नागकुमाररण्णो अब्भित्तारियाए परिसाए देवाणं सातिरेगं अद्धपलिओवमं ठिती पन्नत्ता मज्झिमियाए परिसाए देवाणं अद्धपलिओवमं ठिती पन्नत्ता बाहिरियाए परिसाए देवाणं देसुणं अद्धपलिओवमं ठिती पन्नत्ता अब्भित्तारियाए परिसाए देवीणं देसूणं अद्धपलिओवमं ठिती पन्नत्ता मज्झिमियाए परिसाए देवीणं सातिरेगं चउभागपलिओवमं ठिती पन्नत्ता बाहिरियाए परिसाए देवीणं चउभागपलिओवमं ठिती पन्नत्ता अट्ठो जहा चमरस्स कहि णं भंते उत्तरिल्लाणं नागकुमाराणं भवणा पन्नत्ता जहा- ठाणपदे जाव विहरति

भूयाणंदस्स णं भंते नागकुमारिंदस्स नागकुमाररण्णो अब्भित्तोरियाए परिसाए कति देवसाहस्सीओ पन्नत्ताओ मज्झिमियाए परिसाए कति देवसाहस्सीओ पन्नत्ताओ बाहिरियाए परिसाए कति देवसाहस्सीओ पन्नत्ताओ अब्भित्तोरियाए परिसाए कति देविसया पन्नत्ता गोयमा भूयाणंदस्स णं नागकुमारिंदस्स नागकुमार रण्णो अब्भित्तोरियाए परिसाए पन्नासं देवसाहस्सीओ पन्नत्ताओ मज्झिमियाए परिसाए सद्धिं देवसाहस्सीओ पन्नत्तओ बाहिरियाए परिसाए सत्तरि देवसाहस्सीओ पन्नत्ता अब्भित्तोरियाए परिसाए दो पणवीसं देविसया पन्नत्ता, मज्झिमियाए परिसाए दो देवी सया पन्नत्ता, बाहिरियाए परिसाए पन्नत्तरं देविसयं पन्नत्तं भूयाणंदस्स णं भंते नागकुमारिंदस्स नागकुमाररण्णो कालं ठिती पुच्छा गोयमा भूताणदस्स णं नागकुमारिंदस्स नागकुमाररण्णो अब्भित्तोरियाए परिसाए देवाणं देसूणं पलिओवमं ठिती पन्नत्ता मज्झिमियाए परिसाए देवाणं साइरेगं अद्धपलिओवमं ठिती पन्नत्ता बाहिरियाए परिसाए देवाणं अद्धपलिओवमं ठिती पन्नत्ता अब्भित्तोरियाए परिसाए देवीणं अद्धपलिओवमं ठिती पन्नत्ता मज्झिमियाए परिसाए देवीणं देसूणं अद्धपलिओवमं ठिती पन्नत्ता बाहिरियाए परिसाए देवीणं साइरेगं चउब्भागपलिओवमं ठिती पन्नत्ता अत्थो जहा- चमरस्स अवसेसाणं वेणुदेवादीणं महाघोसपज्जवसाणाणं ठाणपदवत्तव्वया निरवयवा भाणियव्वा परिसाओ जहा- धरणभूताणंदाणं-दाहिणिल्लाणं जहा- धरणस्स उत्तरिल्लाणं जहा- भूताणंदस्स परिमाणंपि ठितीवि

[१५९] कहिं णं भंते वाणमंतराणं देवाणं भोमेज्जा नगरा पन्नत्ता जहा- ठाणपदे जाव विहरंति कहिं णं भंते पिसायाणं देवाणं भोमेज्जा नगरा पन्नत्ता जहा- ठाणपदे जाव विहरंति कालमहाकाला य तत्थ दुवे पिसायकुमाररायाणो परिवसंति जाव विहरंति कहिं णं भंते दाहिणिल्लाणं पिसायकुमाराणं जाव विहरंति काले य एत्थ पिसायकुमारिंदे पिसायकुमारराया परिवसति महिड्ढिए जाव विहरति कालस्स णं भंते पिसायकुमारिंदस्स पिसायकुमाररण्णो कति परिसाओ पन्नत्ताओ गोयमा तिण्णि पडिवत्ति-३

परिसाओ पन्नत्ताओ तं जहा- ईसा तुडिया दढरहा अब्भित्तोरिया ईसा मज्झिमिया तुडिया बाहिरिया दढरहा कालस्स णं भंते पिसायकुमारिंदस्स पिसायकुमाररण्णो अब्भित्तोरियाए परिसाए अद्धदेवसाहस्सीओ पन्नत्ताओ मज्झिमियाए परिसा दस देवसाहस्सीओ पन्नत्ताओ बाहिरियाए परिसाए बारस देवसाहस्सीओ पन्नत्ताओ अब्भित्तोरियाए परिसाए एगं देविसतं पन्नत्तं एवं तिसुवि कालस्स णं भंते पिसायकुमारिंदस्स पिसायकुमाररण्णो अब्भित्तोरियाए परिसाए देवाणं केवतियं कालं ठिती पन्नत्ता मज्झिमियाए परिसाए देवाणं केवतियं कालं ठिती पन्नत्ता बाहिरियाए परिसाए देवाणं केवतियं कालं ठिती पन्नत्ता जाव बाहिरियाए परिसाए देवीणं केवतियं कालं ठिती पन्नत्ता गोयमा कालस्स णं पिसायकुमारिंदस्स पिसायकुमाररण्णो अब्भित्तोरियाए परिसाए देवाणं अद्धपलिओवमं ठिती पन्नत्ता मज्झिमियाए परिसाए देवाणं देसूणं अद्धपलिओवमं ठिती पन्नत्ता बाहिरियाए परिसाए देवाणं सातिरेगं चउब्भागपलिओवमं ठिती पन्नत्ता अब्भित्तोरियाए परिसाए देवीणं सातिरेगं चउब्भागपलिओवमं ठिती पन्नत्ता मज्झिमियाए परिसाए देवीणं चउब्भागपलिओवमं ठिती पन्नत्ता बाहिरियाए परिसाए देवीणं देसूणं चउब्भागपलिओवमं ठिती पन्नत्ता अद्धो जो चेव चमरस्स एवं उत्तरिल्लस्सवि एवं निरंतरं जाव गीयस्स ।

[१६०] कहिं णं भंते जोतिसियाणं देवाणं विमाणा पन्नत्ता कहिं णं भंते जोतिसिया देवा परिवसंति गोयमा उप्पिं दीवसमुद्दाणं इमीसे रयणप्पभाए पुढवीए बहुसमरमणिज्जाओ भूमिभागाओ सत्तनउए जोयणसतते उड्ढं उप्पत्तिता दसुत्तरजोयणसय बाहल्ले एत्थ णं जोतिसियाणं देवाणं तिरियम-

संखेज्जा जोतिसियविमाणावाससहस्सा भवंतितिमक्खायं ते णं विमाणं अद्धकविट्ठकसंठा-णसंठिया एवं जहा- ठाणपदे जाव चंदिम-सूरिया य एत्थ णं जोतिसिंदा जोतिसरायाणो परिवसंति महिड्ढिया जाव विहरंति चंदस्स णं भंते जोतिसिंदस्स जोतिसरण्णो कति परिसाओ पन्नत्ताओ गोयमा तिण्णि परिसाओ पन्नत्ताओ तं जहा- तुंबा तुडिया पव्वा अब्भितरिया तुंबा मज्झिमिया तुडिया बाहिरिया पव्वा सेसं जहा- कालस्स परिमाणं ठिती अट्ठो जहा- चमरस्स एवं सूरस्स वि ।

• तच्चाए पडिवत्तीए देवाधिकारो समत्तो •

॥ दीवसमुद्भवत्तव्वयाधिकारो ॥

[१६१] कहि णं भंते दीवसमुद्दा केवइया णं भंते दीवसमुद्दा केमहालया णं भंते दीवसमुद्दा किंसंठिया णं भंते दीवसमुद्दा किमाकारभावपडोयारा णं भंते दीवसमुद्दा पन्नत्ता गोयमा जंबुद्धीवाइया दीवा लवणादीया समुद्दा संठाणओ एकविधिविधाणा वित्थरतो अणेगविधिविधाणा दुगुणादुगुणे पडुप्पाएमाणा-पडुप्पाएमाणा पवित्थरमाणा-पवित्थरमाणा ओभासमाणवीचिया बहुउप्पल-पउम-कुमुद-नलिण-सुभग सोहंधिय-पंडरीय-महापोंडरीय-सतपत्त-सहस्सपत्त-पप्फुल्लकेस-रोवचित्ता पत्तेयं-पत्तेयं पउमवर-वेइयापरिक्खित्ता पत्तेयं-पत्तेयं वनसंडपरिक्खित्ता सयंभुरमण-पज्जवसाणा अस्सिं तिरियलोए असंखेज्जा दीवसमुद्दा पन्नत्ता समणाउसो ।

[१६२] तत्थ णं अयं जंबुद्धीवे नामं दीवे सव्वदीवसमुद्दाणं सव्वब्भंतरए सव्वखुड्डाए वट्ठे तेल्लापूयसंठाणसंठिते वट्ठे रहचक्कवालसंठाणसंठिते वट्ठे पुक्खरकणियासंठाणसंठिते वट्ठे पडिपुन्नचंद-संठाणसंठिते एककं जोयणसयसहस्सं आयाम-विक्खंभेणं तिण्णि जोयणसयसहस्साइं सोलस य सहस्साइं दोण्णि य सत्तावीसे जोयणसते तिण्णि य कोसे अट्ठावीसं च धणुसयं तेरसं अंगुलाइं अद्धंगुलकं च किंचि-पडिवत्ति-३

विसाहियं परिक्खवेणं पन्नत्ते से णं एक्काए जगतीए सव्वतो समंता संपरिक्खित्ते सा णं जगती अट्ठ जोयणाइं उड्ढं उच्चत्तेणं मूले बारस जोयणाइं विक्खंभेणं मज्झे अट्ठ जोयणाइं विक्खंभेणं उप्पिं चत्तारि जोयणिं विक्खंभेणं मूले विच्छिण्णा मज्झे संखित्ता उप्पिं तणुया गोपुच्छसंठाणसंठिता सव्ववइरामई अच्छा सण्हा जाव अभिरूवा पडिरूवा सा णं जगती एक्केणं जालकडएणं सव्वतो समंता संपरिक्खित्ता से णं जालकडए अद्धजोयणं उड्ढं उच्चत्तेणं पंचधणुसयाइं विक्खंभेणं सव्वरयणामए अच्छे सण्हे जाव पडिरूवे ।

[१६३] तीसे णं जगतीए उप्पिं बहुमज्झदेसभाए एत्थ णं महई एगा पउमवरवेदिया पन्नत्ता सा णं पउमवरवेदिया अद्धजोयणं उड्ढं उच्चत्तेणं पंच धणुसयाइं विक्खंभेणं जगतीसमिया परिक्खवेणं सव्वरयणामई अच्छा जाव पडिरूवा तीसे णं पउमवरवेइयाए अयमेयारूवे वण्णावासे पन्नत्ते तं जहा-वइरामया नेमा रिट्ठामया पडिट्ठाणा वेरुलियामया खंभा सुवण्णारुप्पामया फलगा लोहितक्खमईओ सूईओ वइरामया संधी नानामणिमया कलेवरा नानामणिमया कलेवरसंघाडा नानामणिमया रूवा नानामणिमया रूवसंघाडा अंकामया पक्खा पक्खबाहाओ जोतिरसामया वसा वंसकवेल्लुया रययामईओ पट्टियाओ जातरूवमईओ ओहाडणीओ वइरामईओ उवरिपुंछणीओ सव्वसेयरययामए छादणे सा णं पउमवरवेइया एगमेगेणं हेमजालेणं एगमेगेणं गवक्खजालेणं एगमेगेणं खिंखिणिजालेणं एगमेगेणं घंटाजालेणं एगमेगेणं मुत्ताजालेणं एगमेगेणं मणिजालेणं एगमेगेणं कणगजालेणं एगमेगेणं रयणजालेणं एगमेगेणं पउमजालेणं

सव्वत्तो समंता संपरिक्खित्ता ते णं जाला तवणिज्जलंबूसगा सुवण्णपयरगमंडिया नानामणिरयणविविहहारद्ध हारउवसोभितसमुदया ईसिं अण्णमण्णमसंपत्ता पुच्चावरदाहिणुत्तरागतेहिं वाएहिं मंदायंज-मंदायं एज्जमाणा-एज्जमाणा पलंबमाणा-पलंबमाणा पझंझमाणा-पझंझमाणा तेणं ओरालेणं मणुण्णेणं मनोहरेणं कण्णमण-णेव्वुतिकरेणं सद्देणं सव्वत्तो समंता आपूरेमाणा-आपूरेमाणा सिरीए अतीव उवसोभेमाणा-उवसोभेमाणा चिद्धंति तीसे णं पउमवरवेइयाए तत्थ-तत्थ देसे तहिं-तहिं बहवे हयसंघाडा गयसंघाडा नरसंघाडा किन्नरसंघाडा किंपुरिसंघाडा महोरगसंघाडा गंधव्वसंघाडा उसभसंघाडा सव्वरयणामया अच्छा सण्हा जाव पडिरूवा तीसे णं पउमवरवेइयाए तत्थ-तत्थ देसे तहिं-तहिं बहवे हयपंतीओ तहेव जाव पडिरूवाओ एवं हयवीहीओ जाव पडिरूवाओ एवं हयमिहुणाइं जाव पडिरूवाइं तीसे णं पउमवरवेइयाए तत्थ-तत्थ देसे तहिं-तहिं बहवे पउमलयाओ नागलयाओ एवं असोग-चंपग-चूय-वण-वासंतिय-अतिमुत्तग-कुंद-सामलयाओ निच्चं कुसुमियाओ निच्चं माइयाओ निच्चं लवइयाओ निच्चं थवइयाओ निच्चं गुलइयाओ निच्चं गोच्छियाओ निच्चं जमलियाओ निच्चं जुवलियाओ निच्चं विणामियाओ निच्चं पणमियाओ निच्चं सुविभत्त-पिंडि-मंजरि-वडेंसगधरीओ निच्चं कुसुमिय-माइय-लवइय-थवइय-गुलइय-गोच्छिय-जमलिय-जुवलिय-विणमिय-पणमिय-सुविभत्त-पिंडि-मंजरि-वडेंसगधरीओ सव्वरयणामईओ अच्छाओ जाव पडिरूवाओ से केणट्ठेणं भंते एवं वुच्चइ-पउमवरवेइया गोयमा पउमवरवेइयाए तत्थ-तत्थ देसे तहिं-तहिं वेदियासु वेदियाबाहासु वेदियापुंडतरेसु खंभेसु खंभबाहासु खंभसीसेसु खंभपुंडरेसु सूईसु सुईमुहेसु सूईफलएसु सूईपुंडतरेसु पक्खेसु पक्खबाहासु पक्खपेरंतरेसु बहूइं उप्पलाइं पउमाइं जाव सहस्सपत्ताइं सव्वरयणामयाइं अच्छाइं सण्हाइं जाव पडिरूवाइं महता वासिककच्छत्तसमाणाइं पन्नत्ताइं समणाउसो से तेणट्ठेणं गोयमा एवं वुच्चइ-पउमवरवेदिया-पउमवरवेदिया, पउमवरवेइया णं भंते किं सासया असासया गोयमा सिय सासया सिय असासया से केणट्ठेणं भंते एवं वुच्चइ-सिय सासया सिय असासया गोयमा दव्वट्ठयाए सासया वण्णपज्जवेहिं गंधपज्जवेहिं रसपज्जवेहिं फासपज्जवेहिं असासया से तेणट्ठेणं गोयमा एवं वुच्चइ-सिय पडिवत्ति-३

सासया सिय असासया पउमवरवेइया णं भंते कालओ केवच्चिरं होति गोयमा नं कयावि नासि न कयावि नत्थि न कयावि न भविस्सति भुविं च भवति य भविस्सति य धुवा नियया साससा अक्खया अव्वया अवट्ठिया निच्चा पउमवरवेदिया ।

[१६४] तीसे णं जगतीए उप्पिं पउमवरवेइयाए बाहिं एत्थ णं महेगे वनसंडे पन्नत्ते-देसूणाइं दो जोयणाइं चक्कवालविक्खंभेणं जगतीसमए परिकखेवणं किण्हे किण्होभासे नीले नीलोभासे हरिए हरिओभासे सीए सीओभासे निद्धे निद्धोभासे तिव्वे तिव्वोभासे किण्हे किण्हच्छाए जाव तिव्वे तिव्वच्छाए धणकडियकडच्छाए रम्मे महामेहनिकुरबंभूए ते णं पायवा मूलमंतो कंदमंतो खंधमंतो तयामंतो सालमंतो पवालमंतो पत्तमंतो पुप्फमंतो फलमंतो बीयमंतो अनुपुव्व-सुजाय-रुइल-वट्ठभावपरिणया एकक्खंधी अणेगसाह-प्पसाह-विडिमा अणेगनरवाम-सुप्पसारिय-अगेज्झ-घण-विउल-बद्ध वट्ठ खंधा अच्छिद्धपत्ता अविरलपत्ता अवाईणपत्ता अणईइपत्ता निद्धय-जरढ-पंडुपत्ता नवहरिय-भिसंत-पत्ताभारंधयार-गंभीरदरिसणिज्जा

उवविणिग्गय-नव-तरुण-पत्त-पल्लव-कोमल-उज्जलचलंतकिसलय-सूमालपवालसोहियवरंकुरग्गसिहरा निच्चं कुसुमिया निच्चं माइया निच्चं लवइया निच्चं थवइया निच्चं गुलइया निच्चं गोच्छिया निच्चं जमलिया निच्चं जुवलिया निच्चं विणामिया निच्चं पणमिया निच्चं सुविभत्त-पिंडि-मंजरि-वडेंसगधरा निच्चं कुसुमिय-माइय-लवइय-थवइय-गुलइय-गोच्छिय-जमलिय-जुवलिय-

विणमिय-पणमिय-सुविभत्त-पिंडि-मंजरि-वडैसग-धरा सुय-बरहिण-मयणसाल-कोइल-कोरक-भिंंगारग-कोंडलग-
जीवंजीवग-नंदीमुह-कविल-पिंगलक्ख रंडक-चक्कवाय-कलहंस-सारस-
अणेगसउणगणमिहुणविरइयसदुण्णइयमहुर-सरणाइया सुरम्मा संपिंडिय-दरियभमरमहुयरिपहकर-
परिलिंतमत्तछप्पयकुसुमासवलोल-महुरगुमगुमंत-गुंजंतदेसभागा अब्भितरपुप्फफला बाहिरपत्तच्छण्णा
पत्तेहि य पुप्फेहि य ओच्छन्न-पलिच्छन्न निरोया अकंटया साउफला निद्धफला नाणा-विहगुच्छ-गुम्म-
मंडवग-सोहिया विचित्तसुह-केउबहुला वावी-पुक्खरिणी-दीहियासु य सुनिवेसियरम्म-जालधरगा ।

पिंडिम-नीहारिमं सुगंधि सुह-सुरभिमनहरं च महया गंधद्धणिं मुयंता सुहसेउकेउबहुला
अणेगसगड-रह-जाण-जुग-सीया-संदमाणियपडिमोयणा सुरम्मा पासादीया दरिसणिज्जा अभिरूवा पडिरूवा
तस्स णं वणसंडस्स अंतो बहुसमरमणिज्जे भूमिभागे पन्नत्ते से जहानामए-आलिंगपुक्खरेति वा मुङ्ग-
पुक्खरेति वा सरतलेति वा करतलेति वा चंदमंडलेति वा सूरमंडलेति वा आयंसमंडलेति वा उरब्भचम्मेति
वा उसभचम्मेति वा वराहचम्मेति वा सीहचम्मेति वा वग्धचम्मेति वा विगचम्मेति वा दीवियचम्मेति वा
अणेगसंककीलगसहस्सवितते आवड-पच्चावड-सेढी-पसेढी-सोत्थिय-सोव-त्थिय-पूसमाण-वद्धमाणग-मच्छं-डक-
मकरंडक-जारमार फुल्लावली-पउमपत्त-सागरतरंग-वासंति-लय-पउमलयभत्तिचित्तेहिं सच्छाएहिं समिरी-एहिं
सउज्जोएहिं नाणाविह-पंचवण्णेहिं मणीहि य तणेहि य उवसोहिए तं जहा- किणेहिं जाव सुक्किलेहिं तत्थ
णं जेते किण्हामणी य तणा य तेसि णं इमेतारूवे वण्णावासे पन्नत्ते से जहानामए-जीमूतेति वा अंजणेति
वा खंजणेति वा कज्जलेति वा मसीति वा मसीगुलियाति वा गवलेति वा गवलगुलियाति वा भमरेति वा
भमरावलिआति वा भमरपतंगयसारेति वा जंबूफलेति वा अदारिड्ढेति वा परपुट्ठेति वा गएति वा गयकलभेति
वा कण्हसप्पेइ वा कण्हकेसरेइ वा आगासथिग्गलेति वा कण्हसोएति वा किण्हकणवीरेइ वा कण्हबंधुजीवेति
वा भवे एयारूवेसिया गोयमा णो तिण्ढे सम्भे ते णं कण्हा मणी य तणा य इत्तो इट्ठतराए चेव कंततराए
चेव पियतराए चेव मणुण्णतराए चेव मणामतराए चेव वण्णेणं पन्नत्ता ।

पडिवत्ति-३

तत्थ णं जेते नीलगा मणी य तणा य तेसि णं इमेतारूवे वण्णावासे पन्नत्ते से
जहानामएभिंगेति वा भिंंगपत्तेति वा चासेति वा चासपिच्छेति वा सुएति व सुयपिच्छेति वा नीलीति वा
नीलीभेदेति वा नीलीगुलियाति वा सामाएति वा उच्चंतएति वा वणराईइ वा हलधरवसणेइ वा मोरग्गीवाति
वा पारेवयगीवाति वा अयसिकुसुमेति वा बाणकुसुमेति वा अंजणकेसिगाकुसुमेति वा नीलुप्पलेति वा
नीलकणवीरेति वा नीलबंधुजीवेति वा भवे एयारूवे सिया नो इण्ढे सम्भे ते णं नीलगा मणी य तणा य
एत्तो इट्ठतराए चेव कंततराए चेव जाव वण्णेणं पन्नत्ता तत्थ णं जेते लोहितगा मणी य तणा य तेसि
णं इमेतारूवे वण्णावासे पन्नत्ते से जहानामे-ससकरुहिरेति वा उरभरुहिरेति वा वराहरुहिरेति वा मणुस्स-
रुहिरेति वा महिसरुहिरेति वा बालिंदगोवएति वा बलदिवागरेति वा संझब्भरागेति वा गुंजद्धरागेति वा
जासुयणकुसुमेति वा पालियायकुसुमेति वा जातिहिंगुलुएति वा सिलप्पवालेति वा पवालंकुरेति वा
लोहितक्खमणीति वा लक्खारसएति वा किमिरागरत्तकंबलेइ वा चीमपिड्ढरासीइ वा रत्तुप्पलेति वा रत्ता-
सोगते वा रत्तकणवीरेति वा रत्तबंधुजीवेति वा भवे एयारूवे सिया नो तिण्ढे सम्भे ते णं लोहितगामणी
य तणा य एत्तो इट्ठतराए चेव जाव वण्णेणं पन्नत्ता तत्थ णं जेते हालिद्धगा मणी य तण्मा य तेसि णं
इमेतारूवे वण्णावासे पन्नत्ते से जहानामे-चंपए वा चंपगच्छलीइ वा चंपकभेदेइ वा हलिद्धाति वा
हलिद्धाभेदेति वा व हलिद्धागुलियाति वा हरियालेति वा हरियालभेदेति वा हरियालगुलियाति वा चिउरेति वा

चिउरंगरागेति वा वरकणगेति वा वरकणगनिघसेति वा वरपुरिसवसणेति वा अल्लङ्कुसुमेति वा चंपाकुसुमेइ वा कुहंडियाकुसुमेति वा कोरंटकदामेइ वा कडवडाकुसुमेति वा घोसाडियाकुसुमेति वा सुवण्जूहिया कुसुमेति वा सुहिरण्मयाकुसुमेइ वा बीयगकुसुवमेति वा पीयासोएति वा पीयकणवीरेति वा पीयबंदुजीवेति वा भवे एयारूवे सिया नो इण्ढे सम्ढे ते णं हालिद्धा मणी य तणा य एत्तो इद्धतराए चेव जाव चेव वण्णेणं पन्नत्ता तत्थ णं जेते सुक्किलगा मणी य तणा य तेसि णं इमेतारूवे वण्णावासे पन्नत्ते से जहानामएअंकेति वा संखेति वा चंदेति वा कुमुदेति वा दगरएति वा दहिधणेति वा खीरेति वा खीरपूरेति वा हंसावलीति वा कौंचावलीति वा हारावलीति वा दरिधणेति वा खीरेति वा खीरपूरेति वा हंसावलीति वा कोचांवलीति वा हारावलीति वा बलायावलीति वा चंदावलीति वा सारइयबलाहएति वा धंतधोरुप्पपट्टेइ वा सालिपिट्टरासीति वा कुंदुप्फरासीति वा कुमुयरासीति वा सुक्कछिवाडीति वा पेहुणमिंजाति वा भिसेति वा मिणालियाति वा गयदंतेति वा लवंगदलेति वा पौंडरीयदलेति वा सिंदुवारवरमल्लदामेति वा सेतासोएति वा सेयकणवीरेति वा सेयबंधुजीवेति वा भवे एयारूवे सिया नो तिण्ढे सम्ढे ते णं सुक्किलला मणो य तणा य एत्तो इद्धतराए चेव जाव वण्णेणं पन्नत्ता ।

तेसि णं भंते मणीण य तणाय य केरिए गंधे पन्नत्ते से जहानामए-कोट्टपुडाण वा पत्तपुडाण वा चोयपुडाण वा तगरपुडाण वा एलापुडाण वा चंपापुडाण वा दमणापुडाण वा कुंकुमपुडाण वा चंदणपुडाम वा उसीरपुडाण वा मरूयापुडाण वा जातिपुडा वा जूहियापुडाण वा मल्लियापुडाण वा ण्हाणमल्लियापुडाण वा केतकिपुडाण वा पाडलिपुडाण वा नोमालियपुडाण वा वासपुडाण वा कप्पूरपुडाण वा अनुवायंसि उब्भिज्जमाणाण वा निब्भिज्जमाणाण वा कोट्टेज्जमाणाण वा रुचिज्जमाणाण वा उक्किरिज्जमाणाण वा विक्खरिज्जमाणाण वा परिभुज्जमाणाण वा भंडाओ वा भंडं साहरिज्जमाणाणं ओराला मणुण्णा मणहरा घाणमणणिव्वुतिकरा सव्वतो समंता गंधा अभिणिस्सवंति भवे एयारूवे सिया नो तिण्ढे सम्ढे ते णं मणी य तणा य एत्तो इद्धतराए चेव जाव गंधेणं पन्नत्ता तेसि णं भंते मणीण य पडिवत्ति-३

तणाण य केरिए फासे पन्नत्ते से जहानामए-आईणेति वा रुएति वा बूरेति वा नवणीतेति वा हंसगब्भ-तूलीति वा सिरीसकुसुमणिचएति वा बालकुमुदपत्तरासीति वा भवे तारूवे सिया नो तिण्ढे सम्ढे ते णं मणी य तणो य एत्तो इद्धतराए चेव जाव फासेणं पन्नत्ता तेसि णं भंते मणीण य तणाण य पुच्चाव-रदाहिणुत्तरागतेहिं वेहिं मंदायं-मंदायं एइयाणं वेइयाणं कंपियाणं चालियाणं फंदियाणं घट्टियाणं खोभियाणं उदीरियाणं केरिए सद्धे पन्नत्ते से जहानामए-सिवियाए वा संदमाणीयाए वा रहवरस्स वा सछत्तस्स सज्झयस्स सघंटयस्स सपडागस्स सतोरणवरस्स सणंदिधोसस्स सखिंखिणहेमजालपेरंतपरि-खित्तस्स हेम-वय-चित्तविचित्त-तेणिस-कणगनिज्जुत्त-दारुयागस्स सुपिण्हारकमंडलधुरगस्स कालायससुकयणे-मिजंत-कम्मस्स आइण्णवरतुगरगसुसंपउत्तस्स कुसुलनरछेयसारहिसुसंप-रिगहितस्स सरसतबत्तीसतोण-मंडितस्स सकंकडवडेंसगस्स सचारवसरपहरणावरणहरिय-जोहजुद्धसज्जस्स रायंगणंसि वा अंतेपुरंसि वा रम्मंसि वा मणिकोट्टिमतलंसि अभिक्खणं-अभिक्खणं अभिघट्टिज्जमाणस्स ओराला मणुण्णा मनहरा कण्णमणणिव-वुतिकरा सव्वतो समंता सद्धा अभिणिस्सवंति भवे एतारूवे सिया नो तिण्ढे सम्ढे से जहानामए-वेयालियाए वीणाए उत्तरमंदामुच्छिताए अंके सुपइट्टियाए कुसलनरनारिसुसंगपग्गहिताए चंदनसारनिम्मिय-कोणपरिघट्टियाए पच्चूसकालसमंयसि मंदं-मंदं एइयाए वेइयाए कंपियाए चालियाए फंदियाए घट्टियाए खोभियाए उदीरियाए ओराला मणुण्णा मनहरा कण्णमणणिव्वुतिकरा सव्वतो समंता सद्धा अभिणिस्सवंति

भवे एयारूवे सिया नो तिण्डे समड्डे से जहानामए-किण्णराण वा किंपुरिसाण वा महोरगाण वा गंधव्वाणा वा भद्दसालवनगयाण वा नंदनवणगयाण वा सोमनसवणगयाण वा पंडगवनगयाण वा महाहिम-वंत-मलय-मंदरगिरि-गुहसमण्णागयाण वा एगतो सहिताणं संमुहागयाणं समुपविट्ठाणं संनिविट्ठाणं पमुदियपक्कीलियाणं गीयरति-गंधव्वहरिसियमणाणं गज्जं पज्जं कत्थं गेयं पयबद्धं उक्खित्तायं पवत्तायं मंदायं रोचियावसाणं सत्तसरसमण्मगयं अट्ठरससुसंपउत्तं एक्कारसालंकारं छद्दोसविप्पमुक्कं अट्ठगुणोववेयं गुंजावंकुहरोवगूढं रत्तं तिट्ठाणकरणसुद्धं सकुहरगुंजंतवंस-तंती-तल-ताल-लय-गहसुसंपउत्तं मधुरं समं सललियं मनोहरं मउयरिभि-यपयसंचारं सुरतिं सुणतिं वरचारूवं दिव्वं नट्ठं सज्जं गेयं पगीयाणं भवे एयारूवे सिया गोयमा एवंभूए सिया ।

[१६५] तस्स णं वनसंडस्स तत्थ-तत्थ देसे तहिं-तहिं बहुईओ खुड्डा-खुड्डियाओ वावीओ पुक्खरिणीओ दीहियाओ गुंजालियाओ सरसीओ सरपंतियाओ सरसरपंतियाओ बिलपंतियाओ अच्छाओ सण्हाओ रययामयकूलाओ समतीराओ वड्डरामयपासाणाओ तवणिज्जतलाओ सुवण्ण-सुब्भ-रययवाल्याओ वेरुलियमणिफालियपडल-पच्चोयडाओ सुहोयारसुत्ताराओ नानामणि-तित्थ-सुबद्धाओ चाउक्कोणाओ आणु-पुव्वसुजायवप्पगंभीरसीयलजलाओ संछण्णपत्तभिसमुणालाओ बहुउप्पल-कुमुद-नलिण-सुभग-सोगंधिय-पोंडरीय-सयपत्त-सहस्सपत्त-फुल्लकेसरोवचियाओ छप्पयपरिभुज्जमाणकमलाओ अच्छविमलसलिलपुन्नाओ परिहत्थडमंतमच्छकच्छभ-अणेगसउणमिहुणपविचरिय-सट्ठण्णइयमहुरसरणाइयाओ पत्तेयं-पत्तेयं पउमवर-वेदियापरिक्खित्ताओ पत्तेयं-पत्तेयं वणसंडपरिक्खित्ताओ अप्पेगतिआओ आसवोदाओ अप्पेगतिआओ वारुणोदाओ अप्पेगतिआओ खीरोदाओ अप्पेगतिआओ धओदाओ अप्पेगतिआओ खोदोदाओ अप्पेगतिआओ अमयरस-समरसोदाओ अप्पेगतिआओ पगतीए उदगरसेणं पन्नत्ताओ पासाइयाओ दरिसणिज्जाओ अभिरूवाओ पडिरूवाओ तासि णं खुड्डा-खुड्डिणं वावीणं जाव बिलपंतियाणं पत्तेयं-पत्तेयं चउद्धिसिं चत्तारि तिसोवाण-पडिरूवगा पन्नत्ता तेसि णं तिसोवाणपडिरूवगाणं अयमेयरूव वण्णावासे पन्नत्ते तं जहा- वड्डरामया नेमा पडिवत्ति-३

जाव पडिरूवाओ तेसि णं तिसोवाणपडिरूवगाणं पुरतो पत्तेयं-पत्तेयं तोरणे पन्नत्ते ते णं तोरणा नाणाम-णिमया नाणमणिमएसु खंभेसु उववणिविट्ठ-सण्णिविट्ठा विविहमुत्ततरोवचिया विविहतारारूवोवचिया ईहामिय-उसभ-तुरग-नर-मगर-विहगवालगा-किन्नर-रू-सरभ-चमर-कुंजर-वणलय-पउमलयभत्तिचित्ता खंभु-ग्गयवड्डरवेदियापरिगताभिरामा विज्जाहरजमलजुयलजंतजुताविव अच्छिसहस्समालणीया रूवगहस्सकलिया भिसमाणा भिब्भिसमाणा चक्खुल्लोयणलेसा सुहफासा सस्सिरीयरूवा पासाइया दरिसणिज्जा अभिरूवा पडिरूवा ।

तेसि णं तोरणाणं उप्पिं अट्ठ मंगलगा पन्नत्ता तं जहा- सोत्थिय सिरिवच्छणंदियावत्तं-वद्धमाणग-भद्दासण-कलस-मच्छ-दप्पणा सव्वरयणामया अच्छा जाव पडिरूवा तेसि णं तोरणाणं उप्पिं बहवे किण्हचामरज्झाया नीलचामरज्झाया लोहियचामरज्झाया हालिद्वचामरज्झाया सुक्किलचामरज्झाया अच्छा सण्हा रूप्पट्टा वड्डरदंडा जलयामलगंधीया सुरूवा पासाइयया दरिसणिज्जा अभिरूवा पडिरूवा तेसि णं तोरणाणं उप्पिं बहवे छत्ताइछत्ता पडागाइपडागा घंटाजुयला चामरजुयला उप्पलहत्थगा जाव सहस्सपत्तहत्थगा सव्वरयणामया अच्छा जाव पडिरूवा तासि णं खुड्डाखुड्डियाणं वावीणं जाव बिलपंतियाणं तत्थ-तत्थ देसे तहिं-तहिं बहवे उप्पायपव्वया नियइपव्वयाग जगती-पव्वयगा दारुपव्वयगा

दगमंडवगा दगमंचका दगमालगा दगपासायगा ऊसडा खड्डा खडहडगा अंदोलगा पक्खंदोलगा सव्वरयणामया अच्छा जाव पडिरूवा तेसु णं उप्पायपव्वतेसु जाव पक्खंदोलएसु बहूइं हंसासणाइं कौचासणाइं गरुलासणाइं उण्णयासणाइं पणयासणाइं दीहासणाइं भद्दासणाइं पक्खासणाइं मगरासणाइं सीहासणाइं पउमासणाइं दिसासोवत्थियासणाइं सव्वरयणामयाइ अच्छाइं जाव पडिरूवाइं तस्स णं वणसंडस्स तत्थ-तत्थ देसे तहिं-तहिं बहवे आलिघरगा मालिघरगा कयलिघरगा लयाघरगा अच्छणधरगा पेच्छणधरगा मज्जणधरगा पसाहणधरा गब्भधरगा मोहणधरगा आयंसघरगा सव्वरयणामया अच्छा जाव पडिरूवा तेसु णं आलिघरएसु जाव आयंसघरएसु बहूइं हंसासणाइं जाव दिसासोवत्थियासणाइं सव्वरयणामयाइं अच्छाइं जाव पडिरूवाइं तस्स णं वणसंडस्स तत्थ-तत्थ देसे तहिं-तहिं बहवे जाईमंडवगा जूहिया-मंडवगा मल्लियामंडवगा नोमालियामंडवगा वासंतीमंडवगा दधिवासुयमंडवगा सूरिल्लिमंडवगा तंबोलीमंडवगा मुद्धियामंडवगा नागलयामंडवगा अतिमुत्तमंडवगा अप्फोतामंडवगा मालुयमंडवगा सामलयामंडवगा सव्वरयणामया अच्छा जाव पडिरूवा तेसु णं जाती-मंडवएसु जाव सामलयामंडवएसु बहवे पुढविसिलापट्टगा पन्नत्ता तं जहा- अप्पेगतिया हंसासणसंठिता जाव अप्पेगतिया दिसासोवत्थियासण संठिता अण्णे च बहवे पुढविसिलापट्टगा वरसयणासणविसिद्धसंठाणसंठिया पन्नत्ता समणाउसो आईणग-रूय-बूर-नवणीत तूलाफासा सव्वरयणामया अच्छा जाव पडिरूवा तत्थ णं बहवे वाणमंतरा देवा देवीओ य आसयंति सयंति जाव कडाणं कम्माणं कल्लाणाणं कल्लाणं फलवित्तिविसेसं पच्चणुब्भवमाणा विहरंति तीसे णं जगतीए उप्पिं पउमवरवेदियाए अंतो एत्थ णं महं एगे वनसंडे पन्नत्तेदेसूणाइं दो जोयणाइं विक्खंभेणं जगतीसमए परिकखेवेणं किण्हे किण्होभासे वणसंडवण्णओ तणसद्धविहूणो नेयव्वो तत्थ णं बहवे वाणमंतरा देव देवीओ य आसयंति सयंति चिद्धंति निसीयंति तुयद्धंति रमंति ललंति कीडंति मोहंति पुरा पोराणाणं सुचिण्णाणं सुपरक्कंतामं सुभाणं कडाणं कम्माणं जाव विहरंति ।

[१६६] जंबुद्धीवस्स णं भंते दीवस्स कति दारा पन्नत्ता गोयमा चत्तारि दारा पन्नत्ता तं जहा- विजये वेजयंते जयंते अपराजिते ।

पडिवत्ति-३

[१६७] कहि णं भंते जंबुद्धीवस्स दीवस्स विजये नामं दारे पन्नत्ते गोयमा जंबुद्धीवे दीवे मंदरस्स पव्वयस्स पुरत्थिमेणं पणयालीसं जोयणसहस्साइं अबाधाए जंबुद्धीवे दीवे पुरच्छिम्मपेरंते लवणसमुद्धपुरच्छिम्मद्वस्स पच्चत्थिमेणं सीताए महानदीए उप्पिं एत्थ णं जंबुद्धीवस्स दीवस्स विजये नामं दारे पन्नत्ते-अट्ठ जोयणाइं उड्ढं उच्चत्तेणं चत्तारि जोयणाइं विक्खंभेणं तावतियं चैव पवेसेणं सेए वरकणगथूभियागे ईहामिय-उसभ-तुरग-जाव पउमलयभत्तिचित्ते खंभुगतवड्ढरवेदियापरिगताभिरामे विज्जाहरजमलजुयल-जंतजुत्ते इव अच्छीसहस्समालिणीए रूवगसहस्सकलिए भिसमाणे भिब्भिसमाणे चक्कुल्लोयणलेसे सुहफासे सस्सिरीयरूवे वण्णो दारस्स तस्सिमो होइ तं जहा- वड्ढरामया नेमा रिद्धामया पतिट्ठाणा वेरुलियामया खंभा जायरूवौवचिय-पवरपंचवण्णमणिर-यण-कोट्टिमतले हंसगब्भमए एलुए गोमेज्जएमए इंदखीले लोहितक्खमईओ दारचेडाओ जोतिर-सामए उत्तरंगे वेरुलियामया कवाडा लोहितक्खमईओ सूईओ वड्ढरामया संधी नानामणिमया समुग्गगा वड्ढरामया अग्गला लोहितक्खमईओसूईओ वड्ढरामयासंधी नानामणिमयासमुग्गगा वड्ढरामयाअग्गला अग्गलपासाया वड्ढरामई आवत्तणपेढिया अंकुत्तरपासए निरंतरिघणकलाडे भित्तीसु चैव भित्तीगुलिया छप्पन्ना तिण्णि होंति गोमाणसिया तत्तिया नानामणिरयणवालरूवगलीलट्ठियसालभंजिया वड्ढरामए कूडे रययामए उस्सेहे सव्वतवणिज्जमए उल्लोए

नाणामणिरयणजालपंजर-मणिवसंग-लोहितक्खपडिवंसगरयतभोमे अंकामया पक्खा पक्खबाहाओ जोतिरसामया वंसा वंसकवेल्लुयाओ य रययामईओ पट्टियाओ जायरूमई ओहाऽडणीओ वडरामईओ उवरिपुंछणीओ सव्वसेतरययामए छादणे अंकमयकणगकूड-तवणिज्जथूभियाए सेते संखतलविमलनिम्म-लदधि-धण-गोखीर-फेण-रययणिगरप्पगासे तिलगरयणद्धचंदचित्ते नानामणिमयदामालंकिए अंतो बहिं च सण्हे तवणिज्जवालुयापत्थडे सुहफासे सस्सिरीयरूवे पासादीए दरिसणिज्जे अभिरूवे पडिरूवे ।

विजयस्स णं दारस्स उभओ पासिं दुहओ निसीहियाए दो-दो वंदनकलसपरिवाडीओ पन्नत्ताओ ते णं वंदनकलसा वरकमलपड्डाणा सुरभिवरवारिपडिपुन्ना चंदणकयचच्चागा आविद्धकंठेगुणा पउमुप्पलपिहाणा सव्वरयणामया अच्छा जाव पडिरूवा महता-महता महिंदकुंभसमाणा पन्नत्ता समणाउसो विजयस्स णं दारस्स उभओ पासिं दुहओ निसीहिआए दो दो नागदंत परिवाडीओ ते णं नागदंतगा मुत्ताजलंतरुसियहेमजाल-गवक्खजाल-खिंखिणीघंटाजालपरिक्कित्ता अब्भुग्गता अभिणिसिद्धा तिरियं सुसंपग्गहिता अहेपन्नगद्धरूवा पन्नगद्धसंठाणसंठिता सव्ववडरामया अच्छा जाव पडिरूवा महता-महता गयदंतसमाणा पन्ता समणाउसो तेसु णं नागदंतएसु बहवेकिण्हसुत्तबद्धा वगअधारितमल्लदामकलावा जाव सुक्किल सुत्तबद्धा वग्धारियमल्लदामकलावा ते णं दामा तवणिज्जलंबूसगा सुवण्णपतरगंडिता नाणामणिरयण-विविधहारद्धहारउवसोभितसमुदया जाव सिरीए अतीव-अतीव उवसोभेमाणा-उवसोभेमाणा चिद्धंति तेसि णं नागदंतगाणं उवरिं अण्णाओ दो दो नागदंतपरिवाडीओ पन्नत्ताओ ते णं नागदंतगा मुत्ताजलंतरुसिय तहेव जाव समणाउसो तेसु णं नागदंतएसु बहवे रययामया सिक्कया पन्नत्ता तेसु णं रययामएसु सिक्कएसु बहवेवेरुलियामईओ धूवघडीओ पन्नत्ताओ ताओ णं धूवघडीओ कालागरु-पवरकुंदुरुक्क-तुरुक्क-धूवमघमघंतगंधुदुयाभिरामाओ सुगंधवरगंधगंधियाओ गंधवट्ठिभूयाओ ओरालेणं मणुण्णेणं मनहरेणं घाणमणविव्वुड्ढकरेणं गंधेणं ते एसे सव्वतो समंता आपूरेमाणीओ-आपूरेमाणीओ सिरीएअतीव-अतीव उवसोभेमाणीओ-उवसोभेमाणीओ चिद्धंति ।

विजयस्स णं दारस्स उभओ पासिं दुहओ निसीधियाए दो दो सालभंजिया-परिवाडीओ पडिवत्ति-३

पन्नत्ताओ ताओ णं सालभंजियाओ लीलट्टिताओ सुइट्टियाओ सुअलंकिताओ नानाविहरागवसणाओ नाणामल्लपिणद्धाओ मुट्ठीगेज्झसुमज्झाओ आमेलगजमलजुयलवट्ठियअब्भुण्णयपीणरचिसंठियप-ओहराओ रत्तावंगाओ असियकेसीओ मिदुविसयपसत्थ-लक्खण-संवेल्लितग्गसिरयाओ ईसिं असोगवरपादवसमुट्टिताओ वामहत्थगहितग्गसालाओ ईसिं अद्धच्चिकडक्कचेट्टिएहिं लूसेमाणीओ विव चक्खुल्लोयणेलेसेहिं अण्णमण्णं खिज्जमाणो इव पुढविपरिणामाओ सासयभाव-मुवगताओ चंदाननाओ चंदविलासिणीओ चंदद्धसमनिडालाओ चंदाहियसोमदंसणाओ उक्का विव उज्जोएमाणीओ विज्जुधणमिरिय-सूरदिप्पंततदेय-अहिययरसंनिकासाओ सिंगारागारचारुवेसाओ पासादीयाओ दरिसणिज्जाओ अभिरूवाओ पडिरूवाओ तेयसा अतीव-अतीव उवसोभेमाणी-ओ-उवसोभेमाणीओ चिद्धंति विजयस्स णं दारस्स उभओ पासिं दुहतो निसीहियाए दो-दो जालकडगा पन्नत्ता ते णं जालकडगा सव्वरयणामया अच्छा जाव पडिरूवा विजयस्स णं दारस्स उभओ पासिं दुहओ निरीधियाए दो-दो घंटाओ पन्नत्ताओ तासि णं घंटाणं अयमेयरूवे वन्नावासे पन्नत्ते तं जहा- जंबूणयामईओ घंटाओ वडरामईओ लालाओ नाणामणिमया घंटापासा तवणिज्जमईओ संकलाओ रययामईओ रज्जूओ ताओ णं घंटाओ ओहस्सराओ मेहस्सराओ हंसस्सराओ कौचस्सराओ सीहस्सराओ दुंदुहिस्सराओ नंदिस्सराओ नंदिघोसाओ मंजुस्सराओ मंजुघोसाओ सुस्सराओ सुस्सरघोसाओ ओरालेण

मणुण्णेणं मणहरेणं कण्णमणनिव्वुइकरेण सद्देण ते पदेसे सव्वतो समंता आपूरेमाणीओ-आपूरेमाणीओ सिरीए अतीव-अतीव उवसोभेमाणीओ-उवसोभेमाणीओ चिद्धंति विजयस्स णं दारस्स उभओ पासिं दुहओ निसीधियाए दो-दो वणमालाओ पन्नत्ताओ ताओ णं वनमालाओ नाणादुम-लय-किसलय-पल्लवसमाउलाओ छप्पयपरि-भुज्जमाण-सोभंतसस्सिरीयाओ पासाईयाओ दरिसणिज्जाओ अभिरूवाओ पडिरूवाओ पासाइयाओ ते पदेसे ओराले जाव गंधेणं आपूरेमाणीओ जाव चिद्धंति ।

[१६८] विजयस्स णं दारस्स उभओ पासिं दुहओ निसीधियाए दो-दो पगंठगा पन्नत्ता ते णं पगंठगा चत्तारि जोयणाइं आयाम-विकखंभेणं दो जोयणाइं बाहल्लेणं सव्ववइरामया अच्छा जाव पडिरूवा तेसि णं पगंठगाणं उवरिं पत्तेयं-पत्तेयं पासायवडैंसगा पन्नत्ता ते णं पासायवडैंसगा चत्तारि जोयणाइं उड्ढं उच्चत्तेणं दो जोयणाइं आयामविकखंभेणं अब्भुग्गयमूसित-पहसितविव विविह-मणिरयणभत्तिचित्ता वाउद्धयविजयवेजयंती पडाग-च्छत्तातिच्छत्तकलिया तुंगा गगणतलमणुलिहंतसिहरा जालंतरयण पंजरुम्मिलितव्व मणिकगथूभियागा वियसियसयवत्त-पोंडरीय-तिल-करयणद्धचंदचित्ता अंतो बाहिं च सण्हा तवणिज्जवाल्यापत्थडा सुहफासा सस्सिरीयरूवा पासादीया दरिसणिज्जा अभिरूवा पडिरूवा तेसि णं पासायवडैंसगाणं उल्लोया पउमलयाभत्तिचित्ता जाव सामलयाभत्तिचित्ता सव्वतवणिज्जमया अच्छा जाव पडिरूवा तेसि णं पासायवडैंसगाणं पत्तेयं-पत्तेयं अंतो बहुसमरमणिज्जे भूमिभागे पन्नत्ते से जहानामए-आलिङ्गपुक्खरेति वा जाव मणीहिं उवसोभिए मणीहिं वण्णो गंधो फासो य नेयव्वो तेसि णं बहुसमर-मणिज्जाणं भूमिभागाणं बहुमज्झदेसभाए पत्तेयं-पत्तेयं मणिपेढियाओ पन्नत्ताओ ताओ णं मणिपेढियाओ जोयणं आयामविकखंभेण अद्धजोयणं बाहल्लेणं सव्वरयणामईओ अच्छाओ जाव पडिरूवाओ ।

तासि णं मणिपेढियाणं उवरिं पत्तेयं-पत्तेयं सीहासणे पन्नत्ते तेसि णं सीहासणाणं अयमेयारूवे वण्णावासे पन्नत्ते तं जहा- रययामया सीहा सोवणिण्या पादा तवणिज्जमया चक्कला नाणामणिमयाइं पायसीसगाइं जंबूणयमयाइं गत्ताइं वइरामया संधी नाणामणिमए वेच्चे ते णं सीहासणा ईहामिय-उसभ-जाव पउमलयभत्तिचित्ता ससारसारोवचियविविह-मणिरयणपायपीढा अत्थरग-मिउमसूरग-पडिवत्ति-३

नवतयकुसंत-लिच्च-केसरपच्चुत्थ-ताभिरामा आईणग-रूय-बूर-नवनीत-तूलफासा सुविरचित्तरयत्ताणा ओयवियखो-मदुगुल्लपट्टपडिच्छयणा रत्तंसुयसंवुया सुरम्मा पासाईया दरिसणिज्जा अभिरूवा पडिरूवा तेसि णं सीहासणाणं उप्पिं पत्तेयं-पत्तेयं विजयदूसे पन्नत्ते ते णं विजयदूसा सेया संखंक-कुंद-दगरय-अमतमहियफेणपुंजसन्निकासा सव्वरयणामया अच्छा जाव पडिरूवा तेसि णं विजयदूसाणं बहुमज्झदेसभाए पत्तेयं-पत्तेयं वइरामया अंकुसा पन्नत्ता तेसु णं वइरामएसु अंकुसेसु पत्तेयं-पत्तेयं कुंभिकका मुत्तदामा पन्नत्ता ते णं कुंभिकका मुत्तादामा अण्णेहिं चउहिं कुंभिककेहिं मुत्तादामेहिं तदद्धुच्चप्पमाणमेत्तेहिं सव्वतो समंता संपरिकिखत्ता ते णं दामा तवणिज्जलंबूसगा सुवण्ण-पयरगमंडिया जाव सिरीए अतीव-अतीव उवसोभेमाणा-उवसोभेमाणा चिद्धंति तेसि णं पासाय-वडैंसगाणं उप्पिं बहवे अद्धमंगलगा पन्नत्ता सोत्थिय तथेव जाव छत्ताइछत्ता ।

[१६९] विजयस्स णं दारस्स उभओ पासिं दुओ निसीधियाए दो दो तोरणा पन्नत्ता वण्णओ जाव सहस्सपत्तहत्थगा तेसि णं तोरणाणं पुरतो दो-दो सालभंजियाओ पन्नत्ताओ वण्णओ तेसि णं तोरणाणं पुरतो दो-दो नागदंतगा पन्नत्ता नागदंतावण्णओ उवरिमणागदंता नत्थि तेसि णं तोरणाणं पुरतो दो-दो हयसंघाडा जाव उसभसंघाडा सव्वरयणामया अच्छा जाव पडिरूवा एवं पंतीओ वीहीओ मिहुणगा दो-

दो पउमलयाओ जाव पडिरूवाओ तेसि णं तोरणाणं पुरतो-दो-दो दिसासोवत्थिया पन्नत्ता सव्वरयणामया अच्छा जाव पडिरूवा तेसि णं तोरणाणं पुरतो दो-दो वंदनकलसा पन्नत्ता वण्णओ तेसि णं तोरणाणं पुरतो दो-दो भिंगारगा पन्नत्ता वरकमलपड्डाणा जाव महता-महता मत्तगयमहामनुहागितिसमाणा पन्नत्ता समणाउसो तेसि णं तोरणाणं पुरतो दो-दो आयंसगा पन्नत्ता तेसि णं आयंसगाणं अयमेयारूवे वण्णावासे पन्नत्ते तं जहा- तवणिज्जमया पयंठगा वेरुलियमया छरूहा वड्डरामया वरंगा नानामणिमया वलक्खा अंकमया मंडला अणोग्धसियनिम्मलाए छायाए समणुबद्धा चंडमंडलपडिणिकासा महता-महता अद्धकायसमाणा पन्नत्ता समणाउसो तेसि णं तोरणाणं पुरतो दो-दो वड्डरणाभा थाला पन्नत्ता ते णं थाला अच्छ-तिच्छाडय-सालितंदुल-नहसंदट्ट-पडिपुन्ना इव चिट्ठंति सव्वजंबूनदमया अच्छाजाव पडिरूवा महता-महता रहचक्कसमाणा पन्नत्ता समणाउसो तेसि णं तोरणाणं पुरतो दो-दो पातीओ पन्नत्ताओ ताओ णं पातीओ अच्छोदय-पडिहत्थाओ नानाविहस्स फलहरितगस्स बहुपडिपुन्नाओ विव चिट्ठंति सव्वरयणामईओ अच्छाओ जाव पडिरूवाओ महया-महया गोकलिंगजगचक्कसमाणाओ पन्नत्ताओ समणाउसो ।

तेसि णं तोरणाणं पुरतो दो-दो सुपतिट्ठगा पन्नत्ता ते णं सुपतिट्ठगा सुसव्वोसहि-पडिपुन्ना नाणाविहस्स य पसाधणभंडस्स बहुपडिपुन्ना इव चिट्ठंति सव्व रयणामया अच्छा जाव पडिरूवा तेसि णं तोरणाणं पुरतो दो-दो मणोगुलियाओ पन्नत्ताओ तओ णं मणोगुलियाओ सव्ववेरुलियामईओ अच्छाओ जाव पडिरूवाओ तासु णं मणोगुलियासु बहवे सुवण्णरुप्पामया फलगा पन्नत्ता तेसु णं सुवण्णरुप्पाम-हएसु फलएसु बहवे वड्डरामया नागदंतगा पन्नत्ता तेसु णं वड्डरामएसु नागदंतएसु बहवे रययामया सिक्कया पन्नत्ता तेसु णं रययामएसु सिक्कएसु बहवे वायकरगा पन्नत्ता ते णं वायकरगा किण्हसुत्तसिक्कग-गवच्छिया जाव सुक्किलसुत्तसिक्कग-गलच्छिया सव्ववेरुलियामया अच्छा जाव पडिरूवा तेसि णं तोरणाणं पुरतो दो-दो चित्ता रयणकरंडगा पन्नत्ता से जहनामए रण्णो चाउरंतचक्कवट्ठिस्स चित्ते रयणकरंडए वेरुलियमणि-फालियपडल-पच्चोयडे साए पभाए ते पदेसे सव्वतो समंता ओभासइ उज्जोवेइ तावेइ पभासेइ एवामेव तेविचित्ता रयणकरंडगा साए पभाए ते पदेसे सव्वतो समंता

ओभासैति

उज्जोवैति

पडिवत्ति-३

तावंति पभासैति तेसि णं तोरणाणं पुरतो दो-दो हयकंठा गयकंठा जाव उसभकंठा पन्नत्ता सव्वरयणामया अच्छा जाव पडिरूवा तेसि णं तोरणाणं पुरतो दो-दो सीहासणाइं पन्नत्ताइं तेसि णं सीहासणाणं वण्णओ जाव दामा तेसि णं तोरणाणं पुरतो दो-दो रुप्पच्छदा छत्ता पन्नत्ता ते णं छत्ता वेरुलियविमलदंडा जंबूणयकणिका वड्डरसंधी मुत्ताजालपरिगता अट्टसहस्सवरकंचणसालागा वट्टरमलयसुगंधी सव्वोउसुर-भिसीयलच्छाया मंगलभत्तिचित्ता चंदा-गारोवमा तेसि णं तोरणाणं पुरतो दो-दो चामराओ पन्नत्ताओ ताओ णं चामराओ चंदप्पभ-वड्डर-वेरुलियनानामणिरयणखचियचित्तदंडाओ सुहुमरयतदीहवालाओ संखंककुंद-दग-रय-अमयमहि-यफेणपुंजसणिकासाओ सव्वरयणामयाओ अच्छाओ जाव पडिरूवाओ तेसि णं तोरणाणं पुरतो दो-दो तेल्लसमुग्गा कोट्टसमुग्गा पत्तसमुग्गा चोयसमुग्गा तगरसमुग्गा एलासमुग्गा हरियालसमुग्गा हिंगुलयसमुग्गा मणोसिलासमुग्गा अंजणसमुग्गा सव्वरयणामया अच्छा जाव पडिरूवा ।

[१७०] विजये णं दारे अट्टसतं चक्कज्झयाणं एवं मिगज्झयाणं गरुडज्झयाणं ऋच्छज्झयाणं छत्तज्झयाणं पिच्छज्झयाणं सउणिज्झयाणं सीहज्झयाणं उसभज्झयाणं अट्टसतं सेयाणं च उविसा-णाणं नागवरकेऊणं एवामेव सुपव्वावरेणं विजयदारे असीयं केउसहस्सं भवतित्ति मक्खायं विजये णं दारे

नव भोमा पन्नत्ता तेसि णं भोमाणं अंतो बहुसमरमणिज्जा भूमिभागा पन्नत्ता जाव मणीणं फासो तेसि णं भोमाणं अंतो बहुसमरमणिज्जा भूमिभागा पन्नत्ता जाव मणीणं फासो तेसि णं भोमाणं उप्पिं उल्लोया पउमलयाभत्तिचित्ता जाव सामलया भत्तिचित्ता सव्वतवणिज्जमया अच्छा जाव पडिरूवा तेसि णं भोमाणं बहुमज्झदेसभाए जेसे पंचमे भोमे तस्स णं भोमस्स बहुमज्झदेसभाए एत्थ णं महं एगे सीहासणे पन्नत्ते सीहासणवण्णओ विजयदूसे अंकुसे जाव दामा चिट्ठंति तस्स णं सीहासणस्स अवरुत्तरेणं उत्तरेणं उत्तरपुरत्थिमेणं एत्थ णं विजयस्स देवस्स चउण्हं सामाणियसहस्साणं चत्तारि भद्दासणसाहस्सीओ पन्नत्ताओ तस्स णं सीहासणस्स दाहिणेणं एत्थ णं विजयस्स देवस्स मज्झिमियाए परिसाए दसण्हं देव-साहस्सीणं दस भद्दासणसाहस्सीओ पन्नत्ताओ तस्स णं सीहासणस्स दाहिणपच्चत्थिमेणं एत्थ णं विज-यस्स देवस्स बाहिरियाए परिसाए बारसण्हं देवसाहस्सीणं बारस भद्दासणसाहस्सीओ पन्नत्ताओ तस्स णं सीहासणस्स पच्चत्थिमेणं एत्थ णं विजयस्स देवस्स सत्तण्हं अणियाहिवतीणं सत्त भद्दासणा पन्नत्ता तस्स णं सीहासणस्स पुरत्थिमेणं दाहिणेणं पच्चत्थिमेणं उत्तरेणं एत्थ णं विजयस्स देवस्स सोलस आयरक्ख-देवसाहस्सीणं सोलस भद्दासणसाहस्सीओ पन्नत्ताओ तं जहा- पुरत्थिमेणं चत्तारि साहस्सीओ एवं चउसुवि जाव उत्तरेणं चत्तारि साहस्सीओ अवसेसेसु भोमेसु पत्तेयं-पत्तेयं सीहासणे पन्नत्ते भद्दासणा पन्नत्ता ।

[१७१] विजयस्स णं दारस्स उवरिमागारे सोलसविहेहिं रतणेहिं उवसोभिते तं जहा- रयणेहिं विरेहिं वेरुलिएहिं जाव रिट्ठेहिं विजयस्स णं दारस्स उप्पिं अट्ठमंगलगा पन्नत्ता तं जहा- सोत्थिय सिरिवच्छ जाव दप्पणा सव्वरयणामया अच्छा जाव पडिरूवा विजयस्स णं दारस्स उप्पिं बहवे कण्हचा-मरज्झया जाव सव्वरयणामया अच्छा जाव पडिरूवा विजयस्स णं दारस्स उप्पिं बहवे छत्तातिच्छत्ता ।

[१७२] से केणट्ठेणं भंते एवं वुच्चति-विजए णं दारे विजए णं दारे गोयमा विजए णं दारे विजए नाम देवे महिड्ढीए महज्जुतीए जाव महाणुभावे पलिओवमट्ठितीए परिवसति से णं तत्थ चउण्हं सामाणियसाहस्सीणं चउण्हं अग्गमहिसीणं सपरिवाराणं तिण्हं परिसाणं सत्तण्हं अणियाणं सत्तण्हं अणियाहिवईणं सोलसण्हं आयरक्खदेवसाहस्सीणं विजयस्स णं दारस्स विजयाए रायहाणीए अण्णेसिं च बहूणं विजयाए रायहाणीए वत्थव्वगाणं देवाणं देवीण य आहेवच्चं जाव दिव्वाइं भोगभोगाइं भुंजमाणे पडिवत्ति-३

विहरइ से तेणट्ठेणं गोयमा एवं वुच्चति-विजए दारे-विजए दारे अदुत्तरं च णं गोयमा विजयस्स णं दारस्स सासए नामधेज्जे पन्नत्ते-जं नं कयाइ नासि नं कयाइ नत्थि न कयाइ न भविस्सइ जाव अवट्ठिए निच्चे विजए दारे ।

[१७३] कहि णं भंते विजयस्स देवस्स विजया नाम रायहाणी पन्नत्ता गोयमा विजयस्स णं दारस्स पुरत्थिमेणं तिरियमसंखेज्जे दीवसमुद्धे वीतिवत्तिता अण्णंमि जंबुद्धीवे दीवे बारस जोयणसहस्साइं ओगाहिता एत्थ णं विजयस्स देवस्स विजया नाम रायहाणी पन्नत्ता-बारस जोयणसहस्साइं आयाम-विककंभेणं सत्ततीसं जोयणसहस्साइं नव य अडयाले जोयणसए किंचिविसेसाहिया परिकखेवेणं पन्नत्ता सा णं एगेणं पागारेणं सव्वतो समंता संपरिक्खत्ता से णं पागारे सत्तसीसं जोयणाइं अद्धजोयणं च उड्ढं उच्चत्तेणं मूले अद्धतेरसस जोयणाइं विकखंभेणं मज्झे सक्कोसाइं छ जोयणाइं विकखंभेणं उप्पिं तिण्णि सद्धकोसाइं जोयणाइं विकखंभेणं मूले विच्छिण्णे मज्झे संखित्ते उप्पिं तणुए बाहिं वट्ठे अंतो चउरंसे गोपुच्छसंठाणसंठिते सव्वकणगामए अच्छे जाव पडिरूवे से णं पागारे नानाविहपंचवण्णेहिं कविसीसएहिं

उवसोभिए तं जहा- किण्हेहिं जाव सुक्किलेहिं ते णं कविसीलका अद्धकोसं आयामेणं पंचधणुसताइं विक्खंभेणं देसोणमद्धकोसं उड्ढं उच्चत्तेणं सव्वमणिमया अच्छा जाव पडिरूवा विजयाए णं रायहाणीए एगमेगाए बाहाए पणुवीसं-पणुवसं दारसतं भवतीति मक्खायं ते णं दारा बावडिं जोयणाइं अद्धजोयणं च उड्ढं उच्चत्तेणं एककतीसं जोयणाइं कोसं च विक्खंभेणं तावतियं चेव पवेसेणं सेता वरकणगथूभियागा वण्णओ जाव वणमालाओ ईहामिय तहेव जहा- विजए दारे जाव तवणिज्जवालुगपत्थडा सुहफासा सस्सिरीया सरूवा पासादीया तेसि णं दाराणं उभयो पासिं दुहओ निसीहियाए दो-दो चंदणकलसपरिवाडीओ पन्नत्ताओ तहेव भाणियव्वं जाव वणमालाओ तेसि णं दाराणं उभओ पासिं दुओ निसीहियाए दो-दो पगंठागा पन्नत्ता ते णं पगंठागा एककतीसं जोयणाइं कोसं च आयाम-विक्खंभेणं पन्नरस जोयणाइं अड्ढाइज्जे य कोसे बाहल्लेणं पन्नत्ता सव्ववड्ढरामया अच्छा जाव पडिरूवा तेसि णं पगंठाणं उप्पिं पत्तेयं-पत्तेयं पासायवड्डेसगा पन्नत्ता ते णं पासायवड्डेसगा एककतीसं जोयणाइं कोसं च उड्ढं उच्चत्तेणं पन्नरस जोयणाइं अड्ढाइज्जे य कोसे आयाम-विक्खंभेणं अब्भुग्गयमूसितपहसिया विव वण्णओ उल्लोगा सीहासणाइं जाव मुत्तादामा सेसं इमाए गाहाए अनुगंतव्वं ।

[तोरण मंगलया सालभंजिया नागदंतएसु दामाइं

संघाडं पंति वीधी मिधुण लता सोथिया चेव
वंदणकलसा भिंगारगा य आदंसगा य थाला
पातीओ य सुपतिट्ठा मणोगुलिया वातकरगा य
चित्ता रयणकरंडा हयग नरकंठका य
चंगेरी पडला सीहासण छत्त चामरा उवरि भोमा
य]

एवामेव सुपव्वावरेणं विजयाए रायहाणीए एगमेगे दारे असीतं-असीतं केउसहस्सं भवतीति मक्खायं तेसि णं दाराणं पुरओ सत्तरस भोमा पन्नत्ता तेसि णं भोमाणं भूमिभागा उल्लोया य भाणियव्वा तेसि णं भोमाणं बहुमज्झदेसभाए जेते नवमनवमा भोमा तेसि णं भोमाणं बहुमज्झदेसभाए पत्तेयं-पत्तेयं मद्दासणा पन्नत्ता तेसि णं दाराणं उवरिमागारा सोलसविधेहिं रयणेहिं उवसोभिया तं चेव जाव छत्ताइछत्ता एवामेव पुव्वावरेण विजयाए रायहाणीए पंच दारसता भवतीति मक्खाया ।

पडिवत्ति-३

[१७४] विजयाए णं रायहाणीए चउद्धिसिं पंच-पंच जोयणसताइं अबाहाए एत्थ णं चत्तारि वणसंडा पन्नत्ता तं जहा- असोगवणे-सत्तिवण्णवणे चंपगवणे चूतवणे ।

[पुव्वेणं असोगवणं दाहिणतो होइ सत्तिवण्णवणं
अवरेणं चंपगवणं चूयवणं उत्तरे पासे

ते णं वणसंडा साइरेगाइं दुवालस जोयणसहस्साइं आयामेणंपंच जोयणसयाइं विक्खंभेणं पन्नत्ता-पत्तेयं-पत्तेयं पागारपरिक्खित्ता किण्हा किण्होभासा वणसंडवण्णओ भाणियव्वो जाव बहवे वाणमंतरा देवा य देवीओ य आसयंति सयंति चिट्ठंति निसीदंति तुयट्ठंति रमंति ललंति कीलंति मोहंति पुरापोराणाणं सुचिण्णाणं सुपरक्कंताणं सुभाणं कम्माणं कडाणं कल्लाणाणं कल्लाणं फलवित्तिविसेस पच्चणुभवमाणा विहरंति तेसि णं वणसंडाणं बहुमज्झदेसभाए पत्तेयं-पत्तेयं पासायवड्डेसगा पन्नत्ता ते णं पासायवड्डेसगा बावडिं जोयणाइं अद्धजोयणं च उड्ढं उच्चत्तेणं एककतीसं जोयणाइं कोसं च आयाम-

विक्रंभेणं अब्भुगगतमूसिय-पहसिया विव तहेव जाव अंतो बहुसमरमणिज्जा भूमिभागा पन्नत्ता उल्लोया पउमलयाभत्तिचित्ता भाणियव्वा तेसि णं पासायवडैसगाणं बहुमज्झदेसभाए पत्तेयं-पत्तेयं सीहासणा पन्नत्ता वण्णावासो सपरिवारा तेसि णं पासायवडैसगाणं उप्पिं बहवे अट्ठमंगलगा झया छत्तातिच्छत्ता तत्थ णं चत्तारि देवा महिड्ढीया जाव पलिओवमट्ठितीया परिवसंति तं जहा- असोए सत्तिवण्णे चंपए चूते ते णं तत्थ साणं-साणं वणसंडाणं साणं-साणं पासायवडैसयाणं साणं-साणं सामाणियामं साणं-साणं अगगमहिसीणं साणं-साणं परिसाणं साणं-साणं आयरक्खदेवाणं आहेवच्चं जाव विहरति विजयाए णं रायहाणीए अंतो बहुसमरमणिज्जे भूमिभागे पन्नत्ते जाव पंचवण्णेहिं मणीहिं उवसोभिए तणसद्विहूणे जाव देवा य देवीओ य आसयंति जाव विहरंति तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं उवगारियालयणे पन्नत्ते-बारस जोयणसयाइं आयाम-विक्रंभेणं तिण्णि जोयणसहस्साइं सत्त य पंचाणउत्ते जोयणसते किंचि विसेसाहिए परिकखेवणं अद्धकोसं बाहल्लेणं सव्वजंबूणयामए अच्छे जाव पडिरूवे से णं एगाए पउमवरवेइयाए एगेणं य वणसंडेणं सव्वतो समंता संपरिक्खित्ते पउमवरवेइयाए वण्णओ वणसंडवण्णओ जाव विहरंति से णं वणसंडे देसूणाइं दो जोयणाइं चक्कवालविक्रंभेणं उवगारियालयणसमे परिकखेवणं ।

तस्स णं उवगारियालयणस्स चउद्धिसिं चत्तारि तिसोवाणपडिरूवगा पन्नत्ता वण्णओ तेसि णं तिसोवाणपडिरूवगामं पुरतो पत्तेयं-पत्तेयं तोरणा पन्नत्ता वण्णओ तस्स णं उवगारियालयणस्स उप्पिं बहुसमरमणिज्जे भूमिभागे पन्नत्ते जाव मणीणं फासो तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगे मूलपासायवडैसए पन्नत्ते से णं मूल पासायवडैसए बावट्ठिं जोय-णाइं अद्धजोयणं च उड्ढं उच्चत्तेणं एककतीसं जोयणाइं कोसं च आयाम-विक्रंभेणं अब्भुगगतमूसियपहसिते तहेव तस्स णं मूल पासायवडैसगस्स अंतो बहुसमरमणिज्जे भूमिभागे पन्नत्ते जाव मणिफासे उल्लोए तस्स णं बहुसमरमणिज्जस्स भूमिभागस्स बहुमज्झदेसभागे एत्थ णं महं एगा मणिपेढिया पन्नत्ता सा च एगं जोयणमायामविक्रंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उवरिं महं एगे सीहासणे पन्नत्ते एवं सीहासणवण्णओ सपरिवारो तस्स णं पासायवडैसगस्स उप्पिं बहवे अट्ठमंगलगा झया छत्तातिच्छत्ता से णं मूल पासायवडैसए अण्णेहिं चउहिं तदुच्चत्तप्पमाणमे-त्तेहिं पासायवडैसएहिं सव्वतो समंता संपरिक्खित्ते तेणं पासायवडैसगा एककतीसं जोयणाइं कोसं च उड्ढं पडिवत्ति-३

उच्चत्तेणं अद्धसोलसजोयणाइं अद्धकोसं च आयाम-विक्रंभेणं अब्भुगगतमूसियपहसिया विव तहेव तेसि णं पासायवडैसयाणं अंतो बहुसमरमणिज्जा भूमिभागा उल्लोया तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेयं सीहासणं पन्नत्तं वण्णओ तेसिं परिवारभूता भद्दासणा पन्नत्ता तेसि णं अट्ठमंगलगा झया छत्तातिच्छत्ता ते णं पासायवडैसगा अण्णेहिं चउहिं तदुच्चत्तप्पमाणमेत्तेहिं पासायवडैसएहिं सव्वतो समंता संपरिक्खित्ता ते णं पासायवडैसगा अद्धसोलसजोयणाइं अद्धकोसं च उड्ढं उच्चत्तेणं देसूणाइं अट्ठ जोयणाइं आयाम-विक्रंभेणं अब्भुगगतमूसियपहसिया विव तहेव तेसि णं पासायवडैसगाणं अंतो बहुसमरमणिज्जा भूमिभागा उल्लोया तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेयं पउमासणा पन्नत्ता तेसि णं पासायवडैसगाणं अट्ठमंगलगा झया छत्ता-तिच्छत्ता ते णं पासायवडैसगा अण्णेहिं चउहिं तदुच्चत्तप्पमाणमेत्तेहिं पासायवडैसएहिं सव्वतो समंता संप-रिक्खित्ता ते णं पासायवडैसगा देसूणाइं अट्ठ जोयणाइं उड्ढं उच्चत्तेणं देसूणाइं चत्तारि जोयणाइं

आयाम-विक्रंभेणं अब्भुग्गतमूसियपहसिया विव भूमिभागा उल्लोया भद्दासणाइं उवरिं मंगलगा झया छत्तातिछत्ता ते णं पासायवडैसगा अण्णेहिं चउहिं तदद्दुच्चत्तप्पमाणमेत्तेहिं पसायवडैसएहिं सव्वतो समंता संपरिक्खित्ता ते णं पासायवडैसगा देसूणाइं चत्तारि जोयणाइं उड्ढं उच्चत्तेणं देसूणाइं दो जोयणाइं आयाम-विक्रंभेणं अब्भुग्गतमूसियपहसिया विव भूमिभागा उल्लोया पउमासणाइं उवरिं मंगलगा झया छत्ताइच्छत्ता ।

[१७५] तस्स णं मूलपासायवडैसगस्स उत्तरपुरत्थिमेणं एत्थ णं विजयस्स देवस्स सभा सुधम्म पन्नत्ता-अद्धत्तेरसजोयणाइं आयामेणं छ सक्कोसाइं जोयणाइं विक्रंभेणं नव जोयणाइं उड्ढं उच्चत्तेणं अणेगखंभसतसंनिविद्धा अब्भुग्गतसुकयवडैरवेदियातोरण-वररइयसालभंजियासुसिलिद्ध-विसिद्ध-लद्ध-संठिय-पसत्थवेरुलियविमलखंभा नाणामणि-कणगरयणखइय-उज्जलबहु-समसुविभत्तभूमिभागा ईहा-मिय-उसभ-तुरग-जाव सुहफासा सस्सिरीयूवा कंचणमणिरयण-थूभियागा नाणाविहपंचवण्णघंटापडागपरि-मंडितग्गसिहरा धवला मिरीइकवचं विणिम्मयंती लाउल्लोइयमहिया गोसीससरसरत्तचंदणदद्वरदिन्नपंच-गुलितला उवचियवंदण-कलसा वंदणघडसुकय-तोरण-पडिदुवारदेसभागा आसत्तोसत्तविउलवट्टवग्धारिय-मल्लदामकलावा पंचवण्णसरससुरभिमुक्कपुप्फपुंजोवयारकलिता कालागरु-पवरकुंदुरुक्क-तुरुक्कधूवमघमघेत-गंधुदुयभिरामा सुगंधवरगंधगंधिया गंधवट्ठिभूया अच्छरगणसंघसंविक्किण्णा दिव्वतुडियसदसपणाइया अच्छा जाव पडिरूवा ।

तीसे णं सोहम्माए सभाए तिदिसिं तओ दारा पन्नत्ता तं जहा- पुरत्थिमेणं दाहिणेणं उत्तरेणं ते णं दारा पत्तेयं-पत्तेयं दो-दो जोयणाइं उड्ढं उच्चत्तेणं एगं जोयणं विक्रंभेणं तावइयं चेव पवेसेणं सेया वरकणगथूभियागा दारवण्णओ जाव वणामालाओ तेसि णं दारणं पुरओ पत्तेयं-पत्तेयं मुहमंडवे पन्नत्ते ते णं मुहमंडवा अद्धत्तेरसजोयणाइं आयामेणं छजोयणाइं सक्कोसाइं विक्रंभेणं साइरेगाइं दो जोयणाइं उड्ढं उच्चत्तेणं अणेगखंभसयसंनिविद्धा जाव उल्लोया भूमिभागवण्णओ तेसि णं मुहमंडवाणं उवरिं पत्तेयं-पत्तेयं अट्ठमंगलगा झया छत्ताइच्छत्ता तेसि णं मुहमंडवाणं पुरओ पत्तेयं-पत्तेयं पेच्छाघरमंडवे पन्नत्ते ते णं पेच्छाघरमंडवा अद्धत्तेरसजोयणाइं आयामेणं जाव दो जोयणाइं उड्ढं उच्चत्तेणं जाव मणीणं फासो तेसि णं बहुमज्झेदसभाए पत्तेयं-पत्तेयं वडिरामए अक्खाडगे पन्नत्ते तेसि णं वडिरामयाणं अक्खडगाणं बहुमज्झेदसभाए पत्तेयं-पत्तेयं वडिरामए पन्नत्ता ताओ णं मणिपेढियाओ जोयणमेगं आयाम-विक्रंभेणं अद्धजोयणं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं सीहासणे पन्नत्ते पडिवत्ति-३

सीहासणवण्णओ सपरिवारो तेसि णं पेच्छाघरमंडवाणं उप्पिं अट्ठमंगलगा झया छत्तातिछत्ता तेसि णं पेच्छाघरमंडवाणं पुरओ पत्तेयं-पत्तेयं मणिपेढिया पन्नत्ता ताओ णं मणिपेढियाओ दो-दो जोयणाइं आयाम-विक्रंभेणं जोयणं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं चेइयथूभे पन्नत्ते ते णं चेइयथूभा दो जोयणाइं आयाम-विक्रंभेणं सातिरेगाइं दो जोयणाइं उड्ढं उच्चत्तेणं सेया संखंक-कुंद-दगरय-अमयमहियफेणपुंजसण्णिकासा सव्वरयणामया अच्छा जाव पडिरूवा तेसि णं चेइयथूभाणं उप्पिं अट्ठमंगलगा बहुकिण्हचामरझया छत्तातिछत्ता तेसि णं चेइयथूभाणं पत्तेयं-पत्तेयं चउदिसिं चत्तारिमणिपेढियाओ पन्नत्ताओ ताओ णं मणिपेढियाओ जोयणं आयाम-विक्रंभेणं अद्धजोयणं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उप्पिं पत्तेयं-पत्तेयं चत्तारि जिनपडिमाओ जिणुस्सेहपमाणमेत्ताओ पलियंकणिसण्णाओ थूभाभिमुहीओ चिट्ठंति तं जहा- उसभा वद्धमाणा चंदाणणा वारिसेणा तेसि णं चेइयथूभाणं पुरओ पत्तेयं-पत्तेयं मणिपेढियाओ दो-दो जोयणाइं आयाम-विक्खंभेणं जोयणं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं चेइयरुक्खे पन्नत्ते ते णं चेइयरुक्खा अट्ठजोयणाइं उड्ढं उच्चत्तेणं अट्ठजोयणं उव्वेहेणं दो जोयणाइं खंधी अट्ठजोयणं विक्खंभेणं छजोयणाइं विडिमा बहुमज्झदेसभाए अट्ठजोयणाइं आयाम-विक्खंभेणं साइरेगाइं अट्ठजोयणाइं सव्वग्गेणं पन्नत्ता तेसि णं चेइयरुक्खाणं अयमेतारूवे वण्णावासे पन्नत्ते तं जहा- वइरामयमूल-रययसुपतिट्ठि-तयिडिमा रिद्धामयकंद-वेरुलियरुइल-खंधा सुजात-वरजातरूपपढमगविसाल-साला नानामणिरयणविविध-साहप्पसाह-वेरुलियपत्त-तवणिज्जपत्त-वैटा जंबूनयरत्तमउय-सुकुमालपवालपल्लववरंकरधरा विचित्तमणिरयण-सुरभिकुसुमफलभरण-मियसाला सच्छाया सप्पभा सस्सिरीया सउज्जोया अधियं नयनमननिव्वुतिकरा अयमरसमरसफला पासादीया दरिसणिज्जा अभिरूवा पडिरूवा ते णं चेइयरुक्खा अण्णेहिं बहूहिं तिलय-लवय-छत्तोवग सिरीस-सत्तिवण्ण-दहिवण्ण-लोद्ध-धव-चंदण-अज्जुण-नीव-कुडय-कयंव-पणस-ताल-तमाल-पियाल-पियंगु-पारावय-रायरुक्ख-नंदिरुक्खेहिं सव्वओ समंता संपरिक्खित्ता ते णं तिलया जाव नंदिरुक्खा कुस-विकुस-विसुद्धरुक्खमूला मूलमंतो कंदमंतो जाव सुरम्मा ते णं तिलया जाव नंदिरुक्खा अण्णाहिं बहूहिं पउमलयाहिं जाव सामलयाहिं सव्वतो समंता संपरिक्खित्ता ताओ णं पउमलयाओ जाव सामलयाओ निच्चं कुसुमियाओ जाव पडिरूवाओ तेसि णं चेइयरुक्खाणं उप्पिं अट्ठमंगलगा झया छत्तातिछत्ता तेसि णं चेइयरुक्खाणं पुरओ पत्तेयं-पत्तेयं मणिपेढिया पन्नत्ता ताओ णं मणिपेढियाओ जोयणं आयाम-विक्खंभेणं अट्ठजोयणं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उप्पिं पत्तेयं-पत्तेयं महिदज्झए पन्नत्ते ते णं महिंदज्झया अट्ठमाइं जोयणाइं उड्ढं उच्चत्तेणं अट्ठकोसं उव्वेहेणं अट्ठकोसं विक्खंभेणं वइरामया-वट्ठलद्वसंठिय-सुसिलिद्वपरि-घट्ठमद्वसुपतिट्ठिता विसिद्धा अणेगवर-पंचवण्णकुडभीसहस्स-परिमंडियाभिरामा वा उद्धुयविजयवेजयं-तीपडाग-छत्तातिछत्तकलिया तुंगा गगणतल-मणुलिहंतसिहरा पासादीया दरिसणिज्जा अभिरूवा पडिरूवा तेसि णं महिंदज्झयाणं उप्पिं अट्ठमंगलगा झया छत्तातिछत्ता तेसि णं महिंदज्झयाणं पुरओ पत्तेयं-पत्तेयं नंदा पुक्खरिणी पन्नत्ता ताओ णं पुक्खरिणीओ अट्ठतेरस-जोयणाइं आयामेणं छ जोयणाइं सक्कोसाइं विक्खंभेणं दस जोयणाइं उव्वेहेणं अच्छाओ सण्हाओ पुक्खरिणीवण्णओ पत्तेयं-पत्तेयं पउमवरवेइया-परिक्खित्ताओ पत्तेयं-पत्तेयं वणसंडपरिक्खित्ताओ वण्णओ तासि णं नंदाणं पुक्खरिणीणं तिदिसिं तिसोवाणप-पडिवत्ति-३

डिरूवगा पन्नत्ता तेसि णं तिसोवाण-पडिरूवगाणं वण्णओ तोरणा भाणियव्वा जाव छत्तातिछत्ता सभाए णं सुहम्माए छ मणोगुलियासाहस्सीओ पन्नत्ता तं जहा- पुरत्थिमेणं दो साहस्सीओ पच्चत्थिमेणं दो साहस्सीओ दाहिणेणं एगा साहस्सी उत्तरेणं एगा साहस्सी तासु णं मणोगुलियासु बहवे सुवण्णरूपमया फलगा पन्नत्ता तेसु णं सुवण्णरूपमएसु फलगेसु बहवे वइरामया नागदंतगा पन्नत्ता तेसु णं वइरामएसु नागदंतएसु बहवे किण्हसुत्तबद्धा वग्धारितमल्लदामकलावा जाव सुक्किलसुत्तबद्धा वग्धारितमल्लदामकलावा ते णं दामा तवणिज्जलंबूसगा जाव चिट्ठंति सभाए णं सुहम्माए छ

गोमाणसीसाहस्सीओ पन्नत्ताओ तं जहा- पुरत्थिमेणं दो साहस्सीओ एवं पच्चत्थिमेणवि दाहिणेणं सहस्सं एवं उत्तरेणवि तासु णं गोमाणसीसु बहवे सुवण्णरुप्पमया फलगा पन्नत्ता जाव तेसु णं वइरामएसु नागदंतएसु बहवे रययामया सिक्कया पन्नत्ता तेसु णं रययामएसु सिक्कएसु बहवे वेरुलियामईओ धूवघडियाओ पन्नत्ताओ ताओ णं धूवघडियाओ कालागरु-पवरकुंदरुक्क-तुरुक्क-धूवमघमघंतगंधुदुयाभिरामाओ जाव घाणमणनिव्वुड्ढकरेणं गंधेणं ते पएसे सव्वतो समंता आपूरेमाणीओ-आपूरेमाणीओ सिरीए अतीव-अतीव उवसोभेमाणीओ-उवसोभेमाणीओ चिट्ठंति सभाए णं सुधम्मए अंतो बहुसमरणिज्जे भूमिभागे पन्नत्ते जाव मणीणं फासो उल्लोए पउमल-याभत्तिचित्ते जाव सव्वतवणिज्जमए अचअछे जाव पडिरूवे ।

[१७६] तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगा मणिपेढिया पन्नत्ता सा णं मणिपेढिया दो जोयणाइं आयाम-विक्खंभेणं जोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे माणवए नाम चेइयखंभे पन्नत्ते-अद्धमाइं जोयणाइं उड्ढं उच्चत्तेणं अद्धकोसं उव्वेहेणं अद्धकोसं विक्खंभेणं छकोडीए छलंसे छविग्गहिते वइरामयवट्ठलद्वसंठिय-सुसिलिद्वपरिघट्टमद्वसुपतिद्विते एवं जहा- हिंदज्झयस्स वण्णणो जाव पडिरूवे तस्स णं माणवकस्स चेतियखंभस्स उवरिं छक्कोसे ओगाहित्ता हेट्ठावि छक्कोसे वज्जेत्ता मज्झे अद्धपंचमेसु जोयणेसु एत्थ णं बहवे सुवण्णरुप्पमया फलगा पन्नत्ता तेसु णं सुवण्णरुप्पमएसु फलएसु बहवे वइरामया नागदंता पन्नत्ता तेसु णं वइरामएसु नागदंतएसु बहवे रययामया सिक्कगा पन्नत्ता तेसु णं रययामयसिक्कएसु बहवे वइरामया गोलवट्ठसमुग्गका पन्नत्ता तेसु णं वइरामएसु गोलवट्ठसमुग्गएसु बहुयाओ जिण-सकहाओ संनिक्खित्ताओ चिट्ठंति जाओ णं विजयस्स देवस्स अण्णेसिं च बहूणं वाणमंतराणं देवाण य देवीणं य अच्चणिज्जाओ वंदणिज्जाओ जाव पज्जुवासणिज्जाओ माणवगस्स णं चेतियखंभस्स उवरिं अद्धमंगलगा झया छत्तातिछत्ता तस्स णं माणव-कस्स चेतियखंभस्स पुरत्थिमेणं एत्थ णं महं एगा मणिपेढिया पन्नत्ता सा णं मणिपेढिया जोयणं आयाम-विक्खंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे सीहासणे पन्नत्ते सपरिवारे तस्स णं माणवगस्स चेतियखंभस्स पच्चत्थिमेणं एत्थ णं महं एगा मणिपेढिया पन्नत्ता-जोयणं आयाम-विक्खंभेणं अद्धजोयणं बाहल्लेमं सव्वमणिमई अच्छा जाव पडिरूवा तीसे णं मणिपेढिया उप्पिं एत्थ णं महं एगे देवसयणिज्जे पन्नत्ते तस्स णं देवसयणिज्जस्स अयमेयारूवे वण्णावासे पन्नत्ते तं जहा- नाणामणिमया पडिपादा सोवणिगया पादा नाणामणिमया पायसीसा जंबूनयमयाइं गत्ताइं वइरामया संधी नानामणिमए वेच्चे रययामई तूली लोहियक्खमया बिब्बोयणा तवणिज्जमई गंडोवहाणिया से णं देवसयणिज्जे सालिंगणवट्टिए उभओ बिब्बोयणे दुहओ उण्णए मज्जे नयगंभीर गंगापुलिणवालुया-उद्दालसालिसए ओयवियखोमदुगुल्लपट्ट-पडिच्छयणे आइणगरुत्त-बूर-नवणीयतूलफासे सुविरइयरयत्ताणे पडिवत्ति-३

रत्तंसुयसंवुते सुरम्मे पासाईए दरिसणिज्जे अभिरूवे पडिरूवे तस्स णं देवसयणिज्जस्स उत्तरपुरत्थिमेणं एत्थ णं महं एगा मणिपेढिया पन्नत्ता-जोयणमेणं आयाम-विक्खंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं खुड्डए महिंदज्झए पन्नत्ते पमाणं वण्णओ जो महिंदज्झयस्स तस्स णं खुड्डमहिंदज्झयस्स पच्चत्थिमेणं एत्थ णं विजयस्स देवस्स महं एगे चोप्पाले नाम पहरणकोसे पन्नत्ते-सव्ववइरामए अछे जाव पडिरूवे तत्थ णं विजयस्स देवस्स बहवे

फलिहरयणपामोक्खा पहरणरयणा संनिक्खित्ता चिद्वंति-उज्जला सुणिसाय सुतिक्खधारा पासाईया दरिसणिज्जा अभिरूवा पडिरूवा तीसे णं सभाए सुहम्माए उप्पिं बहवे अट्ठमंगलगा झया छत्तातिछत्ता ।

[१७७] सभाए णं सुधम्माए उत्तरपुरत्थिमेणं एत्थ णं महं एगे सिद्धायतणे पन्नत्ते-अद्धतेरस जोयणाइं आयामेणं छ जोयणाइं सकोसाइं विक्खंभेणं नव जोयणाइं उड्ढं उच्चत्तेणं जाव गोमाणसिया वत्तव्वया जा चेव सहाए सुहम्माए वत्तव्वया सा चेव निरवसेसा भाणियव्वा तहेव दारा मुहमंडवा पेच्छाघरमंडवा झया थूभा चेइयरूक्खा महिंदज्झया नंदाओ पुक्खरिणीओ सुधम्मासरिसप्पमाणं मणगुलिया दामा गोमाणसी धूवघडियाओ तहेव भूमिभागे उल्लोए य जाव मणिफासो तस्स णं सिद्धायतणस्स बहुमज्झदेसभाए एत्थ णं महं एगामणिपेढिया पन्नत्ता-दो जोयणाइं आयामविक्खंभेणं जोयणं बाहल्लेमं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे देवच्छंदए पन्नत्ते-दो जोयणाइंआयाम-विक्खंभेणं साइरेगाइं दो जोयणाइं उड्ढं उच्चत्तेणं सव्वरयणामए अच्छे जाव पडिरूवे तत्थ णंदेवच्छंदए अट्ठसतं जिनपडिमाणं जिणुस्सेहप्पमाणमेत्ताणं संनिखित्तं चिद्वइ तासि णं जिनपडिमाणं अयमेयारूवे वण्णावासे पन्नत्ते तं जहा- तवणिज्जमया हत्थतल-पायतला अंकामयाइं नक्खाइं अंतोलोहियक्खप-रिसेयाइं कणगामया पादा कणगामया गोप्फा कणगामईओ जंधाओ कणगामया जाणू कणगामया ऊरू कणगामईओ गायलट्ठीओ तवणिज्जमईओ नाभीओ रिद्वामईओ रोमराईओ तवणिज्जमया चूचुया तवणिज्जमया सिरिवच्छा कणगमईओ वाहाओ कणगमईओ पासाओ कणगमईओ गीवाओ रिद्वामए मंसू सिलप्पवालमया ओट्टा फालियामया दंता तवणिज्जमईओ जीहाओ तवणिज्जमया तालुया कणगमईओ नासियाओ अंतोलोहितक्खपरिसेयाओ अंकमयाणि अच्छीणि अंतोलोहि-तक्खपरिसेयाइं रिद्वामईओ ताराओ रिद्वमयाइं अच्छिपत्ताइं रिद्वामईओ भमुहाओ कणगामयाकवोला कणगामया सवणा कणगामयनिडालपट्टियाओ वइरामईओ सीसघडीओ तवणिज्जमईओ केसंतकेसभूमीओ रिद्वामया उवरिमुद्धजा ।

तासि णं जिनपडिमाणं पिद्वओ पत्तेयं-पत्तेयं छत्तधार-पडिमाओ पन्नत्ताओताओ णं छत्तधारपडिमाओ हिमरययकुंदेंदुप्पगासाइं सकोरेंटमल्लदामधवलाइं आतपताइं सलीलं धारेमाणीओ-धारेमाणीओ चिद्वंति तासि णंजिनपडिमाणं उभओ पासिं दो-दो चामरधारपडिमाओ पन्नत्ताओ तो णं चामरधारपडिमाओ चंदप्पह-वइर-वेरुलिय-नाणामणिरयणखचितचित्तदंडाओ सुहुमरयतदीहवालाओ संखंक-कुंद-दगरय-अमतमथितफेणजसणिकासाओ धवलाओ चामराओ गहाय सलीलं वीजेमाणीओ चिद्वंति तासि णं जिनपडिमाणं पुरओ दो-दो नागपडिमाओदो-दो जक्खपडिमाओ दो-दो भूतपडिमाओ दो-दो कुंडधारपडिमाओ विणयओणयाओ पायवडियाओ पंजलीउडाओ संनिक्खित्ताओ चिद्वंति-सव्वरयणामईओ अच्छाओ जाव पडिरूवाओ तत्थ णं देवच्छंदए जिनपडिमाणं पुरओ अट्ठसतं घंटाणं अट्ठसतं वंदनकल-साणं अट्ठसतं भिगारगाणं एवंआयंसगाणं थालाणं पातीणं सुपतिद्वकाणं मणगुलियाणं वातकरगाणं पडिवत्ति-३

चित्ताणं रयणकरंडगाणं हयकंठगाणं [गयकंठगाणं नरकंठगाणं किन्नरकंठगाणं किंपुरिसकंदगाणं महोरगकंठगाणं गंधव्वकंठगाणं उसभकंठगाणं पुप्फचंगेरीणं एवं मल्ल-चुण्ण-गंध-वत्थाभरणचंगेरीणं सिद्धत्थचंगेरीणं लोमहत्थचंगेरीणं पुप्फपडलगाणं जाव लोमहत्थपडलगाणं सीहासणाणं छत्ताणं चामरामं तेल्लसमुग्गाणं कोट्टसमुग्गाणं पत्तसमुग्गाणं चोयसमुग्गाणं तगरसमुग्गाणं एलासमुग्गाणं हरियालसमुग्गाणं हिंगुलयसमुग्गाणं मणोसिलासमुग्गाणं अंजणसमुग्गाणं अट्ठसयं झयाणं अट्ठसयं] धूवकडुच्छुयाणं

संनिक्खित्तं चिद्धंति तस्सणं सिद्धायतणस्स उप्पिं बहवे अट्ठमंगलगा झया छत्ताचिछत्ता उत्तिगारा सोलसविहेहिं रयणेहिं उवसोणिया तंजहा-रयणेहिं जाव रिद्धेहिं ।

[१७८] तस्स णं सिद्धायतणस्सणं उत्तरपुरत्थिमेणं एत्थ णं महं एगा उववायसभा पन्नत्ता जहा- सुधम्मा तहेव जाव गोमाणसीओ उववायसभाएविदारा मुहमंडलवा उल्लोए भूमिभागे तहेवजाव मणिफासो तस्स णं बहुसमरमणिज्जस्सभूमिभागस्स बहुमज्झदेसभाए एत्थ णं महं एगा मणिपेढिया पन्नत्ता-जोयणं आयाम-विकखंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे देवसयणिज्जे पन्नत्ते तस्स णं देवसयणिज्जस्स वण्णओउववायसभाए णंउप्पिं अट्ठमंगलगा झया छत्तातिछत्ता तीसे णं उववायसभाएउत्तरपुरत्थिमेणं एत्थणं महं एगे हरए पन्नत्तेसे णं हरए अद्धतेरसजोयणिं आयामेणं छ जोयणाइं सक्कोसाइं विकखंभेणं दस जोयणाइं उव्वेहेणं अच्छे सण्हे वण्णओ जहेव नंदाणं पुक्खरिणीणं जाव तोरणवण्णओ तस्स णं हरयस्स उत्तरपुरत्थिमेणं एत्थ णं महं एगा अभिसेयसभा पन्नत्ता जहा-सभासुधम्मा तं चेव निरवसेसं जाव गोमाणसीओ भूमिभाए उल्लोए तहेव तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगा मणिपेढिया पन्नत्ता-जोयणं आयाम-विकखंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे सीहासणे पन्नत्ते सीहासणवण्णओ अपरिवारो तत्थ णं विजयस्स देवस्स सुबहू अबिसेकभंडे संनिक्खित्ते चिद्धंति अभिसेयसभाए उप्पिं अट्ठमंगलगा झया छत्तातिछत्ता तीसे णं अभिसेयसभाए उत्तरपुरत्थिमेणं एत्थ णं महं एगा अलंकारियसभा पन्नत्ता अभिसेयसभा वत्तव्वया जाव सीहासणं अपरिवारं तत्थ णं विजयस्स देवस्स सुबहू अलंकारिए भंडे संनिक्खित्ते चिद्धंति अलंकारियसभाए उप्पिं अट्ठमंगलगा झया छत्ताइछत्ता तीसे णं अलंकारियसभाए उत्तरपुरत्थिमेणं एत्थ णं महं एगा ववसायसभा पन्नत्ता अभिसेयसभा वत्तव्वयाजाव सीहासणंअपरिवारं तत्थ णं विजयस्स देवस्स महं एगे पोत्थयरयणे संनिक्खित्ते चिद्धंति तस्स णं पोत्थयरयणस्स-अयमेयारूवे वण्णावासे पन्नत्तेतं जहा- रिद्धमईओ कंबियाओ तवणिज्जमए दोरे नाणामणिमए गंठी अंकमयाइं पत्ताइं वेरुलियमए लिप्पासणे तवणिज्जमई संकला रिद्धामए छादणे रिटअठामई मसी वडरामई लेहणी रिद्धामयाइं अक्खराइं धम्मिए लेक्खे ववसायसभाए णं उप्पिं अट्ठमंगलगाझया छत्तातिछत्ता तीसे णं ववसायसभाए उत्तरपुरत्थिमेणं महं एगे बलिपीढे पन्नत्ते दो जोयणिं आयामविकखंभेणं जोयणं बाहल्लेणं सव्वरयणामए अच्छे जाव पडिरूवे तस्स णं बलिपीढस्स उत्तरपुरत्थिमेणं एत्थ णं महं एगा नंदापुक्खरिणी पन्नत्ता जं चेव माणं हरयस्स तं चेव सव्वं ।

[१७९] तेणं कालेणं तेणं समएणं विजए देवे विजयाए रायहाणीए उववातसभाए देवसयणिज्जंसि देवदूसंतरिते अंगुलस्स असंखेज्जतिभागमेत्तीए ओगाहणाए विजयदेवत्ताए उववण्णे तए णं से विजए देवे अहुणोववण्णमेत्तए चेव समाणे पंचविहाए पज्जत्तीए पज्जत्तिभावं गच्छति तं जहा-
आहार-

पडिवत्ति-३

पज्जत्तीए सरीरपज्जत्तीए इंदियपज्जत्तीए आणापाणुपज्जत्तीए भासमणपज्जत्तीए तए णं तस्स विजयस्स देवस्सपंचविहाए पज्जत्तीए पज्जत्ति भावं गयस्स समाणस्स इमेयारूवे अज्झत्थिए जाव समुप्पज्जित्था-किं मे पुट्ठि करणिज्जं किं मे पच्छा करणिज्जं किं मे पुट्ठिं सेयं किं मे पच्छा सेयं किं मे पुट्ठिंपि पच्छावि हिताए सुहाए खमाए निस्सेयसाए आणुगामियत्ताए भविस्सति तए णं तस्स

विजयस्स देवस्स सामाणियपरिसोववण्णगा देवा विजयस्स देवस्स इमं एतारूवं अज्झत्थियं चिंतियं पत्थियं मणोगयं संकप्पं समुप्पणं समभिजाणित्ता जेणेव विजए देवे तेणेव उवागच्छंति उवागच्छित्ता विजयं देवं करयलपरिग्गहियं सिरसावत्तं मत्थए अंजलिं कट्ठु जएणं विजएणं वद्धावैति वद्धावेत्ता एवं वयासी एवं खलु देवाणुप्पियाणं विजये रायहाणीए सिद्धायतणंसि अट्ठसत्तं जिनपडिमाणं जिणुस्सेहमाणमेत्ताणं संनिक्खित्तं चिट्ठति सभाए सुधम्मए माणवए चेतियखंभे वड्डरामएसु गोलवट्टसमुग्गएसु बहूओ जिन-सकहाओ सन्निक्खित्ताओ चिट्ठति जाओ णं देवाणुप्पियाणं अण्णेसिं च बहूणं विजयरायहाणिवत्थव्वाणं देवाण य देवीण अच्चणिज्जाओ वंदमिज्जाओ जाव चेतियं पज्जुवासणिज्जाओ एतण्णं देवाणुप्पियाणं पुत्विं करणिज्जं एतण्णं देवाणुप्पियाणं पच्छा करणिज्जं एतण्णं देवाणुप्पियाणं पुत्विं सेयं एतण्णं देवाणुप्पियाणं पच्छा सेयं एतण्णं देवाणुप्पियाणं पुत्विंपि पच्छावि जाव आणुगामियत्ताए भविस्सति तए णं से विजए देवे तेसिं सामाणियपरिसोववण्णगाणंदेवाणं अंतिए एयमट्ठं सोच्चा निसम्म हट्ठतुट्ठ-जाव हियए देवसयणिज्जाओ अब्भुट्ठेइ अब्भुट्ठेत्ता देवदूसं परिहेइ परिहेत्ता देवसयणिज्जाओ पच्चोरुहइ पच्चोरुहित्ता उववायसभाओ पुरत्थिमेणं दारेणं निग्गच्छइ निग्गचअछित्ता जेणेव हरए तेणेव उवागच्छति हरयं अनुपदाहिणं करेमाणे-करेमाणे पुरत्थिमेणं तोरणेणं अनुप्पविसति अनुप्पविसित्ता पुरत्थिमिल्लेणं तिसोवाणपडिरूवएणं पच्चोरुहति पच्चोरुहित्ता हरयं ओगाहति ओगाहित्ता जलमज्जणं करेति करेत्ता जलकिड्डं करेति करेत्ता आयंते चोक्खे परमसूइभूते हरयाओ पच्चुत्तरति पच्चुत्तरित्ता जेणामेव अभिसेयसभा तेणामेव उवागच्छति उवागच्छित्ता अभिसेयसभं पदाहिणं करेमाणे पुरत्थिमिल्ले णं दारेणं अनुपविसति अनुपविसित्ता जेणेव सीहासणे तेणेव उवागच्छति उवागच्छित्ता सीहासणवरगते पुरत्थाभिमुहे सण्णिसण्णे ।

तए णं तस्स विजयस्स देवस्स सामाणियपरिसोववण्णगा देवा अभिओगिए देवे सद्धान्वेति सद्धान्वेत्ता एवं वयासी-खिप्पामेव भो देवाणुप्पिया विजयस्स देवस्स महत्थं महग्धं महरिहं विपुलं इंदाभिसेयं उवट्ठवेह तए णं ते आभिओगिया देवा सामाणियपरिसोववण्णेहिं देवेहिं एवं वुत्था समाणा हट्ठतुट्ठ जाव हियया करतलपरिग्गहियं सिरसावत्तं मत्थए अंजलिं कट्ठु एवं देवा तहत्ति आणाए विणएणं वयणं पडिसुणंति पडिसुणित्ता उत्तरपुरत्थिमं दिसीभागं अवक्कमंति अवक्कमित्ता वेउव्विसमुग्धाएणं समोहणंति समोहणित्ता संखेज्जाइं जोयणाइं दंडं निसिरंति तं जहा- रयणाणं जाव रिट्ठाणं अहाबायरे पोग्गले परिसाडंति परिसाडित्ता अहासुहुमे पोग्गले परियायंति परियाइत्ता दोच्चंपि वेउव्विसमुग्धाएणं समोहणंति समोहणित्ता अट्ठसहस्सं सोवण्णियाणं कलसाणं अट्ठसहस्सं रुप्पामयाणं कलसाणं अट्ठसहस्सं मणिमयाणं अट्ठसहस्सं सुवण्णरुप्पामयाणं अट्ठसहस्सं सुवण्णमणिमयाणं अट्ठसहस्सं रुप्पामणिमयाणं अट्ठसहस्सं सुवण्णरुप्पामणिमयाणं अट्ठसहस्सं भोमेज्जाणं अट्ठसहस्सं भिंगाराणं एवं-गाणं पुप्फ-चंगेरीणं जाव लोमहत्थगचंगेरीणं पुप्फपडलगाणं जाव लोमहत्थगपडलगाणं सीहासणाणं छत्ताणं चामराणं तेल्लसमुग्गाणं जाव अंजणसमुग्गाणं झयाणं अट्ठसहस्सं धूवकडुच्छुयाणं विउव्वंति विउव्वित्ता ते साभाविए य विउव्विए य कलसे य जाव धूवकडुच्छुए य गेण्हंति गेण्हित्ता विजयाओ राययहाणीतो पडि- पडिवत्ति-३

णिक्खमंति पडिणिक्खमित्ता ताए उक्किट्ठाए जाव दिव्वाए देवगतीए तिरियमसंखेज्जाणं दीवसमुद्धानं मज्झमज्झेणं वीईवयमाणा-वीईवयमाणा जेणेव खीरोदे समुद्दे तेणेव उवागच्छंति उवागच्छित्ता खीरोदगं गिण्हंति गिण्हित्ता जाइं तत्थ उप्पलाइं जाव सहस्सपत्ताइं ताइं गिण्हंति गिण्हित्ता जेणेव पुक्खरोदे समुद्दे

तेणेव उवागच्छंति उवागच्छित्ता पुक्खरोदगं गेण्हंति गेण्हित्ता जेणेव समयखेत्ते जेणेव भरहेरवयाइं वासाइं जेणेव मागधवरदामपभासाइं तित्थाइं तेणेव उवागच्छंति उवागच्छित्ता तित्थोदगं गिण्हंति गिण्हित्ता तित्थमट्टियं गेण्हंति गेण्हित्ता जेणेव गंगा-सिंधु-रत्ता-रत्तवतीओमहानदीओ तेणेव उवागच्छंति उवागच्छित्ता सरितोदगं गेण्हंति गेण्हित्ता उभयतडमट्टियं गेण्हंति गेण्हित्ता जेणेव चुल्लहिमवंत-सिहरिवासधरपव्वता तेणेव उवागच्छंति उवागच्छित्ता सव्वतुवरे सव्वपुप्फे सव्वगंधे सव्वमल्ले सव्वोसहिसिद्धत्थए य गिण्हंति गिण्हित्ता जेणेव पउमद्धह-पुंडरीयद्धहा तेणेव उवागच्छंति उवागच्छित्ता दहोदगं गेण्हंति गेण्हित्ता जाइं तत्थ उप्पलाइं जाव सहस्सपत्ताइं ताइं गेण्हंति गेण्हित्ता जेणेव हेमवय-हेरण्णवयाइं वासाइं जेणेव रोहियरोहितंस-सुवण्णकूलरुप्पकूलाओ महानदीओ तेणेव उवागच्छंति उवागच्छित्ता सलिलोदगं गेण्हंति गेण्हित्ता उभयतडमट्टियं गेण्हंति गेण्हित्ता जेणेव सद्दावाति-वियडावाति-वट्ठवेतड्ढपव्वत्ता तेणेव उवागच्छंति उवागच्छित्ता सव्वतुवरे जावसव्वोसहिसिद्धत्थए य गेण्हंति गेण्हित्ता जेणेव महाहिमवंत-रुप्पिवासधरपव्वता तेणेव उवागच्छंति उवागच्छित्ता जाव जेणेव महापउमद्धह-महापुंडरीयद्धहा तेणेव उवागच्छंति उवागच्छित्ता दहोदगं गेण्हंति गेण्हित्ता जाइं तत्थ उप्पलाइं जेणेव हरिवास-रम्मगवासाइं जेणेव हरि-हरिकंत-नरकंत-नारिकंताओ महानदीओ तेणेव उवागच्छंति उवागच्छित्ता सलिलोदगं गेण्हंति गेण्हित्ता उभयतडमट्टियं गेण्हंति गेण्हित्ता जेणेव गंधावाति-मालवंतपरियागा-वट्ठवेयड्ढपव्वया तेणेव उवागच्छंति उवागच्छित्ता जेणेव निसह-नीलवंत-वासहरपव्वता तेणेव उवागच्छंति उवागच्छित्ता जेणेव तिगिच्छिदह-केसरिदहा तेणेव उवागच्छंति उवागच्छित्ता दहोदगं गेण्हंति गेण्हित्ता जाइं तत्थ उप्पलाइं जाव सहस्सपत्ताइं ताइं गेण्हंति गेण्हित्ता जेणेव पुव्वविदेहावरविदेहवासाइं जेणेव सीया-सीओयाओ महानईओ तेणेव उवागच्छंति उवागच्छित्ता सलिलोदगं गेण्हंति गेण्हित्ता उभयतडमट्टियं गेण्हंति गेण्हित्ता जेणेव सव्वचक्कवट्ठिविजया जेणेव सव्वमागहवरदामपभासाइं तित्थाइं जेणेव सव्ववक्खारपव्वता तेणेव उवागच्छंति उवागच्छित्ता सव्वतुवरे जाव सव्वोसहिसिद्धत्थए य गेण्हंति गेण्हित्ता जेणेव सव्वंतरनदीओ तेणेव उवागच्छंति उवागच्छित्ता सलिलोदगं गेण्हंति गेण्हित्ता [उभयतडमट्टियं गेण्हंति गेण्हित्ता] जेणेव मंदरे पव्वते जेणेव भद्दसालवणे तेणेव उवागच्छंति उवागच्छित्ता सव्वतुवरे जाव सव्वोसहि-सिद्धत्थए य गिण्हंति गिण्हित्ता जेणेव नंदणवणे तेणेव उवागच्छंति उवागच्छित्ता सव्वतुवरे जाव सव्वोसहिसिद्धत्तए य सरसं च गोसीसचंदणं गिण्हंति गिण्हित्ता जेणेव सोमनसवणे तेणेव उवागच्छंति उवागच्छित्ता सव्वतुवरे जाव सव्वोसहिसिद्धत्थए य सरसं व गोसीसचंदणं दिव्वं च समुणदामं गेण्हंति गेण्हित्ता जेणेव पंडगवने तेणेव उवागच्छंति उवागच्छित्ता सव्वतुवरे जाव सव्वोसहिसिद्धत्थए यसरसं च गोसीसचंदणं दिव्वं च समुणदामं दद्धरमलयसुगंधिए गंधे गेण्हंति गेण्हित्ता एगतो मिलंति मिलित्ता जंबुद्धीवस्स पुरत्थिमिल्लेणं दारेणं निग्गच्छंति निग्गच्छित्ता ताए उक्किट्ठाए जाव देवगतीए तिरियमसंखेज्जाणदीवसमुद्धानं मज्झिमज्झेणं वीईवयमाणा-वीईवयमाणा जेणेव विजया रायहाणी तेणेव उवागच्छंति उवागच्छित्ता विजयं रायहाणिं अनुप्पयाहिणं करेमाणा-करेमाणा जेणेव अभिसेयसभा जेणेव विजए देवे तेणेव उवागच्छंति उवागच्छित्ता करतलपरिग्गहियं सिरसावत्तं मत्थए अंजलिं कट्ठु जएणं विजएणं वद्धावेंति विद्धावेत्ता विजयस्स देवस्स तं

पडिवत्ति-३

महत्थं महगअधं महरिहं विपुलं अभिसेयं उवट्ठवेंति ।

तए णं तं विजयं देवं चत्तारि सामाणियसाहस्सीओ चत्तारि अग्गमहिंसीओ सपरिवाराओ तिण्णि परिसाओ सत्त अणिया सत्ता अणियाहिवी सोलस आयारक्खदेवसाहस्सीओ अण्णे य बहवे य विजयरायधाणिवत्थव्वगा वाणमंतरा देवा य देवीओ य तेहिं साभाविएहिं उत्तरवेउव्विएहि य वरकमल-पतिट्ठाणेहिं सुरभिवरवारिपडिपुन्नेहिं चंदणकयचच्चाएहिं आविद्धकंठगुणेहिं पउमुप्पलपिधाणेहिं सुकुमालक-रतलपरिग्गहिएहिं अट्ठसहस्सेणं सोवण्णियाणं कलसाणं रूप्पामयाणं मणिमयाणं जाव अट्ठसहस्सेणं भोमेज्जाणं कलसाणं सव्वोदएहिं सव्वमट्ठियाहिं सव्वतुवरेहिं सव्वपुप्फेहिं सव्वगंधेहिं सव्वमल्लेहिं सव्वो-सहिसिद्धत्थएहिं य सव्वइट्ठिए सव्वजुतीए सव्वबलेणं सव्वसमुदएणं सव्वायरेणं सव्वविभूतीए सव्वविभूसाए सव्वसंभमेणं सव्वपुप्फगंधमल्लालंकारेणं सव्वदिव्वतुडियसद्दसण्णिणाएणं महया इड्ढीए महया जुतीए महया बलेणं महया समुदएणं महया वरतुरियजमगसमगपरडुप्पवादितरवेणं संख-पणव-गडह-भेरि-झल्लरि-खरमुहि-हुडुक्क-मुरव-मुडंग-दुंदुहि-निग्घोसनादितरवेणं महया-महया इंदाभि-सेगेणं अभिसिंचंति तए णं तस्स विजयस्स देवस्स महया-महया इंदाभिसेगंसि वट्ठमाणंसि अप्पेगतिया देवा विजयं रायहाणिं नच्चोदगं नातिमट्ठियं पविरलफुसियं रयरेणविणासणं दिव्वं सुरभिं गंदोदगवासं वासंति अप्पेगतिया देवा विजयं रायहाणि निहतरयं नट्ठरयं भट्ठरय पसंतरयं उवसंतरयं करंति अप्पेगतिया देवा विजयं रायहाणि सब्भिंतरबाहिरियं आसियसम्मज्जितोवलित्तं सित्तसुइसम्मट्ठ-रत्थंतरावणवीहियं करंति अप्पेगतिया देवा विजयं रायहाणिं मंचातिमंचकलितं करंति अप्पेगतिया देवा विजयं रायहाणिं नानाविहरागोसियझय-पडागतिपडागमंडितं करंति अप्पेगतिया देवा विजयं रायहाणिं लाउल्लोइय-महियं गोसीस-सरसरत्तचंदण-दट्ठरदिण्णपंचंगुलितलं करंति अप्पेगतिया देवा विजयं रायहाणिं उवचियवंदणकलसं वंदणघडसुकयतोरण-पडिदुवारदेसभागं करंति अप्पेगतिया देवा विजयं रायहाणिं आसत्तोसत्तविपुलवट्ठवग्घारितमल्लदामकलावं करंति अप्पेगइया देवा विजयं रायहाणिं उवचियवंदणकलसं वंदणघडसुकयतोरणपडिदुवारदेसभागं करंति अप्पेगतिया देवा विजयं रायहाणिं आसत्तोसत्तविपुलवट्ठवग्घारितमल्लदामकलावं करंति अप्पेगइया देवा विजयं रायहाणिं पंचवण्णसरससुरभिमुक्कपुप्फपुंजोवयारकलितं करंति अप्पेगइया देवा विजयं रायहाणिं कालागरु-पवरकुंदुरुक्क-तुरुक्क-धूवडज्झंत-मघमघेतंगंधुद्धयाभिरामं सुगंधवरगंधगधियं गंधवट्ठिभूयं करंति अप्पेगइया देवा हिरणवासं वासंति अप्पेगइया देवा सुवण्णवासं वासंति अप्पेगइया देवा एवं रयणवासं पुप्फवासं मल्लवासं गंधवासं चुण्णवासं वत्थवासं आभरणवासं अप्पेगइया देवा हिरणविधिं भाएंति एवं-सुवण्णविधिं जाव आभरणविधिं अप्पेगतिया देवा दुतं नट्ठविधिं उवदंसेंति अप्पेगतिया देवा विलंबितं नट्ठविहिं उवदंसेंति अप्पेगतिया देवा दुतविलंबितं नाम नट्ठविधिं उवदंसेंति अप्पेगतिया देवा अंचियं नट्ठविधिं उवदंसेंति अप्पेगतिया देवा रिभितं नट्ठविधिं उवदंसेंति अप्पेगतिया देवा अंचितरिभितं नट्ठविधिं उवदंसेंति अप्पेगतिया देवा आरभडं नट्ठविधिं उवदंसेंते अप्पेगतिया देवा भसोलं नट्ठविधिं उवदंसेंति अप्पेगतिया देवा आरभडभसोलं नट्ठविधिं उवदंसेंति अप्पेगतिया देवा उप्पायनिवायपसत्तं संकुचिय-पसारियं रियारियं भंत-संभंतं नाम नट्ठविधिं उवदंसेंति अप्पेगतिया देवा चउव्विधं वाइयं वादेंति तं जहा- ततं विततं धणं झुसिरं अप्पेगतिया देवा चउव्विधं गेयं गायंति तं जहा- उक्खित्तं पवत्तं मंदायं रोइयावसाणं अप्पेगतिया देवा चउव्विधं अभिनयं अभिनयंति तं जहा- दिट्ठतियं पाडिसुयं सामन्नतोविणिवातियं लोगमज्झावसाणियं अप्पेगतिया देवा पीणंति अप्पेगतिया देवा तंडवेंति अप्पेगतिया पडिवत्ति-३

देवा लासेति अप्पेगतिया देवा बुक्कारेति अप्पेगतिया देवा पीणंति तंडवेति लासेति बुक्कारेति अप्पेगतिया देवा अप्फोडेति अप्पेगतिया देवा वग्गंति अप्पेगतिया देवा तिवतिं छिंदंति अप्पेगतिया देवा अप्फोडेति विगंगंति तिवंति छिंदंति अप्पेगतिया देवा हयहेसियं करेति अप्पेगतिया देवा हत्थिगुलगुलाइयं करेति अप्पेगतिया देवा रहघणघणाइयं करेति अप्पेगतिया देवा उच्छलेति अप्पेगतिया देवा पोच्छलेति अप्पेगतिया देवा उक्किट्ठिं करेति अप्पेगतिया देवा उच्छलेति पोच्छलेति उक्किट्ठिं करेति अप्पेगतिया देवा सीहनादं नदंति अप्पेगतिया देवा पादददरयं करेति अप्पेगतिया देवा भूमिचवेडं दलयंति अप्पेगतिया देवा सीहनादं पादददरयं भूमिचवेडं दलयंति अप्पेगतिया देवा हक्कारेति अप्पेगतिया देवा थुक्कारेति अप्पेगतिया देवा थक्कारेति अप्पेगतिया देवा नामाइं साहेति अप्पेगतिया देवा हक्कारेति थुक्कारेति थक्कारेति नामाइं साहेति अप्पेगतिया देवा ओवयंति अप्पेगतिया देवा उप्पयंति अप्पेगतिया देवा परिवयंति अप्पेगतिया देवा ओवयंति उप्पयंति परिवयंति अप्पेगतिया देवा जलंपि अप्पेगतिया देवातवंति अप्पेगतिया देवा पतवंति अप्पेगतिया देवा जलंति तवंति पतवंति अप्पेगतिया देवा गज्जंति अप्पेगतिया देवा विज्जुयायंति अप्पेगतिया देवा वासं वासंति अप्पेगतिया देवा गज्जंति विज्जुयायंति वासं वासंति अप्पेगतिया देवा देवसन्निवायं करेति अप्पेगतिया देवा देवुक्कलियं करेति अप्पेगतिया देवा देवकहकहं करेति अप्पेगतिया देवा देवदुहदुहगं करेति अप्पेगतिया देवा देवसन्निवायं देवउक्कलियं देवकहकहं देवदुहदुहगं करेति अप्पेगतिया देवा देवुज्जोयं करेति अप्पेगतिया देवा विज्जुयारं करेति अप्पेगतिया देवा चेलुक्खेवं करेति अप्पेगतिया देवा देवुज्जोयं विज्जुयारं चेलुक्खेवं करेति अप्पेगतिया देवा उप्पलहत्थगता जाव सहस्सपत्तहत्थगतवंदणकलसहत्थगता जाव धूवकडुच्छुयहत्थगता हट्ठतुट्ठ-जाव हियया विजयाए रायहाणीए सव्वतो समंता आधावंति परिधावंति ।

तए णं तं विजयं देवं चत्तारि सामाणियसाहस्सीओ चत्तारि अग्गमहिंसीओ सपरिवाराओ जाव सोलसआयरक्खदेवसाहस्सीओ अण्णे य बहवे विजयरायहाणीवत्थच्चा वाणमंतरा देवा य देवीओ य तेहिं वरकमलपतिट्ठाणेहिं जाव अट्ठसहस्सेणं सोवण्णियाणं कलसाणं तं चेव जाव अट्ठसहस्सेणं भोमेज्जाणं कलसाणं सव्वोदगेहिं सव्वमट्ठियाहिं सव्वतुवरेहिं सव्वपुप्फेहिं जाव सव्वोसहिंसिद्धत्थएहिं सव्विड्ढीए जाव निग्घोसनाइयरवेणं महया-महया इंदाभिसेएणं अभिसिंचंति अभिसिंचित्ता पत्तेयं-पत्तेयं करतलपरिग्गहियं सिरसावत्तं मत्थए अंजलिं कट्ठु एवं वयासि-जय-जय नंदा जय-जय भद्दा जय-जय नंदा भद्दं ते अजियं जिणाहिं जियं पालयाहिं अजितं जिणाहिं सत्तुपक्खं जित्तं पालयाहिं मित्तपक्खं जियमज्झे वसाहिं तं देव निरुवसग्गं इंदो इव देवाणं चंदो इव ताराणं चमरो इव असुराणं धरणो इव नागाणं भरहो इव मणुयाणं बहूणि पलिओवमाइं बहूणि सागरोवमाणि बहूणि पलिओवम-सागरोवमाणि चउण्हं सामाणियसाहस्सीमं जाव आयरक्खदेवसाहस्सीणं विजयस्स देवस्स विजयाए रायहाणीए अण्णेसिं च बहूणं विजयराय-हाणिवत्थच्चाणं वाणमंतराणं देवाणं देवीण य आहेवच्चं जाव आणा-ईसर-सेणावच्चं कारेमाणे पालेमाणे विहराहित्ति कट्ठु महता-महता सट्ठेणं जय-जय सट्ठं पउंजंति ।

[१८०] तए णं से विजए देवे महया-महया इंदाभिसेएणं अभिसित्ते समाणे सीहासणाओ अब्भुट्ठेइ अब्भुट्ठेत्ता अभिसेयसाओ पुरत्थिमेणं दारेणं पडिनिक्खमति पडिनिक्खमित्ता जेणेव अलंकारिय-सभा तेणेव उवागच्छति उवागच्छित्ता अलंकारियसभं अनुप्पयाहिणीकरेमाणे-अनुप्पयाहिणीकरेमाणे पुरत्थिमेमं दारेणं अनुपविसति अनुपविसित्ता जेणेव सीहासणे तेणेव उवागच्छति उवागच्छित्ता सीहासणवर-

गते पुरत्थाभिमुहे सणिसण्णे तए णं तस्स विजयस्स देवस्स आभि-ओहिया देवा आलंकारियं भंडं उवणेंति तए णं तस्स विजयस्स देवस्स आभिओगिया देवा आलंकारियं भंडं उवणेंति तए णं से विजए देवे तप्पढमयाए पम्हलसूमालाए दिव्वाए सुरभीए गंधकासाईए गाताइं लूहेति लूहत्ता सरसेणं गोसीसचंदणेणं गाताइं अनुलिंपति अनुलिंपित्ता नासाणी-सासवायवोज्झं चक्खुहरं वण्णफरिसजुत्तं हयलालापेलवातिरेणं धवलं कणगखचियंतकम्मं आगासफलिहसमप्पभं अहतं दिव्वं देवदूसजुयलं नियंसेइ नियंसेत्ता हारं पिणिद्धेइ पिणिद्धेत्ता अद्धहारं पिणिद्धेइ पिणिद्धेत्ता एकावलिं पिणिद्धेत्ति पिणिद्धेत्ता एवं एतेणं अभिलावेणं मुत्ताबलिं कणगावलिं रयणावलिं कडगाइं तुडियाइं अंगयाइं केयूराइं दसमुद्धियाणतकं कुंडलाइं चूडामणि चित्तरयण-संकडं मउडं पिणिद्धेइं पिणिद्धेत्ता गंथिम-वेढिम-पूरिम-संघाइमेणं चउत्विहेणं मल्लेणं कप्परुक्खयं पिव अप्पाणं अलंकियविभूसितं करेति करेत्ता दद्धरमलयसुगंधगंधिएहिं गंधेहिं गाताइं भुकुंडेति भुकुंडेत्ता दिव्वं च सुमणदामं पिणिद्धेति तए णं से विजए देवे केसालंकारेणं मल्लालंकारेणं आभरणालंकारेणं चउत्विहेणं अलंकारेणं अलंकिते विभूसिए माणे पडिपुन्नालंकारेणं सीहासणाओ अब्भुद्धेइ अब्भुद्धेत्ता अलंकारियसभाओ पुरत्थिमिल्लेणं दारेणं पडिनिक्खमित्ता पडिनिक्खमित्ता जेणेव ववसायसभा तेणेव उवागच्छति उवागच्छित्ता ववसायसभं अनुप्पदाहिणीकरेमाणे-अनुप्पदाहिणीकरेमाणे पुरत्थिमिल्लेणं दारेणं अनुपविसति अनुपविसित्ता जेणेव सीहासणे तेणेव उवागच्छति उवागच्छित्ता सीहासणवरगते पुरत्थाभिमुहे सणिसण्णे तए णं तस्स विजयस्स देवस्स आभिओगिया देवा पोत्थयरयणं उवणेंति ।

तए णं से विजए देवे पोत्थयरयणं गेण्हति गेण्हित्ता पोत्थयरयणं मुयति मुएत्ता पोत्थयरयणं विहाडेति विहाडेत्ता पोत्थयरयणं वाएति वाएत्ता धम्मियं ववसायं ववसइ ववयसइत्ता पोत्थयरयणं पडिणिक्खिवेइ पडिणिक्खिवेत्ता सीहासणाओ अब्भुद्धेति अब्भुद्धेत्ता ववसायसभाओ पुरत्थिमिल्लेणं दारेणं पडिणिक्खमइ पडिणिक्खमित्ता जेणेव नंदा पुक्खरिणी तेणेव उवागच्छति उवागच्छित्ता नंदं पुक्खरिणिं अनुप्पयाहिणीकरेमाणे-अनुप्पयाहिणीकरेमाणे पुरत्थिमिल्लेमं तोरणेणं अनुपविसति अनुपविसित्ता पुरत्थिमिल्लेणं तिसोपाणपडिरूवणं पच्चोरुहति पच्चोरुहित्ता हत्थं पादं पक्खालेति पक्खालेत्ता एणं महं सेतं रययामयं विमलसलिलपुन्नं मत्तगयमहमुहाकितिसमाणं भिंगारं गिण्हति गिण्हित्ता जाइं तत्थ उप्पलाइं पउमाइं जाव सहस्सपत्ताइं ताइं गिण्हति गिण्हित्ता नंदातो पुक्खरिणीतो पच्चुत्तरेइ पच्चुत्तरेत्ता जेणेव सिद्धायतणे तेणेव पहारेत्थ गमणाए तए णं तस्स विजयस्स देवस्स चत्तारि सामाणियसाहस्सीओ जाव अन्ने य बहवे वाणमंतरा देवा य देवीओ य अप्पेगइया उप्पलहत्थगया जाव सहस्सपत्तहत्थगया विजयं देवं पिडुतो-पिडुतो अनुगच्छंति तए णं तस्स विजयस्स देवस्स बहवे आभिओगिया देवा देवीओ य वंदणकलसहत्थगता जाव धूवकडुच्छुयहत्थगता विजयं देवं पिडुतो-पिडुतो अनुगच्छंति तए णं से विजए देवे चउहिं सामाणियसाहस्सीहिं जाव अण्णेहि य बहूहिं वाणमंतरेहिं देवेहिं य देवीहि य सद्धिं संपरिवुडे सव्विड्डीए सव्वजुतीए जाव निग्घोसणाइयरवेणं जेणेव सिद्धायतणे तेणेव उवागच्छति उवागच्छित्ता सिद्धायतणं अनुप्पयाहिणीकरेमाणे-अनुप्पयाहिणी करेमाणे पुरत्थिमिल्लेणं दारेणं अनुपविसति अनुपविसित्ता आलोए जिनपडिमाणं पणामं करेति करेत्ता जेणेव मणिपेढिया जेणेव देवच्छंदए जेणेव जिनपडिमाओ तेणेव उवागच्छइ उवागच्छित्तालोमहत्थगं परामुसति परामुसित्ता जिनपडिमाओ पमज्जति पमज्जित्ता दिव्वाए दग्धाराए ण्हावेत्ता सरसेणं गोसीसचंदणेणं

गाताइं अनुलिंपइ अनुलिंपित्ता जिनपडिमाणं अहयाइं देवदूसजुयलाइं नियंसेइ नियंसेत्ता अग्गेहिं वरेहिं
गंधेहिं मल्लेहिं य अच्चेति अच्चेत्ता पुप्फारुहणं मल्लारुहणं
पडिवत्ति-३

वण्णारुहणं चुण्णारुहणं गंधारुहणं आभरणारुहणं करेति करेत्ता जिनपडिमणं पुरतो अच्छेहिं सण्हेहिं
रययामएहिं अच्छरसा-तंदुलेहिं अट्ठमंगलए आलिहति आलिहित्ता कयग्गाहग्ग-हितकरतलपब्भट्ठ-विमुक्केणं
दसद्धवण्णेणं कुसुमेणं पुप्फपुंजोवयारकलितं करेति करेत्ता चंदप्पभ-वडरवेरुलियविमलदंडं
कंचणमणिरयणभत्तिचित्तं कालागरु-पवर-कुंदुरुक्क-तुरुक्क-धूवगंधुत्त-माणुविद्धं धूमवट्ठिं विणिम्मयुतं
वेरुलियामयं कडुच्छुयं पग्गहित्तु पयतो धूवं दाऊण जिनवराणं सत्तट्ठ पदाणि ओसरति ओसरित्ता
दसंगुलिं अंजलिं करिय मत्थयम्मि यपयतो अट्ठसयविसुद्ध-गंधजुत्तेहिं अत्थजुत्तेहिं अपुणरुत्तेहिं
महावित्तेहिं संथुणइ संथुणित्ता वामं जाणुं अंचेइ अंचेत्ता दाहिणं जाणुं धरणितलंसि निवाडेइ तिकखुत्तो
मुद्धाणं धरणियलंसि नमेइ नेत्ता ईसिं पच्चुण्णमति पच्चुण्णमित्ता कडयतुडियथंभियाओ भुयाओ साहरति
साहरित्ता करयलपरिग्गहियं सिरसावत्तं मत्थए अंजलिं कट्ठु वं वयासी-

नमोत्थु णं अरहंताणं भगवंताणंआदिगराणं तित्थगराणं सयंसंबुद्धाणं पुरिसुत्तमाणं
पुरिससीहाणं पुरिसवरपुंडरीयाणं पुरिसवरगंधहत्थीणं लोगुत्तमाणं लोगनाहाणं लोगहिआणं लोगपईवाणं
लोगपज्जोयगराणं अभयदयाणं चक्खुदयाणं मग्गदयाणं सरणदयाणं बोहिदयाणं धम्मदयाणं धम्मदेसयाणं
धम्मनायगाणं धम्मसारहीणं धम्मवरचाउरंतचक्कवट्ठीणं अप्पडिहयवरनाणदंसणधराणं विअट्ठच्छउमाणं
जिणाणं जावयाणं तिन्नाणं तारयाणं बुद्धाणं बोहयाणं मुत्ताणं मोयगाणंसव्वन्नूणं सववदरिसीणं सिवं
अयलं अरुअं अनंतं अक्खयं अच्चाबाहं अपुणरावित्ति सिद्धिगइनामधेयं ठाणं संपत्ताणं वंदति नमंसति
वंदित्ता नमंसित्ता-जेणेव सिद्धायणस्स बहुमज्झदेसभाए तेणेव उवागच्छति उवागच्छित्ता दिव्वाए
दगधाराए अब्भुक्खति अब्भुक्खित्ता सरसेणं सीसचंदणेणं पंचंगुलितलं दलयति दलइत्ता
कयग्गाहग्गहियकरतलपब्भट्ठ-विमुक्केणं दसद्धवण्णेणं कुसुमेणं पुप्फपुंजोवयारकलियं करेति करेत्ता धूवं
दलयति दलइत्ता-जेणेव सिद्धायतणस्स दाहिणिल्ले दारे तेणेव उवागच्छति उवागच्छित्ता लोमहत्थयं
गेण्हइ गेण्हित्ता दारचेडीओ य सालभंजियाओ य वालरूवए य लोमहत्थेणं पमज्जति पमज्जित्ता दिव्वाए
दगधाराए अब्भुक्खति अब्भुक्खित्ता सरसेणं गोसीसचंदणेणं चच्चए दलयति दलइत्ता पुप्फारुहणं जाव
आभरणारुहणं करेति करेत्ता आसत्तोसत्तविपुलवट्ठवग्गधारितमल्लदामकलावं करेति करेत्ता
कयग्गाहग्गहित-जाव पुंजोवयारकलितं करेति करेत्ता धूवं दलयति दलइत्ता-जेणेव दाहिणिल्ले दारे
मुहमंडवे जणेव दाहिणिल्लस्स मुहमंडवस्स बहुमज्झदेसभाए तेणेव उवागच्छति उवागच्छित्ता लोमहत्थगं
परामुसइ परामुसित्ता बहुमज्झ-देसभागं लोमहत्थगेणं पमज्जति पमज्जित्ता दिव्वाए दगधाराए
अब्भुक्खेति अब्भुक्खेत्ता सरसेणं गोसीसचंदणेणं पंचंगुलितलं मंडलगं आलिहति आलिहित्ता कयग्गाह
जाव धूवं दलयति दलइत्ता-जेणेव दाहिणिल्लस्स मुहमंडवस्स पच्चत्थिमिल्ले दारे तेणेव उवागच्छति
उवागच्छित्ता लोमहत्थगं परामुसति परामुसित्ता दारचेडीओ य सालभंजियाओ य वालरूवए य
लोमहत्थगेणं पमज्जति पमज्जित्ता दिव्वाए दगधाराए अब्भुक्खति अब्भुक्खित्ता सरसेणं गोसीसचंदणेणं
जाव धूवं दलयति दलइत्ता-

जेणेव दाहिणिल्लस्स मुहमंडवस्स उत्तरिल्ला खंभपंती तेणेव उवागच्छति उवागच्छित्ता
लोमहत्थगं परामुसति परामुसित्ता खंभे य सालभंजियाओ य वालरूवए य लोमहत्थगेमं पमज्जति

पमज्जित्ता दिव्वाए दग्धाराए अब्भुक्खति अब्भुक्खित्ता सरसेणं गोसीसचंदणेणं चच्चए दलयति दलइत्ता पुप्फारुहणं जाव आभरणारुहणं करेइ करेत्ता आसत्तोसत्तविउ-लवट्टवग्धारियमल्लदामकलावं करेइ करेत्ता कयग्गाहग्गहियकरतलपब्भट्टविमुक्केणं दसद्धवण्णेणं कुसुमेणं पुप्फपुंजोवयारकलियं करेइ करेत्ता धूवं पडिवत्ति-३

दलयति दलइत्ता-जेणेव दाहिणिल्लस्स मुहमंडवस्स पुरत्थिमिल्ले दारे तं चेव सव्वं भाणियव्वं जाव दारस्स अच्चणिया जेणेव दाहिणिल्लस्स मुहमंडवस्स दाहिणिल्ले दारे तेणेव उवागच्छति तंचेव जेणेव दाहिणिल्ले पेच्छाधरमंडवे जेणेव दाहिणिल्लस्स पेच्छाधरमंडवस्स बहुमज्झदेसभागे जेणेव वइरामए अक्खाडए जेणेव मणिपेढिया जेणेव सीहासणे तेणेव उवागच्छति उवागच्छित्ता लोमहत्थगं परामुसति परामुसित्ता अक्खडगं च मणिपेढियं च सीहासणं च लोमहत्थगेणं पमज्जति पमज्जित्ता दिव्वाए दग्धाराए अब्भुक्खति अब्भुक्खित्ता सरसेणं गोसीसचंदणेणं चच्चए दलयति दलइत्ता पुप्फारुहणं जावधूवं दलयइ दलइत्ता-जेणेव दाहिणिल्लस्स पेच्छाधरमंडवस्स पच्चत्थिमिल्ले दारे तेणेव उवागच्छति दारच्चणिया जेणेव दाहिणिल्लस्स पेच्छाधरमंडवस्स उत्तरिल्ला खंभपंती तहेव जेणेव दाहिणिल्लस्स पेच्छाधरमंडवस्स पुरत्थिमिल्ले दारे तेणेव उवागच्छति तहेव जेणेव दाहिणिल्लस्स पेच्छाधरमंडवस्स दाहिणिल्ले दारे तेणेव उवागच्छइ तहेव जेणेव दाहिणिल्ले चेइयथूभे तेमेव उवागच्छति उवागच्छित्ता लोमहत्थगंपरामुसति परामुसित्ता चेइयथूभं च मणिपेढियं च लोमहत्थगेमं पमज्जति पमज्जित्ता दिव्वे दग्धाराए अब्भुक्खइ अब्भुक्खित्ता सरसेणं गोसीसचंदणेणं चच्चए दलयि दलइत्ता पुप्फारुहणं जाव धूवं दलयति दलइत्ता-जेणेव पच्चत्थिमिल्ला मणिपेढिया जेणेव पच्चत्थिमिल्ला जिनपडिमा तेणेव उवागच्छति उवागच्छित्ता जिनपडिमे आलोए पणामं करेइ करेत्ता जाव नमंसित्ता जेणेव उत्तरिल्ला मणिपेढिया जेणेव उत्तरिल्ला जिनपडिमा तेणेव उवागच्छति उवागच्छित्ता जाव नमंसित्ता जेणेव पुरत्थिमिल्ला मणिपेढिया जेणेव पुरत्थिमिल्ला जिनपडिमा तेणेव उवागच्छति उवागच्छित्ता जाव नमंसित्ता जेणेव दाहिणिल्ला मणिपेढिया जेणेव दाहिणिल्ला जिनपडिमा तेणेव उवागच्छति उवागच्छित्ता जाव नमंसित्ता जेणेव दाहिणिल्ले चेइयरुक्खे दारविही जेणेव दाहिणिल्ले महिंदज्झए दारविही ।

जेणेव दाहिणिल्ल नंदा पुक्खरिणी तेणेव उवागच्छइ उवागच्छित्ता लोमहत्थगं परामुसति परामुसित्ता तोरणे य तिसोवाणपडिरुवए य सालभंजियाओ य बालरुवए य लोमहत्थगेणं पमज्जति पमज्जित्ता दिव्वाए दग्धाराए अब्भुक्खइ अब्भुक्खित्ता सरसेणं गोसीसचंदणेणं चच्चए दलयति दलइत्ता पुप्फारुहणं जाव आरणारुहणं करेइ करेत्ता आसत्तोस-त्तविउलवट्टवग्धारियमल्लदामकलावं करेइ करेत्ता कयग्गाहग्गहिय-करतलपब्भट्टविमुक्केणं दसद्धवण्णेमं कुसुमेणं पुप्फपुंजोवयारकलियं करेइ करेत्ता धूवं दलयति दलइत्ता-सिद्धायतणं अनुप्पयाहिणीकरेमाणे जेणेव उत्तरिल्ला नंदा पुक्खरिणी तेणेव उवागच्छति उवागच्छित्ता तं चेव जेणेव उत्तरिल्ले महिंदज्झए जेणेव उत्तरिल्ले चेइयरुक्खे जेणेव उत्तरिल्ले चेइयथूभे जेणेव पच्चत्थिमिल्ला मणिपेढिया जेणेव पच्चत्थिमिल्ला जिनपडिमा जेणेव उत्तरिल्ला मणिपेढिया जेणेव उत्तरिल्ला जिनपडिमा जेणेव पुरत्थिमिल्ला मणिपेढिया जेणेव पुरत्थिमिल्ला जिनपडिमा जेणेवदाहिणिल्ला मणिपेढिया जेणेव दाहिणिल्ला जिणपडिमा जेणेव उत्तरिल्ले पेच्छाधरमंडवे जेणेव उत्तरिल्लस्स पेच्छाधरमंडवस्स बहुमज्झदेसभाए जेणेव वइरामे अक्खाडए जेणेव मणिपेढिया जेणेव सीहासणे तेणेव उवागच्छति उवागच्छित्ता तहेव जहा- दक्खिणिल्लस्स जेणेव उत्तरिल्लस्स पेच्छाधरमंडवस्स पच्चत्थिमिल्ले दारे जेणेव उत्तरिल्लस्स पेच्छाधरमंडवस्स उत्तरिल्ले दारे जेणेव उत्तरिल्लस्स

पेच्छाधरमंडवस्स पुरत्थिमिल्ले दारे जेणेव उत्तरिल्लस्स पेच्छाधरमंडवस्स दाहिणिल्ला खंभपंती जेणेव उत्तरिल्ले दारे मुहमंडवे जेणेव उत्तरिल्लस्स मुहमंडवस्स बहुमज्झदेसभाए तेणेव उवागच्छति उवागच्छित्ता जेणेव उत्तरिल्लस्स मुहमंडवस्स पच्चत्थिमिल्ले दारे जेणेव उत्तरिल्लस्स मुहमंडवस्स उत्तरिल्ले दारे जेणेव उत्तरिल्लस्स मुहमंडवस्स पुर-
पडिवत्ति-३

त्थिमिल्ले दारे जेणेव उत्तरिल्लस्स मुहमंडवस्स दाहिणिल्ला खंभपती जेणेव सिद्धायतणस्स उत्तरिल्ले दारे जेणेव सिद्धायतणस्स पुरत्थिमिल्ल दारे जेणेव पुरत्थिमिल्ले दारे मुहमंडवे जेणेव पुरत्थिमिल्लस्स मुहमंडवस्स बहुमज्झदेसभाए तेणेव उवागच्छति उगच्छित्ता जेणेव पुरत्थिमिल्लस्स मुहमंडवस्स दाहिणिल्ले दारे जेणेव पुरत्थिमिल्लस्स मुहमंडवस्स पच्चत्थिमिल्ला खंभपती जेणेव पुरत्थिमिल्लस्स मुहमंडवस्स उत्तरिल्ले दारेजेणेव पुरत्थि-मिल्लस्स मुहमंडवस्स पुरत्थिमिल्ले दारे जेणेव पुरत्थिमिल्ले पेच्छाधरमंडवे जेणेव पुरत्थिमिल्लस्स पेच्छाधरमंडवस्स बहुमज्झदेसभाए जेणेव वइरामए अक्खाए जेणेव मणिपेढिया जेणेव सीहासणे जेणेव पुरत्थिमिल्लस्स पेच्छाधरमंडवस्स दाहिणिल्ले दारे जेणेव पुरत्थिमिल्लस्स पेच्छाधरमंडवस्स पच्चत्थिमिल्ला खंभपती जेणेव पुरत्थिमिल्लस्स पेच्छाधरमंडवस्स उत्तरिल्ले दारे जेणेव पुरत्थिमिल्लस्स पेच्छाधरमंडलवस्स पुरत्थिमिल्ले दारे जेणेव पुरत्थिमिल्ले चेइयथूभे जेणेव दाहिणिल्ला मणिपेढिया ।

जेणेव दाहिणिल्ला जिनपडिमा जेणेव पच्चत्थिमिल्ला मणिपेढिया जेणेव पच्चत्थिमिल्ला जिनपडिमा जेणेव उत्तरिल्ला मणिपेढिया जेणेव उत्तरिल्ला जिनपडिमा जेणेव पुरत्थिमिल्ला मणिपेढिया जेणेव पुरत्थिमिल्ला जिनपडिमा जेणेव पुरत्थिमिल्ले चेइयरुक्खे जेणेव पुरत्थिमिल्ले महिंदज्झए जेणेव पुरत्थिमिल्ला नंदापुक्खरिणी तेणेव उवागच्छति उवागच्छित्ता जाव धूवं दलयइ दलइत्ता-जेणेव सभा सुहम्मा तेणेव उवागच्छति उवागच्छित्ता सभं सुहम्मं पुरत्थिमिल्लेणं दारेणं अनुप्पविसति अनुप्पविसित्ता जेणेव मणिपेढिया तेणेव उवागच्छति उवागच्छित्ता आलोए जिनसकहाणं पणामं करेति करेत्ता जेणेव माणवए चेतियथंभे जेणेव वइरामया गोलवट्टसमुग्गका तेणेव उवागच्छति उवागच्छित्ता वइरामे गोलवट्टसमुग्गए गेण्हइ गेण्हित्ता विहाडेइ विहाडेत्ता जिणसकहाओ गेण्हइ गेण्हित्ता सोमहत्थगं परामुसइ परामुसित्ता जिणसकहाओ लोमहत्थगेमं पमज्जति पमज्जित्ता दिव्वाए दगधाराए अब्भुक्खइ अब्भुक्खइत्ता सरसेणं गोसीसचंदणेणं अनुलिंपति अनुलिंपित्ता अग्गेहिं वरेहिं गंधेहिं मल्लेहि य अच्चेइ अच्चेत्ता धूवं दहति दहित्ता वइरामएसु गोलवट्टसमुग्गएसु पक्खिवइ परामुसित्ता मामवकं चेतियखंभं लोमहत्थगेणं पमज्जति पमज्जित्ता दिव्वाए दगधाराए अब्भुक्खइ अब्भुक्खित्ता सरसेणं गोसीसचंदणेणं चच्चए दलयइ दलइत्ता पुप्फारुहणं जाव धूवं दलयइ दलइत्ता-जेणेव मणिपेढिया जेणेव सीहासणे तेणेव तहेव दारच्चणिया जेणेव मणिपेढिया जेणेव देवसयणिज्जे तेणेव उवागच्छति उवागच्छित्ता जेणेव मणिपेढिया जेणेव खुड्डागमहिंदज्झए तेणेव उवागच्छति उवागच्छित्ता-जेणेव पहरणकोसचोप्पाले तेणेव उवागच्छति उवागच्छित्ता लोमहत्थगं परामुसइ परामुसित्ता फलिहरयणपामोक्खाइं पहरणरयणिं लोमहत्थगेणं पमज्जति पमज्जित्ता दिव्वे दगधाराए अब्भुक्खइ अब्भुक्खित्ता सरसेणं गोसीसचंदणेणं चच्चए दलयति दलइत्ता पुप्फारुहणं जाव आभरणारुहणं करेति करेत्ता आसत्तोसत्तविउलवट्टवग्धारिय-मल्लदामकलावं करेति करेत्ता कयग्गाहग्गहियकरतलपब्भइविमुक्केणं दसद्धवण्णेणं कुसुमेणं पुप्फपुंजोवयारकलियं करेति करेत्ता धूवं दलयति दलइत्ता-

जेणेव सभाए सुहम्माए बहुमज्झदेसभाए तेणेव उवागच्छति उवागच्छित्ता-जेणेव सभाए सुहम्माए दाहिणिल्ले दारे तेणेव उवागच्छति उवागच्छित्ता-सभं सुहम्मं अनुप्पयाहिणी करेमाणे जेणेव उत्तरिल्ला नंदापुक्खरिणी तेणेव उवागच्छति उवागच्छित्ता-जेणेव सभाए सुहम्माए उत्तरिल्ले दारे तेणेव उवागच्छइ उवागच्छित्ता-जेणेव सभाए सुहम्माए पुरत्थिमिल्ले दारे तेणेव उवागच्छइ उवागच्छित्ता-जेणेव पडिवत्ति-३

उववायसभा तेणेव उवागच्छति उवागच्छित्ता उववायसभं पुरत्थिमिल्लेणं दारेणं अनुप्पविसति अनुप्प-विसित्ता जेणेव मणिपेढिया जेणेव देवसयणिज्जे तेणेव उवागच्छति उवागच्छित्ता-जेणेव उववायसभाए बहुमज्झदेसभाए तेणेव उवागच्छइ उवागच्छित्ता-जेणेव उववायसभाए दाहिणिल्ले दारे तेणेव उवागच्छइ उवागच्छित्ता-उववायसभं अनुप्पयाहिणीकरेमाणे जेणेव उत्तरिल्ला नंदापुक्खरिणी तेणेव उवागच्छइ-उवा-गच्छित्ता-जेणेव उववायसभाए उत्तरिल्ले दारे तेणेव उवागच्छइ उवागच्छित्ता-जेणेव उववायसभाए पुरत्थिमिल्ले दारे तेणेव उवागच्छइ उवागच्छित्ता-जेणेव हरए तेणेव उवागच्छइ उवागच्छित्ता तोरणे य तिसोवाणपडिरूवए य सालभंजियाओ य बालरूवए य लोमहत्थगेणं पमज्जति पमज्जित्ता-जेणेव अभिसेय-सभा तेणेव उवागच्छति उवागच्छित्ता अभिसेयसभं पुरत्थिमिल्लेणं दारेणं अनुप्पविसति अनुप्पविसित्ता जेणेव मणिपेढिया जेणेव सीहासणे तेणेव उवागच्छति उवागच्छित्ता-जेणेव सुबहू अभिसेयभंडे तेणेव उवागच्छति उवागच्छित्ता-जेणेव अभिसेयसभाए बहुमज्झदेसभाए तेणेव उवागच्छइ उवागच्छित्ता-जेणेव अभिसेयसभाए दाहिणिल्ले दारे तेणेव उवागच्छति उवागच्छित्ता-अभिसेयसभं अनुप्पयाहिणीकरेमाणे जेणेव उत्तरिल्ला नंदापुक्खरिणी तेणेव उवागच्छइ उवागच्छित्ता-जेणेव अभिसेयसभाए उत्तरिल्ले दारे तेणेव उवागच्छइ उवागच्छित्ता-जेणेव अभिसेयसभाए पुरत्थिमिल्ले दारे तेणेव उवागच्छइ उवागच्छित्ता-जेणेव अलंकारियसभा तेणेव उवागच्छइ उवागच्छित्ता अलंकारियसभं पुरत्थिमिल्लेणं दारेणं अनुप्पविसति अनुप्पविसित्ता जेणेव मणिपेढिया जेणेव सीहासणे तेणेव उवागच्छइ उवागच्छित्ता जेणेव सुबहू अलंकारियभंडे तेणेव उवागच्छति उवागच्छित्ता-जेणेव अलंकारियसभाए बहुमज्झदेसभाए तेणेव उवागच्छति उवागच्छित्ता-जेमेव अलंकारियसभाए दाहिणिल्ले दारे तेणेव उवागच्छति उवागच्छित्ता-अलंकारियसभं अनुप्पयाहिणीकरेमाणे जेणेव उत्तरिल्ला नंदा पुक्खरिणी तेणेव उवागच्छति उवागच्छित्ता-जेणेव अलंकारिय-सभाए उत्तरिल्ले दारे तेणेव उवागच्छति उवागच्छित्ता-जेमेव अलंकारियसभाए पुरत्थमिल्ले दारे तेणेव उवागच्छति उवागच्छित्ता-जेमेव ववसायसभा तेणेव उवागच्छति उवागच्छित्ता ववसायसभं पुरत्थिमिल्लेणं दारेणं अनुप्पविसति अनुप्पविसित्ता जेणेव पोत्थयरयणे तेणेव उवागच्छति उवागच्छित्ता लोमहत्थगं परामुसति परामुसित्ता पोत्थयरयणं लोमहत्थगेणं पमज्जति पमज्जित्ता दिव्वाए दगधाराए अब्भुक्खति अब्भुक्खित्ता सरसेणं गोसीसचंदणेणं चच्चए दलयति दलइत्ता अग्गेहिं वरेहिं गधेहिं मल्लेहिं य अच्चेइ अच्चेत्ता पुप्पारुहणं जाव आभरणारुहणं जेणेव मणिपेढिया जेणेव सीहासणे तेणेव उवागच्छइ उवागच्छित्ता-जेणेव ववसायसभे बहुमज्झदेसभाए तेणेव उवागच्छति उवागच्छित्ता-जेणेव ववसायसभाए दाहिणिल्ले दारे तेणेव उवागच्छति उवागच्छित्ता-ववसायसभं अनुप्पयाहिणीकरेमाणे जेणेव उत्तरिल्ला नंदापुक्खरिणी तेणेव उवागच्छति उवागच्छित्ता जेणेव ववसायसभाए उत्तरिल्ले दारे तेणेव उवागच्छति उवागच्छित्ता-जेणेव ववसा-यसभाए पुरत्थिमिल्ले दारे तेणेव उवागच्छति उवागच्छित्ता-जेणेव बलिपीढे तेणेव उवागच्छति उवागच्छित्ता बलिपीढस्स बहुमज्झदेसभागं दिव्वाए दगधाराए अब्भुक्खति अब्भुक्खित्ता सरसेणं गोसीसचंदणेणं पंचंगुलितलं दलयति दलइत्ता कयग्गाहग्गहियकरतलपब्भट्टविमुक्केणं

दसद्ववण्णेणं कुसुमेणं पुप्फपुंजोव-यारकलियं करेति करेत्ता धूवं दलयति दलइत्ता आभिओगिए देवे सद्दावेति सद्दावेत्ता एं वयासी-

खिप्पामेव भो देवाणुप्पा विजयाए रायहाणीए सिंधाडगेसु तिएसु चउक्केसु पच्चरेसु चउम्मुहेसु महापहपहेसु पागारेसु अट्ठालएसु चरियासु दारेसु गोपुरेसु तोरणेसु आरामेसु उज्जाणेसु काननेसु वनेसु वनसंडेसु वनराईसु अच्चणियं करेइ करेत्ता ममेयमाणत्तियं खिप्पामेव पच्चप्पिणह तते णं ते आभि-

पडिवत्ति-३

ओगिया देवा विजएणं देवेणं एवं वुत्ता समाणा हट्ठतुड्ड-जाव पडिसुणेत्ता विजयाए रायहाणीए सिंधाडगेसु जाव वणराईसु अच्चणियं करेति करेत्ता जेणेव विजए देवे तेणेव उवागच्छंति उवागच्छित्ता [विजयं देवं करतलपरिग्गहियं सिरसावत्तं मत्थए अंजलिं कट्ठु एयमाणत्तियं पच्चप्पिणंति तए णं से विजए देवे बलिपीढे बलिविसज्जणं करेति करेत्ता जेणेव उत्तरपुरत्थमिल्ला नंदापुक्खरिणी तेणेव उवागच्छति उवागच्छित्ता उत्तरपुरत्थमिल्लं नंदं पुक्खरिणिं अनुप्पयाहिणीकरेमाणे पुरत्थमिल्लेणं तोरणेणं अनुप्पविसति अनुप्पविसित्ता पुरत्थमिल्लेणं तिसोमाणपडिरूवणं पच्चोरुभति पच्चोरुभित्ता हत्थपायं पक्खालेति पक्खालेत्ता नंदाओ पुक्खरिणीओ पच्चुत्तरति पच्चुत्तरित्ता जेणेव सभा सुहम्मा तेणेव पहारेत्थ गमणाए तए णं से विजए देवे चउहिं सामाणियसाहस्सीहिं [चउहिं अग्गमहिसीहिं सपरिवाराहिं तिहिं परिसाहिं सत्तहिं अणियाहिं सत्तहिं अणियाहिवईहिं सोलसेहिं आयरक्खदेवसाहस्सीहिं] अण्णेहिं य बहूहिं विजयरायहाणी-वत्थव्वेहिं वाणमंतरेहिं देवेहिं देवीहियं सद्धिं संपरिवुडे सव्विड्डीए जाव दुंदुहिनिग्गोसणाइयरवेणं विजयाए रायहाणीए मज्झमज्झेणं जेणेव सभा सुहम्मा तेणेव उवागच्छति उवागच्छित्ता सभं सुहम्मं पुरत्थमिल्लेणं दारेणं अनुप्पविसति अनुप्पविसित्ता जेणेव मणिपेढिया जेणेव सीहासणे तेणेव उवागच्छति उवागच्छित्ता सीहासणवरगते पुरत्थाभिमुहे सण्णिसण्णे ।

[१८१] तए णं तस्स विजयस्स देवस्स चत्तारि सामाणियसाहस्सीओ अवरुत्तरेणं उत्तरेणं उत्तरपुरत्थिमेणं पत्तेयं-पत्तेयं पुव्वणत्थेसु भद्दासणेसु निसीयंति तए णं तस्स विजयस्स देवस्स चत्तारिअग्गमहिसीओ पुरत्थिमेणं पत्तेयं-पत्तेयं पुव्वणत्थेसु भद्दासणेसु निसीयंति तए णं तस्स विजयस्स देवस्स दाहिणपुरत्थिमेणं अब्भिंतरियाए परिसाए अट्ठ देवसाहस्सीओ पत्तेयं-पत्तेयं पुव्वणत्थेसु भद्दासणेसु निसीयंति एवं दक्खिणेणं मज्झिमियाए परिसाए दस देवसाहस्सीओ जाव निसीदंति दाहिणपच्चत्थिमेणं बाहिरियाए परिसाए बारस देवसाहस्सीओ पत्तेयं-पत्तेयं जाव निसीदंति तए णं तस्स विजयस्स देवस्स पच्चत्थिमेणं सत्त अणियाहिवती पत्तेयं-पत्तेयं जाव निसीयंति तए णं तस्स विजयस्स देवस्स पुरत्थिमेणं दाहिणेणं पच्चत्थिमेणं उत्तरेणं सोलस आयरक्खदेवसाहस्सीओ पत्तेयं-पत्तेयं पुव्वणत्थेसु भद्दासणेसु निसीदंति तं जहा- पुरत्थिमेणं चत्तारि साहस्सीओ जाव उत्तरेणं चत्तारि साहस्सीओ ते णं आयरक्खा सन्नद्ध-बद्ध-वम्मियकवया उप्पीलियसरासणपट्टिया पिणद्धगेवेज्ज-विमलवरचिंधपट्टा गहियाउहपहरणा ति-नयाइं ति-संधीणि वइरामयकोडीणिं धणूइं अभिगिच्छा परियाइयकंडकलावा नीलपाणिणो पीय-पाणिणो-रत्तपाणिणो चावपाणिणो चारुपाणिणो चम्मपाणिणो दंडपाणिणो खग्गपाणिणो पासपाणिणो नील-पीय-रत्त-चाव-चारु-चम्म-दंड-खग्ग-पासधरा आय-रक्खा रक्खोवगा गुत्ता गुत्तपालिता जुत्ता जुत्तपालिता पत्तेयं-पत्तेयं समयतो विनयतो किंकरबूता विव चिट्ठंति तए णं से विजए देवे चउण्हं सामाणियसाहस्सीणं चउण्हं अग्गमहिसीणं सपरिवाराणं तिण्हं परिसाणं सत्तण्हं अणियाणं सत्तण्हं

अणियाहिवईणं सोलसण्हं आयरक्खदेवसाहस्सीणं विजयस्स णं दारस्स विजयाए रायहाणीए अण्णेसिं च बहूणं विजयाए रायहाणीए वत्थव्वगाणं देवाणं देवीण य आहेवच्चं पोरेवच्चं सामित्तं भट्ठित्तं महत्तरगतं आणा-ईसर-सेणावच्चं कारेमाणे पालेमाणे महयाहयनट्ट-गीय-वाइय-तंती-तल-ताल-तुडिय-घण-मुङ्ग-पडुप्पवाइयरवेणं दिव्वाइं भोगभोगाइं भुंजमाणे विहरइ विजयस्स णं भंते देवस्स केवतियं कालं ठिती पन्नत्ता गोयमा एगं पलिओवमं ठिती पन्नत्ता विजयस्स णं भंते देवस्स सामाणियाणं देवाणं केवतियं कालं ठिती पन्नत्ता गोयमा एगं पलिओवमं ठिती पन्नत्ता एमहिइडीए एमहज्जुतीए एमहब्बले एमहायसे एमहासोक्खे
 एमहाणु-
 पडिवत्ति-३

भागे विजए देवे विजए देवे ।

[१८२] कहि णं भंते जंबुद्धीवस्स दीवस्स वेजयंते नामं दारे पन्नत्ते गोयमा जंबुद्धीवे दीवे मंदरस्स पव्वयस्स दक्खिणेणं पणयालीसं जोयणसहस्साइं अबाधाए जंबुद्धीवे दीवे दाहिणपेरंते लवणसमुद्ध-दाहिमद्धस्स उत्तरेणं एत्थ णं जंबुद्धीवस्स दीवस्स वेजयंते नामं दारे पन्नत्ते-अट्ठ जोयणाइं उड्ढं उच्चत्तेणं सच्चेव सव्वा वत्तव्वता जाव दारे कहि णं भंते रायहाणी दाहिणे णं जाव वेजयंते देवे वेजयंते देवे, कहि णं भंते जंबुद्धीवस्स दीवस्स जयंते नामं दारे पन्नत्ते गोयमा जंबुद्धीवे दीवे मंदरस्स पव्वयस्स पच्चत्थिमेणं पणयालीसं जोयणसहस्सिं जंबुद्धीवे दीवे पच्चत्थिमपेरंत लवणसमुद्धपच्चत्थिमद्धस्स पुरत्थिमेणं सीओदाए महानदीए उप्पिं एत्थ णं जंबुद्धीवस्स दीवस्स जयंते नामं दारे पन्नत्ते तं चेव से पमाणं जयंते देवे पच्चत्थिमेणं से रायहाणि जाव एमहिइडीए, कहि णं भंते जंबुद्धीवस्स दीवस्स अपराइए नामं दारे पन्नत्ते गोयमा मंदरस्स उत्तरेणं पणयालीसं जोयणसहस्साइं अबाधाए जंबुद्धीवे दीवे उत्तपेरंते लवणसमुद्धस्स उत्तरद्धस्स दाहिणेणं एत्थ णं जंबुद्धीवे दीवे अपराइए नामं दारे पन्नत्ते तं चेव पमाणं रायहाणी उत्तरेणं जाव अपराइए देवे चउण्हवि अण्णमि जंबुद्धीवे ।

[१८३] जंबुद्धीवस्स णं भंते दीवस्स दारस्स य दारस्स य एस णं केवतियं अबाधाए अंतरे पन्नत्ते गोयमा अउणासीतिं जोयणसहस्साइं बावण्णं च जोयणाइं देसूणं च अद्धजोयणं दारस्स य दारस्स अबाधाए अंतरे पन्नत्ते ।

[१८४] जंबुद्धीवस्स णं भंते दीवस्स पएसा लवणं समुद्धं पुट्ठा हंता पुट्ठा ते णं भंते किं जंबुद्धीवे दीवे लवणे समुद्धे गोयमा ते जंबुद्धीवे दीवे नो खलु ते लवणे समुद्धे लवणस्स णं भंते समुद्धस्स पदेसा जंबुद्धीवं दीवं पुट्ठा हंता पुट्ठा ते णं भंते किं लवणे समद्धे जंबुद्धीवे दीवे गोयमा लवणे णं ते समुद्धे नो खलु ते जंबुद्धीवे दीवे जंबुद्धीवे णं भंते दीवे जीवा उद्धाइत्ता-उद्धाइत्ता लवणे समुद्धे पच्चायंति गोयमा अत्थेगतिया पच्चायति अत्थेगतिया नो पच्चायंति लवणे णं भंते समुद्धे जीवा उद्धाइत्ता-उद्धाइत्ता जंबुद्धीवे दीवे पच्चायंति गोयमा अत्थेगतिया पच्चायंति अत्थेगतिया नो पच्चायंति ।

[१८५] से केणट्ठेणं भंते एवं वुच्चति-जंबुद्धीवे दीवे गोयमा जंबुद्धीवे दीवे मंदरस्स पव्वयस्स उत्तरेणं नीलवंतस्स दाहिणेणं मालवंतस्स वक्खारपव्वयस्स पच्चत्थिमेणं गंधमायणस्स वक्खारपव्वयस्स पुरत्थिमेणं एत्थ णं उत्तरकुरा नाम कुरा पन्नत्ता-पाईणपडिणायता उदीणदाहिणवित्थिण्णा अद्धचंदसंठाण-संठिता एक्कारस जोयणसहस्साइं अट्ठ य बायाले जोयणसते दोण्णि य एक्कोण-वीसतिभागे जोयणस्स विक्खंभेणं तीसे जीवा उत्तरेणं पाईणपडिणायता दुओ वक्खारपव्वयं पुट्ठा पुरत्थिमिल्लाए कोडीए पुरत्थिमिल्लं वक्खारपव्वतं पुट्ठा पच्चत्थिमिल्लाए कोडीए पच्चत्थिमिल्लं वक्खारपव्वयं पुट्ठा तेवण्णं

जोयणसहस्सिं आयामेणं तीसे धणुपट्ठं दाहिणेणं सट्ठिं जोयणसहस्साइं चत्तारि य अट्ठारसुत्तरे जोयणसत्ते दुवालस य एकूणवीसतिभाए जोयणस्स परिकखेवणं पन्नत्ता उत्तरकुराए णं भंते कुराए केरिसए आगार-भावपडोयारे पन्नत्ते गोयमा से जहानामए आलिंगपुक्खरेइ वा जाव तणाणं मणीणं य वण्णो गंधो फासो सट्ठो य भाणितव्वो उत्तरकुराए णं कुराए तत्थ-तत्थ देसे तहिं-तहिं बहुईओ खुड्डा-खुड्डीयाओ वावीओ जाव बिलपंतियाओ तिसोवामपडिरूवगा तोरणा पव्वयगा पव्वयगेसु आसणाइं घरगा घरएसु आसणाइं मंडवगा मंडवएसु पुढविसिलापट्ठगा तत्थ णं बहवे उत्तरकुरा मणुस्सा मणुस्सीओ य आसयंति सयंति जाव फलवित्तिविसेसं पच्चणुभवमाणा विहरंति, उत्तरकुराए णं कुराए तत्थ-तत्थ देसे तहिं-तहिं बहवे सेरिया-पडिवत्ति-३

गुम्मा जाव महाजाइगुम् ते णं गुम्मा दसद्धवण्णं कुसुमं कुसुमंति जेण कुराए बहुसमरमणिज्जे भूमिभागे वायविहुयग्गसालेहिं मुक्कपुप्फपुंजोवयारकलिए सिरीए अईव उवसोभेमाणे चिट्ठइ उत्तरकुराए णं कुराए तत्थ-तत्थ देसे तहिं-तहिं बहवे रुक्खा हेरुयालवणा भेरुयालवणा मेरुयालवणा सालवणा सरलवणा सत्तवण्णवणा पूयफलिवणा खज्जूरिवणा नालिएरिवणा कुस-विकुस-विसुद्धरुक्खमूला मूलमंतो कंदमंतो जाव अणेगसगड-रह-जाण-जुग्ग-गिल्लि-थिल्लि-सीय-संदमाणियपडिमोयणा सुरम्मा पासादीया दरिस-णिज्जाअभिरूवा पडिरूवा पत्तेहि य पुप्फेहिय य अच्छण्ण-पडिच्छण्णा सिरीए अतीव-अतीव उवसोभेमाणा-उवसोभेमाणा चिट्ठंति ।

उत्तरकुराए णं कुराए तत्थ-तत्थ देसे तहिं-तहिं बहवे उद्दालका कोद्दालका मोद्दालका कत-माला नट्टमाला वट्टमाला दंतमाला सिंगमाला संखमाला सेयमाला नाम दुमगणा पन्नत्ता समाणाउसो कुस-विकुस-विसुद्धरुक्खमूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे तिलया लउया छत्तोवा सिरीसा सत्तिवण्णा लोद्धा धवा चंदणा अज्जुणा नीवा कुडया कदंबा फणसा साला तमाला पियाला पियंगू पारेयवा रायरुक्खा नंदिरुक्खा कुस-विकुस-विसुद्धरुक्खमूला जाव चिट्ठंति उत्तरकुराए णं कुराए तत्थ-तत्थ-देसे हिं-तहिं बहूओ पउमलयाओ नागलयाओ असोगलयाओ चंपगलयाओ चूयलयाओ वणलयाओ वासंतिकलयाओ अइमुत्तकलयाओ कुंदलयाओ सामलयाओ निच्चं कुसुमियाओ जाव वडिसय-धराओ पासादीयाओ दरिसणिज्जाओ अभिरूवाओ पडिरूवाओ उत्तरकुराए णं कुराए तत्थ-तत्थ देसे तहिं-तहिं बहूओ वनराईओ पन्नत्ताओ ताओ णं वनराईओ किण्हाओ किण्होभासाओ जाव अणेगसगड-रह-जाण-जुग्ग-गिल्लि-थिल्लि-सीयसंद-माणियपडिमोयणाओ सुरम्माओ पासाईयाओ दरिसणिज्जाओ अभिरूवाओ पडिरूवाओ उत्तर-कुराए णं कुराए तत्थ-तत्थ देसे तहिं-तहिं बहवे मत्तंगया नाम दुमगणा पन्नत्ता समाणाउसो जहा- से चंदप्पभ-मणिसिलाग-वरधीसु-वरवारुणि-सुजातपत्त-पुप्फ-फल-चोय-निज्जाससार-बहु-दव्व-जुत्तसंभारकालसंधियासवा महु-मेरग-रिद्धाभ-दुद्धजाति-पसन्न-तेल्लग-सता-उखज्जूरमुद्धियासार-कावि-सायण-सुपक्कखोयरसवरसुरा-वण्णरसगंध फरिसजुत्त-बलवीरिय-परिणामा मज्जविही बहुप्पगारा तहेव ते मत्तंगयावि दुमगणा अणेगबहुविविहवीससापरिणयाए मज्जविहीए उववेया फलेहिं पुन्ना वीसंदंति कुस-विकुस-विसुद्ध-रुक्खमूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे भिंगंगया नाम दुमगणा पन्नता समाणाउसो जहा- से करग-घडग-कलस-कक्करि-पायंचणि-उदंक-वद्धणि-सुपइट्ठग-विट्ठर-पारी-चसग-भिंंगार-करोडि-सरग-परग-पत्ती-थाल-मल्लग-चवलिय-दग-वारक-विचित्तवट्ठक-मणि-वट्ठक-सुत्तिचारुपिणय कंचण-मणि-रयण-भत्तिचित्ता भाजणविधी बहुप्पगारा तहेव ते भिंगंगयावि दुमगणा अणेबहुविविहवीससापरिणताए भाजणविधीए उववेया कुस-विकुस-विसुद्धरुक्खमूला जाव चिट्ठंति ।

उत्तरकुराए णं कुराए तत्थ-तत्थ देसे तहिं-तहिं बहवे तुडियंगा नाम दुमगणा पन्नत्ता समणुसो जहा- से आलिङ्ग-मुङ्ग-पणव-पडहददरग-करडि-डिंडिम-भंगा-होरंभ-कणिय-खरमुहि-मगुंद-संखिय-पिरली-वच्चग-परिवाइणि-वंस-वेणु-सुधोस-विपंचि महति-कच्छभि-रग-सिग तल-ताल-कंसताल-सुसंपउत्ता आतोज्ज-विधी बहुप्पगारा निउण-गंधव्वसमयकुसलेहिं फंदिय तिद्वाणसुद्धा तहेव ते तुडियंगहयावि दुमगणा अणेगबहुविविधवीससारपरिणयाए तत-वितत-धण-झुसिराए चउव्विहाए आतोज्जविहीए उववेया कुस-विकुस-विसुद्धरुक्खमूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे दीवसिहा नाम दुमगणा पन्नत्ता समणाउसो जहा- से संझाविरागसमए नवणिहिपतिणो दीविया-चक्कवालविंदे पभूय-पडिवत्ति-३

वट्ठिपलित्तणेहे धणिउज्जालिए तिमिरमद्दए कणगणिगरण-कुसुमितपारिजातकवणप्पगासे कंचनमणिरयण-विमलमहरिहविचित्तदंडाहि दीवियाहिं सहसापज्जालिउस्सप्पियणिद्ध-तेय-दिप्पंतविमलगहगणसमप्पहाहिं वितिमिरकरसूर-पसरिउज्जोय-चिल्लियाहिं जालुज्जल-पहसियाभिरामाहिं सोभेमाणा तहेव ते दीवसिहावि दुमगणा अणेगबहुविविधवीससारपरिणयाए उज्जोयविहीए उववेया कुस-विकुस-विसुद्धरुक्खमूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे जोतिसिया नाम दुमगणा पन्नत्ता समणाउसो जहा- से अचिरुग्गयसरय-सूरमंडल-पडंतउक्कासहस्स-दिप्पं-तविज्जु-उज्जलहुयवहनिद्धमजलिय निद्धंतधोयतत्ततव-णिज्जकिंसुयासोयजासुयमकुसुमविमउलिय पुंज-मणिरयणकिरण-जच्चहिंगुलुयणिगररूवाइरेगरूवा तहेव ते जोतिसियावि दुमगणा अमेगबहुविविधवीससारपरिण उज्जोयविहीए उववेया कुस-विकुस-विसुद्धरुक्खमूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे चित्तंगा नाम दुमगणा पन्नत्ता समणाउसो जहा- से पेच्छाघरे विचित्ते रम्मे वरकुसुमदाममालुज्जले भासंतमुक्कपप्फपुंजोवयारकलिए विरल्लियवि-चित्तमल्ल-सिरिसमुदयप्पगब्भे गंधिमवेढिमपूरिमसंघाइमेणं मल्लेणं छेयसिप्पिय-विभागरइएण सव्वतो चेव समणुबद्धे पविरल-लंबंत-विप्पइट्ठेहिं पंचवण्णेहिं कुसुमदामेहिं सोमाणे वणमालकतग्गए चेव दिप्पमाणे तहेव ते चित्तंगयावि दुमगणा अणेगबहुविविधवीससारपरिणयाए मल्लविहीए उववेया कुस-विकुस-विसुद्धरुक्ख-मूला जाव चिट्ठंति उत्तरकुराए णं कुराए तत्थ-तत्थ देसे तहिं-तहिं बहवे चित्तरसा नाम दुमगणा पन्नत्ता समणाउसो जहा- से सुगंधवरकलमसालितंदुल-विसिद्धिणिरुवहत-दुद्धरद्धे सारयघयगुड-खंड-महुमेलिए अति-रसे परमण्णे होज्ज उत्तमवण्णगंधमंते रण्णो जहा- वा चक्कवट्ठिस होज्ज निउणेहिं सुयपुरिसेहिं सज्जिए चउरकप्पसेयसित्ते इव ओदणे कलमसालिणिव्वत्तिए विपक्के सबप्फ-मिउ-विसय-सगलसित्थे अणेगसाल-णगसंजुत्ते अहवा पडिपुन्नदव्वुवक्खडे सुसक्कए वण्णगंधरसफरिसजुत्त-बलविरियपरिणामे इंदियबलपुट्ठि-वद्धणे खुप्पिवासमहणे पहाणगुलकट्ठियखंडमच्छंडिघओवणी-एव्व मोयगे सण्हसमियगब्भे पन्नत्ते तहेव ते चित्तरसा वि दुमगणा अणेगबहुविविधवीससारपरिणयाए भोजणविहीए उववेया कुस-विकुस-विसुद्ध-रुक्ख-मूला जाव चिट्ठंति ।

उत्तरकुराए णं कुराए तत्थ-तत्थ देसे तहिं-तहिं बहवे मणियंगा नाम दुगणा पन्नत्ता समणाउसो जहा- से हारद्धहार-वेढणग-मउड-कुंडल-वामुत्तगहेमजाल-मणिजाल-कणगजालग-सुत्तग-ओविय-कडग-खुड्डियाएगावलि-कंठसुत्त-मगरिग-उरत्थगेवेज्ज-सोणिसुत्तग-चूलामणि-कणगतिलग-फुल्लग-सिद्धत्थय-कण्णवालि-ससि-सूर-उसभ-चक्कग-तलभंगय-तुडिय-हत्थ-मालग-हरिसय-केयूर-वलय-पालंब-अंगुलेज्जग-वलक्ख-दीणारमालिया-कंची-मेहला-कलाव-पयरग-पारिहेरग-पायजाल-घंडिया-खिंखिणी-रयणोरुजाल-वरणेउर-चलणमालिया-कणगणिगलमालिया-कंचणमणिरयणभत्तिचित्ता भूसणविधी बहुप्पगारा

तहेव ते मणियंगावि दुमगणा अणेबहुविविहवीससापरिणताए भूसणविहीए उववेया कुसविकुस-
विसुद्धरुक्खमूला जाव चिद्वंति उत्तरकुराएओ णं कुराए तत्थ-तत्थ देसे तहिं-तहिं बहवे गेहागारा नाम
दुमगणा पन्नत्ता समणाउसो जहा- से पागारट्टालग-चरिय-दार-गोपुर-पासायाकासतल-मंडव-एगसालग-

बिसालगतिसालग-चउसा-लग-गळभधर-मोहणधर-वलभिधर-चित्तसालमा-लय-भत्तिधर-

वट्ठतंसचउरंसनंदियावत्तसंठिया पंडुरतलमुंडमालहम्मियं अहव णं धवलहर-अद्ध-मागहविब्भम-
सेलद्धसेलसुद्धिय-कूडागारड्ड-सुविहिकोद्धग-अमेगधर-सरण-लेणं-आवणा विडंग-जालवंद-निज्जूह-अपवरक-
चंदसालियरुव-विभत्तिकलिता भवणविही बहुविकप्पा तहेव ते गेहागारावि दुमगणा अणेगबहुविधिववीस-
सापरिणयाए सुहारुहण-सुहोत्ताराए सुहनिक्खिमणप्पवेसाए दद्धरसोपाणपंतिक-
पडिवत्ति-३

लिताए पडिरिक्कसुहविहाराए मनोनुकूलाए भवणविहीए उववेया कुस-विकुस-विसुद्धरुक्खमूला जाव चिद्वंति
उत्तरकुराए णं कुराए तत्थ-तत्थ देसे तहिं-तहिं बहवे अणिगणा नामं दुमगणा पन्नत्ता समणाउसो जहा-
से आइगण-खोम-तणुय-कंबल-दुगुल्ल-कोसेज्ज-कालमिगपट्ट-अंसुय-चीणंसुय-पट्टा आभरण-चित्त-सहिणग-
कल्लाणग-भिगिणील-कज्जलबहुवण्ण-रत्त-पीत-सुक्किल-सक्कय-मिगलो-महेमप्प-रल्लग-अवरुत्तर-सिंधु-
उसभ-दामिल-वंग-कलिंग-नलिणतंतु-मयभत्तिचित्ता वत्थविही बहुप्पकारा हवेज्ज वरपट्टणुग्गता वण्णराग-
कलित्ता तहेव ते अणिगणावि दुमगणा अमेगबहुविविहवीससापरिणताए वत्थविधीए उववेया कुस-विकुस-
विसुद्धरुक्खमूला जाव चिद्वंति ।

उत्तरकुराए णं भंते कुराए मणुयाणं केरिसए आगारभावपडोयारे पन्नत्ते गोयमा ते णं
मणुया अतीव सोमचारूवा भोगुत्तमगयलक्खणा भोगसस्सिरीया सुजायसव्वंग-सुंदरंगा सुपतिद्धिय-
कुम्मचारु-चलणा रत्तुप्पलपत्त-मउयसुकुमालकोमलतला नग-नगर-मगर-सागर-चक्कंकहरंक-
लक्खणंकियचलणा अनु-पुव्वसुसाहतंगुलीया उण्णय-तणु-तंबणिद्धणखा संठिय-सुसिलिद्ध-गूढगुप्फा एणी-
कुरुविंद-वत्त-वट्ठाण-पुव्वजंघा समुग्ग-निमग्ग-गूढजाणू गयससण-सुजात-सण्णिभोरू वरवारणमत्त-
तुल्लविककम-विलासितगती पमुइयवरतुरग-सीहलरलद्धियकडी वरतु-रग-सुजातगुज्झदेसा आइण्णहयव्व
निरुवलेवा साहसयसोणंदमुसल-दप्पण-निगरितवरकण-गच्छरुसरिस-वरवइरवलितमज्झा उज्जुय-समसंहित-
सुजात-जच्चत्तणु-कसिण-निद्ध-आदेज्ज-लडह-सुकुमाल-मउय-रमणिज्जरोमराई गंगावत्तय-पयाहिणावत्त-
तरंगभंगुर-रविकिरणतरुणबोधिय-आ-कोसायंतपउम-गंभीरवियडणाभा झस-विहग-सुजातपीणकुच्छी झसोदरा
सुइकरणा सण्णयपासा संगत-पासा सुंदरपासा सुजातपासा मितमाइय-पीणइयपासा
अकरंडुयकणगरुयनिम्मल-सुजाय-निरुवहयदेहधारी कणगसिलातलुज्जल-पसत्थ-समतल-उवचिय-विच्छिण्ण-
पिहुलवच्छा सिरिवच्चं-कियवच्छा जुगसन्निभपी-णरतियपीवरपउट्ट-संठियसुसिलिद्धविसिद्धधणथिरसुबद्धसंधी
पुरवरफ-लिह-वट्ठियभुया भुयगीसरविपुल-भोग-आयाणफलिहउच्छूढ-दीहबाहू रत्ततलोवइत-मउय-मंसल-
सुजाय-अच्छिद्धजालपाणी पीवरकोमलवरंगुलीया आतंब-तलिण-सुचि-रुइर-निद्धणक्खा चंदपाणिलेहा
सूरपालिणेहा संखपाणिलेहा चक्कपाणिलेहा दिसासो-वत्थियपाणिलेहा चंद-सूर-संख-चक्क-दिसासोवत्थिय-
पाणिलेहा अनेगवरलक्खणुत्तम-पसत्थ-सुविरइयपाणि-लेहा वरमहिस-वराह-सीह-सद्धल-उसभ-नागवर-
पडिपुन्नविउलखंधा चउरंगुलसुप्पमाण-कंबुरसरिसगीवा मंस-लसंठिय-पसत्थ-सद्धलविपुलहणुया अवट्ठित-
सुविभत्त-चित्तमंसू ओयवियसिलप्पवाल-बिंबफल-सन्निभाह-रोट्टा पंडुरससिसगल-विमलनिम्मलसंख-
गोखीरफेणकुंद-दगरयमुणालिया-धवलदंतसेठी अखंडदंता अप्फुडि-यदंता सुजातदंता अविरलदंता

एगदंतसेदिव्व अणेगदंता हुतवहनिद्धंतधोत-तत्ततवणिज्ज-रत्ततलतालुजीहा गरुलायत-उज्जुतुंगणासा
कोकासित-धवलपत्तलच्छा विष्फालिय-पुंडरीयनयणा आणामियचावरुइल-तणु-कसिण-निद्धभुया अल्लीण-
प्पमाणजुत्त-सवणा सुसवणा पीम-मंसल-कवोल-देसभागा निव्वण-सम-लट्ठ-मट्ठ-चंददसमनिडाला
उडुवतिपडिपुन्नसोमवदणा धणणिचियसुबद्धलक्ख-नुण्णयकूडागारणिभ-पिंडियसिरा छत्तागारुत्तमंगदेसा
दाडिमपुप्फपगास-तवणिज्जसरिस-निम्मल-सुजाय-केसंतकेसभूमी सामलिबोंडधणाणि-चियछोडिय-
मिउविसयप-सत्थसुहुमलक्खण-सुगंधसुंदर-भुयभमोयगभिंणि-नील-कज्जल-पहट्ठभमरणनिद्ध-निकुरंबनि-चिय-
कुंचिय-पयाहिणावत्त-मुद्धसिरया लक्खणवज्जणगुणोववेया सुजायसुविभत्तसुरूवगा पासाईया दरिसणिज्जा
अभिरूवा पडिरूवा ।

उत्तरकुराए णं भंते कुराए मणुईणं केरिसए आगारभावपडोयारे पन्नत्ते गोयमा ताओ णं
पडिवत्ति-३

मणुईओ सुजायसव्वंगसुंदरीओ पहाणमहेलागुणजुत्ताओ अइकंग-विसप्पमाण-पउमसूमाल-कुम्मसंठित-
विसिद्धचलणा उज्जु-मउय-पीवर-पुट्ठ-साहयंगुलीओ उण्णय-रतिय-तलिणतंव-सुइ-निद्धणखा रोमरहिय-वट्ठ-
लट्ठसंठिय-अजहण्णपसत्थलक्खणजंध-जुयला सुणिम्मिय-सुगूढजाणू मंसलसुबद्धसंधी कयलीखंभाति-
रेगसंठिय-निव्वण-सुकुमल-मउय-कोमल-अविरल-सम-संहत-सुजात-वट्ठ-पीवर-निरंतरोरू अट्ठावयवीचिय-
पट्ठसंठिय-पसत्थ-विच्छिण्ण-पिहुलसोणी वदणाया मप्पमाणदुगुणितविलास-मंसलसुबद्धजहणवरधारणीओ
वज्जविराइय-पसत्थलक्खनिरोदरा तिव-लियलिय-तणुणमियमज्झिआओ उज्जुय-समसंहित-जच्चतणु-
कसिण-निद्ध-आदेज्ज-लडह-सुवि-भत्त-सुजात-सोभंत-रुइल-रमणिज्जरोमराई गंगावत्तय-पयाहिणावत्त-
तरंगभं-गुर-रविकिरण-तरुणबोधिय-आकोसायंतपउम-गंभीरवियडणाभा अनुब्भड-पसत्थ-पीणकुच्छी
सण्णयपासा संगयपासा सुंदरपासा सुजायपासा मितमाइयपीणरइयपासा अकरंडुय-कणगरुयगनिम्मलसुजाय-
निरुवहय-गातलट्ठी कंचणकलस-सुप्पमाण-सम-संहित-सुजात-लट्ठचूचुयआमेलगाजमलजुगल-वट्ठिय-
अब्भुण्णयर-तियसंठियपयोधराओ भुजंगअनुपुव्वतणुय-गोपुच्छवट्ठसम-संहिय-नमिय-आएज्ज-ललियवाहा
तंबणहा मंसलग्गहत्था पीवरकोमलवरंगुलीआ निद्धपालिणेहा रवि-ससि-संख-चक्क-सोत्थिय-विभत्त-
सुविरइयपाणिलेहा पीणुन्नयकक्ख-वक्ख-वत्थिप्पदेसा पडिपुन्नगलकबोला चउरंगुलसुप्पमाण-
कंबुवरसरिसमीवा मंसल-संठिय-पसत्थहणुया दाडिम-पुप्फप्पगास-पीव-रपवराधरा सुंदरोत्तरोट्ठा
दधिदगरयचंदकुंदवासंतिमउलधवल-अच्छिद्ध-विमलदसणा रत्तुप्पलरत्त-मउयसूमाल-तालुजीहा कणइरमउल-
अब्भुगय-उज्जुतुंगणासा सारयणवकम-लकुमुदकुवलयवि-मुक्कदल-निगरसरिस-लक्खणअंकियनयणा
पत्तल-चवलायंत-तंबलोयणाओ आणामि-तच्चाव-रुइल-किण्हब्भराइसंठिय-संगत-आयय-सुजात-तणु-कसिण-
निद्धभमुया अल्लीण-पमाणजुत्तं-सवणा पीण-मट्ठ-रमणिज्जगंडलेहा चउरंस-पसत्थ-समणिडासला
कोमुइरयणिकर-विमलपडिपुन्न-सोमवयणा छत्तुन्नयउत्तिमंगा कुडिल-सुसिणिद्ध-दीहसिरया छत्त-ज्झय-
जूव-थूभ-दामिणि-कमंडलु कलस-वावि-सोत्थिय-पडाग-जव-मच्छ-कुम्म-रहवर-मगर-सुक-थाल-अंकुस-अट्ठावय-
सुपइ-इक-मऊर-सिरिदामाभिसेय-तरण-मेइणि-उदधि वरभवण-गिरि-वरआयंस-ललि-यगय-उसभ-सीह-चामर-
उत्तमपसत्थबत्तीसलक्खणधरीओ हंसस-रिसगतीओ कोइलमहुर-गिरा-सुस्सराओ कंताओ सव्वस्स
अनुमयाओ ववगतवलिपलिया वंग-दुव्वण्ण-वाही-दोभग्ग-सोग-मुक्काओ उच्चत्तेण य नराण
थोवूणमूसियाओ सभावसिंजारचरुवेसा संगय-गय-हसिय-भणिय-चेट्ठिय-विलास-सेलाव-निउणजुत्तोवयारकुसला

सुंदरथण-जहण-वयण-कर-चरण-नयण-ला-वण्ण-वण्ण-रूव-जोव्वण-विलासकलिया नंदनवनचारिणीओव्वं
अच्छराओ अच्छेरगपेच्छणिज्जा पासाईयाओ दरिसणिज्जाओ अभिरूवाओ पडिरूवाओ ।

ते णं मणुया ओहस्सरा हेसस्सरा कौचस्सरा नंदिसस्सरा नंदिधोसा सीहस्सरा सीहधोसा
मंजुस्सरा मंजुधोसा सुस्सरा सुस्सरनिग्धोसा पउमुप्पगलगंधसरिसनीसाससुरभिवयणा छवी निरातंक-
उत्तमपसत्थअइसेस-निरुवमतणू जल्ल-मल-कलंक-सेय-रय-दोसवज्जिय-सरीर-निरुवलेवा छाया-उज्जोइयंग-
मंगा अनुलोमवाउवेगा कंकग्गहणी कवोतपरिणामा सउणिपोस-पिड्ढंतरोरुपरिणता विग्गहिय-उन्नयकुच्छी
वज्जरिसभनारायसंघयणा समचउरंससंठाणसंठिया छधणुसहस्समूसिया तेसिं मणुयाणं दोछप्पन्नपिड्ढिक-
करंडगसता पन्नत्ता समणाउसो ते णं मणुया पगतिभद्दगा पगतिउवसंता पगतिपयणुकोहमानमायालोभा
मिउमद्वसंपन्ना अल्लीणा भद्दगा विणीया अप्पिच्छा असंनिहिसंचया अचंडा विडिमंतरपरिवसणा जहिच्छि-
यकामगामिणो य ते मणुयगणा पन्नत्ता समणाउसो तेसि णं भंते मणुयाणं केवतिकालस्स आहारद्वे
पडिवत्ति-३

समुप्पज्जति गोयमा अट्ठमभत्तस्स आहारद्वे समुप्पज्जति ते णं भंते मणुया किमाहारमाहारेंति गोयमा
पुढवीपुप्फफलाहारा ते मणुयगणा पन्नत्ता समणाउसो तीसे णं भंते पुढवीए केरिसए आसाए पन्नत्ते
गोयमा से जहानामए गुलेति वा खंडेति वा सक्कराति वा मच्छंडियाति वा पप्फडमोयएति वा भिसकंदेति
वा पुप्फुत्तराइ वा पउमुत्तराइ वा विजयाति वा महाविजयाति वा उवमाति वा अणोवमाति वा चाउरक्के
वा गोकखीरे खंडगुलमच्छंडिउवणीए पयत्तमंदग्गिकदिए वण्णेणं उववेते गंधेणं उववेते रसेणं उववेते फासेणं
उववेते भवेयारूवे सिया नो तिणद्वे समद्वे तीसे णं पुढवीए एत्तो इड्ढतराए चेव कंततराए चेव पियतराए चेव
मणुण्णतराए चेव मणामतराए चेव आसाए णं पन्नत्ते तेसि णं भंते पुप्फफलाणं केरिसए आसाए पन्नत्ते
गोयमा से जहानामए रण्णो चाउरंतचक्कवट्ठिस्स कल्लाणे भोयणे सतसहस्सनिप्फन्ने वण्णेणं उववेते
गंधेणं उववेते रसेणं उववेते फासेणं उववेते आसादणिज्जे वीसादणिज्जे दीवणिज्जे दप्पणिज्जे मयणिज्जे
बिंहणिज्जे सव्विंदियगातपल्हायणिज्जे भवेयारूवे सिया नो तिणद्वे समद्वे तेसि णं पुप्फफलाणं एत्तो
इड्ढतराए चेव जाव मणामतराए चेव आसाए णं पन्नत्ते ।

ते णं भंते मणुया तमाहारमारित्ता कहिं वसहिं उवेंति गोयमा रुक्खगेहालया णं ते
मणुयगणा पन्नत्ता समणाउसो ते णं भंते रुक्का किं संठिया पन्नत्ता गोयमा अप्पेगा कुडागारसंठिया
अप्पेगापेच्छाघरसंठिया अप्पेगा छत्तसंठिया अप्पेगा झयसंठिया अप्पेगाथूभसंठिया अप्पेगा तोरणसंठिया
अप्पेगा गोपुरसंठिया अप्पेगा वेइयसंठिया अप्पेहा चोप्पालसंठिया अप्पेगा अट्ठालग संठिया अप्पेगा
वीहिसंठिया अप्पेहा वपासायसंठिया अप्पेगा हम्मियतलसंठिया अप्पेगा गवक्खसंठिया अप्पेगा वालग्ग-
पोतियसंठिया अप्पेगा बलभीसंठिया अप्पेगा वरभवणविसिद्ध-संठाण-संठिया सुहसीयलच्छाया णं ते दुमगणा
पन्नत्ता समणाउसो अत्थि णं भंते उत्तरकुराए कुराए गेहाणि वा गेहाययणाणि वा नो तिणद्वे समद्वे
रुक्खगेहालया णं ते मणुयगणा पन्नत्ता समणाउसो अत्थि णं भंते उत्तरकुराए कुराए गामाति वा
नगराति वा जाव सन्निवेसाति वा नो तिणद्वे समद्वे जहिच्छियकामगामिणो णं ते मणुयगणा पन्नत्ता
समणुसो अत्थि णं भंते उत्तरकुराए कुराए असीति वा मसीति वा किसीति वा विवणीति वा पणीति वा
वाणिज्जाति वा नो तिणद्वे समद्वे ववगयअसिमसिकिसिविवणिपणिवाणिज्जा णं ते मणुयगणा पन्नत्ता
समणाउसो अत्थि णं भंते उत्तरकुराए कुराए हिरण्णेति वा सुवण्णेति वा कंसेति वा दूसेति वा
मणिमोत्तियसंखसिलप्पवा-लसंतसारसावएज्जेति वा हंता अत्थि नो चेव णं तेसिं मणुयाणं तिव्वे

ममत्तभावे समुप्पज्जति अत्थि णं भंते उत्तरकुराए कुराए रायाति वा जुवरायाति वा ईसरेति वा तलवरेइ वा कोडुंबि-एति वा मांडबिएति वा इब्भेति वा सेट्ठीति वा सेणावतीति वा सत्थवाहेति वा नो तिण्ढे समढ्ढे ववग-यइइडिसक्कारा णं ते मणुयगणा पन्नत्ता समणाउसो अत्थि णं भंते उत्तरकुराए कुराए दासेति वा पेसेति वा सिस्सिति वा भयगेति वा भाइल्लगेति वा कम्मरएति वा नो तिण्ढे समढ्ढे ववगतआभिओगिया णं ते मणुयगणा पन्नत्ता समणाउसो अत्थि णं भंते उत्तरकुराए कुराए माताति वा पियाति वा भायाति वा भइणीति वा भज्जाति वा पुत्ताति वा धूयाति वा सुण्हाति वा हंता अत्थि नो चेव णं तेसि णं मणुयाणं तिव्वे पेज्जबंधणे समुप्पज्जति पयणुपेज्जबंधणा णं ते मणुयगणापन्नत्ता समणाउसो ।

अत्थि णं भंते उत्तरकुराए अरीति वा वेरीति वा घातकेति वा वहकेति वा पडिणीएति वा पच्चामित्तेति वा नो तिण्ढे समढ्ढे ववगतवेराणुबंधा णं ते मणुयगणा पन्नत्ता समणुसो अत्थि णं भंते उत्तरकुराए कुराए मित्तेति वा वयंसेति वा सहीति वा सुहिएति वा संगतिएति वा नो तिण्ढे समढ्ढे ववग-पडिवत्ति-३

तनेहाणुरागा ते मणुयगणा पन्नत्ता समणाउसो अत्थि णं भंते उत्तरकुराए कुराए आवाहाति वा वीवाहाति वा जन्नाति वा सद्धाति वा थालिपाकाति वा पितिपिंडनिवेदणाति वा चूलोवणयणाति वा सीमंतोवणयणाति वा नो तिण्ढे समढ्ढे ववगतआवाहवीवाहजन्नसद्धथालिपागपितिपिंडनिवेदणचूलेवणसयणसीमंतो-वणयणा णं ते मणुयगणा पन्नत्ता समणाउसो अत्थि णं भंते उत्तरकुराए कुरे इंदमहाति वा खंदमहाति वा रुद्धमहाति वा सिवमहाति वा वेसमणमहाति वा नागमहाति वा जक्खमहाति वा भूतमहाति वा मुगुंद महाति वा कूवम-हातिवातलागमहातिवानदिमहातिवा दहमहातिवा पव्वयमहातिवा रुक्खमहाति वा चेइयमहाति वा थूभमहाति वा नो तिण्ढे समढ्ढे ववगतमहामहिमा णं ते मणुयगणा पन्नत्ता समणुसो अत्थि णं भंते उत्तरकुराए कुराए नडपेच्छाति वा नट्टपेच्छाति वा जल्लपेच्छाति वा मल्लपेच्छाति वामुट्ठियपेच्छाति वा वेलंबग-पेच्छाति वाकहगपेच्छाति वा पवगपेच्छाति वा लासगपेच्छाति वा अक्खाइगपेच्छाति वा लंखपेच्छाति वा मंखपेच्छाति वा तूणइल्लपेच्छाति वा तुंबवीणपेच्छाति वा अक्खाइगपेच्छाति वा लंखपेच्छाति वा मंख-पेच्छाति वा तूणइल्लपेच्छाति वा तुंबवीणपेच्छाति वा कावपेच्छाति वा मागहपेच्छाति वा नो तिण्ढे समढ्ढे ववगतकोउहल्ला णं ते मणुयगणा पन्नत्ता समणाउसो अत्थि णं भंते उत्तरकुराए कुराए सगडाति वा रहाति वा जाणाति वा जुग्गाति वा गिल्लीति वा थिल्लीति वा सीयाति वा संदमाणियाति वा नो तिण्ढे समढ्ढे पादचारविहारिणो णं ते मणुयगणा पन्नत्ता समणाउसो अत्थि णं भंते उत्तरकुराए कुराए-आसाति वा इत्थीति वा उट्ठाति वा गोणाति वा महिसाति वा खराति वा घोडाति वा अजाति वा एलाति वा हंता अत्थि नो चेव णं तेसिं मणुयाणं परिभोगत्ताए हव्वमागच्छंति अत्थि णं भंते उत्तरकुराए कुराए गावीति वा महिसीति वा उट्ठीति वा अयाति वा एलिगति वा हंता अत्थि नो चेव णं तेसिं मणुयाणं परिभोगत्ताए हव्वमागच्छंति ।

अत्थि णं भंते उत्तरकुराए कुराए सीहाति वा वग्धाति वा विगाति वा दीविगाति वा अच्छाति वा परस्परति वा सियालाति वा विडालाति वा सुणगाति वा कोलसुणगाति वा कोकंतियाति वा ससगाति वा चित्तलाति वा चिल्ललगाति वा हंता अत्थि नो चेव णं ते अण्णमण्णस्स तेसिं वा मणुयाणं किंचि आबाहं वा वाबाहं वा छविच्छेदं वा करेंति पगतिभद्दगा णं ते सावयगणा पन्नत्ता समणाउसो अत्थि णं भंते उत्तरकुरे कुरा सालीति वा वीहिति वा गोधूमाति वा जवाति वा तिलाति वा उक्खूति वा हंता अत्थि नो चेव णं तेसिं मणुयामं परिभोगत्ताए हव्वमागच्छंति अत्थि णं भंते उत्तरकुराए कुराए खाणूति

वा कंटएति वा हीएति वा सक्कराति वा तणकयवराति वा पत्तकयवराति वा असुईति वा पूइयाति वा दुब्भि-गंधाति वा अचोक्खाति वा नो तिण्हे समहे ववगयखाणु-कंटक-हीर-सक्कर-तणकयवर-पत्तकयवर-असुई-पूइय-दुब्भिगंधमचोक्खपरिव-ज्जिया णं उत्तरकुरा पन्नत्ता समणाउसो अत्थि णं भंते उत्तरकुराए कुराए गड्ढाति वा दरीति वा घसीति वा भिगूति वा विसमेति वा धूलीति वा पंकेति वा चलणीति वा नो तिण्हे समहे उत्तरकुराए णं कुराए बहुसमरमणिज्जे भूमिभागे पन्नत्ते समणाउसो अत्थि णं भंते उत्तरकुराए कुराए दंसाति वा मसगाति वा ढिंकुणाति वा जूवाति वा लिक्खाति वा नो तिण्हे समहे ववगतोवद्वा णं उत्तरकुरा पन्नत्ता समणाउसो अत्थि णं भंते उत्तरकुराए कुराए अहीति वा अयगराति वा महोरगाति वा हंता अत्थि नो चेव णं ते अण्णमण्णस्स तेसिं वा मणुयाणं किंचि आबाहं वा वाबाहं वा छविच्छेयं वा करेति पगइभद्गगा णं ते बालगणा पन्नत्ता समणाउसो अत्थि णं भंते उत्तरकुराए कुराए गहदंडाति वा गहमुसलाति वा गहगज्जिताति वा गहजुद्धाति वा गहसंघाडगाति वा गहअवसववति वा पडिवत्ति-३

अब्भाति वा अब्भरुक्खाति वा संझाति वा गहजुद्धाति वा गहसंघाडगाति वा गहअवसव्वाति वा अब्भाति वा अब्भरुक्खाति वा संझाति वा गंधव्वनगराति वा गज्जिताति वा विज्जुताति वा उक्कापाताति वा दिसा-दाहाति वा निग्घाताति वा पंसुविट्ठीति वा जूवगाति वा जक्खालित्ताति वा धूमियाति वा महियाति वा रउग्धाताति वा चंदोवराति वा सूरुवरागाति वा चंदपरिवेसाति वा सूरपरिवेसाति वा पडिचंदाति पडिसूराति वा इंदधणूति वा उदगमच्छाति वा कविहसियाति वा अमोहाति वा पाईणवायाति वा पडीणवायाति वाजाव सुद्धवाताति वा गामदाहाति वा नगरदाहाति वा जाव सण्णि-वेसदाहाति वा पाणक्खय-भूतक्खय-कुलक्खयाति वा नो तिण्हे समहे ।

अत्थि णं भंते उत्तरकुराए कुराए डिंबाति वा डमराति वा कलहाति वा बोलाति वा खाराति वा वेराति वा महाजुद्धाति वा महासंगामाति वा महासन्नाहाति वा महापुरिसनिपडणाति वा महासत्थनिड-णाति वा ववगतडिंब-डमर-कलह-बोल-खार-वेराणं ते मणुयगणा पन्नत्ता समणाउसो अत्थि णं भंते उत्तर-कुराए कुराए इब्भूयाति वा कुलरोगाति वा गामरोगाति वा नगररोगाति वा मंडलरोगाति वा पंडुरोगाति वा पोदुरोगाति वा सिरोवेदणाति वा अच्छिवेदणाति वा कण्णवेदणाति वा नखवेदणाति वा दंतवेद-णाति वा कासाति वा सासाति वा सोसाति वा जराति वा दाहाति वा कच्छूति वा खसराति वा कुट्ठाति वा अरि-साति वा अजीरगाति वा भगंदलाति वा इंदग्गहाति वा खंदग्गहाति वा कुमारग्गहाति वा नागग्गहाति वा जक्खग्गहाति वा भूतग्गहाति वा धणुग्गहाति वा उव्वेगाति वा एगाहियाति वा बेयाहियाति वा तेयाहियाति वा चाउत्थगाहियाति वा हिययसूलाति वा मत्थगसूलाति वा पाससूलाति वा कुच्छिसूलाति वा जोणिसूलाति वा गाममारीति वा जाव सन्निवेसमारीति वा पाण-क्खयाति वा जणक्खयाति वा धणक्खायति वा कुल-क्खयाति वा वसणभूतमणारियाति वा नो तिण्हे समहे ववगतरोगातंका णं ते मणुयगणा पन्नत्ता सम-णाउसो तेसिं णं भंते मणुया णं केवतिकालं ठिती पन्नत्ता गोयमा जहण्णेणं देसूणिं तिण्णि पलिओवमाइं पलिओवमस्स असंखेज्जतिभागेणं ऊणगाणि उक्कोसेणं तिण्णि पलिओवमाइं, ते णं भंते मणुया कालमासे कालं किच्चा कहिं गच्छंति कहिं उववज्जंति गोयमा ते णं मणुया छम्मासावेसाउया जुयलगं पसवंति पसवित्ता एगूणपन्नं राइंदियाइं अनुपालेंति अनुपालेत्ता कासित्ता छीइत्ता जंभाइत्ता अक्किट्ठा अव्वहित्ता अपरियाविया कालमासे कालं किच्चा देवलोएसु उववज्जंति देवलोगपरिग्गहिया णं ते मणुयगणा पन्नत्ता

समणाउसो उत्तरकुराए णं भंते कुराए कतिविधा मणुया अनुसज्जंति गोयमा छवविहा मनुया अनुसज्जंति तं जहा- पउमगंधा मियगंधा अममा तेतली सहा सणिंचरा ।

[१८६] कहि णं भंते उत्तरकुराए जमगा नाम दुवे पव्वता पन्नत्ता गोयमा नीलवंतस्स वासध-रपव्वयस्स दाहिणिल्लाओ चरिमंताओ अट्ठचोत्तीसे जोयणसत्ते चत्तारि य सत्तभागे जोयणस्स अबाधाए सीताए महानदीए पुरत्थिम-पच्चत्थिमेणं उभओ कूले एत्थ णं उत्तरकुराए जमगा नाम दुवे पव्वता पन्नत्ता-एगमेगं जोयणसहस्सं उड्ढं उच्चत्तेणं अड्ढाड्ढज्जाइं जोयणसताणि उव्वेहेणं मूले एगमेगं जोयण-सहस्सं आयामविक्खंभेणं मज्झे अद्धद्वमाइं जोयणसताइं आयाम-विक्खंभेणं उवरिं पंचजोयणसयाइं आयाम-विक्खंभेणं मूले तिण्णि जोयणसहस्साइं एगं च बावट्ठं जोयणसतं किंचिविसेसाहियं परिक्खेवेणं पन्नत्ता मज्झे दो जोणसहस्साइं तिण्णि य बावत्तरे जोयणसते किंचिविसेसाहिए परिक्खेवेणं पन्नत्ता उवरिं एगं जोयणसहस्सं पंच य एक्कासीते जोयणसते किंचिविसेसाहिए परिक्खेवेणं पन्नत्ता मूले विच्छिण्णा मज्झे संखित्ता उप्पिं तणुया गोपुच्छसंठाण-संठिता सव्वकणगामया अच्छा जाव पडिरूवा पत्तेयं-पत्तेयं

पडिवत्ति-३

पउम-वरवियापरिक्खित्ता पत्तेयं-पत्तेयं वनसंडपरिक्खित्ता वण्णओ तेसि णं जमगपव्वयाणंउप्पिं बहुसमर-मणिज्जा भूमिभागा पन्नत्ता वण्णओ जाव आसयंति तेसि णं बहुसमरमणिज्जाणं भूमिभागाणं बहुमज्झ-देसभाए पत्तेयं-पत्तेयं पासायवडेंसगा पन्नत्ता ते णं पासायवडेंसगा बावट्ठिं जोयणाइं अद्धजोयणं च उड्ढं उच्चत्तेणं एकत्तीसं जोयणाइं कोसं च विक्कंभेणं अब्भुग्गतमूसित-पहसिता वण्णओ उल्लोए भूमिभागो मणिपेढिया दो जोयणाइं आयाम-विक्खंभेणं जोयणं बाहल्लेणं सीहासणं विजयदूसे अंकुसा दामा णं च मुणेत्तव्वे विधी जावतेसि णं सीहासणाणं अवरुत्तरेणं उत्तरेणं उत्तरपुरत्थिमेणं एत्थ णं जमगाणं देवाणं पत्तेयं-पत्तेयं चउण्हं सामाणियसाहस्सीणं चत्तारि भद्दासणसाहस्सीओ पन्नत्ताओ परिवारो वत्तव्वो तेसि णं पासायवडेंसगाणं उप्पिं अट्ठद्वमंगलगा जाव सहस्सपत्तहत्थगा से केणट्ठेणं भंते एवं वुच्चति-जमगा पव्वता जमगा पव्वता गोयमा जमगपव्वतेसु णं खुड्डा-खुड्डियासु जाव बिलपंतियासु बहूइं उप्पलाइं जाव सहस्सपत्ताइं जमगप्पभाइं जमगागाराइं जमगवण्णाइं जमगा य एत्थ दो देवा महिड्डिया जाव पलिओव-मट्ठितीया परिवसंति ते णं तत्थ पत्तेयं-पत्तेयं चउण्हं सामाणियसाहस्सीणं जाव सोलसण्हं आयरक्ख-देवसाहस्सीणं जमगपव्वताणं जमगाण य रायहाणीणं अण्णेसिं च बहूणं वाणमंतराणं देवाण य देवीण य आहेवच्चं जाव पालेमाणा विहरंति से तेणट्ठेणं गोयमा एवं-वुच्चति जमगा पव्वता जमगा पव्वता अदुत्तरं च णं गोयमा जाव निच्चा कहि णं भंते जमगाणं देवाणं जमगाओ नाम रायहाणीओ पन्नत्ताओ गोयमा जमगपव्वयाणं उत्तरेणं तिरियमसंखेज्जे दीवसमुद्धे वीड्वइत्ता अण्णंमि जंबुद्धीवे दीवे बारस जोयणसहस्साइं ओगाहित्ता एत्थ णं जमगाणं देवाणं जमगाओ नाम रायहाणीओ पन्नत्ताओ-बारस जोयणसहस्साइं जहा-विजयस्स जाव एमहिड्डिया जमगा देवा जमगा देवा ।

[१८७] कहि णं भंते उत्तरकुराए कुराए नीलवंतद्धे नामं दहे पन्नत्ते गोयमा जमगपव्वयाणं दाहिणिल्लाओ चरिमंताओ अट्ठचोत्तीसे जोयणसते चत्तारि सत्तभागा जोयणस्स अबाहाए सीताए महानदीए बहुमज्झदेसभाए एत्थ णं उत्तरकुराए कुराए नीलवंतद्धे नामं दहे पन्नत्ते-उत्तरदक्खिणायते पाईणपडीण-विच्छिण्णे एगं जोयणसहस्सं आयामेणं पंच जोयणसताइं विक्खंभेणं दस जोयणाइं उव्वेहेणं अच्छे सण्हे रययामयकूले जाव अणेगसउणगणमिथुड्ढणपविचरिय-सदुण्णइयम-हुरसरणाइयए पासादीए दरिसणिज्जे

अभिरूवे पडिरूवे उभओ पासिं दोहि य पउमवरवेइयाहिं वणसंडेहिं सव्वतो समंता संपरिक्खित्ते दोण्हवि वण्णओ नीलवंतद्दहस्स णं दहस्स तत्थ-तत्थ देसे तहिं-तहिं बहवे तिसोमाणपडिरूवगा पन्नत्ता वण्णओ तेसि णं तिसोमाणपडिरूवगाणं पुरतो पत्तेयं-पत्तेयं तोरणे पन्नत्ते वण्णओ लतस्स नीलवंतद्दहस्स बहुमज्झ-देसभाए एत्थ णं महं एगे पउमे पन्नत्ते-जोयणं आयाम-विक्खंभेणं अद्धजोयणं बाहल्लेणं दस जोयणाइं उव्वेहेणं दो कोसे ऊसिते जलंतातो सातिरेगाइं दसजोयणिं सव्वग्गेणं पन्नत्ते तस्स णं पउमस्स अयमेयारूवे वण्णावासे पन्नत्ते तं जहा- वइरामए मूले रिद्धामए कंदे वेरुलियामए नाले वेरुलियामया बाहिरपत्ता जंबूनयमया अब्भितरपत्ता तवणिज्जमया केसरा कणगमई कण्णिय नानामणिमया पुक्खरत्थिभुया सा णं कण्णिया अद्धजोयणं आयाम-विक्खंभेणं कोसं बाहल्लेणं सव्वप्पणा कणगमई अच्छा जाव पडिरूवा तीसे णं कण्णियाए उवरिं बहुसमरमणिज्जे भूमिभागे जाव मणीणं वण्णो गंधो फासो तस्स णं बहुसमर-मणिज्जस्स भूमिभागस्स बहुमज्झदेसभाए एत्थ णं महं एगे भवणे पन्नत्ते-कोसं आयामेणं अद्धकोसं विक्खंभेणं देसूणं कोसं उड्ढं उच्चत्तेणं अणेगखंभसतसंनिविट्ठं वण्णओ जाव दिव्वतुडियसद्धसंपणाइए अच्छे जाव पडिरूवे तस्स णं भवणस्स तिदिसिं ततो दारा पन्नत्ता तं जहा- पुरत्थिमेणं दाहिणेणं उत्तरेणं पडिवत्ति-३

ते णं दारा पंचधणुसयाइं उड्ढं उच्चत्तेणं अड्ढाइज्जाइं धणुसताइं विक्खंभेणं तावतयं चेव पवेसेणं सेया वरकणगथूभियागा दारवण्णओ जाव वणमालाओ ।

तस्स णं भवणस्स उल्लोओ अंतो बहुसमरमणिज्जो भूमिभागो जाव मणीणं वण्णो गंधो फासो तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं मणिपेढिया पन्नत्ता-पंचधणु-सयाइं आयाम-विक्खंभेणं अड्ढाइज्जाइं धणुसताइं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उप्पिं एत्थ णं महं एगे देवसयणिज्जे पन्नत्ते सयणिज्जवण्णओ तस्स णं भवणस्स उप्पिं अट्ठमंगलगा जाव सहस्सपत्तहत्थगा से णं पउमे अण्णेणं अट्ठसतेणं तदद्दुच्चत्तप्पमाणमेत्ताणं पउमाणं सव्वतो समंता संपरिक्खित्ते ते णं पउमा अद्धजोयणं आयाम-विक्खंभेणं कोसं बाहल्लेणं दस जोयणाइं उव्वेहेणं कोसं ऊसिया जलंताओ साइरेगाइं दस जोयणाइं सव्वग्गेणं पन्नत्ताइं तेसि णं पउमाणं अयमेयारूवे वण्णावासे पन्नत्ते तं जहावइरामया मूला जाव कणगामईओ कण्णियाओ नाणामणिमया पुक्खरत्थिभुगा ताओ णं कण्णियाओ कोसं आयाम-विक्खंभेणं अद्धकोसं बाहल्लेणं सव्वकणगामईओ अच्छाओ जाव पडिरूवाओ तासि णं कण्णियाणं उप्पिं बहुसमरमणिज्जा भूमिभागा जाव मणीणं वण्णो गंधो फासो तस्स णं पउमस्स अवरुत्तरेणं उत्तरेणं उत्तरपुरत्थिमेणं नीलवंतस्स नागकुमारिंदस्स नागकुमाररण्णो चउण्हं सामाणियसाहस्सीणं चत्तारि पउमसाहस्सीओ पन्नत्ताओ एतेणं सव्वो परिवारो पउमाणं भाणियतव्वो से णं पउमे अण्णेहिं तिहिं पउमपरिक्खेवेहिं सव्वतो समंता संपरिक्खित्ते तं जहा- अब्भितरेणं मज्झिमेणं बाहिएणं अब्भितरए पउमपरिक्खेवे बत्तीसं पउमसयसाहस्सीओ पन्नत्ताओ मज्झिमए पउमपरिक्खेवे चत्तालीसं एवमेव सपुव्वावरेणं एगा पउमकोडी वीसं च पउमसतसहस्सा भवंतीति मक्खायं, से केणट्ठेणं भंते एवं वुच्चतिनीलवंतद्दहे नीलवंतद्दहे गोयमा नीलवंतद्दहे णं तत्थ-तत्थ देसे तहिं-तहिं बहूइं उप्पलाइं जाव सहस्सपत्ताइं नीलवंतप्पभाइं नीलवंतागारइं नीलवंतवण्णाइं नीलवंतवण्णाभाइं नीलवंते एत्थ नागकुमारिंदे नागकुमारराया महिइडिए जाव पलिओवमट्ठितीए परिवसति से णं तत्थ चउण्हं सामाणिय-साहस्सीणं जाव सोलसण्हं आयरक्खदेवसाहस्सीणं नीलवंतद्दहस्स नीलवंताए य रायहाणीए

अण्णेसिं च बहूणं वाणमंतराणं देवाणं य देवीणं य आहेवच्चं जाव विहरति से तेणद्वेणं गोयमा एवं वुच्चति-नीलवंतद्वहे नीलवंतद्वहे ।

[१८८] कहि णं भंते नीलवंतस्स नागकुमाररिंदस्स नागकुमाररण्णो नीलवंता नाम रायहाणी, नीलवंतद्वहस्सुत्तरेणं अण्णंमि जंबुद्वीवे दीवे बारस जोयणसहस्साइं जहा- विजयस्स ।

[१८९] नीलवंतद्वहस्स णं पुरत्थिम-पच्चत्थिमेणं दस-दस जोयणाइं अबाधाए एत्थ णं दस-दस कंचणगपव्वता पन्नत्ता ते णं कंचणगपव्वता एगमेगं जोयणसतं उड्ढं उच्चत्तेणं पणवीसं पणवीसं जोयणाइं उव्वेहेणं मूले एगमेगं जोयणसतं विक्खंभेणं मज्झे पन्नत्तरिं जोयणाइं विक्खंभेणं उवरिं पन्नासं जोयणाइं विक्खंभेणं मूले तिण्णि सोलसुत्तरे जोयणसते किंचिविसेसाहिए परिकखेवेणं मज्झे दोन्नि सत्ततीसे जोयणसते किंचिविसेसूणे परिकखेवेणं उवरिं एगं अट्ठावण्णं जोयणतं किंचिविसेसूणे परिकखेवेणं मूले वित्थिण्णा मज्झे संखित्ता उप्पिं तणुया गोपुच्छसंठाणसंठिता सव्वकंचणमया अच्छा जाव पडिरूवा पत्तेयं-पत्तेयं पउमवरवेइयापरिक्खित्ता पत्तेयं-पत्तेयं वणसंडपरिक्खित्ता वण्णओ तेसि णं कंचणगपव्वताणं उप्पिं बहुसमरमणिज्जा भूमिभागा पन्नत्ता जाव आसयंति तेसि णं बहुसमरमणिज्जाणं भूमिभागाणं बहुमज्झ-देसभाए पत्तेयं-पत्तेयं पासाय-वडेंसए पन्नत्ते-सड्ढबावडिं जोयणाइं उड्ढं उच्चत्तेणं एककीसं जोयणाइं कोसं पडिवत्ति-३

च विक्खंभेणं मणिपेढिया दोजोयणिया सीहासणा सपरिवारा, से केणद्वेणं भंते एवं वुच्चतिकंचणगपव्वता कंचणगपव्वता गोयमा कंचणगेसु णं पव्वतेसु तत्थ-तत्थ देसे तहिं-तहिं वावीसु उप्पलाइं जाव कंचणगवण्णाभाइं कंचणगा य एत्थ देवा महिड्ढीया जाव विहरंति से तेणद्वेणं रायहाणीओ वि तहेव उत्तरेणं विजयरायहाणिसरिसियाओ अण्णंमि जंबुद्वीवे कहिणं भंते उत्तरकुराए कुराए उत्तरकुरूद्वहे नामं दहे पन्नत्ते गोयमा नीलवंतद्वहस्स दाहिणिल्लाओ चरिमंतओ अट्ठचोत्तीसे जोयणसते एवं सो चेव गमो नेतव्वो जो नीलवंतद्वहस्स सव्वेसिं सरिसको दहसरिनामा य देवा सव्वेसिं पुरत्थिमपच्चत्थिमेणं कंचणगपव्वता दस-दस एकप्पमाणा उत्तरेणं रायहाणीओ अण्णंमि जंबुद्वीवे, कहि णं भंते चंदद्वहे एरावणद्वहे मालवंतद्वहे एवं एककेक्को नेयव्वो ।

[१९०] कहि णं भंते उत्तरकुराए कुराए जंबू-सुदंसणाए जंबूपेढे नामं पेढे पन्नत्ते गोयमा जंबुद्वीवे दीवे मंदरस्स पव्वयस्स उत्तरपुरत्थिमेणं नीलवंतस्स वासधरपव्वतस्स दाहिणेणं मालवंतस्स वक्खारपव्वयस्स पच्चत्थिमेणं गंधमादणस्स वक्खारपव्वयस्स पुरत्थिमेणं सीताए महानदीए पुरत्थिमिल्ले कूले एत्थ णं उत्तरकुराए कुराए जंबूपेढे नाम पेढे पन्नत्ते-पंचजोयणसताइं आयाम-विक्खंभेणं पन्नरस एककासीते जोयणसते किंचिविसेसाहिए परिकखेवेणं बहुमज्झदेसभाए बारस जोयणाइं बाहल्लेणं तदाणंतरं च णं माताए-माताए पदेसपरिहाणीए परिहायमाणे-परिहायमाणे सव्वेसु चरमंतेसु दो कोसे बाहल्लेणं सव्वजंबूनयामए अच्छे जाव पडिरूवे से णं एगाए पउमवरवेइयाए एगेणं य वणसंडेणं सव्वतो समंता संपरिकखत्ते वण्णओ दोण्हवि तस्स णं जंबूपेढस्स चउदिसिं चत्तारि तिसोवाणपडिरूवगा पन्नत्ता तं चेव जाव तोरणा जाव छत्तातिछत्ता तस्स णं जंबूपेढस्स उप्पिं बहुसमरमणिज्जे भूमिभागे पन्नत्ते से जहानामए आलिंगपुक्खरेति वा जाव मणीणं फासो तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं महं एगा मणिपेढिया पन्नत्ता-अट्ठ जोयणाइं आयाम-विक्खंभेणं चत्तारि जोयणाइं बाहल्लेणं मणिमई अच्छा जाव पडिरूवा तीसे णं मणिपेढियाए उवरिं एत्थ णं महं जंबू सुदंसणा

पन्नत्ता-अद्वजोयणाइं उड्डं उच्चत्तेणं अद्वजोयणं उव्वेहेणं दो जोयणाइं खधे अद्व जोयणाइं विक्खंभेणं छ जोयणाइं विडिमा बहुमज्झदेसभाए अद्व जोयणाइं विक्खंभेणं सातिरेगाइं अद्व जोयणाइं सव्वग्गेणं पन्नत्ता वइरायमूल-रययसुपतिट्ठियविडिमा रिट्ठामयकंद-वेरुलियरुइरखंधा सुजायवरजायरूपढमगविसालसाला नानामणिरय-णाविहिह-साहप्पसाह-वेरुलियपत्ततवणिज्जपत्तेवैटा

जंबूनयरत्तमउयसुकुमालपवालपल्लवंकुरधरा विचित्त-मणिरयणसुरहिकुसुमफलभर-नमियसाला सच्छाया सप्पभा सस्सिरिया सउज्जोया अहियं मणोनिव्वुइकरी पासाईया दरिसणिज्जा अभिरूवा पडिरूवा ।

[१९१] जंबूणं पं सुंदसणाए चउदिसिं चत्तारि साला पन्नत्ता तं जहा- पुरत्थिमेणं दक्खिणेणं पच्चत्थिमेणं उत्तरेणं तत्थ पं जेसे पुरत्थिमिल्ले साले एत्थ पं महं एगे भवणे पन्नत्ते-एगं कोसं आयामेणं अद्वकोसं विक्खंभेणं देसूणं कोसं उड्डं उच्चत्तेणं अणेगखंभसतसंनिविट्ठ वण्णओ जाव भवणस्स दारं तं चेव पमाणं पंचधणुसताइं उड्डं उच्चत्तेणं अड्ढाइज्जइं विक्खंभेणं जाव वणमालाओ भूमिभागा उल्लोया मणिपेढिया पंचधणुसतिया देवसयणिज्जं भाणियव्वं तत्थ पं जेसे दाहिणिल्ले साले एत्थ पं महं एगे पासायवडेंसए पन्नत्ते-कोसं च उड्डं उच्चत्तेणं अद्वकोसं आयाम-विक्खंभेणं अब्भुग्गयमूसियपहसिया अंतो बहुसमरमणिज्जे भूमिभागे उल्लोया तस्स पं बहुसमरमणिज्जस्स भूमिभागस्स बहुमज्झदेसभाए सीहासणं सपरिवारं भाणियव्वं तत्थ पं जेसे पच्चत्थिमिल्ले साले एत्थ पं महं एगे पासायवडेंसए पन्नत्ते तं चेव

पडिवत्ति-३

पमाणं सीहासणं सपरिवारं भाणियव्वं तत्थ पं जेसे उत्तरिल्ले साले एत्थ पं महं एगे पासायवडेंसए पन्नत्ते तं चेव पमाणं सीहासणं सपरिवारं तत्थ पं जेसे उत्तरिल्ले साले एत्थ पं महं एगे पासायवडेंसए पन्नत्ते तं चेव पमाणं सीहासणं सपरिवारं तत्थ पं जेसे उत्तरिल्ले साले एत्थ पं महं एगे पासायवडेंसए पन्नत्ते तं चेव पमाणं सीहासणं सपरिवारं तत्थ पं जेसे उवरिल्ले विडिमग्गसाले एत्थ पं महं एगे सिद्धायतणे पन्नत्ते-कोसं आयामेणं अद्वकोसं विक्खंभेणं देसूणं कोसं उड्डं उच्चत्तेणं अणेगखंभसतसंनिविट्ठे वण्णओ तिदिसिं तओ दारा पंचधणुसता अड्ढाइज्जधणुसयविक्खंभा मणिपेढिया पंचधणुसतिया तीसे पं मणिपेढियाए उप्पिं एत्थ पं महं एगे देवच्छंदए पन्नत्ते पंचधणुसयाइं आयामविक्खंभेणं साइरेगाइं पंचधणुसयाइं उड्डं उच्चत्तेणं सव्वरयणामए अच्छे जाव पडिरूवे तत्थ पं देवच्छंदए अद्वसयं जिनपडि-माणं जिणुस्सेधप्पमाणानं एवं सव्वा सिद्धायतणवत्तव्वया भाणियव्वा जाव धूवकडुच्छुया तस्स पं सिद्धाय-तणस्स उवरिं अद्वडुमंगलया जाव सहस्सपत्तहत्थगा ।

जंबू पं सुंदसणा मूले बारसहिं पउमवरवेइयाहिं सव्वतो समंता संपरिक्खित्ता वण्णओ जंबू पं सुंदसणा अण्णेणं अद्वसतेणं जंबूणं तदद्वुच्चत्तम-पमाणमेत्तेणं सव्वतो समंता संपरिक्खित्ता ताओ पं जंबूओ चत्तारि जोयणाइं उड्डं उच्चत्तेणं कोसं उव्वेहेणं जोयणं खंधो कोसं विक्खंभेणं तिण्णि जोयणाइं विडिमा बहुमज्झदेसभाए चत्तारि जोयणाइं आयाम-विक्खंभेणं सातिरेगाइं चत्तारि जोयणाइं सव्वग्गेणं वइरामयमूल-रययसुपइट्ठियविडिमा रुक्खवण्णओ जंबूणं पं सुंदसणाए अवरुत्तरेणं उत्तरेणं उत्तरपुरत्थिमेणं एत्थ पं अणाढियस्स देवस्स चउण्हं सामाणियसाहस्सीणं चत्तारि जंबूसाहस्सीओ पन्नत्ताओ एवं जंबू परिवारो जाव आयरक्खाणं जंबू पं सुंदसणा तिहिं सइएहिं वनसंडेहिं सव्वतो समंता संपरिक्खित्ता तं जहा- अब्भंतरणं मज्झिमेणं बाहिरेणं जंबूणं पं सुंदसणाए पुरित्थिमेणं पढमं वनसंडं पन्नासं जोयणाइं ओगाहित्ता एत्थ पं महं एगे भवणे पन्नत्ते पुरत्थमिभवणसरिसे भाणियव्वे जाव सयणिज्जं एवं दाहिणेणं

पच्यत्थिमेमं उत्तरेणं जंबूए णं सुदंसणाए उत्तर-पुरत्थिमेणं पढमं वनसंडं पन्नासं जोयणाइं ओगाहिक्ता एत्थ णं महं चत्तारि नंदापुक्खरिणीओ पन्नत्ताओ तं जहा- पउमा पउमप्पभा चेव कुमुदा कुमुदप्पभा ताओ णं नंदाओ पुक्खरिणीओ कोसं आयामेणं अद्धकोसं विक्खंभेणं पंचधणुसयाइं उव्वेहेणं वण्णओ पत्तेयं-पत्तेयं पउमवरवेइया परिक्खित्ताओ पत्तेयं-पत्तेयं वनसंडपरिक्खित्ताओ वण्णओ तासि णं पुक्खरिणीणं पत्तेयं-पत्तेयं चउद्धिसिं चत्तारि तिसोवाणपडिरूवग पन्नत्ता वण्णओ जाव तोरणा तासि णं नंदापुक्खरिणीणं बहुमज्झदेसभाए एत्थ णं महं एगे पासायवडेंसए पन्नत्ते-कोसप्पमाणे अद्धकोसं विक्खंभो सो चेव वण्णओ जाव सीहासणं सपरिवारं एवं दक्खिण-पुरत्थिमेणं वि पन्नासं जोयणाइं ओगाहिक्ता चत्तारि नंदा पुक्खरिणीओ उप्पलगुम्मा नलिणा उप्पला उप्पलुज्जला तं चेव पमाणं तहेव पासायवडेसंगो तप्पमाणो एवं दक्खिण-पच्यत्थिमेणवि पन्नासं जोयणाइं नवरं भिंगा भिंगणिभा चेव अंजणा कज्जलप्पभा सेसं तं चेव जंबूए णं सुदंसणाए उत्तर-पच्यत्थिमेणं पढमं वणसंडं पन्नासं जोयणाइं ओगाहिक्ता एत्थ णं चत्तारि नंदाओ पुक्खरिणीओ पन्नत्ताओ तं जहा- सिरिकंता सिरिचंदा सिरिनिलया चेव सिरिमहिया तं चेव पमाणं तहेव पासायवडेंसओ ।

जंबूए णं सुदंसणाए पुरत्थिमिल्लस्स भवणस्स उत्तरेणं उत्तर-पुर्थिमिल्लस्स पासायवडें-सगस्स दाहिणेणं एत्थ णं महं एगे कूडे पन्नत्ते-अट्ठ जोयणाइं उड्ढं उच्चत्तेणं दो जोयणाइं उव्वेहेणं मूले अट्ठ जोयणाइं विक्खंभेणं मज्झे छ जोयणाइं विक्खंभेणं उवरिं चत्तारि जोयणाइं विक्कंभेणं मूले सातिरे-पडिवत्ति-३

गाइं पणुवीसं जोयणाइं परिक्खेवेणं मज्झे सातिरेगाइं अट्ठारस जोयणाइं परिक्खेवेणं उवरिं सातिरेगाइं बारस जोयणाइं परिक्खेवेणं मूले विच्छिण्णे मज्झे संखित्ते उप्पिं तणुए गोपुच्छसंठाणसंठिए सव्वजंबूनया-मए अच्छे जाव पडिरूवे से णं एगाए पउमवरवियाए एगेण य वणसंडेण सव्वतो समंता संपरिक्खित्ते दोणहवि वण्णओ तस्स णं कूडस्स उवरिं बहुसमरमणिज्जे भूमिभागे पन्नत्ते जाव मणीणं तणाय य सट्ठो तस्स णं बहुसमरमणिज्जस्स भूमिभागस्स बहुमज्झदेसभाए एगं सिद्धायतणं-कोसप्पमाणं सव्वा सिद्धाय-तणवत्तव्वया जंबूए णं सुदंसणाए पुरत्थिमिल्लस्स भवणस्स दाहिणेणं दाहिण-पुरत्थिमिल्लस्स पासायवडें-सगस्स उत्तरेणं एत्थ णं महं एगे कूडे पन्नत्ते तं चेव पमाणं सिद्धायतणं च जंबूए णं सुदंसणाए दाहि-णिल्लस्स भवणस्स पुरत्थिमेणं दाहिण-पुरत्थिमिल्लस्सपासायवडेंसगस्स पच्यत्थिमेणं एत्थ णं महं एगे कूडे पन्नत्ते तं चेव पमाणं सिद्धायतणं च जंबूए णं सुदंसणाए दाहिणिल्लस्स भवणस्स पच्यत्थिमेणं दाहि-णपच्यत्थि मिल्लस्स पासायवडेंसगस्स पुरत्थिमेणं एत्थ णं महं एगे केडू पन्नत्ते तं चेव पमाणं सिद्धा-यतणं च जंबूए णं सुदंसणाए पच्यत्थिमिल्लस्स भवणस्स दाहिणेणं दाहिण-पच्यत्थिमिल्लस्स पासाय-वडेंसगस्स उत्तरेणं एत्थ णं महं एगे कूडे पन्नत्ते तं चेव पमाणं सिद्धायतणं च जंबूए णं सुदंसणाए पच्यत्थिमिल्लस्स भवणस्स उत्तरेणं उत्तर-पच्यत्थिमिल्लस्स पासायवडेंसगस्स दाहिणेणं एत्थ णं महं एगे कूडे पन्नत्ते तं चेव पमाणं सिद्धायतणं च जंबूए णं सुदंसणाए उत्तरिल्लस्स भवणस्स पच्यत्थिमेणं उत्तर-पच्यत्थि-मिल्लस्स पासायवडेंसगस्स पुरत्थिमेणं एत्थ णं महं एगे कूडे पन्नत्ते तं चेव पमाणं सिद्धायतणं च जंबूए णं सुदंसणाए उत्तरिल्लस्स भवणस्स पुरत्थिमेणं उत्तर-पुरत्थिमिल्लस्स पासायवडेंसगस्स पच्यत्थिमेणं एत्थ णं महं एगे कूडे पन्नत्ते तं चेव पमाणं तहेव सिद्धायतणं जंबूए णं सुदंसणाए तुवालस नामधेज्जा पन्नत्ता [तं जहा]-

[१९२] सुदंसणा अमोहा य सुप्पबुद्धा जसोधरा ।

विदेहजंबू सोमणसा नियया निच्चमंडिया॥

[१९३] सुभद्धा य विसाला य सुजाया सुमणा वि य ।

सुदंसणाए जंबूए नामधेज्जा दुवालस ॥

[१९४] से केणट्ठेणं भंते एवं वुच्चइ-जंबू सुदंसणा गोयमा जंबूए णं सुदंसणाए जंबूदीवाहिवती अणाढिते नामं देवे महिइदीए जाव पत्तिओवमट्ठितीए परिवसति से णं तत्थ चउण्हं सामाणियसाहस्सीणं जाव आयरक्खदेवसाहस्सीणं जंबूदीवस्स जंबूए सुदंसणाए अणाढियाते य रायधाणीए जाव विहरति सेणट्ठेणं गोयमा एवं वुच्चति-जंबू सुदंसणा कहि णं भंते अणाढियस्स देवस्स अणाढिया नाम रायहाणी पन्नत्ता गोयमा जंबुदीवे दीवे मंदरस्स पव्वयस्स उत्तरेणं तिरियमसंखेज्जे एवं जहा विजयस्स देवस्स जाव समत्ता वत्तव्वया रायधाणीए एमहिइदीए अदुत्तरं च णं गोयमा जंबुदीवे दीवे उत्तरकुराए कुराए तत्थ-तत्थ देसे तहिं-तहिं बहवे जंबूरुक्खा जंबूवणा जंबूसंडा निच्चं कुसुमिया जाव वडंसगधरा से तेणट्ठेणं गोयमा एवं वुच्चइ-जंबुदीवे दीवे अदुत्तरं च णं गोयमा जंबुदीवस्स सासते नामधेज्जे पन्नत्ते-जण्ण कयावि नासि जाव निच्चे ।

[१९५] जंबुदीवे णं भंते दीवे कति चंडा पभासिंसु वा पभासंति वा पभासिस्संति वा कति सूरिया तविंसु वा तवंति वा तविस्संति वा कति नक्खत्ता जोयं जोइंसु वा जोयंति वा जोइस्संति वा कति महग्गहा चारं चरिंसु वा चरंति वा चरिस्संति वा कति तारागणकोडाकोडीओ सोभिंसु वा सोभंति वा पडिवत्ति-३

सोभिस्संति वा गोयमा जंबुदीवे णं दीवे दो चंडा पभासिंसु वा पभासंति वा पभासिस्संति वा दो सूरिया तविंसु वा तवंति वा तविस्संति वा छप्पन्नं नक्खत्ता जोगं जोइंसु वा जोयंति वा जोएस्संति वा छावत्तरं गहसतं चारं चरिंसु वा चरंति वा चरिस्संति वा ।

[१९६] एगं सतसहस्सं तेत्तीसं खलु भवे सहस्साइं ।

नव य सया पन्नसा तारागण कोडकोडीणं ॥

[१९७] सोभिंसु वा सोभंति वा सोभिस्संति वा ।

[१९८] जंबुदीवं दीवं लवणे नामं समुद्धे वट्ठे वलयागारसंठाणसंठिते सव्वतो समंता संपरिक्खित्ताणं चिट्ठति लवणे णं भंते समुद्धे किं समचक्कवालसंठिते विसमचक्कवालसंठिते गोयमा समचक्कवालसंठिते नो विसमचक्कवाल संठिते लवणे णं समुद्धे दो जोयणसतसहस्साइं चक्कवाल-विक्खंभेणं पन्नरस जोयणसयसहस्साइं एगासीइसहस्साइं सयमेगोणचत्तालीसे किंचिविसेसूणं परिकखेवणं से णं एक्काए पउमवरवेइयाए एगेणं य वणसंडेणं सव्वतो समंता संपरिक्खित्ते चिट्ठइ दोण्हवि वण्णओ सा णं पउमवरवेइया अद्धजोयणं उड्ढं उच्चत्तेणं पंच धणुसयविक्खंभेणं लवणसमुद्धसमिया परिकखेवणं सेसं तहेव से णं वणसंडे देसूणाइं दो जोयणाइं जाव विहरइ लवणस्स णं भंते समुद्धस्स कति दारा पन्नत्ता गोयमा चत्तारि दारा पन्नत्ता तं जहा- विजए वेजयंते जयंते अपराजिते कहि णं भंते लवणसमुद्धस्स विजए नामं दारे पन्नत्ते गोयमा लवणसमुद्धस्स पुरत्थिमपेरंते धायइसंडदीवपुरत्थिमद्धस्स पच्चत्थिमेणं सीओदाए महानदीए उप्पिं एत्थ णं लवणस्स समुद्धस्स विजए नामं दारे पन्नत्ते जंबुदीवविजयसरिसे जाव अट्ठमंगलगा से केणट्ठेणं भंते एवं वुच्चति-विजए दारे विजए दारे जो अट्ठो जंबुदीवगस्स कहिं णं भंते लवणगस्स विजयस्स देवस्स विजया नामं रायहाणी पन्नत्ता गोयमा विजयस्स दारस्स पुरत्थिमेणं तिरियमसंखेज्जे अण्णंमि लवणसमुद्धे बारस जोयणसहस्साइं ओगाहिता एत्थ णं विजयस्स देवस्स विजया

नामं रायहाणी पन्नत्ता जंबुद्वीवगसरिसा वत्तव्वया कहि णं भंते लवणसमुदस्स वेजयंते नाम दारे पन्नत्ते गोयमा लवणसमुदे दाहिणपेरंते धायइसंडदीवस्स दाहिणद्वस्स उत्तरेणं एत्थ णं वेजयंते नामं दारे पन्नत्ते सेसं तं चेव सव्वं एवं जयंते वि तस्स वि रायहाणी पच्चत्थिमेणं कहि णं भंते लवणसमुदस्स अपराजिते तहेव रायहाणी वि उत्तरेणं अपराजितस्स दारस्स अण्णंमि लवणे जहा विजयरायहाणि-गमो उड्ढं उच्चत्तं तहा लवणस्स णं भंते समुदस्स दारस्स य दारस्स य एस णं केवतियं अबाधाए अंतरे पन्नत्ते गोयमा तिण्णि जोयणसतसहस्साइं पंचाणउई सहस्साइं दोण्णि य असीते जोयणसते कोसं च दारस्स य दारस्स य अबाहाए अंतरे पन्नत्ते ।

[१९९] तिण्णिवे ससहस्सा पंचाणउतिं भवे सहस्साइं ।

दो जोयणसत असिता कोसं दारंतरे लवणे ॥

[२००] लवणस्स णं [भंते समुदस्स पएसा ध्ययइसंडं दीवं पुट्ठा हंता पुट्ठा ते ण भंते किं लवणे समुदे धायइसंडे दीवे गोयमा ते लवणे समुदे नो खलु ते धायइसंडे दीवे धायइसंडस्स णं भंते दीवस्स पदेसा लवणं समुदं पुट्ठा हंता पुट्ठा ते णं भंते किं धायइसंडे दीवे लवणे समुदे गोयमा धायइसंडे णं ते दीवे नो खलु ते लवणे समुदे] लवणे णं भंते समुदे जीवे उद्धाइत्ता-उद्धाइत्ता सो चेव विही एवं धायइ-संडेवि से केणट्ठेणं भंते एवं वुच्चइ-लवणे समुदे लवणे समुदे गोयमा लवणस्स णं समुदस्स उदगे आविले रइले लोणे लिंदे खारए कडुए अपेज्जे बहूणं चउप्पयल-मिय-पसु-पक्खि-सिरीसवाणं नण्णत्थ तज्जोणियाणं पडिवत्ति-३

सत्ताणं सुट्ठिए एत्थ लवणाहिवई देवे महिइदीए महज्जुतीए महाबले महायसे महासोक्खे महाणुभावे पलिओवमट्ठिईए से णं तत्थ चउण्हं सामाणियसाहस्सीणं जाव लवणसमुदस्स सुट्ठियाए रायहाणीए अण्णेसिं जाव विहरइ से एणट्ठेणं गोयमा एवं वुच्चइ-लवणे णं समुदे लवणे णं समुदे अदुत्तरं च णं गोयमा लवणे समुदे सासए जाव निच्चे ।

[२०१] लवणे णं भंते समुदे कति चंदा पभासिंसु वा पभासेंति वा पभासिस्संति वा एवं पंचण्हवि पुच्छा गोयमा लवणे णं समुदे चत्तारि चंदा पभासिंसु वा पभासेंति वा पभासिस्संति वा चत्तारि सूरिया तविंसु वा तवंति वा तविस्संति वा बारसुत्तरं नक्खत्तसयं जोगं जोइंसु वा जोयंति वा जोएस्संति वा तिण्णि बावणा महग्गहसया चारं चरिंसु वा चरंति वा चरिस्संति व दुण्णि सयसहस्सा सत्तट्ठिं च सहस्सा नव य सया तारागणकोडकोडीणं सोभं जाव सोभिस्सति वा ।

[२०२] कम्हा णं भंते लवणे समुदे चाउद्धसड्ढमुद्धिद्वपुण्णमासिणीसु अतिरेगं-अतिरगं वड्ढति वा हायति वा गोयमा जंबुद्वीवस्स णं दीवस्स चउद्धिसिं बाहिरिल्लाओ वेइयंताओ लवणसमुदं पंचाणउत्ति-पंचाणउत्तिं जोयणसहस्साइं ओगाहत्ता एत्थ णं चत्तारि महइमहालया महारंजर-संठाणसंठिया महापायला पन्नत्ता तं जहा- वलयामुहे केयुए जूयए ईसरे ते णं महापाताला एगमेगं जोयणसयसहस्सं उव्वेहेणं मूले दस जोयणसहस्साइं विक्खंभेणं मज्झे एगपदेसियाए सेढीए एगमेगं जोयणसतसहस्सं विक्खंभेणं उवरिं मुहमूले दस जोयणसहस्साइं विक्खंभेणं तेसि णं महापायालाणं कुड्डा सव्वत्थ समा दस-जोयणसतबाहल्ला सव्ववइरामया अच्छा जाव पडिरूवा तत्थ णं बहवे जीवा पोग्गला य अवक्कमंति विउक्कमंति चयंति उव्वज्जंति सासया णं ते कुड्डा दव्व-इयाए वण्णपज्जवेहिं गंधपज्जवेहिं रसपज्ज-वेहिं फासपज्जवेहिं असासया तत्थ णं चत्तारि देवा महि-इदीया जाव पलिओवमट्ठितीया परिवसंति तं जहा- काले महाकाले वेलंबे पंभजणे तेसि णं महापायालामं पत्तेयं-पत्तेयं तओ तिभागा पन्नत्ता तं जहा- हेट्ठिल्ले तिभागे

मज्झिम्मे तिभागे उवरिल्ले तिभागे ते णं तिभागा तेत्तीसं जोयणसहस्साइं तिण्णि य तेत्तीसे जोयणसते जोयणतिभागं च बाहल्लेणं पन्नत्ता तत्थ णं जेसे हेट्ठिल्ले तिभागे एत्थ णं वाउकाए संचिद्धति तत्थ णं जेसे मज्झिम्मे तिभागे एत्थ णं वाउकाए य आउकाए य संचिद्धति तत्थ णं जेसे उवरिल्ले तिभागे एत्थ णं आउकाए संचिद्धति अदुत्तरं च णं गोयमा लवणसुद्धे तत्थ-तत्थ देसे तहिं-तहिं बहवे कुड्डालिं जरसंठाणसंठिया खुड्डापायाला पन्नत्ता ते णं खुड्डापायाला एगमेगं जोयणसहस्सं उव्वेहेणं मूले एगमेगं जोयणसतं विक्खंभेणं मज्झे एगपदेसियाए सेढीए एगमेगं जोयणसहस्सं विक्खंभेणं उप्पिं मुहमूले एगमेगं जोयणसतं विक्खंभेणं तेसि णं खुड्डापायालाणं कुड्डा सव्वत्थ समा दसजोयणबाहल्ला सव्ववइरामया अच्छा जाव पडिरूवा तत्थ णं बहवे जीवा पोग्गला य जाव असासया पत्तेयं-पत्तेयं अद्धपलिओवमट्ठितीयाहिं देवताहिं परिग्गहिया तेसि णं खुड्डापातालाणं पत्तेयं-पत्तेयं तओ तिभागा पन्नत्ता तं जहा- हेट्ठिल्ले तिभागे मज्झिम्मे तिभागे उवरिल्ले तिभागे ते णं तिभागा तिण्णि तेत्तीसे जोयणसते-जोयणसते जोयणतिभागं च बाहल्लेणं पन्नत्ता तत्थ णं जेसे हेट्ठिल्ले तिभागे एत्थ णं वाउकाए संचिद्धति मज्झिम्मे तिभागे वाउआए आउयाए य संचिद्धति उवरिल्ले आउकाए संचिद्धति एवामेव सपुव्वावरेणं लवणसमुद्धे सत्त पायालसहस्स अद्ध य चुलसीता पातालसता भवंतीति मक्खाया तेसि णं खुड्डापातालाणं महापातालाणं य हेट्ठिममज्झिम्मेसु तिभागेसु बहवे ओराला वाया संसेयंति संमुच्छंति एयंति वेयंति चलंति घट्ठंति खुब्भंति फंदंति उदीरंति तं तं भावं परिणमंति जया णं तेसिं खुड्डापातालाणं पडिवत्ति-३

महापातालाणं य हेट्ठिल्लमज्झिम्मेसु तिभागेसु बहवे ओराला वाया जाव तं तं भावं परिणमंति तया णं से उदए उण्णामिज्जइ जया णं तेसिं खुड्डापायालाणं महापायालाणं य हेट्ठिल्लमज्झिम्मेसु तिभागेसु नो बहवे ओराला जाव तं तं भावं न परिणमंति तया णं से उदए नो उण्णामिज्जइ अंतरावि य णं ते वाया उदीरंति अंतरावि य णं से उदगे उण्णामिज्जइ एवं खलु गोयमा लवणे समुद्धे चाउद्धसद्धमुद्धिद्धपुन्न-मासिणीसु अइरेगं-अइरेगं वड्ढति वा हायति वा ।

[२०३] लवणे णं भंते समुद्धे तीसाए मुहुत्ताणं कतिखुत्तो अतिरेगं-अतिरेगं वड्ढति वा हायति वा गोयमा लवणे णं समुद्धे तीसाए मुहुत्ताणं दुक्खुत्तो अतिरेगं-अतिरेगं वड्ढति वा हायति वा से केणट्ठेणं भंते एवं वुच्चइ-गोयमा उद्धमंतेसु पायालेसु वड्ढइ आपूरंतेसु पायालेसु हायइ से तेणट्ठेणं एवं वुच्चइ लवमे णं समुद्धे तीसाए मुहुत्ताणं दुक्खुत्तो अइरेगं अइरेगं वड्ढइ वा हायइ वा ।

[२०४] लवणसिहा णं भंते केवतियं चक्कवालविक्खंभेणं केवतियं अइरेगं-अइरेगं वड्ढति वा हायति वा गोयमा लवणसिहा णं सव्वत्थ समा दस जोयणसहस्साइं चक्कवालविक्खंभेणं देसूणं अद्धजोयणं अतिरेगं-अतिरेगं वड्ढति वा हायति वा, लवणस्स णं भंते समुद्धस्स कति नागसाहस्सीओ अब्भितरियं वेलं धरंति कति नागसाहस्सीओ बाहिरियं वेलं धरंति कति नागसाहस्सीओ अग्गोदयं धरंति गोयमा लवण-समुद्धस्स बायालीसं नागसाहस्सीओ अब्भितरियं वेलं धरंति बावत्तरिं नागसाहस्सीओ बाहिरियं वेलं धरंति सट्ठिं नागसाहस्सीओ अग्गोदयं धरंति एवमेव सपुव्वावरेणं एगा नागसतसाहस्सी चोवत्तरिं च नागसहस्सा भवंतीति मक्खाया ।

[२०५] कति णं भंते बेलंधरनागरायाणो पन्नत्ता गोयमा चत्तारि वेलंधरनागरायाणो पन्नत्ता तं जहा- गोथूभे सिवए संखे मणोसिलए एतेसि णं भंते चउण्हं वेलंधरनागरायाइणं कति आवासपव्वता पन्नत्ता गोयमा चत्तारि आवासपव्वता पन्नत्ता तं जहा- गोथूभे दओभासे संखे दगसीमे

कहि णं भंते गोथूभस्स वेलंधरनागरायस्स गोथूमे नामं आवासपव्वते पन्नत्ते गोयमा जंबुद्दीवे दीवे मंदरस्स पव्वयस्स पुरत्थिमेणं लवणसमुद्धं बायालीसं जोयणसहस्साइं ओगाहिन्ता एत्थ णं गोथूभस्स वेलंधरनागरायस्स गोथूभे नामं आवासपव्वते पन्नत्ते सत्तरसएक्कवीसाइं जोयणसताइं उड्ढं उच्चत्तेणं चत्तारि तीसे जोयणसते कोसं च उव्वेधेणं मूले दसबावीसे जोयणसते आयाम-विक्कंभेणं मज्झे सत्त तेवीसे जोयण-सते आयाम-विक्कंभेणं उवरिं चत्तारि चउवीसे जोयणसए आयामविक्खंभेणं मूले तिण्णि जोयणसहस्साइं दोण्णि य बत्तीसुत्तरे जोयणसए किंचिविसेसूणे परिकखेवेणं मज्झे दो जोयणसहस्साइं दोण्णि य छलसीते जोयणसते किंचिवि-सेसाहिए परिकखेवेणं उवरिं एगं जोयणसहस्सं तिण्णि य ईयाले जोयणसते किंचिविसेसूणे परिकखेवेणं मूले वित्थिण्णे मज्झे संखित्ते उप्पिं तणुए गोपुच्छसंठाणसंठिए सव्वकणगामए अच्छे जाव पडिरूवे से णं एगाए पउमवरवेयाए एगेणं य वणसंडेणं सव्वतो समंता संपरिक्खित्ते दोण्हवि वण्णओ गोथूभस्स णं आवासपव्व-तस्स उवरिं बहुसमरमणिज्जे भूमिभागे पन्नत्ते जाव आसयंति तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं पासायवडंसए बावद्धि जोयणद्धं च उड्ढं उच्चत्तेणं तं चेव पमाणं अद्ध आयामविक्खंभेणं वण्णओ जाव सीहासणं सपरिवारं से केणट्ठेणं भंते एवं-वुच्चइ-गोथूभे आवासपव्वए गोथूभे आवासपव्वए गोयमा गोथूभे णं आवासपव्वत्ते खुड्डा-खुड्डियासु जाव बिलपंतियासु बहूइं उप्पलाइं जाव सहस्सपत्ताइं गोथूभप्पभाइं गोथूभागाराइं गोथूभवण्णाइं गोथूभवण्णाभाइं गोथूभे य एत्थ देवे महिड्डीए जाव पलिओवमद्धितीए परिवसति से णं तत्थ चउण्हं सामाणियसाहस्सीणं जाव गोथूभस्स आवासपव्व-पडिवत्ति-३

तस्स गोथूभाए रायहाणीए जाव विहरति से तेणट्ठेणं गोयमा एवं वुच्चति-गोथूभे आवासपव्वते गोथूभे आवासपव्वते जाव निच्चे ।

रायहाणिपुच्छा गोयमा गोथूभस्स आवासपव्वतस्स पुरत्थिमेणं तिरियमसंखेज्जे दीवसमुद्धे वीतिवड्ढत्ता अण्णंमि लवणसमुद्धे बारस जोयणसहस्साइं ओगाहिन्ता जहा विजया कहि णं भंते सिवगस्स वेलंधरनागरायस्स दओभासणामे आवासपव्वते पन्नत्ते गोयमा जंबुद्दीवे णं दीवे मंदरस्स पव्वयस्स दक्खिणेणं लवणसमुद्धं बायालीसं जोयणसहस्साइं ओगाहिन्ता एत्थ णं सिगस्स वेलंधर-नागरायस्स दओभासे नामं आवा-सपव्वते पन्नत्ते जहा गोथूभो जाव सीहासणं सपरिवारं से केणट्ठेणं भंते एवं वुच्चइ-दओभासे आवासपव्वते दओभासे आवासपव्वते गोयमा दओभासे णं आवासपव्वते लवणसमुद्धे अड्डजोयणिए खेत्ते दगं सव्वतो समंता ओभासेति उज्जोवेति तावेति पभासेति सिवए एत्थ देवे महिड्डीए जाव रायहाणी से दक्खिणेणं सिविगा दओभासस्स सेसं तं चेव कहि णं भंते संखस्स वेलंधरनागरायस्स संखे नामं आवासपव्वते पन्नत्ते गोयमा जंबुद्दीवे णं दीवे मंदरस्स पव्वयस्स पच्चत्थिमेणं बायालीसं जोयणसहस्साइं ओगाहिन्ता एत्थ णं संखस्स वेलंधरनागरायस्स संखे नामं आवासपव्वते पन्नत्ते गोथूभगमो जाव सीहासणं सपरिवारं से केणट्ठेणं भंते एवं वुच्चइ-संखे आवासपव्वते संखे आवासपव्वते गोयमा संखे आवासपव्वते खुड्डा-खुड्डियासु जाव बिलपंतियासु बहूइं उप्पलाइं जाव सहस्सपत्ताइं संखप्पभाइं संखागाराइं संखवण्णाइं संखवण्णाभाइं संखे य एत्थ देवे महिड्डीए जाव विहरति से तेणट्ठेणं रायहाणी संखपव्वयस्स पच्चत्थिमेणं विजयारायहाणी गमो कहि णं भंते मणोसिलगस्स वेलंधरनागरायस्स दगसीमे नामं आवासपव्वते पन्नत्ते गोयमा जंबुद्दीवे दीवे मंदरस्स पव्वयस्स उत्तरेणं लवणसमुद्धं बायालीसं जोयणसहस्साइं ओगाहिन्ता एत्थ णं मनोसिलगस्स वेलंधरनागरायस्स दगसीमे नामं आवासपव्वते पन्नत्ते

गोथूभगमेणं जाव सीहासणं सपरिवारं से केणट्ठेणं भंते एवं वुच्चइ-दगसीमे आवासपव्वते दगसीमे आवासपव्वते गोयमा दगसीमे णं आवासपव्वते सीतासीतोदाणं महानदीणं सोता तत्थ गता ततो पडिहता पडिणियत्तंति मणोसिलए य एत्थ देवे महिइदीए जाव विहरति से तेणट्ठेणं [मणोसिला रायहाणी दगसीमस्स आवासपव्वयस्स उत्तरेणं तिरियमसंखेज्जे दीवसमुद्धे वीतिवतित्ता अण्णमि लवणे तहेव पा०] कहि णं भंते मणोसिलगस्स वेलंधरनागारायस्स मणोसिला नाम रायहाणी गोयमा दगसीमस्स आवासपव्वयस्स उत्तरेणं तिरि अण्णमि लवणे एत्थ णं मणोसिलया नाम रायहाणी पन्नत्ता तं चेव पमाणं जाव मणोसिलाए देवे ।

[२०६] कणगंकरयफालियमया य वेलंधराणमावासा ।

अनुवेलंधरराईणं पव्वया हौंति रयणमया ॥

[२०७] कइ णं भंते अनुवेलंधरनागरायाणो पन्नत्ता गोयमा चत्तारि अनुवेलंधरनागरायाणो पन्नत्ता तं जहा- कक्कोडए कद्धमए केलासे अरुणप्पभे एतेसि णं भंते चउण्हं अनुवेलंधरनागराईणं कति आवासपव्वया पन्नत्ता गोयमा चत्तारि आवासपव्वया पन्नत्ता तं जहा- कक्कोडए विज्जुप्पभे केलासे अरुणप्पभे कहि णं भंते कक्कोडगस्स अनुवेलंधरनागरायास्स कक्कोडएनाम आवासपव्वते पन्नत्ते गोयमा जंबुद्धीवे दीवे मंदरस्स पव्वयस्स उत्तरपुरत्थिमेणं लवणसमुद्धं बायालीसं जोयणसहस्साइं ओगाहित्ता एत्थ णं कक्कोडगयस्स नागरायास्स कक्कोडए नाम आवासपव्वते पन्नत्ते-सत्तरस एक्कवीसाइं जोयणसताइं तं चेव पमाणं जं गोथूभस्स नवरि-सव्वरयणामए अच्छे जाव निरवसेसं जाव सीहासणं सपरिवारं अट्ठो से बहूइं

पडिवत्ति-३

उप्पलाइं कक्कोडप्पभाइं सेसं तं चेव नवरिकक्कोडगपव्वयस्स उत्तरपुरत्थिमेणं एवं तं चेव सव्वं कद्धमस्सवि सो चेव गमओ अपरिसेसिओ नवरि-दाहिणपुरत्थिमेणं आवसो विज्जुप्पभा रायहाणी दाहिणपुरत्थिमेणं केलासेवि एवं चेव नवरिदाहिणपच्चत्थिमेणं केलासावि रायाहाणि ताए चेव दिसाए अरुणप्पभेवि उत्तरपच्चत्थिमेणं रायहाणीवि ताए चेव दिसाए चत्तारि वि एगप्पमाणा सव्वरयणामया य ।

[२०८] कहि णं भंते सुट्ठियस्स लवणाहिवइस्सा गोयमदीवे नाम दीवे पन्नत्ते गोयमा जंबुद्धीवे दीवे मंदरस्स पव्वयस्स पच्चत्थिमेणं लवणसमुद्धे बारसजोयणसहस्साइं ओगाहित्ता एत्थ णं सुट्ठियस्स लवणाहियइस्स गोयमदीवे नाम दीवे पन्नत्ते-बारसजोयणसहस्साइं आयामविकखंभेणं सत्ततीसं जोयणसहस्साइं नव य अडयाले जोयणसए किंचिविसेसूणे परिकखेवेणं जंबूदीवंतेणं अद्धेकूणनउत्ति जोयणाइं चत्तालिसं च पंचाणउत्तिभागे जोयणस्स ऊसिए जलंताओ लवणसमुद्धं तेणं दो कोसे ऊसिते जलंतो से णं एगाए पउमवरवेइयाए एगेणं वणसंडेणं सव्वतो समंता संपरिक्खित्ते वण्णओ दोण्हवि गोयमदीवस्स णं दीवस्स अंतो बहुसमरमणिज्जे भूमिभागे पन्नत्ते से जहानामएआलिंगपुक्खरेइ वा जाव आसयंति तस्स णं बहुसमरमणिज्जस्स भूमिभागस्स बहुमज्झदेसभागे एत्थ णं सुट्ठियस्स लवणाहिवइस्स महं एगे अइक्कीला-वासे नामं भोमेज्जविहारे पन्नत्ते-बावट्ठिं जोयणाइं अद्धजोयणं च उइं उच्चत्तेणं एक्कतीसं जोयणाइं कोसं च विकखंभेणं अणेगखंभसतसन्निविट्ठे भवणवण्णओ भाणियव्वो अइक्कीलावासस्स णं भोमेज्जविहारस्स अंतो बहुसमरमणिज्जे भूमिभागे पन्नत्ते जाव मणीणं फासो तस्स णं बहुसमर-मणिज्जस्स भूमिभागस्स बहुमज्झदेसभाए एत्थ णं महं एगा मणिपेढिया पन्नत्ता सा णं मणिपेढिया जोयणं आयाम-विकखंभेणं अद्धजोयणं बाहल्लेणं सव्वमणिमई अच्छा जाव पडिरूवा तीसे णं मणिपेढियाए उवरिं एत्थ णं

देवसयणिज्जे पन्नत्ते वण्णओ उप्पिं अट्ठमंगलगा से केणट्ठेणं भंते एवं वुच्चति-गोयमदीवे गोयमदीवे गोयमा गोयमदीवस्स णं दीवस्स सासते नामधेज्जे पन्नत्ते न कयावि नासि जाव निच्चे सुट्ठिए य एत्थ देवे महिड्ढीए जाव पलिओवमट्ठितीए परिवसति से णं तत्थ चउण्हं सामाणियसाहस्सीणं जाव गोयम-दीवस्स सुट्ठियाए रायहाणीए अण्णेसिं च बहूणं वाणमंतराणं देवाणं देवीण य आहेवच्चं जाव विहरति से तेणट्ठेणं गोयमा एवं वुच्चति-गोयमदीवे गोयमदीवे कहिं णं भंते सुट्ठियस्स लवणाहियइस्स सुट्ठिया नामं रायहाणी पन्नत्ता गोयमा गोयमदीवस्स पच्चत्थिमेणं तिरियमसंखेज्जे जाव अण्णंमि लवणसमुद्धे बारस जोयणसहस्साइं ओगाहित्ता एवं तहेव सव्वं नेयव्वं जाव सुत्थिए देवे ।

[२०९] कहिं णं भंते जंबुद्धीवगाणं चंदाणं चंददीवा नामं दीवा, जंबुद्धीवे दीवे मंदरस्स पव्वयस्स पुरत्थिमेणं लवणसमुद्धं बारस जोयणसहस्साइं ओगाहित्ता एत्थ णं जंबुद्धीवगामं चंदाणं चंददीवा नामं दीवा पन्नत्ता-बारस जोयणसहस्साइं आयाम-विक्खंभेणं सेसं तं चेव जहा- गोतमदीवस्स परिक्खेवो जंबुद्धीवन्तेणं अट्ठेकोणनउइं जोयणाइं चत्तालीसं पंचानउतिं भागे जोयणस्स ऊसिया जलंताओ लवणसमुद्धंतेणं दो कोसे ऊसिता जलंताओ परमवरवेइया पत्तेयं-पत्तेयं वणसंडपरिक्खित्ते दोण्हवि वण्णओ भूमिभागा तस्स बहुमज्झदेसभागे पासादवड्डेसगा विजयमूलपासादसरिसया जाव सीहासणा सपरिवारा से केणट्ठेणं भंते एवं वुच्चइ-चंददीवा गोयमा बहुसु खुड्डाखुड्डियासु जाव विलपंतियासु बहूइं उप्पलाइं जाव सहस्सपत्ताइं चंदप्पभाइं चंदागाराइं चंदवण्णाइं चंदवण्णभाइं चंदा य एत्थ देवा महिड्ढीया जाव पलिओवमट्ठितीया परिवसंति ते णं तत्थ पत्तेयं-पत्तेयं चउण्हं सामाणियसाहस्सीणं जाव चंददीवाणं चंदाणं य रायहाणीणं अण्णेसिं च बहूणं जोतिसियाणं देवाणं देवी य आहेवच्चं जाव विहरंति से तेणट्ठेणं गोयमा चंददीवा

जाव

पडिवत्ति-३

निच्चा, कहिं णं भंते जंबुद्धीवगाणं चंदाणं चंदाओ नाम रायहाणीओ पन्नत्ताओ गोयमा चंददीवाणं पुरत्थिमेणं तिरियमसंखेज्जे दीवसमुद्धे वीइवइत्ता अण्णंमि जंबुद्धीवे दीवे बारस जोयणसहस्साइं ओगाहित्ता तं चेव पमाणं जाव एमहिड्ढीया चंदा देवा चंदा देवा कहिं णं भंते जंबुद्धीवगाणं सूराणं सूरदीवा नामं दीवा, जंबुद्धीवे दीवे मंदरस्स पव्वयस्स पच्चत्थिमेणं लवणसमुद्धं बारस जोयणसहस्साइं ओगाहित्ता तं चेव उच्चत्तं आयाम-विक्खंभेणं परिक्खेवो वेदिया वणसंडा भूमिभागा जाव आसयंति पासायवड्डेसगाणं तं चेव पमाणं मणिपेढिया सीहासणा सपरिवारा अट्ठो उप्पलाइं सूरप्पभाइं सूरा एत्थ देवा जाव रायहाणीओ सकाणं दीवाणं पच्चत्थिमेणं अण्णंमि जंबुद्धीवे दीवे सेसं तं चेव जाव सूरा देवा ।

[२१०] कहिं णं भंते अब्भितरलावणगाणं चंदाणं चंददीवा नामं दीवा, जंबुद्धीवे दीवे मंदरस्स पव्वयस्स पुरत्थिमेणं लवणसमुद्धं बारस जोयणसहस्साइं ओगाहित्ता एत्थ णं अब्भितरलावणगाणं चंदाणं चंददीवा नामं दीवा पन्नत्ता जहा- जंबुद्धीवगा चंदा तहा भाणियव्वा नवरि-रायहाणीओ अण्णंमि लवणे सेसं तं चेव एवं अब्भितरलावणगाणं सूराणवि लवणसमुद्धं बारस जोयणसहस्साइं तहेव सव्वं जाव रायहाणो, कहिं णं भंते बाहिरलावणगाणं चंदाणं चंददीवा नाम दीवा, लवणस्स समुद्धस्स पुरत्थिमिल्लाओ वेदियंताओ लवणसमुद्धं पच्चत्थिमेणं बारस जोयणसहस्साइं ओगाहित्ता एत्थ णं बाहिरलावणगाणं चंदाणं चंददीवा नामं दीवा पन्नत्ता-बारस जोयणसहस्साइं आयामविक्खंभेणं घायइसंडदीवन्तेणं अट्ठेकोणनवतिं जोयणाइं चत्तालीसं च पंचनउतिभागे जोयणस्स ऊसिता जलंताओ लवणसमुद्धंतेणं दो कोसे ऊसिता पउमवरवेइया वणसंडा बहुसमरमणिज्जा भूमिभागा मणिपेढिया सीहासणा सपरिवारा सो चेव अट्ठो रायहाणीओ सगाणं

दीवाणं पुरत्थिमेणं तिरियमसंखेज्जे दीव समुद्धे वीइवइत्ता अण्णंमि लवणसमुद्धे तहेव सव्वं कहिं णं भंते बाहिरलावणगाणं सूरा णं सूरदीवा नामं दीवा, लवणसमुद्धपच्चत्थिमिल्लाओ वेदियंताओ लवणसमुद्धं पुरत्थिमेणं बारस जोयणसहस्साइं धावइतसंडदीवन्तेणं अद्धे-कूणउत्तिं जोयणाइं चत्तालीसं च पंचनउत्तिभागे जोयणस्स लवणसमुद्धंतेणं दो कोसे ऊसिया सेसं तहेव जाव रायहाणीओ सगाणं दीवाणं पच्चत्थिमेणं तिरियमसंखेज्जे लवणे चेव बारस जोयणा तहेव सव्वं भाणियव्वं ।

[२११] कहि णं भंते घायइसंडदीवगाणं चंदाणं चंददीवा नामं दीवा पन्नत्ता गोयमा घायइ-संडस्स दीवस्स पुरत्थिमिल्लाओ वेदियंताओ कालोयं णं समुद्धं बारस जोयणसहस्साइं ओगाहत्ता एत्थ णं घायइसंडदीवगाणं चंदाणं चंददीवा नामं दीवा पन्नत्ता सव्वतो समंता दो कोसा ऊसिता जलंताओ बारस जोयणसहस्साइं तहेव विक्खंभ परिकखेवो भूमिभागो पासायवडिंसया मणिपेढिया सीहासणा सपरिवारा अट्ठो तहेव रायहाणीओ सकाणं दीवाणं पुरत्थिमेणं अण्णंमि घायइसंडे दीवे सेसं तं चेव एवं सूरदीवानि नवरं-घायइसंडस्स दीवस्स पच्चत्थिमिल्लातो वेदियंताओ कालोयं णं समुद्धं बारस जोयणसहस्साइं तहेव सव्वं जाव रायहाणीओ सूराणं दीवाणं पच्चत्थिमेणं अण्णंमि घायइसंडे दीवे सव्वं तहेव ।

[२१२] कहि णं भंते कालोयगाणं चंदाणं चंददीवा नामं दीवा पन्नत्ता गोयमा कालोयसमुद्धस्स पुरत्थिमिल्लाओ वेदियंताओ कालोयणं समुद्धं पच्चत्थिमेणं बारस जोयणसहस्साइं ओगाहत्ता एत्थ णं कालोयगचंदाणं चंददीवा नामं दीवा पन्नत्ता सव्वतो समंता दो कोसा ऊसिता जलंताओ सेसं तहेव जाव रायहाणीओ सगाणं दीवाणं पुरत्थिमेणं अण्णंमि कालोयसमुद्धे बारस जोयमसहस्साइं तं चेव सव्वं जाव चंदा देवा, चंदा देवा एवं सूराणवि नवरं-कालोयस्स पच्चत्थिमिल्लातो वेदियंताओ कालोयसमुद्धपुरत्थिमेणं बारस जोयणसहस्साइं ओगाहत्ता तहेव रायहाणीओ सगाणं दीवाणं पच्चत्थिमेणं अण्णंमि कालोयसमुद्धे तहेव पडिवत्ति-३

सव्वं एवं पुक्खरवरगाणं चंदाणं पुक्खरवरस्स दीवस्स पुरत्थिमिल्लाओ वेदियंताओ पुक्खरसमुद्धं बारस जोयणसहस्साइं ओगाहत्ता चंददीवा अण्णंमि पुक्खरवरे दीवे रायहाणीओ तहेव एवं सूराणवि दीवा पुक्खरवरदीवस्स पच्चत्थिमिल्लाओ वेदियंताओ पुक्खरोदंसमुद्धं बारस जोयणसहस्साइं ओगाहत्ता तहेव सव्वं जाव रायहाणीओ दीवल्लगाणं दीवे समुद्धगाणं समुद्धे चेव एगाणं अब्भिंतरपासे एगाणं बाहिरपासे रायहाणीओ दीवल्लगाणं दीवेसु समुद्धगाणं समुद्धेसु सरिणामएसु ।

[२१३] इमे नामा अनुगंतव्वा ।

[२१४] जंबुद्धीवे लवणे धायइ-कालोद-पुक्खरे वरुणे ।

खीर-धय-खोय-नंदी अरुणवरे कुंडले रुयगे ॥

[२१५] आभरण-वत्थ-गंधे उप्पल-तिलए य पुढवि-निहि-रयणे ।

वासहर-दह-नईओ विजया वक्खार-कप्पिंदा ॥

[२१६] कुरु-मंदर मावासा कूडा नक्खत्त-चंद सूरय एवं भाणियव्वं ।

[२१७] कहि णं भंते देवदीवगाणं चंदाणं चंददीवा नामं दीवा पन्नत्ता गोयमा देवदीवस्स पुरत्थिमिल्लाओ वेदियंताओ देवोदं समुद्धं बारस जोयणसहस्साइं ओगाहत्ता एत्थ णं देवदीवगाणं चंदाणं चंददीवा नामं दीवा पन्नत्ता सच्चेव वत्तव्या जाव अट्ठो रायहाणीओ सगाणं दीवाणं पच्चत्थिमेणं देवदीवं असंखेज्जाइं जोयणसहस्साइं ओगाहत्ता एत्थ णं देवदीवगाणं चंदाणं चंदाओ नामं रायहाणीओ पन्नत्ताओ

कहि णं भंते देवदीवगाणं सूरानं सूरदीवा नामं दीवा पन्नत्ता गोयमा देवदीवस्स पच्चत्थिमिल्लाओ वेइयंताओ देवोदं समुद्धं बारस जोयणसहस्साइं ओगाहत्ता एत्थ णं देवदीवगाणं सूरानं सूरदीवा नामं दीवा पन्नत्ता तघेव रायहाणीओ सगाणं दीवाणं पुरत्थिमेणं देवदीवं असंखेज्जाइं जोयणसहस्साइं ओगाहत्ता एत्थ णं कहि णं भंते देवसमुद्धगाणं चंदाणं चंददीवा नामं दीवा पन्नत्ता गोयमा देवोदगस्स समुद्धगस्स पुरत्थिमिल्लाओ वेदियंताओ देवोदगं समुद्धं पच्चत्थिमेणं बारस जोयण-सहस्साइं तेणेव कमेणं जाव रायहाणीओ सगाणं दीवाणं पच्चत्थिमेणं देवोदगं समुद्धं असंखेज्जाइं जोयणसहस्साइं ओगाहत्ता एत्थ णं देवोदगाणे चंदाणं चंदाओ नामं रायहाणीओ पन्नत्ताओ तं चेव सव्वं एवं सूरानवि नवरि-देवोदगस्स पच्चत्थिमिल्लाओ वेइयंताओ देवोदगसमुद्धं पुरत्थिमेणं बारस जोयणसहस्साइं ओगाहत्ता रायहाणीओ सगाणं-सगाणं दीवाणं पुरत्थिमेणं देवोदगं समुद्धं असंखेज्जाइं जोयणसहस्साइं एवं नागे जक्खे भूतेवि चउण्हं दीवसमुद्धाणं कहि णं भंते सयंभूरमण-दीवगाणं चंदाणं चंददीवा नामं दीवा पन्नत्ता सयंभूरमणस्स दीवस्स पुरत्थिमिल्लाओ वेतियंताओ सयंभूरमणोदगं समुद्धं बारस जोयणसहस्साइं तहेव रायहाणीओ सगाणं दीवाणं पुरत्थिमेणं सयंभूरमणोदगं समुद्धं पुरत्थिमेणं असंखेज्जाइं जोयण तं चेव एवं सूरानवि सयंभूरमणस्स पच्चत्थिमिल्लाओ वेदियंताओ रायहाणीओ सकाणं सकाणं दीवाणं पच्चत्थिमिल्लाणं सयंभूरमणोदं समुद्धं असंखेज्जा सेसं तं चेव कहि णं भंते सयंभूरमणसमुद्धकाणं चंदाणं, सयंभूरमणस्स समुद्धस्स पुरत्थिमिल्लाओ वेतियंताओ सयंभूरमणं समुद्धं पच्चत्थिमेणं बारस जोयणसहस्साइं ओगाहत्ता सेसं तं चेव एवं सूरानवि सयंभूरमणस्स पच्चत्थिमिल्लाओ सयंभूरमणीदं समुद्ध पुरत्थिमेणं बारस जोयणसहस्साइं ओगाहत्ता राहाणीओ सगाणं दीवाणं पुरत्थिमेणं सयंभूरमणं समुद्धं असंखेज्जाइं जोयणसहस्साइं ओगाहत्ता एत्थ णं सयंभूरमण जाव सूरदेवा ।

[२१८] अत्थि णं भंते लवणसमुद्धे वेलंधराति वा नागराया अग्धाति वा खन्नाति वा सिंहाति पडिवत्ति-३

वा विजातीति वा हासवुड्ढीति वा हंता अत्थि जहा णं भंते लवणसमुद्धे अत्थि वेलंधराति वा नागराया अग्धाति वा जाव हासवुड्ढीति वा तहा णं बाहिरएसुवि समुद्धेसु अत्थि वेलंधराइ वा नागराया अग्धाति वा जाव विजातीति वा हासवुड्ढीति वा नो तिण्ढे समद्धे ।

[२१९] लवणे णं भंते समुद्धे किं ऊसितोदगे पत्थडोदगे खुभियजले अखुभियजले गोयमा लवणे णं समुद्धे ऊसितोदगे नो पत्थडोदगे खुभियजले नो अक्खुभियदले जहा णं भंते लवणे समुद्धे ऊसितोदगे नो पत्थडोदगे खुभियजले नो अक्खुभियजले तहा णं बाहिरगा समुद्धा किं ऊसितोदगा पत्थडोदगा खुभियजला अक्खुभियजला गोयमा बाहिरगा समुद्धा नो ऊसितोदगा पत्थडोदगा नो खुभियजला अक्खुभियजला पुन्ना पुन्नप्पमाणा वोलट्टमाणा वोसट्टमाणा समभरघडत्ताए चिद्धंति अत्थि णं भंते लवणसमुद्धे बहवे ओराला बलाहका संसेयंति संमुच्छंति वासं वासंति हंता अत्थि जहा णं भंते लवणसमुद्धे बहवे ओराला बलाहका संसेयंति संमुच्छंति वासं वासंति तहा णं बाहिरएसुवि समुद्धेसु बहवे ओराला बलाहका संसेयंति संमुच्छंति वासं वासंति नो तिण्ढे समद्धे से केण्ढेणं भंते एवं वुच्चति-बाहिरगा णं समुद्धा पुन्ना पुन्नप्पमाणा वोलट्टमाणा बोसट्टमाणा समभरघडत्ताए चिद्धंति गोयमा बाहिरएसु णं समुद्धेसु बहवे उदगजोणिया जीवा पोग्गला य उदगत्ताए वक्कमंति विउक्कमंति चयंति उववज्जंति से तेण्ढेणं गोयमा एवं वुच्चति-बाहिरगा णं समुद्धा पुन्ना पुन्नप्पमाणा जाव समभरघडत्ताए चिद्धंति ।

[२२०] लवणे णं भंते समुद्धे केवतियं उव्वेह-परिवुड्ढीए पन्नत्ते गोयमा लवणस्स णं समुद्धस्स उभओ पासिं पंचानउत्ति-पदेसे गंता पदेसं उव्वेह-परिवुड्ढीए पन्नत्ते पंचानउत्ति-बालग्गाइं गंता वालग्गं उव्वेह-परिवुड्ढीए पन्नत्ते पंचानउत्ति-लिक्खाओ गंता लिक्खं उव्वेह-परिवुड्ढीए पन्नत्ते जूया-जव-जयमज्झो अंगुल-विहत्थि-रयणी-कुच्छी-धणु-गाउय-जोयण-जोयणसत-जोयणसहस्साइं गंता जोयणसहस्सं उव्वेह-परिवुड्ढीए पन्नत्ते लवणे णं भंते समुद्धे केवतियं उस्सेह-परिवुड्ढीए पन्नत्ते गोयमा लवणस्स णं समुद्धस्स उभओपासिं पंचानउत्ति पदेसे गंता सोलसपएसे उस्सेह-परिवुड्ढीए पन्नत्ते पंचानउत्ति-बालग्गाइं गंता सोलस-बालग्गाइं उस्सेह-परिवुड्ढीए एवं जाव पंचानउत्ति-जोयणसहस्साइं गंता सोलस-जोयणसहस्साइं उस्सेह-परिवुड्ढीए ।

[२२१] लवणस्स णं भंते समुद्धस्स केमहालए गोतित्थे, गो. लवणस्स णं समुद्धस्स उभओ-पासिं पंचाणउत्तिं जोयणसहस्साइं गोतित्थे पन्नत्ते लवणस्स णं भंते समुद्धस्स केमहालए गोतित्थविरहिते खेत्ते गोयमा लवणस्स णं समुद्धस्स दस जोयणसहस्साइं गोतित्थविरहिते खेत्ते पन्नत्ते लवणस्स भंते समुद्धस्स केमहालए उदगमाले गोयमा दस जोयणसहस्साइं उदगमाले पन्नत्ते ।

[२२२] लवणे णं भंते समुद्धे किंसंठिए पन्नत्ते गोयमा गोतित्थसंठिते नावासंठिते सिप्पि-संपुडसंठिते अस्सखंधसंठिते वलभिसंठिते वट्ठे वलयागारसंठिते पन्नत्ते लवणे णं भंते समुद्धे केवतियं चक्कवालविक्खंभेणं केवतियं परिकखेवेणं केवतियं उव्वेहेणं केवतियं उस्सेहेणं केवतियं सव्वग्गेणं पन्नत्ते गोयमा लवणे णं समुद्धे दो जोयणसहयसहस्साइं चक्कवालविक्खंभेणं पन्नरस जोयणसतसहस्साइं एकासीतिं च सहस्साइं सतं च एगुणयालं किंचिविसेसूणं परिकखेवेणं एगं जोयणसहस्सं उव्वेधेणं सोलस जोयणसहस्साइं उस्सेहेणं सत्तरस जोयणसहस्सिं सव्वग्गेणं ।

[२२३] जइ णं भंते लवणसमुद्धे दो जोयणसतसहस्साइं चक्कवालविक्खंभेणं पन्नरस जोयणसतसहस्साइं एकासीतिं च सहस्साइं सतं च एगुणयालं किंचिविसेसूणं परिकखेवेणं एगं जोयणसहस्सं पडिवत्ति-३

उव्वेहेणं सोलस जोयणसहस्साइं उस्सेधेणं सत्तरस जोयणस्सस्साइं सव्वग्गेणं पन्नत्ते कम्हा णं भंते लवणसमुद्धे जंबुद्धीवे दीवं नो ओवीलेति नो उप्पीलेति नो चेव णं एगोदगं करेति गोयमा जंबुद्धीवे णं दीवे भरहेरवएसु वासेसु अरहंता चक्कवट्ठी बलदेवा वासुदेवा चारणा विज्जाधरा समणा समणीओ सावया सावियाओ मणुया पगतिभद्दया पगतिविणीया पगतिउवसंता पगतिपयणुकोहमाणमायालोभा मिउमद्दव-संपन्ना अल्लीणा भद्दगा विणीता तेसि णं पणिहाए लवणसमुद्धे जंबुद्धीवे दीवं नो ओवीरेति नो उप्पिलेति नो चेव णं एगोदगं करेति चुल्लहिमवंत-सिहरिसु वासहर-पव्वतेसु देवा महिड्ढिया जाव पलिओवमट्ठितीया परिवसंति तेसि णं पणिहाए लवणसमुद्धे जंबुद्धीवं दीवं नो ओवीलेति नो उप्पीलेति नो चेव णं एगोदगं करेति हेमवत-हेरणवतेसु वासेसु मणुया पगति-भद्दगा जाव विणीता तेसि णं पणिहाए लवणसमुद्धे जंबुद्धीवं दीवं नो ओवीलेति नो उप्पीलेति नो चेव णं एगोदगं करेति सद्दावति-वियडावतिसु वट्ठवेयड्ढपव्वतेसु देवा महिड्ढिया जाव पलिवओवमट्ठितीया परिवसंतितेसि णं पणिहाए लवणसमुद्धे जंबुद्धीवं दीवं नो ओवीलेति नो उप्पिलेति नो चेव णं एगोदगं करेति महाहिमवंत-रुप्पिसु वासहरपव्वतेसु देवा महिड्ढिया जाव पलिओवमट्ठितीया परिवसंति तेसि णं पणिहाए लवणसमुद्धे जंबुद्धीवं दीवं नो ओवीलेति जाव एगोदगं करेति ।

हरिवास-रम्मयवासेसु मणुया पगतिभद्गगा जाव विणीति तेसि णं पणिहाए लवणसमुद्धे जंबुद्धीवं दीवं नो ओवीलेति नो उप्पीलेति नो चेव णं एगोदगं करेति गंधावति-मालवंतपरियाएसु वट्टवे-यड्डपव्वतेसु देवा महिड्ढीया जाव पलिवओमट्ठितीया परिवसंति तेसि णं पणिहाए लवणसमुद्धे जंबुद्धीवं दीवं नो ओवीलेति नो उप्पीलेति नो चेव णं एगोदगं करेति निसड-नीलवंतेसु वासधरपव्वतेसु देवा महिड्ढीया जाव पलिओवमट्ठितीया परिवसंति तेसि णं पणिहाए लवणसमुद्धे जंबुद्धीवे दीवं नो ओवीलेति नो उप्पीलेति नो चेव णं एगोदगं करेति पुव्वविदेहावराविदेहेसु वासेसु अरहंता चक्कवट्ठी बलदेवा वासुदेवा चारणा विज्जाहरा समणा समणीओ सावया सावियाओ मणुया पगतिभद्गगा जाव विणीता तेसि णं पणिहाए लवणसमुद्धे जंबुद्धीवं दीवं नो ओवीलेति जाव एगोदगं करेति देवकुरु-उत्तरकुरुसु मणुया पगतिभद्गगा जाव विणीता तेसि णं पणिहाए लवणसमुद्धे जंबुद्धीवं दीवं नो ओवीलेति जाव एगोदगं करेति जंबूए य सुदंसणाए अणाढिए नामं देवे जंबुद्धीवाहिवती महिड्ढीए जाव पलिओवट्ठितीए परिवसति तस्स पणिहाए लवणसमुद्धे जंबुद्धीवं दीवं नो ओवीलेति जाव एगोदगं करेति अदुत्तरं च णं गोयमा लोगट्ठिती लोगाणुभावे जण्णं लवणसमुद्धे जंबुद्धीवं दीवं नो ओवीलेति जाव ए गोदगं करेति ।

[२२४] लवणसमुद्धं धायइसंडे नामं दीवे वट्टे वलयागारसंठाणसंठिते सव्वतो समंता संपरिक्खित्ताणंचिद्धति धायइसंडे णं भंते दीवे किं समचक्कवालसंठिते विसमचक्कवालसंठिते गोयमा समचक्कवालसंठिते नो विसमचक्कवालसंठिते धायइसंडे णं भंते दीवे केवइयं चक्कवालविकखंभेणं केवइयं परिकखेवेणं पन्नत्ते गोयमा चत्तारि जोयणससहस्साइं चक्कवालविकखंभेणं इगयालीसं जोयणसतसहस्साइं दसजोयणसहस्साइं नव य एगट्ठे जोयणसते किंचिविसेसूणे परिकखेवेणं पन्नत्ते से णं एगाए पउमवरवेदियाए एगेणं वणसंडेणं सव्वतो समंता संपरिक्खित्ते दोण्हवि वण्णओ, धायइसंडस्स णं भंते दीवस्स कति दारा पन्नत्ता गोयमा चत्तारि दारा पन्नत्ता तं जहा-विजए वेजयंते जयंते अपराजिए कहि णं भंते धायइसंडस्स दीवस्स विजए नामं दारे पन्नत्ते गोयमा धायइसंडदीवपुरत्थिमपेरंते कालो यसमुद्धपुरत्थिमद्वस्स पच्चत्थिमेणं सीयाए महानदीए उप्पिं एत्थ णं धायइसंडदीवस्स विजए नामं दारे पडिवत्ति-३

पन्नत्ते तं चेव पमाणं रायहाणीओ अण्णंमि धायइसंडे दीवे सा वत्तव्वया भाणियववा एवं चत्तारिवि दारा भाणियव्वा धायसंडस्स णं भंते दीवस्स दारस्स य दारस्स य एस णं केवइयं अबाहाए अंतरे पन्नत्ते गोयमा दस जोयणसयसहस्साइं सत्तावीसं च जोयणसहस्साइं सत्तपणतीसे जोयणसए तिण्णि य कोसे दारस्स य दारस्स य अबाहाए अंतरे पन्नत्ते धायसंडस्स णं भंते दीवस्स पदेसा कालोयं समुद्धं पुट्ठा हंता पुट्ठा ते णं भंते किं धायइसंडे दीवे कालोए समुद्धे गोयमा ते धायइसंडे नो खलु ते कालोए समुद्धे एवं कालोयस्सवि धायइसंडे दीवे जीवा उद्धाइत्ता-उद्धाइता कालोए समुद्धे पच्चायंति गोयमा अत्थेगतिया पच्चायंति अत्थेगतिया नो पच्चायंति एवं कालोएवि अत्थेगतिया पच्चायंति अत्थेगतिया नो पच्चायंति से केणट्ठेणं भंते एवं वुच्चति धायइसंडे दीवे धायइसंडे दीवे गोयमा धायइसंडे णं दीवे तत्थ-तत्थ देसे तहिं-तहिं पएसे बहवे धायइरुक्खा धायइवणा धायइसंडा निच्चं कुसुमिया जाव वडंसगधारा धायइ-महाधायइरुक्खेसु यत्थ सुदंसणपियदंसणा दुवे देवा महिड्ढीया जाव पलिओवमट्ठितीया परिवसंति से एणट्ठेणं गोयमा एवं वुच्चति-धायइसंडे दीवे अदुत्तरं च णं गोयमा जाव निच्चे धायइसंडे णं भंते दीवे कति चंदा पभासिंसु वा पभासंति वा पभासिस्संति वा कति सूरिया तविंसु वा तवंति वा तविस्संति वा कइ महग्गहा चारं चरिंसु वा चरंति वा चरिस्संति वा कइ नक्खत्ता जोगं जोइंसु वा जोयंति वा जोइस्संति वा

कइ तारागणकोडाकोडीओ सोभिंसु वा सोभंति वा सोभिस्संति वा गोयमा बारस चंदा पभासिंसु वा पभासैंति वा पभासिस्संति वा एवं-

[२२५] चउवीसं ससिरविणो नक्खत्तसता य तिण्णि छत्तीसा

।

एगं च गहसहस्सं छप्पन्नं धायईसंडे ॥

[२२६] अट्ठेव सयसहस्सा तिण्णि सहस्साइं सत्त य सयाइं ।

धायइयसंडे दीवे तारागण कोडाकोडीणं ॥

[२२७] सोभिंसु वा सोभंति वा सोभिस्संति वा ।

[२२८] धायइसंडं णं दीवं कालोदे नामं समुद्धे वट्ठे वलयागारसंठाणसंठिते सव्वतो समंता संपरिक्खित्ताणं चिट्ठइ कालोदे णं भंते समुद्धे किं समचक्कवालसंठिते विसमचक्कवालसंठिते गोयमा समचक्कवालसंठिते नो विसमचक्कवालसंठिते कालोदे णं भंते समुद्धे केवतियं चक्कवालविकखंभेणं केवतियं परिकखेवेणं पन्नत्ते गोयमा अट्ठ जोयणसयसहस्साइं चक्कवालविकखंभेणं एकानउत्तिं जोयणसयसहस्साइं सत्तरिं च सहस्साइं छच्च पंचुत्तरे जोयणसते किंचिविसेसाहिए परिकखेवेणं पन्नत्ते से णं एगाए पउमवरवेदियाए एगेणं वनसंडेणं सव्वओ समंता संपरिक्खित्ते दोण्हवि वण्णओ कालोयस्स णं भंते समुद्धस्स कति दारा पन्नत्ता गोयमा चत्तारि दारा पन्नत्ता तं जहा-विजए वेजयंते जयंते अपराजिए कहि णं भंते कालोदस्स समुद्धस्स विजए नामं दारे पन्नत्ते गोयमा कालोदसमुद्धपुरत्थिमपेरंते पुक्खवरदीव-पुरत्थिमद्धस्स पच्चत्थिमेणं सीतोदाए महानदीए उप्पिं एत्थ णं कालोदस्स समुद्धस्स विजए नामं दारे पन्नत्ते जंबुद्धीवगविजयसरिसा नवरं-रायहाणीओ पुरत्थिमेणं तिरियमसंखेज्जाइं जोयणसहस्साइं ओगाहित्ता अण्णंमि कालोदे समुद्धे जहा लवणे तहा चत्तारि रायहाणीओ समुद्धनामेसु कालोयस्स णं भंते समुद्धस्स दारस्स य दारस्स य एस णं केवतियं आबाहाए अंतरे पन्नत्ते [गोयमा] ।

[२२९] बावीससयसहस्सा बाणउत्तिं खलु भवे सहस्साइं ।

छच्च सया छायाला दारंतर तिण्णिकोसा य ॥

पडिवत्ति-३

[२३०] दारस्स य दारस्स य आबाहाए अंतरे पन्नत्ते कालोदस्स णं भंते समुद्धस्स फएसा पुक्खवरदीवं पुट्ठा तहेव एवं पुक्खवरदीवस्सवि कालोदे णं भंते समुद्धे जीवा उद्धाइत्ता-उद्धाइत्ता तहेव भाणियव्वं से केणट्ठेणं भंते एवं वुच्चति-कालोए समुद्धे कालोए समुद्धे गोयमा कालोयस्स णं समुद्धस्स उदके आसले मासले पेसले कालए मासरासिवण्णाभे पगतीए उदगरसे पन्नत्ते कालमहाकाला य दो देवा महिड्ढीया जाव पलिओवमद्धितीया परिवसंति से तेणट्ठेणं गोयमा जाव निच्चे, कालोए णं भंते समुद्धे कति चंदा पभासिंसु वा पुच्छा गोयमा कालोए णं समुद्धे बायालीसं चंदा पभासिंसु वा पभासैंति वा पभासिस्संति वा ।

[२३१] बायालीसं चंदा बायालीसं च दिणयरा दित्ता ।

कालोदधिम्मि एते चरंति सबद्धलेसागा ॥

[२३२] नक्खत्ताणं सहस्सं एगं छावत्तरं च सतमण्णं ।

छच्च सता छण्णउया महागहा तिण्णि य सहस्सा ॥

[२३३] अट्ठावीसं कालोदहिम्मि बारस य सयसहस्साइं ।

नव य सया पन्नासा तारागणकोडिकोडीणं ॥

[२३४] सोभं सोभिसु वा सोभंति वा सोभिस्संति वा ।

[२३५] कालोयं णं समुद्धं पुक्खरवरे नामं दीवे वट्टे वलयागारसंठाणसंठिते सव्वतो समंता संपरिक्खित्ताणं चिट्ठति पुक्खरवरे णं दीवे किं समचक्कवालसंठिते विसमचक्कवालसंठिते गोयमा समचक्कवालसंठिते नो विसमचक्कवालसंठिते पुक्खरवरे णं भंते दीवे केवतियं चक्कवालविक्खंभेणं केवतियं परिक्खेवेणं पन्नत्ते गोयमा सोलस जोयणसतसहस्साइं चक्कवलविक्खंभेणं [एगा जोयणकोडी-बाउणति च सयसहस्साइं अउणानउति च सहस्सा अट्ठ य सया चउणउया परिक्खेवेणं पन्नत्ते]

[२३६] एगा जोयणकोडी बाणउंति खलु भवे सयसहस्सा ।

अट्ठ सया चउणउया परीरओ पुक्खरवरस्स ॥

[२३७] से णं एगे पउमवरवेदियाए एगेणं य वनसंडेणं सव्व ओसमंता संपरिक्खित्ते दोण्हवि वण्णओ, पुक्खरवरस्स णं भंते दीवस्स कति दारा पन्नत्ता गोयमा चत्तारि दारा पन्नत्ता तं जहा-विजए वेजयंते जयंते अपराजिते कहि णं भंते पुक्खरवरस्स दीवस्स विजए नामं दारे पन्नत्ते गोयमा पुक्खरवरदीवपुरत्थिमपेरंते पुक्खरोदसमुद्धपुरत्थिमद्धस्स पच्चत्थिमेणं एत्थ णं पुक्खरवरदीवस्स विजए नामं दारे पन्नत्ते तं चेव सव्वं एवं चत्तारिविदारा पुक्खरवरस्स णं भंते दीवस्स दारस्स य दारस्स य एस णं केवतियं अबाधाए अंतरे पन्नत्ते गोयमा अडतालीसं जोयणसयसहस्साइं बावीसं च सहस्साइं चत्तारिय अकुणत्तरे जोयणसते दारस्स य दारस्स य अबाहाए अंतरे पन्नत्ते ।

[२३८] अडयाल सयसहस्सा बावीसं खलु भवे सहस्साइं ।

अगुणत्तरा य चउरो दारंतर पुक्खरवरस्स ॥

[२३९] पदेसा दोण्हवि पुट्ठा जीवा दोसुवि भाणियव्वा, से केणट्ठेणं भंते एव वुच्चतिपुक्खरवरदीवे-पुक्खरवरदीवे गोयमा पुक्खरवरे णं दीवे तत्थ-तत्थ देसे तहिं-तहिं पदेसे बहवे पउम-रुक्खा पउमवणा पउमसंडा निच्चं कुसुमिया जाव वडैसगधरा पउम-महापउमरुक्खेसु एत्थ णं पउम-पुंडरीया नामं दो देवा महिड्ढिया जाव पलिओवट्ठितीया परिवसंति से तेणट्ठेमं गोयमा एवं वुच्चति-पुक्खरवरदीवे पडिवत्ति-३

जाव निच्चे, पुक्खरवरे णं भंते दीवे केवइया चंदा पभासिसु वा एवं पुच्छा ।

[२४०] चोयालं चंदसयं चउयालं चेव सूरियाणं सयं ।

पुक्खरवरदीवमि चरंति ते पभासेंता ॥

[२४१] चत्तारि सहस्साइं बत्तीसं चेव होंति नक्खत्ता ।

छत्त सया बावत्तर महग्गया बारस सहस्सा ॥

[२४२] छण्णउइ सयसहस्सा चत्तालीसं भवे सहस्साइं ।

चत्तारि सया पुक्खरवरे उ तारागणकोडिकोडीणं ॥

[२४३] सोभं सोभिसु वा सोभंति वा सोभिस्संति वा, पुक्खरवरदीवस्स णं बहुमज्झदेसभाए एत्थ ण माणुसुत्तरे नामं पव्वते पन्नत्ते वट्टे वलयागारसंठाणसंठिते जो णं पुक्खरवरं दीवं दुहा विभय-माणे-विभयमाणे चिट्ठति तं जहा- अब्भितरपुक्खरद्धं च बाहिरपुक्खरद्धं च अब्भितरपुक्खरद्धे णं भंते केवतियं चक्कवालविक्खंभेणं केवतियं परिक्खेवेणं पन्नत्ते गोयमा अट्ठ जोयणसयसहसाइं चक्कवालविक्खंभेणं ।

[२४४] कोडी बायालीसा तीसं दोण्णि य सया अगुणवण्णा ।

पुक्खरअद्धपरिओ एवं से मणुस्सखेत्तस्स ॥

[२४५] से केणट्ठेणं भंते एवं वुच्चति-अब्भित्तरपुक्खरद्धे अब्भित्तरपुक्खरद्धे गोयमा अब्भित्तरपुक्खरद्धेणं माणुसुत्तरेणं पव्वतेणं सव्वतो समंता संपरिक्खित्ते से एणट्ठेणं गोयमा एवं वुच्चति-अब्भित्तरपुक्खरद्धे अदुत्तरं च णं जाव निच्चे अब्भित्तरपुक्खरद्धे णं भंते केवतिया चंदा पभासिंसु वा पुच्छा सा चेव पुच्छा, जाव तारागणा कोडकोडीओ गोयमा ।

[२४६] बावत्तरिं च चंदा बावत्तरिमेव दिणकरा दित्ता ।

पुक्खरवरदीवड्ढे चरति एते पभासेंता ॥

[२४७] तिन्नि सया छत्तीसा छच्च सहस्सा महग्गहाणं तु

।

नक्खत्ताणं तु भवे सोलाइ दुवे सहस्साइं ॥

[२४८] अडयालसयसहस्सा बावीसं खलु भवे सहसासइं ।

दो य सय पुक्खरद्धे तारागण कोडिकोडिणं ॥

[२४९] सोभं सोभिंसु वा सोभंति वा सोभिस्संति वा ।

[२५०] समयखेत्ते [मणुस्सखेत्ते] णं भंते केवतियं आयाम-विक्खंभेणं केवतियं परिक्खेवेणं पन्नत्ते गोयमा पणयालीसं जोयणसयसहस्साइं आयाम-विक्खंभेणं एगा जोयणकोडी [बायालीसं च सयसहस्साइं तीसं च सहस्साइं दोण्णि य एउणपण्णा जोयणसते किंचिविसेसाहिए परिक्खेवेणं पन्नत्ते] से केणट्ठेणं भंते एवं वुच्चति-मणुस्सखेत्ते मणुस्सखेत्ते गोयमा मणुस्सखेत्ते णं तिविधा मणुस्सा परिवसंति तं जहा- कम्मभूमगा अकम्मभूमगा अंतरदीवगा से तेणट्ठेणं गोयमा एवं वुच्चति मणुस्स खेते मणुस्स खेते, अदुत्तरं च णं गोयमा मणुस्सखेत्तस्स सासए नामधेज्जे जाव निच्चे, मणुस्सखेत्ते णं भंते कति चंदा पभासिंसु वा पुच्छा कई सूरा तवइंसु वा पुच्छा [गोयमा] ।

[२५१] बत्तीसं चंदसयं बत्तीसं चेव सूरियाणं सयं ।

सयलं मणुस्सलोयं चरंति एते पभासेंता ॥

पडिवत्ति-३

[२५२] एक्कारस य सहस्सा छप्पि य सोला महग्गहाणं तु ।

छच्च सया छण्णउया नक्खत्ता तिण्णि य सहस्सा

॥

[२५३] अडसीइ सयसहस्सा चत्तालीस सहस्स मणुयलोगंमि

।

सत्त य सता अणूणा तारागणकोडकोडीणं ॥

[२५४] सोभं सोभिंसु वा सोभंति वा सोभिस्संति वा ।

[२५५] एसो तारापिंडो सव्वसमासेण मणुयलोगंमि ।

बहिया पुण ताराओ जिणेहिं भणिया असंखेज्जा ॥

[२५६] एवइयं तारग्गं जं भणियं माणुसंमि लोगंमि ।

चारं कलंबुयापुप्फसंठियं जोइसं चरइ ॥

- [२५७] रविससिगहनकखत्ता एवइया आहिया मणुयलोए ।
जेसिं नामागोत्तं न पागाया पन्नवेहिंति ॥
- [२५८] छावट्ठि पिडगाइं चंदाइच्चाणं मणुयलोगंमि ।
दो चंदा दो सूरा होंति एक्केक्कए पिडए ॥
- [२५९] छावट्ठिं पिडगाइं नकखत्ताणं तु मणुयलोगंमि ।
छप्पन्नं नकखत्ता होंति एक्केक्कए पिडए ॥
- [२६०] छावट्ठिं पिडगाइं महग्गहाणं तु मणुयलोगंमि ।
छावत्तरं गहसयं होइ य एक्केक्कए पिडए ॥
- [२६१] चत्तारि य पंतीओ चंदाइच्चाण मणुयलोगंमि ।
छावट्ठी-छावट्ठी य होंति य एक्केक्किया पंती ॥
- [२६२] छप्पन्नं पंतीओ नकखत्ताणं तु मणुयलोगंमि ।
छावट्ठी-छावट्ठी य होंति य एक्केक्किया पंती ॥
- [२६३] छावत्तरं गहाणं पंतिसयं होइ मणुयलोगंमि ।
छावट्ठी-छावट्ठी य होंति एक्केक्किया पंती ॥
- [२६४] ते मेरुमणुचरंता पयाहिणावत्तमंडला सव्वे ।
अणवट्ठितेहिं जोगेहिं चंदा सूरा गहगणा य ॥
- [२६५] नकखत्ततारगाणं अवट्ठिया मंडला मुणेयव्वा ।
तेवि य पयाहिणावत्तमेव मेरुं अणुचरंति ॥
- [२६६] रयणियरदिणयराणं उड्ढे व अहे व संकमो नत्थि ।
मंडलसंकमणं पुण सब्भंतरबाहिरं तिरिए ॥
- [२६७] रयणियरदिणयराणं नकखत्ताणं महग्गहाणं च ।
चारविसेसेण भवे सुहदुक्खविही मणुस्साणं ॥
- [२६८] तेसिं पविसंताणं तावक्खेत्तं तु वड्ढए नियमा ।
तेणेव कमेण पुणो परिहायइ निक्खमंताणं ॥
- [२६९] तेसिं कलंबुयापुप्फसंठिया होइ तावक्खेत्तपहा ।

पडिवत्ति-३

- अंतो य संकुया बाहिं वित्थडा चंदसूराणं ॥
- [२७०] केणं वड्ढति चंदो परिहामी केण होइ चंदस्स ।
कालो वा जोण्हो वा केणणुभावेणं चंदस्स ॥
- [२७१] किण्हं राहुविमाणं निच्चं चंदेण होइ अविरहियं ।
चउरंगुलमप्पत्तं हेट्ठा चंदस्स तं चरइ ॥
- [२७२] बावट्ठि-बावट्ठिं दिवसे-दिवसे उ सुक्कपक्खस्स ।
जं परिवड्ढइ चंदो खवेइ तं चेव कालेणं ॥
- [२७३] पन्नरसइभागेण य चंदं पन्नरसमेव तं वरइ ।
पन्नरसइभागेण य पुणोवि तं चेवतिक्कमइ ॥

- [२७४] एवं वड्डइ चंदो परिहाणी एव होइ चंदस्स ।
कालो वा जोण्हो वा तेणणुभावेण चंदस्स ॥
- [२७५] अंतो मणुस्सखेत्ते हवन्ति चारोवगा य उववण्णा ।
पंचविहा जोइसिया चंदा सूरा गहगणा य ॥
- [२७६] तेणं परं जे सेसा चंदाइच्चगहतारनक्खत्ता ।
नत्थि गई नवि चारो अवट्ठिया ते मुणेयव्वा ॥
- [२७७] दो चंदा इह दीवे चत्तारि य सागरे लवणतोए ।
धायइसंडे दीवे बारस चंदा य सूरा य ॥
- [२७८] दो-दो जंबुद्धीवे ससिसूरा दुगुणिया भवे लवणे ।
लावणिगा य तिगुणिया ससिसूरा धयईसंडे ॥
- [२७९] घायइसंडप्पभित्तिं उद्धिद्धा तिगुणिया भवे चंदा ।
आइल्लचंदसहिया अनंतरानंतरे खेत्ते ॥
- [२८०] रिक्खग्गहतारग्गं दीवसमुद्देसु इच्छसी नाउं ।
तस्स ससीहिं गुणियं रिक्खग्गहतारयग्गं तु ॥
- [२८१] चंदातो सूरस्स य सूरा चंदस्स अंतरं होइ ।
पन्नास सहस्साइं जोयणाणं अणूणाइं ॥
- [२८२] सूरस्स य सूरस्स य ससिणो ससिणो य अंतरं होइ ।
बहियाओ माणुसनगस्स जोयणाणं सयसहस्सं ॥
- [२८३] सूरंतरिया चंदा चंदंतरिया य दिनयरा दित्ता ।
चित्तंतरलेसागा सुहलेसा मंदलेसा य ॥
- [२८४] अट्ठासीइं च गहा अट्ठावीसं च होंति नक्खत्ता ।
एगससीपरिवारो एत्तो ताराण वोच्छामि ॥
- [२८५] छावट्ठिसहस्साइं नव चेव सयाइं पंचसयराइं ।
एगससीपरिवारो तारागणकोडकोडीणं ॥
- [२८६] बहियाओ माणुसनगस्स चंदसूराणवट्ठिया जोगा ।

पडिवत्ति-३

चंदा अभिइजुत्ता सूरा पुण होंति पूसेहिं ॥

[२८७] माणुसुत्तरे णं भन्ते पव्वते केवतियं उड्डं उच्चत्तेणं केवतियं उव्वेहेणं केवतियं मूले विक्खंभेणं केवतियं मज्झे विक्खंभेणं केवतियं उवरिं विक्खंभेणं केवतियं अंतो गिरिपरिरणं केवतियं बाहिं गिरिपरिरणं केवतियं मज्झे गिरिपरिरणं केवतियं उवरि गिरिपरिरणं गोयमा माणुसुत्तरे णं पव्वते सत्तरस एक्कवीसाइं जोयणसयाइं उड्डं उच्चत्तेणं चत्तारि तीसे जोयणसए कोसं च उव्वेहेणं मूले दसबावीसे जोयणसते विक्खंभेणं मज्झे सत्ततेवीसे जोयणसते विक्खंभेणं उवरि चत्तारिचउवीसे जोयणसते विक्खंभेणं एगा जोयणकोडी बायालीसं च सयसहस्साइं तीसं च सहस्साइं दोण्णि य अउणापन्ने जोयणसते किंचिविसेसाहिए अंतोगिरिपरिरणं एगा जोयणकोडी बायालीसं च सतसहस्साइं छत्तीसं च सहस्साइं सत्त चोदसोत्तरे जोयणसते बाहिं गिरिपरिरणं एगा जोयणकोडी बायालीसं च सतसहस्साइं चोत्तीसं च सहस्सा

अद्दु य तेवीसुत्तरे जोयणसते मज्झे गिरिपरिरणं एगा जोयणकोडी बायालीसं च सयसहस्साइं बत्तीसं च सहस्साइं नव य बत्तीसं जोयणसते उवरि गिरिपरिरणं मूले विच्छिण्णे मज्झे संखित्ते उप्पिं तणुए अंतो सण्हे मज्झे उदग्गे बाहिं दरिसणिज्जे ईसिं सण्णिसण्णे सीहनिसाई अवड्ढजव-रासिसंठाणसंठिते सव्वजं-बूनयामए अच्छे सण्हे जाव पडिरूवे उभओपासिं दोहिं पउमवरवेदियाहिं दोहि य वणसंडेहि सव्वतो समंता संपरिक्खिते वण्णओ दोण्हवि से केण्हणं भंते एवं वुच्चति-माणुसुत्तरे पव्वते माणुसुत्तरे पव्वते गोयमा माणुसुत्तरस्स णं पव्वतस्स अंतो मणुस्सा उप्पिं सुवण्णा बाहिं देवा अदुत्तरं च णं गोयमा माणुसुत्तरं पव्वतं मणुस्सा णं कयाइ वीतिवइंसु वा वीतिवयंति वा वीतिवइस्संति वा नन्नत्थ चारणेणं वा विज्जाहरेण वा देवकम्मणा वा से तेण्हणं गोयमा एवं वुच्चति-माणुसुत्तरे पव्वते माणुसुत्तरे पव्वते अदुत्तरं च णं जाव निच्चे ।

जावं च णं माणुसुत्तरे पव्वते तावं च णं अस्सिं लोए त्ति पवुच्चति जावं च णं वासाति वा वासधरपव्वताति वा तावं च णं अस्सिं लोएत्ति पवुच्चति जावं च णं गेहाइ वा गेहा यनाति वा तावं च णं अस्सिं लोएत्ति पवुच्चति जावं च णं गामाति वा जाव सन्निवेसाति वा तावं च णं अस्सिं लोएत्ति पवुच्चति जावं च णं अरहंता चक्कवट्ठी बलदेवा वासुदेवा चारणा विज्जाहरा समणा समणीओ सावया सावियाओ मणुया पगतिभद्दगा जाव विणीता तावं च णं अस्सिं लोएत्ति पवुच्चति जाव च णं बहवे ओराला बलाहका संसेयंति संमुच्छंति वासं वासंति तावं च णं अस्सिं लोएत्ति पवुच्चति जावं च णं बादरे विज्जुकारे बादरे थणियसद्दे तावं च णं अस्सिं लोएत्ति पवुच्चति जावं च णं बायरे अगणिकाए तावं च णं अस्सिं लोएत्ति पवुच्चति जावं च णं आगाराति वा नदीओइ वा निहीति वा तावं च णं अस्सिं लोएत्ति पवुच्चति जावं च णं समयाति वा आवलियाति वा आणापाणूति वा थोवाइ वा लवाइ वा मुहुत्ताइ वा दिवसाति वा अहोरत्ताति वा पक्खाति वा मासाति वा उदूति वा अयनाति वा संवच्छराति वा जुगाति वा वाससताति वा वाससहस्साति वा वाससयसहस्साति वा पुव्वंगाति वा पुव्वाति वा तुडियंगाति वा एवं पुव्वे तुडिए अड्डे अववे हूहुए उप्पले पउमे नलिणे अत्थनिउरे अउते नउते पउते चूलिया सीसपहेलिया जाव य सीसपहेलियंगेति वा सीसपहेलियाति वा पलिओवमेति वा सागरोवमेति वा ओसप्पिणीति वा उस्सप्पिणीति वा तावं च णं अस्सिं लोएत्ति पवुच्चति जावं च णं चंदोवरागाति वा सूरुवरागाति वा चंदपरिएसाति वा सूरपरिएसाति वा पडिचंदाति वा पडिसूराति वा इंदधणुइ वा उदगमच्छेइ वा अमोहाइ वा कपिहसिताणि वा तावं च णं अस्सिं लोएत्ति पवुच्चति जावं च णं चंदिमसूरियगहगणनक्खत्ततारारूवाणं अभिगमण-निग्गम-

पडिवत्ति-३

ण-वुड्ढि-निवुड्ढि-अणव-द्वियसंठाणसंठिती आघविज्जति तावं च णं अस्सिं लोएत्ति पवुच्चति ।

[२८८] अंतो णं भंते माणुसुत्तरस्स पव्वतस्स जे चंदिमसूरियगहगणनक्खत्ततारारूवा ते णं भंते देवा किं उड्ढोववण्णगा कप्पोववण्णगा विमाणोववण्णगा चारोववण्णगा चारद्वितीया गतिरतिया गतिसमावण्णगा गोयमा ते णं देवा नो उड्ढोववण्णगा नो कप्पोववण्णगा विमाणोववण्णगा चारोववण्णगा नो चारद्वितीया गतिरतिया गतिसमावण्णगा उड्ढीमुहकलंबुयापुप्फसंठाणसंठितेहिं जोयणसाहस्सितेहिं तावखेत्तेहिं साहस्सियाहिं बाहिरियाहिं वेउव्वियाहिं परिसाहिं महयाहयनट्ट-गीत-वादित-तंती-तल-ताल-तुडिय-धण-मुड्ढंग-पडुप्पवादितरवेणं दिव्वाइं भोगभोगाइं भुंजमाणा महया उक्किठसीहनायबोलकलकलरवेणं पक्खुभितमहासमुद्धरवभूतं पिव करेमाणा अच्छं पव्वयरायं पदाहिणावत्तमंडलचारं मेरुं अनुपरियडंति तेसि

णं भंते देवाणं जाहे इंदे चवति से कहमिदाणिं पकरेंति गोयमा ताहे चत्तारि पंच वा सामाणिया देवा तं ठाणं उवसंपज्जित्ताणं विहरंति जाव एत्थ अण्णे इंदे उववण्णे भवति इंदद्वाणे णं भंते केवतियं कालं विरहिते उववातेणं गोयमा जहण्णेणं एककं समयं उक्कोसेणं छम्मासा बहिया णं भंते माणुसुत्तरस्स पव्वतस्स जे चंदिम-सूरियग-हनकखत्ततारारूवा ते णं भंते देवा किं उड्ढोववण्णगा जाव गतिसमावण्णगा गोयमा ते णं देवा नो उड्ढोववण्णगा नो कप्पोववण्णगा विमाणोववण्णगा नो चारोववण्णगा चारद्वितीया नो गतिरतिथिया नो गतिसमावण्णगा पक्किट्ठगसंठाणसंठितेहिं जोयणसतसाहस्सिएहिं तावक्खेत्तेहिं साहस्सियाहि य बाहिराहिं परिसाहिं महताहतनट्ठ-गीत-वादित-रवेणं दिव्वाइं भोगभोगाइं भुंजमाणा महया उक्किट्ठ सीहनायबोलकलकलरवेणं पक्खुभितमहासमुद्धरवभूतं पिव करेमाणा सुहलेस्सा मंदलेस्सा मंदायलेस्सा चित्तंतरलेसा अण्णमण्णसमोगाढाहिं लेसाहिं कूडा इव ठाणद्विता ते पदेसे सव्वतो समंता ओभासैंति उज्जोवैंति तवैंति पभासैंति तेसिं णं भंते देवाणं जाहे इंदे चवति से कहमिदाणिं पकरेंति गोयमा ताहे चत्तारि पंच वा सामाणिया देवा तं ठाणं उवसंपज्जित्ताणं विहरंति जाव तत्थ अण्णे इंदे उववण्णे भवति, इंदद्वाणे णं भंते केवतियं कालं विरहओ उववातेणं गोयमा जहण्णेणं एककं समयं उक्कोसेणं छम्मासा ।

[२८९] पुक्खरवरण्णं दीवं पुक्खरोदे नामं समुद्धे वट्ठे वलयागारसंठाणसंठिते [सव्वतो समंता] संपरिक्खित्ताणं चिट्ठति पुक्खरोदे णं भंते समुद्धे किं समचक्कवालसंठिते विसमचक्कवालसंठिते गोयमा समचक्कवालसंठिते नो विसमचक्कवालसंठिते पुक्खरोदे णं भंते समुद्धे केवतियं चक्कवाल-विकखंभेणं केवतियं परिकखेवेणं पन्नत्ते गोयमा संखेज्जाइं जोयणसयसहस्साइं चक्कवालविकखंभेणं संखेज्जाइं जोयणसयसहस्साइं परिकखेवेणं पन्नत्ते से णं एगाए पउमवरवेदियए एगेणं वनसंडेणं सव्वओ समंता संपरिक्खित्ते दोण्हवि वण्णओ पुक्खरोदस्स णं समुद्धस्स कति दारा पन्नत्ता गोयमा चत्तारि दारा पन्नत्ता तहेव सव्वं पुक्खरोदसमुद्धपुरत्थिमपेरंते वरुणवरदीवपुरत्थिमद्धस्स पच्चत्थिमेणं एत्थ णं पुक्खरोदस्स विजए नामं दारे पन्नत्ते एवं सेसाणवि, दारंतरंमि संखेज्जाइं जोयण-सयसहस्साइं अबाहाए अंतरे पन्नत्ते पदेसा जीवा य तहेव से केणट्ठेणं भंते एवं वुच्चतिपुक्खरोदे समुद्धे पुक्खरोदे समुद्धे गोयमा पुक्खरोदस्स णं समुद्धस्स उदगे अच्छे पत्थे जच्चे तणुए फलिहवण्णाभे पगतीए उदगरसे पन्नत्ते सिरिधर-सिरिप्पभा यत्थ दो देवा महिड्ढीया जाव पलिओवमद्वितीया परिवसंति से एतेणट्ठेणं जाव निच्चे पुक्खरोदे णं भंते समुद्धे कति चंदा पभासिंसु वा पभासैंति व पभासिस्संति वा संखेज्जा चंदा पभासिंसु वा जाव संखेज्जा तारागणकोडकोडीओ सोभं सोभैसु वा सोभंति वा सोभिस्संति वा ।

[२९०] पुक्खरोदण्णं समुद्धं वरुणवरे नामं दीवे वट्ठे वलयागारे जाव चिट्ठति तहेव सम-पडिवत्ति-३

चक्कवालसंठिते केवतियं चक्कवालविकखंभेणं केवइयं परिकखेवेणं पन्नत्ता गोयमा संखेज्जाइं जोयणसय-सहस्साइं चक्कवालविकखंभेणं संखेज्जाइं जोयणसतसहस्साइं परिकखेवेणं पन्नत्ते पउमवरवेदियावण-संडवण्णओ दारंतरं पदेसा जीवा तहेव सव्वं, से केणट्ठेणं भंते एवं वुच्चइवरुणवरे दीवे वरुणवरे दीवे गोयमा वरुणवरे णं दीवे तत्थ-तत्थ देसे तहिं-तहिं बहुईओ खुड्डाखुड्डियाओ जाव बिलपंतियाओ अच्छाओ जाव सट्ठण्णइयमहुरसनइयाओ वारुणिवरोदग-पडिहत्थाओ पत्तेयं-पत्तेयं पउमवरवेइयापरिक्खित्ताओ पत्तेयं-पत्तेयं वणसंडपरिक्खित्ताओ वण्णओ पासादीयाओ दरिसणिज्जाओ अभिरूवाओ पडिरूवाओ तिसोमाण-तोरणा तासु णं खुड्डा-खुड्डियासु जाव बिलपंतियासु बहवे उप्पातपव्वया जाव पक्खंदोलगा

सव्वफालियामया अच्छा जाव पडिरूवा तेसु णं उप्पायपव्वेसु जाव पक्खंदोलएसु बहूइं हासासणाइं जाव दिसासोवत्थियासणाइं सव्वफालियामयाइं अच्छाइं जाव पडिरूवाइं वरुणवरे णं दीवे तत्थ-तत्थ देसे तहिं-तहिं बहवे आलिघरगा जाव कुसुमघरगा सव्वफालियामया अच्छा जाव पडिरूवा तेसु णं आलिघरएसु जाव कुसुमघरएसु बहूइं हासासणाइं जाव दिसासोवत्थियासणाइं सव्वफालियामयाइं अच्छाइं जाव-पडिरूवाइं वरुणवरे णं दीवे तत्थ-तत्थ देसे तहिं-तहिं बहवे जातिमंडवगा जाव सामलतामंडवगा सव्वफालियामया अच्छा जाव पिडरूवा तेसु णं जातिमंडवएसु जाव सामलतामंडवएसु बहवे पुढविसिलापट्टगा पन्नत्ता तं जहा- अप्पेगतिया हंसासणसंठिता जाव अप्पेगतिया वरसयणविसिद्ध-संठाणसंठिता सव्वफालियामया अच्छा जाव पडिरूवा तत्थ णं बहवे वाणमंतरा देवा जाव विहरंति से तेणट्ठेणं गोयमा एवं वुच्चति-वरुणवरे दीवे वरुणवरे दीवे वरुण-वरुणप्पभा यत्थ दो देवा महिड्डिया जाव पलिओवमट्ठितीया परिवसंति जोतिसं संखेज्जं ।

[२९१] वरुणवरणं दीवं वरुणोदे नामं समुद्धे वट्ठे वलयागार जाव चिट्ठति पुक्खरोद-वत्तव्वत्ता जाव जीवोववातो से केणट्ठेणं भंते एवं वुच्चि-वरुणोदे समुद्धे वरुणोदे समुद्धे गोयमा वरुणोदस्स णं समुद्धस्स उदए से जहानामए-चंदप्पभाइं वा मणिसिला-गाइ वा वरसीधूति वा वरवारुणीइ वा पत्तासवेइ वा पुप्फासवेइ वा फलासवेइ वा चोयासवेइ वा मधूति वा मेरएति वा जातिप्पसन्नाइ वा खज्जूरसारेइ वा मुद्धियासारेइ वा कापिसायणेइ वा सुपक्खखोयरस्सेइ वा अट्ठपिट्ठणिट्ठिताइ वा जंबूफलकालियाइ वावर-पसण्णाइ वा उक्कोसमदपत्ता आसला मासला पेसला ईसिं ओट्ठावलंबिणी ईसिं तंबच्छि करणी सि वोच्छेद-कडुई वण्णेणं उववेता गंधेणं उववेता रसेणं उववेता फासेणं उववेता आसादणिज्जा वीसादणिज्जा दीव-णिज्जा दप्पणिज्जा मयणिज्जा बिंहणिज्जा सव्विंदियगातपल्हायणिज्जा भवेतारूवे सिया गोयमा नो इणट्ठे समट्ठे वरुणोदस्स णं समुद्धस्स उदए एत्तो इट्ठतरा चेव जाव मणामतराए चेव आसादे णं पन्नत्ते वारुणि-वारुणिकंता यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं गोयमा एवं वुच्चति-वरुणोदे समुद्धे वरुणोदे समुद्धे जोतिसं संखिज्जकेणं नायव्वं वारुणवरेणं दीवे कइ चंदापमासिंसु वा।

[२९२] वरुणोदण्णं समुद्धं खीरवरे नामं दीवे वट्ठे जाव चिट्ठति तथेव जाव-से केणट्ठेणं भंते एवं वुच्चति-खीरवरे दीवे खीरवरे दीवे गोयमा खीरवरे णं दीवे तत्थ-तत्थ देसे तहिं-तहिं बहुईओ खुड्डा-खुड्डियाओ जाव बिलपंतियाओ अच्छाओ जाव सट्ठण्णइयमहरसनाइयाओ खीरोदगपडिहत्थाओ पासादीयाओ दरिसणिज्जाओ अभिरू-वाओ पडिरूवाओ पव्वतगा पव्वतएसु आसणा धरहा धरएसु आसणा मंडला मंडवएसु पुढविसि-लापट्टगा सव्वरयणामया अच्छा जाव पडिरूवा पंडरग-पुप्फदंता यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं खीरवरणं दीवं खीरोदे नामं समुद्धे वट्ठे जाव चिट्ठति तथेव जाव-से केणट्ठेणं भंते एवं वुच्चति-खीरोदे समुद्धे खीरोदे समुद्धे गोयमा खीरोदस्स णं पडिवत्ति-३

समुद्धस्स उदए से जहानामे-रण्णो चाउरंतचक्कवट्ठिस्स चाउरक्के गोकखीरे खंडगुलमच्छंडियोवणीते पयत्तमंदग्गिसुकट्टिए वण्णेणं उववेते गंधेणं उववेते रसेणं उववेते फासेणं उववेते आसादणिज्जे जाव बिंहणिज्जे सव्विंदियगातपल्हायणिज्जे भवेतारूवे सिया गोयमा नो इणट्ठे समट्ठे खीरोदस्स णं समुद्धस्स उदए एत्तो इट्ठतराए चेव जाव मणामतराए चेव आसादेणं पन्नत्ते विमल-विमलप्पभा यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं जोतिसं संखेज्जं चंदा जाव तारा ।

[२९३] खीरोदण्णं समुद्धं घयवरे नामं दीवे वट्ठे वलयागारसंठाणसंठिते जाव चिट्ठति जाव-से केणट्ठेणं भंते एवं वुच्चति-घयवरे दीवे घयवरे दीवे गोयमा घयवरे णं दीवे तत्थ-तत्थ देसे तहिं-तहिं बहुईओ खुड्डा-खुड्डियाओ जाव विहरंति नवरं-घयोदगपडिहत्थाओ पव्वतादी सव्वकणगमया कणग-कणगप्पभा यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं जोतिसं संखेज्जं घयवरण्णं दीवं घयोदे नामं समुद्धे वट्ठे जाव चिट्ठति जाव-से केणट्ठेणं भंते एवं वुच्चति-घयोदे समुद्धे घयोदे समुद्धे गोयमा घयोदस्स णं समुद्धस्स उदए से जहानामए-सारइयस्स गोघयवरस्स मंडे सुकढिते उद्धा सज्जविसंदिते विस्संते सल्लइ कण्णियार पुप्फवण्णभे वण्णेणं उववेते गंधेणं उववेते रसेणं उववेते फासेणं उववेते आसादणिज्जे जाव पल्हायणिज्जे भवेतारूवे सिया गोयमा नो इणट्ठे समट्ठे घयोदस्स णं समुद्धस्स उदए एत्तो इट्ठतराए चेव जाव मणामतराए चेव आसादे णं पन्नत्ते कंतसुकंता यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं चंदादी तथेव, घयोदण्णं समुद्धं खोदवरे नामं दीवे वट्ठे जाव चिट्ठति जाव-से केणट्ठेणं भंते एवं वुच्चति-खोदवरे दीवे खोदवरे दीवे गोयमा खोदवरे णं दीवे तत्थ-तत्थ देसे तहिं-तहिं बहुईओ खुड्डा-खुड्डियाओ वावीओ जाव विहरंति नवरं-खोदोदगपडिहत्थाओ पववतगादी सव्ववेरुलियामया सुप्पभ-महप्पभा यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं चंदादी संखेज्जा, खोदवरण्णं दीवं खोदोदे नामं समुद्धे वट्ठे जाव चिट्ठति जाव, से केणट्ठेणं भंते एवं वुच्चति-खोदोदे समुद्धे खोदोदे समुद्धे गोयमा खोदोदस्स णं समुद्धस्स उदए से जहानामए-उच्छूणं जच्चाणं वरपुंडगाणं हरिताभाणं भेरुंडच्छूण वा कालपोराणं हरिताल-पिंजराणं अवणीतमूलाणं तिभागणिव्वादितवाडाणं गंठिपरिसोधिताणं खोदरसे होज्ज वत्थपरिपूते चाउज्जा-तगसुवासिते अधियपत्थे लहुए वण्णेणं उववेते जाव फासेणं उववेते आसादणिज्जे जाव सव्विंदियागा-तपल्हायणिज्जे भवेतारूवे सिया गोयमा नो इणट्ठे समट्ठे खोदेसदस्स णं समुद्धस्स उदए एत्तो इट्ठतराए चेव जाव मणामतराए चेव आसादे णं पन्नत्ते पुन्न-पुन्नप्पभा यत्थ दो देवा महिड्डिया जाव पलिओवमट्ठितीया परिवसंति से तेणट्ठेणं गोयमा एवं वुच्चति-खोदोदे समुद्धे खोदोदे समुद्धे चंदा [दीण जथा पुक्खरोदस्स]

[२९४] खोदोदण्णं मसुद्धं नंदिस्सरवरे नामं दीवे वट्ठे जाव चिट्ठति पुव्वक्कमेणं जाव जीवोववातो से केणट्ठेणं भंते एवं वुच्चति-नंदिस्सरवरे दीवे नंदिस्सरवरे दीवे गोयमा नंदिस्सरवरे णं दीवे तत्थ-तत्थ देसे तहिं-तहिं खुड्डा-खुड्डियाओ वावीओ जाव विहरंति नवरं-खोदोदगपडिहत्थाओ पव्वतगादी पुव्वभणिता सव्ववइरामया अच्छा जाव पडिरूवा अदुत्तरं च णं गोयमा नंदिस्सरवरे दीवे चउद्धिसिं चक्कवा-लविकखंभेणं बहुमज्झदेसभागे चत्तारि अंजनगपव्ता पन्नत्ता तं जहा- पुरत्थिमेमं दाहिणेणं पच्चत्थिमेणं उत्तरेणं ते णं अंजण-गपव्वता चतुरासीतिं जोयणसहस्साइं उड्ढं उच्चत्तेणं एगं जोयणसहस्सं उव्वेहेणं मूले साइरेगाइं दसजोयणसहस्साइं विक्खंभेणं घरणियले दसजोयणसहस्साइं आयाम-विक्खंभेणं तदाणंतरं

पडिवत्ति-३

मायाए-मायाए परिहायमाणा-परिहायमाणा उवरिं एगं जोयणसहस्सं आयाम-विक्खंभेणं मूले एककतीसं जोयणसहस्साइं छच्च तेवीसे जोयणसते किंचिविसेसा-हिए परिकखेवेणं धरणियले एककतीसं जोयणसहस्साइं छत्त तेवीसे जोयणसते देसूणे परिकखेवेणं उवरिं तिण्णि-जोयण-सहस्साइं एकं च बावट्ठं जोयणसतं किं चिविसेसाहियं परिकखेवेणं मूले विच्छिण्णा मज्झे संखित्ता उप्पिं तणुया गोपुच्छसंठाण-संठिता सव्वजणमया अच्छा जाव पडिरूवा पत्तेयं-पत्तेयं पउमवरवेदि-यापरिक्खित्ता पत्तेयं-पत्तेयं

वणसंड-परिक्खित्ता वण्णओ तेसि णं अंजनगपव्वयाणं उवरिं पत्तेयं-पत्तेयं बहुसमरमणिज्जो भूमिभागो पन्नत्तो से जहानामए आलिंगपुक्खरेति वा जाव विहरंति ।

तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेयं सिद्धायतणे पन्नत्ते ते णं सिद्धायतणा एगमेगं जोयणसतं आयामेणं पन्नासं जोयणाइं विक्खंभेणं बावत्तरिं जोयणाइं उड्ढं उच्चत्तेणं अणेगखंभसतसंनिविद्धा वण्णओ तेसि णं सिद्धायतणाणं पत्तेयं-पत्तेयं चउद्धिसिं चत्तारि दारा पन्नत्ता तं जहा- पुरत्थिमेणं दाहिणेणं पच्चत्थिमेणं उत्तरेणं पुरत्थिमेणं देवद्वारे दाहिणेणं असुरद्वारे पच्चत्थिमेणं नागद्वारे उत्तरेणं सुवण्णद्वारे तत्थ णं चत्तारि देवा महिड्ढीया जाव पलिओवमट्ठितीया परिवसंति तं जहा- देवे असुरे नागे सुवण्णे ते णं दारा सोलस जोयणाइं उड्ढं उच्चत्तेणं अट्ठ जोयणाइं विक्खंभेणं तावतियं चेव पवेसेणं सेता वरकणगथूभियागा वण्णओ तेसि णं दाराणं उभयतो पासिं दुहतो निसीधियाए सोलस-सोलस वंदणकलसा पन्नत्ता एवं नेतव्वं जाव सोलस वणमालाओ तेसिं णं दाराणं पुरओ पत्तेयं-पत्तेयं मुहमंडवे पन्नत्ते ते णं मुहमंडवा एगं जोयणसतं आयामेणं पन्नासं जोयणाइं विक्खंभेणं साइरेगाइं सोलस जोयणाइं उड्ढं उच्चत्तेणं अमेगखंभसयसंनिविद्धा वण्णओ तेसि णं मुहमंडवाणं पत्तेयं-पत्तेयं तिदिसिं तओ दारा पन्नत्ता ते णं दारा सोलस जोयणाइं उड्ढं उच्चत्तेणं अट्ठ जोयणाइं विक्खंभेणं जाव वणमालाओ उल्लोगो भूमिभागो उप्पिं अट्ठमंगलगा ।

तेसि णं मुहमंडवाणं पुरओ पत्तेयं-पत्तेयं पेच्छाघरमंडवे पन्नत्ते मुहमंडवप्पमाणतो वत्तव्वता जाव भूमिभागो तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेयं अक्खाडाए पन्नत्ते तेसि णं वइरामयाणं अक्खाडगाणं बहुमज्झदेसभाए पत्तेयं-पत्तेयं मणि-पेढिया पन्नत्ता ताओ णं मणिपेढियाओ अट्ठ जोयणाइं आयाम-विक्खंभेणं चत्तारि जोयणाइं बाहल्लेणं सव्वमणिमईओ जाव पडिरूवाओ तासि णं मणिपेढियाणं उप्पिं सीहासणा विजयदूसा अंकुसा दामा उप्पिं अट्ठमंगलगा तेसि णं पेच्छाघरमंडवाणं पुरतो पत्तेयं-पत्तेयं मणिपेढिया पन्नत्ता ताओ णं मणिपेढियाओ सोलस जोयणाइं आयाम-विक्खंभेणं अट्ठ जोयणाइं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं चेतियथूभा पन्नत्ते ते णं चेतियथूभा सोलस जोयणाइं आयाम-विक्खंभेणं साइरेगाइं सोलस जोयणाइं उड्ढं उच्चत्तेणं संखं-कुंद-दगरय-अमयमहियफेणपुंजसणिकासा अच्छा जाव पडिरूवा उप्पिं अट्ठमंगलगा जाव सहस्सपत्तहत्थगा तेसि णं चेतियथूभाणं पत्तेयं-पत्तेयं चउद्धिसं चत्तारि मणिपेढियाओ पन्नत्ताओ ताओ णं मणिपेढियाओ अट्ठ जोयणाइं आयाम-विक्खंभेणं चत्तारि जोयणाइं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं चत्तारि जिनपडिमाओ जिणुस्सेधम्ममाणमेत्तीओ सव्वरयणामईओ संपलियंकनिसण्णाओ थूभाभिमुहीओ चिट्ठंति तं जहा- उसभा वद्धमाणा चंदानना वारिसेणा तेसि णं चेतियथूभाणं पुरतो पत्तेयं-पत्तेयं मणिपेढियाओ पन्नत्ताओ ताओ णं मणिपेढियाओ सोलस जोयणाइं आयाम-विक्खंभेणं अट्ठ जोयणाइं

बाहल्लेणं

सव्वम-

पडिवत्ति-३

णिमईओ अच्छाओ जाव पडिरूवाओ तासि णं मणिपेढिया णं उप्पि पत्तेयं-पत्तेयं चेतियरुक्खे पन्नत्ते ते णं चेतियरुक्खा अट्ठ जोयणाइं उड्ढं उच्चत्तेणं पमाणं वण्णावासो य जहा विजयस्स जाव अट्ठमंगलगा तेसि णं चेतियरुक्खाणं पुरतो पत्तेयं-पत्तेयं मणिपेढिया पन्नत्ता ताओ णं मणिपेढियाओ अट्ठ जोयणाइं आयाम-विक्खंभेणं चत्तारि जोयणाइं बाहल्लेणं सव्वमणिमईओ अच्छाओ जाव पडिरूवाओ ।

तासि णं मणिपेढियाणं उप्पिं पत्तेयं-पत्तेयं महिंदज्झए पन्नत्ते ते णं महिंदज्झया सट्ठिजोयणाइं उड्डं उच्चत्तेणं जोयणं उव्वेधेणं जोयणं विक्खंभेणं वइरामय जाव अट्ठमंगलगा तेसि णं महिंदज्झयाणं पुरतो पत्तेय-पत्तेय नंदा पुक्खरणी पन्नत्ता ताओ णं नंदाओ पुक्खरणीओ एगमेगं जोयणसतं आयामेणं पन्नासं जोयणाइं विक्खंभेणं दस जोयणाइं उव्वेधेणं अच्छाओ जाव तोरणा, तेसु णं सिद्धायतणेसु पत्तेयं-पत्तेयं अडतालीसं मणोगुलियासाहस्सीओ पन्नत्ताओ तं जहा- पुरत्थिमेणं सोलस्स साहस्सीओ पच्चत्थिओ पच्चत्थिमेणं सोलस साहस्सीओ दाहिणेणं अट्ठ साहस्सीओ उत्तरेणं अट्ठ साहस्सीओ तासु णं मणोगुलियासु बहवे सुवण्णरुप्पमया फलगा जहा विजयारायहाणीओ तेसु णं सिद्धायतणेसु पत्तेयं-पत्तेयं अडतालीसं गोमाणसियासाहस्सीओ पन्नत्ताओ तथेव नवरं-धूव-घडियाओ तेसि णं सिद्धायतणाणं उल्लोया पउमलयाभत्तिचित्ता जाव सव्वतवणिज्जमया अच्छा जाव पडिरूवा तेसि णं सिद्धातणाणं अंतो बहुसमरमणिज्जे भूमिभागे सद्धवज्जं तेसि णं बहुसमरमणिज्जाणं भूमिभागाणं बहुमज्झदेसभाए पत्तेयं-पत्तेयं मणिपेढियाओ पन्नत्ताओ ताओ णं मणिपेढियाओ सोलस जोयणाइं आयाम-विक्खंभेणं अट्ठ जोयणाइं बाहल्लेणं सव्वमणिमईओ अच्छाओ जाव पडिरूवाओ तासि णं मणिपेढियाणं उप्पिं पत्तेयं-पत्तेयं देवच्छंदए पन्नत्ते ते णं देवच्छंदंगा सोलस जोयणाइं आयाम-विक्खंभेणं सातिरेगाइं सोलस जोयणाइं उड्डं उच्चत्तेणं सव्वरयणामया अच्छा जाव पडिरूवा तेसु णं देवच्छंदएसु पत्तेयं-पत्तेयं अट्ठसयं जिनपडिमाणं तथेव जाव अट्ठसतं धूवकडुच्छुगाणं तेसि णं सिद्धायतणाणं उप्पिं अट्ठमंगलगा तत्थ णं जेसे पुरत्थिमिल्ले अंजनगपव्वते तस्स णं चतुद्दिसिं चत्तारि नंदाओ पुक्खरणीओ पन्नत्ताओ-नंदिसेणा अमोहा य गोथूभा य सुदंसणा ताओ णं पुक्खरणीओ एगं जोयणसतसहस्सं आयाम-विक्खंभेणं परिरओ य दस जोयणाइं उव्वेधेणं अच्छाओ वण्णओ नवरं-वट्ठाओ समतीराओ खोदोदगपडिपुननाओ पत्तेयं-पत्तेयं वेइयवनसंडपरिक्खित्ताओ वण्णओ ।

तासि णं पुक्खरणीणं बहुमज्झदेसभाए पत्तेयं-पत्तेयं दधिमुहे पव्वते पन्नत्ते ते णं दधिमुहा पव्वता चउसट्ठिं जोयणसहस्साइं उड्डं उच्चत्तेणं एगं जोयणसहस्सं उव्वेधेणं सव्वत्थ समा पल्लगसंठाण-संठिता परिक्खेवेणं सव्वफालियामया अच्छा जाव पडिरूवा पत्तेयं-पत्तेयं पउमवरवेदिया-परिक्खित्ता पत्तेयं-पत्तेयं वनसंडपरिक्खित्ता वण्णओ तेसि णं दधिमुहाणं पव्वत्ताणं उप्पिं बहुसमरमणिज्जे भूमिभागे पन्नत्ते तेसि णं बहुसमरमणिज्जाणं भूमिभागाणं बहुमज्झदेसभागे पत्तेयं-पत्तेयं सिद्धायतणे पन्नत्ते सच्चेव अंजनग-सिद्धायतणवत्तव्वता जाव अट्ठमंगलगा तत्थ णं जेसे दाहिल्ले अंजनगपव्वते तस्स णं चउद्दिसिं चत्तारि नंदाओ पुक्खरणीओ पन्नत्ताओ-नंदुत्तरा य नंदा आनंदा नंदिवद्धणा सेसं तहेव तत्थ णं जेसे पच्चत्थिमिल्ले अंजनगपव्वते तस्स णं चउद्दिसिं चत्तारि नंदाओ पुक्खरणीओ पन्नत्ताओ-विजया वेजयंती जयंति अपराजिया सेसं तहेव तत्थ णं बहवे भवणवइ-वाणमंतर-जोइसिय-वेमाणिया देवा तिहिं चाउमासिएहिं पज्जोसवणाए य अट्ठविहाओ य महिमाओ करंति अण्णेसु य बहूसुं जिनजम्मणनिक्कमण-नामुप्पादपरिनिव्वाणमादिएसु देवकज्जेसु य देवसमितीसु य देवसमवाएसु य देवसमुदएसु य समुवागता पडिवत्ति-३

समाणा पमुदितपक्कीलिता अट्ठाहियारूवाओ महामहिमाओ करेमाणा सुहंसुहेणं विहरंति अदुततरं च णं गोयमा नंदिस्सरवरे दीवे चक्कवालविक्खंभेणं बहुमज्झदेसभाए चउसु विदिसासु चत्तारि रतिकरपव्वता पन्नत्ता तं जहा- उत्तरपुरत्थिमिल्ले रतिकर-पव्वते दाहिणपुरत्थिमिल्ले रतिकरपव्वते

दाहिणपच्चत्थिमिल्ले रतिकरपव्वते उत्तरपच्चत्थिमिल्ले रतिकरपव्वते ते णं रतिकरपव्वता दस जोयणसहस्साइं उड्ढं उच्चत्तेणं एगं जोयणसहस्सं उव्वेहेणं दस जोयणसयाइं उड्ढं उच्चत्तेणं दस गाउयसयाइं उव्वेहेणं सव्वत्थ समा झल्लरिसंठाणसंठिया दस जोयणसहस्साइं विक्खंभेणं एकक्कीसं जोयणसहस्साइं चत्त तेवीसे जोयणसते परिकखेवेणं सव्वरयणामया अच्छा जाव पडिरूवा तत्थ णं जेसे उत्तरपुरत्थिमिल्ले रतिकरपव्वते तस्स णं चउद्दिसिं ईसाणस्स देविंदस्स देवरणो चउण्हमग्गमहिशीणं जंबुद्दीवप्पमाणाओ चत्तारि रायहाणीओ पन्नत्ताओ तं जहा- नंदुत्तरा नंदा उत्तरकुरा देवकुरा कण्हे कण्हराईए रामरक्खियाए ।

तत्थ णं जेसे दाहिणपुरत्थिमिल्ले रतिकरपव्वते तस्स णं चउद्दिसिं सक्कस्स देविंदस्स देवरणो चउण्हमग्गमहिशीणं जंबुद्दीवप्पमाणाओ चत्तारि रायहाणीओ पन्नत्ताओ तं जहा- सुमना सोमनसा अच्छिमाली मनोरमा चउमाए सिवाए सचीए अंजूए तत्थ णं जेसे दाहिणपच्चत्थिमिल्ले रतिकरपव्वते तस्स णं चउद्दिसिं सक्कस्स देविंदस्स देवरणो चउण्हमग्गमहिशीणं जंबुद्दीवप्पमाणाओ चत्तारि रायहाणीओ पन्नत्ताओ तं जहा भूता भूतवड्ढेसा गोथूभा सुदंसणा अमलाए अच्छराए नवमियाए रोहिणीए तत्थ णं जेसे उत्तरपच्चत्थिमिल्ले रतिकरपव्वते तस्स णं चउद्दिसिमीसाणस्स देविंदस्स देवरणो चउण्हमग्ग-महिशीणं जंबुद्दीवप्पमाणाओ चत्तारि रायहाणीओ पन्नत्ताओ तं जहा- रयणा रतणुच्चया सव्वरतणा रतणसचया वसूए वसुंगुत्ताए वसुमित्ताए वसंधराए केलासहरिवाहणा यत्थ दो देवा महिड्ढीया जाव पलिओवमद्वितीया परिवसंति से तेणद्वेणं जाव निच्चे जोतिसं संखेज्ज ।

[२९५] नंदिस्सरवण्णं दीवं नंदिस्सरोदे नामं समुद्धे वट्ठे जाव चिड्डइ जच्चेव खोदोदसमुद्धस्स वत्तव्वता सच्चेव इहं पि अट्ठसाहिया सुमन-सोमनसा यत्थ दो देवा महिड्ढीया जाव पलिओवमद्वितीया परिवसंति [चंदामि संखेज्जा] सेसं जहा तारगस्स ।

[२९६] नंदिसरोदं समुद्धं अरुणे नामं दीवे वट्ठे वलयागार जाव संपरिक्खित्ता णं चिड्डति अरुणे णं भंते दीवे किं समचक्कवालसंठिते विसमचक्कवालसंठिए गोयमा समचक्कवालसंठिते नो विसमचक्कवालसंठिते केवतियं चक्कवालसंठिते संखेज्जाइं जोयणसयसहस्साइं चक्कवालविकखंभेणं संखेज्जाइं जोयणसयसहस्साइं परिकखेवेणं पन्नत्ते पउमवरवनसंडदारा दारंतरा य तहेव संखेज्जाइं जोयण-सतसहस्साइं दारंतरं जाव अट्ठो वावीओ खोतोदगपडिहत्थाओ उप्पातपव्वयका सव्ववइरामया अच्छा असोग वीतसोगा य एत्थ दुवे देवा महिड्ढीया जाव परिवसंति से तेण. जाव संखेज्जं सव्वं [णंदिस्स-रोदण्णं समुद्धं अरुणे णामं दीवे वट्ठे खोदवरदीवं वत्तव्वत्ता अट्ठसहिता सा इहं च नवरं-पव्वतगादी सव्ववइरामया असोग-वीतसोगा यत्थ दो देवा.पा.]

[२९७] अरुणण्णं दीवं अरुणोदे नामं समुद्धे तस्स वि तहेव परिकखेवो अट्ठो खोतोदगे नवरिं सुभद्ध सुमनभद्धा एत्थ दो देवा महिड्ढीया सेसं तहेव अरुणोदगं समुद्धं अरुणवरे नामं दीवे वट्ठे वलयागार-संठाण. तहेव संखेज्जगं सव्वं जाव अट्ठो खोतोदगपडिहत्थाओ उप्पायपव्वतया सव्ववइरामया अच्छा अरुणवरभद्ध अरुणवरमहाभद्ध एत्थ दो देवा महिड्ढीया एवं अरुणवरोदेवि समुद्धे जाव देवा अरुणवर अरुण-महावरा य एत्थ दो देवा सेसं तहेव, अरुणवरोदण्णं समुद्धं अरुणवरावभासे नामं दीवे वट्ठे जाव देवा पडिवत्ति-३

अरुणवरावभासभद्धारुणवरावभासमहाभद्धा यत्थ दो देवा महिड्ढीया एवं अरुणवरावभासे समुद्धे नवरि देवा अरुणवरावभासवरारुणवरावभासमहावरा एत्थ दो देवा महिड्ढीया [अरुणण्णं दीवं अरुणोदे नामं समुद्धे वट्ठे

खोदोदसरिसो गमो सुभद-सुमण-भद्दा यत्थ दो देवा अरुणोदण्णं समुद्धं अरुणवरे नामं दीवे वट्ठे सोच्चेव गमो नवरं-अरुणवरभद्द-अरुणवरमहाभद्दा यत्थ दो देवा अरुणवरण्णं दीवं अरुणवरोदे नामं समुद्धे वट्ठे जाव चिद्धति तधेव नवरं-अरुणवर-अरुणमहावरा यत्थ दो देवा अरुणवरोदण्णं समुद्धं अरुणवरोभासे नामं दीवे वट्ठे जाव चिद्धति खोददीवगमो नवरं-अरुणवरोभासभद्द-अरुणवरोभासमहाभद्दा यत्थ दो देवा अरुणव-रोभासण्णं दीवं अरुणवरोभासे नामं समुद्धे वट्ठे सच्चेव खोदोदसमुद्धवत्तव्वता नवरं-अरुणवरोभासवर-अरुण-वरोभासमहावरा यत्थ दो देवा पा.] ।

[२९८] कुंडले दीवे कुंडले समुद्धे कुंडलवरे दीवे कुंडलवरे समुद्धे कुंडलवरोभासे दीवे कुंडलवरो-भासे समुद्धे एताइं नामाइं देवा-कुंडले दीवे कुंडलभद्द-कुंडलमहाभद्दा यत्थ दो देवा कुंडले समुद्धे चक्खुसुभ-चक्खुकंता यत्थ दो देवा कुंडलवरे दीवे कुंडलवरभद्द-कुंडलवरमहाभद्दा यत्थ दो देवा कुंडलवरे समुद्धे कुंडलवर-कुंडलमहावरा यत्थ दो देवा कुंडलवरोभासे दीवे कुंडलवरोभासभद्दकुंडलवरोभासमहाभद्दा यत्थ दो देवा कुंडलवरोभासे समुद्धे कुंडलसवरोभासवर-कुंडलवरोभासमहावरा यत्थ दो देवा ।

[२९९] कुंडलवरोभासं णं समुद्धं रुचगे नामं दीवे वट्ठे वलया जाव चिद्धति किं समचक्क विसमचक्कवाल गोयमा समचक्कवाल नो विसमचक्कवालसंठिते केवतियं चक्कवाल पन्नत्ते सव्वट्ठ मनोरमा एत्थ दो देवा सेसं तहेव रुयगोदे नामं समुद्धे जहा खोदोदे समुद्धे संखेज्जाइं जोयणसत-सहस्साइं चक्कवाल संखेज्जाइं जोयणसतसहस्साइं परिकखेवेणं दारा दारंतरं पि संखेज्जाइं जोतिसंपि सव्वं संखेज्जं भाणियव्वं अट्ठोवि जहेव खोदोदस्स नवरि सुमनसोमनसा एत्थ दो देवा महिड्डीया तहेव रुयगाओ आढत्तं असंखेज्जं विक्खंभा परिकखेवो दारा दारंतरं च जोइसं च सव्वं असंखेज्जं भाणियव्वं रुयगोदण्णं समुद्धं रुयगवरं णं दीवे वट्ठे रुयगवरभद्दरुयगवरमहाभद्दा एत्थ दो देवा रुयगवरोदे रुयगवररुयगवरमहावरा एत्थ दो देवा महिड्डीया रुयगवरावभासे रुयगवरावभास-भद्द रुयगवरावभासमहाभद्दा एत्थ दो देवा महिड्डीया रुयगवरावभासे समुद्धे रुयगवरावभास-वररुय-गवरावभासमहावरा एत्थ [एवं रुयए दीवे रुयए समुद्धे रियगवरे दीवे रुयगवरे समुद्धे रुयग-वरोभा-से दीवे रुयगवरोभासे समुद्धे ताओ चेव वत्तव्वताओ नवरं-रुयए दीवे सव्वट्ठ-मनोरमा यत्थ दो देवा रुयए समुद्धे सुमन-सोमनसा यत्थ दो देवा रुयगवरे दीवे रुयगवरभद्द-रुयगवरमहाभद्दा यत्थ दो रुयगवरे समुद्धे रुयगवर-रुयगवरमहावरा यत्थ दो देवा रुयवरोभासे दीवे रुयगव-रोभासभद्द-रुयगवरोभासमहाभद्दा यत्थ दो देवा रुयगवरोभासे समुद्धेरुयगवरोभासवर-रुयगव-रोभासमहावरा यत्थ दो देवा पा.] ।

[३००] हारदीवे हारभद्द हारमहाभद्दा एत्थ हारसमुद्धे हारवरहारवरमहावरा एत्थ दो देवा महिड्डीया हारवरे दीवे हारवरभद्दहारवरमहाभद्दा एत्थ दो देवा महिड्डीया हारवरोए समुद्धे हारवरहारवर-महावरा एत्थ हारवराभासे दीवे हारवरावभासभद्दहारवरावभासमहाभद्दा एत्थ हारवरावभासोए समुद्धे हारव-राभासवरहारवरावभासमहावरा एत्थ एवं सव्वेवि तिपडोयारा नेतव्वा जाव सूरवरोभासोए समुद्धे दीवेसु भद्दनामा वरनामा हौंति उद्धहीसु जाव पच्छिमभावं च खोत्तवरादीसु सयंभूरमणपज्जंतेसु वावीओ खोओदग-पडिहत्थाओ पव्वयका य सव्ववड्ढरामया देवदीवे दीवे दो देवा महिड्डीया देवभद्ददेवमहाभद्दा एत्थ देवोदे समुद्धे देववरदेवमहावरा एत्थ जाव सयंभूरमणे दीवे सयंभूरमणभद्दसयंभूरमणमहाभद्दा एत्थ दो देवा पडिवत्ति-३

महिड्डीया सयंभूरमणण्णं दीवं सयंभूरमणोदे नामं समुद्धे वट्ठे वलया जाव असंखेज्जाइं जोयणसत-सहस्साइं परिकखेवणं जाव अट्ठो गोयमा सयंभूरमणोदए उदए अच्चे पत्थे जच्चे तणुए फलिहवण्णाभे पगतीए

उदगरसेणं पन्नत्ते सयंभुरमणवर-सयंभुरमणमहावरा इत्थ दो देवा महिङ्गीया सेसं तहेव जाव असंखेज्जाओ तारागणकोडिकोडीओ सोभंसे वा, सोभंति वा, सोभिस्संति वा [हारे दीवे हारे समुद्धे हारवरे दीवे हारवरे समुद्धे हारवरोणा-सेदीवे हारवरोभासे समुद्धे ताओ च्चेव वत्तव्वताओ नवरं-हारे दीवे हारभद्ध-हारमहाभद्धा यत्थ दो देवा हारे मुद्धे हारवर-हारमहावरा यत्थ दो देवा हारवरे दीवे हारवरभद्ध-हारवरमहाभद्धा यत्थ दो देवा हारवरे समुद्धे हारवर-हार-वरमहावरा यत्थ दो देवा हारवरोभासे दीवे हारवरोभासभद्ध-हारवकोभासमहाभद्धा यत्थ दो देवा हारवरोभासे समुद्धे हारवरोभासवरहारवरोभासमहावरा यत्थ दो देवा एवं सेसाभरणाणवि तिपडोयारो भेदो भाणियव्वो जाव कणगरयणमुत्तावली ।

एवं वत्थादीणं सव्वेसिं तिपडोयारं वत्थं-आणि-यादि गंधा-कोट्टादि उप्पलादीणि वि तिपडोयारं तिलगादीण वि रुक्खाणं पुढवादीणं छत्तीसाए पदाणं तिपडोयारं निधीणं वि तिपडोयारं चोद्धसण्हं रयणाणं तिपडोयारं चुल्लहिमवंतादीणं वासधरपव्वताणं पउमादीणं सोलसण्हं दहाणं गंगासिंधु आदीणं महानदीणं अंतरनदीणं य कच्छादीण वि बत्तीसण्हं विजयाणं मालवंतादीणं चुण्हं वक्खारपव्वयाणं सोहम्मा-दीणं दुवालसण्हं कप्पाणं सक्कादीणं दसण्हं इंदाणं देवकुर-उत्तरकुराणमंदरस्स आवासाणं चुल्लहिम-वंतादीणं बारसण्ह कूडाणं कत्तियादीणं अट्ठावीसण्हं नक्खत्ताणं चंदसूराणं सव्वेसिं तिपडोयारं जाव सूरद्धीवे सूरवरो-भासण्णं समुद्धं देवे नामं दीवे वट्ठे जाव चिद्धति तथेव नवरं-कहिं णं भंते देवस्स दीवस्स विजए नामं दारे पन्नत्ते गोयमा देवदीवपुरत्थिमपेरंते देवसमुद्धपुरत्थिमद्धस्स पच्चत्थिमेणं एत्थ णं देवस्स दीवस्स विजए नामं दारे पन्नत्ते गोयमा देवदीवपुरत्थिमपेरंते देवसमुद्धपुरत्थिमद्धस्स पच्चत्थिमेणं एत्थ णं देवस्स दीवस्स विजए नामं दारे पन्नत्ते पमाणं वण्णओ य भाणियव्वो जाव विहरति कहि णं भंते विजयस्स देवस्स विजया नामं रायहाणी पन्नत्ता गोयमा विजयस्स दारस्स पच्चत्थिमेणं देवदीवं तिरियमसंखेज्जाइं जोयणसयसहस्साइं ओगाहित्ता एत्थ णं विजयस्स देवस्स विजया नामं रायहाणी पन्नत्ता जाव एमहाणुभागे विजए देवे विजए देवे एवं वेजयंत-जयंत-अपराइतादी अट्ठो ।

जोतिसं सव्वं जहा रुयगदीवस्स नवरं-देवभद्ध-देवमहाभद्धा यत्थ दो देवा देवण्णं दीवं देवोदे नामं समुद्धे वट्ठे जाव चिद्धति जाव-कहि णं भंते देवोदस्स समुद्धस्स विजए नामं दारे पन्नत्ते गोयमा देवसमुद्धपुरत्थिमपेरंते नागदीवपुरत्थिमद्धस्स पच्चत्थिमेणं एत्थ णं देवोदस्स समुद्धस्स विजए नामं दारे पन्नत्ते जाव विहरति रायहाणी विजयदारस्स पच्चत्थिमेणं देवसमुद्धं तिरियमसंखेज्जाइं जोयणसयसहस्साइं जाव एम्महिङ्गीए विजए देवे जहा देवदीवे तहा नागदीवे जहा देवसमुद्ध तहा नागसमुद्ध एवं जाव सयंभुरमणसमुद्धे नवरं-सयंभुरमणस्स उदए जहा पुक्खरोदस्स सयंभुरमणे पदेसा न भण्णंति जीवणं उववातो न भण्णंति देवे नागे जक्खे भूते सयंभुरमणे एक्केक्के च्चेव भाणियव्वे तिपडोगारं नत्थि नंदिस्सरादीणं सयंभुरमणपज्जवसाणाणं अट्ठ चिंताए वावीओ खोतोदगपडिहत्थाओ उप्पातपव्वतगादी सव्ववइरामया नंदिस्सरादीणं भूतपज्जवसाणाणं समुद्धाणं अट्ठ चिंताए खोदसरिसं उदगं सयंभुरमण-समुद्धस्स पुक्खरोदसरिसं अरुणादीया दीव समुद्धा तिपडोयारा जाव सूरा सेसा पंच एगभेया-देवे समुद्धे नागे दीवे नागे समुद्धे जक्खे दीवे जक्खे समुद्धे भूते दीवे भूते समुद्धे सयंभुरमणे दीवे सयंभुरमणे समुद्धे देवे दीवे देवभद्ध-देवमहाभद्धा देवा देवे समुद्धे देववर-देवमहावरा देवा एवं जाव सयंभुरमणे समुद्धे सयंभुवर-सयंभुमहा-पडिवत्ति-३

रवार देवा रुयगादीणं दीवसमुद्धाणं विक्खंभपरिक्खेव-दारंतरजोतिसं च असंखेज्जं पा.] ।

[३०१] केवइया णं भंते जंबुदीवा दीवा नामधेज्जेहिं पन्नत्ता गोयमा असंखेज्जा जंबुदीवा नामधेज्जेहिं पन्नत्ता केवतिया णं भंते लवणसमुद्धा समुद्धा पन्नत्ता गोयमा असंखेज्जा लवणसमुद्धा नामधेज्जेहिं पन्नत्ता एवं धायतिसंडावि एवं जाव असंखेज्जा सूरदीवा नामधेज्जेहिं य एगे देवे दीवे पन्नत्ते एगे देवोदे समुद्धे पन्नत्ते एगं नागे जक्खे भूते जाव एगे सयंभूरमणे दीवे एगे सयंभूरमणसमुद्धे नामधेज्जेणं पन्नत्ते ।

[३०२] लवणस्स णं भंते समुद्धस्स उदए केरिसए आसादेणं पन्नत्ते गोयमा खारे कडुए जाव नन्नत्थ तज्जोणियाणं सत्ताणं कालोयस्स णं पुच्छा गोयमा आसले मासले जाव पगतीए उदगरसे णं पन्नत्ते पुक्खरोदस्स णं पुच्छा गोयमा पुक्खरोदस्स उदए अच्छे पत्थे जाव पगतीए उदगरसे णं पन्नत्ते वरुणोदस्स णं भंते समुद्धस्स केरिसए अस्सादे णं पन्नत्ते गोयमा से जहानामए चंदप्पभाति वा जहा हेद्वा, खीरोदस्स णं पुच्छा गोयमा से जहानामए रण्णो चाउरंतचक्कवट्टिस्स चाउरक्के गोकखीरे जाव एतो इट्ठतराए, घयोदस्स णं पुच्छा गोयमा जहानामते सारइयस्स गोघयवरस्स मंडे जाव एत्तो मणा-मतराए चेव आसादे णं पन्नत्ते खोतोदस्स णं भंते समुद्धस्स उदए केरिसए आसाए णं पन्नत्ते गोयमा से जहानामए उच्छूणं जाव एत्तो इट्ठतराए जहा खोतो तहा सेसा वि सयंभूरममस्स जहा पुक्खरोदस्स कति णं भंते समुद्धा पत्तेयरसा पन्नत्ता गोयमा चत्तारि समुद्धा पत्तेयरसा पन्नत्ता तं जहा- लवणे वरुणोदे खीरोदे घयोदे कति णं भंते समुद्धा पगतीए उदरगसा पन्नत्ता गोयमा तओ समुद्धा पन्नत्ता तं जहा- कालोए पुक्खरोदे सयंभूरमणे अवसेसा समुद्धा उस्सणं खोतरसा पन्नत्ता समणउसो ।

[३०३] कति णं भंते समुद्धा बहुमच्छकच्छभाइण्णा पन्नत्ता गोयमा तओ समुद्धा पन्नत्ता तं जहा- लवणे कालोए सयंभूरमणे अवसेसा समुद्धा अप्पमच्छकच्छभाइण्णा नो च्चेव णं निम्मच्छकच्छभा पन्नत्ता समणाउसो लवणे णं भंते समुद्धे कति मच्छजातिकुलकोडिजोणी-पमुहसयसहस्सा पन्नत्ता गोयमा सत्त मच्छजाति जाव पन्नत्ता कालोए णं नव, सयंभूरमणे पुच्छा अद्धतेरस मच्छजाति जाव पन्नत्ता लवणे णं भंते समुद्धे मच्छाणं केमहालिया सरीरोगाहणा पन्नत्ता गोयमा जहण्णेणं अंगुलस्स असंखेज्जतिभागं उक्कोसेणं पंच जोयणसयिं कालोए णं सत्त जोयणसताइं सयंभूरमणे जोयणसहस्सं [दस जोयणसत्ताइं पा.]

[३०४] केवतिया णं भंते दीवसमुद्धा नामधेज्जेहिं पन्नत्ता गोयमा जावतिया लोगे सुभा नामा सुभा वण्णा सुभा गंधा सुभा रसा सुभा फासा एवतिया दीवसमुद्धा नामधेज्जेहिं पन्नत्ता केवतिया णं भंते दीवसमुद्धा उद्दारेणं पन्नत्ता गोयमा जावतिया अइडाइज्जाणं उद्दारसागरोवमाणं उद्दारसमया एवतिया दीवसमुद्धा उद्दारेणं पन्नत्ता ।

[३०५] दीवसमुद्धा णं भंते किं पुढविरपरिणामा आउपरिणामा जीवररिणामा पोग्गलपरिणामा गोयमा पुढविपरिणामावि आउपरिणामावि जीवपरिणामावि पोग्गल परिणामावि दीवसमुद्धेसुं णं भंते सव्वापाणा सव्वभूया सव्वजीवा सव्वसत्ता उववण्णपुव्वा हंता गोयमा असइं अदुवा अनंतखुत्तो ।

◦ तच्चाए पडिवत्तीए दीव-समुद्धाधिकारो समत्तो ◦

[[इंदियविसयाधिगारो]]

[३०६] कतिविहे णं भंते इंदियविसए पोग्गलपरिणामे पन्नत्ते गोयमा पंचविहे इंदियविसए पडिवत्ति-३

पोग्गलपरिणामे पन्नत्ते तं जहा- सोतिंदियविसए जाव फासिंदियविसए सोतिंदियविसए णं भंते पोग्गलपरि-णामे कतिविहे पन्नत्ते गोयमा दुविहे पन्नत्ते तं जहा- सुब्भिसद्वपरिणामे य दुब्भिसद्वपरिणामे य चक्खिंदियपुच्छा गोयमा दुविहे पन्नत्ते तं जहा- सुरूवपरिणामे य दुरूवपरिणामे य घाणिंदियपुच्छा गोयमा दुविहे पन्नत्ते तं जहा- सुब्भिगंधपरिणामे य दुब्भिगंधपरिणामे य, रसपरिणामे दुविहे पन्नत्ते तं जहा- सुरसपरिणामे य दुरसपरिणामे य फासपरिणामे दुविह पन्नत्ते तं जहा- सुफासपरिणामे य दुफासपरिणामे य से नूणं भंत उच्चावएसु सद्वपरिणामेसु उच्चावएसु रूवपरिणामेसु एवं गंधपरिणामेसु रसपरिणामेसु फासपरिणामेसु परिणममाणा पोग्गला परिणमंतीति वत्तव्वं सिया हंता गोयमा उच्चावेसु सद्वपरिणामेसु परिणममाणा पोग्गला परिणमंतित्ति वत्तव्वं सिया से नूणं भंते सुब्भिसद्वा पोग्गला दुब्भिसद्वत्ताए परिणमंति दुब्भिसद्वा पोग्गला सुब्भिसद्वत्ताए परिणमंति हंता गोयमा सुब्भिसद्वा पोग्गला दुब्भिसद्वत्ताए परिणमंति दुब्भिसद्वापोग्गला सुब्भिसद्वत्ताए परिणमंति से नूणं भंते सुरूवा पोग्गला दुरूवत्ताए परिणमंति दुरूवा पोग्गला सुरूवत्ताए परिणमंति हंता गोयमा एवं सुब्भिगंधा पोग्गला दुब्भिगंधत्ताए परिणमंति दुब्भिगंधा पोग्गला सुब्भिगंधत्ताए परिणमंति हंता गोयमा एवं सुरसा दूरसत्ताए हंता गोयमा एवं सुफासा सुफासत्ताए हंता गोयमा ।

• तच्चाए पडिवत्तीए इंदिय विसयाधिकारो समत्तो •

॥ देवाधिकारो ॥

[३०७] देवे णं भंते महिड्डीए जाव महाणुभागे पुव्वामेव पोग्गलं खिवित्ता पभू तमेव अनुपरियट्ठित्ताणं गिण्हित्तए हंता पभू से केणट्ठेणं भंते एवं वुच्चति-देवे णं महिड्डीए जाव महाणुभागे पुव्वामेव पोग्गलं खिवित्ता पभू तमेव अनुपरियट्ठित्ताणं गिण्हित्तए गोयमा पोग्गले णं खित्ते समाणे पुव्वामेव सिग्घगती भवति तओ पच्छा मंदगती भवति देवे णं पुव्वंपि पच्छावि सीहे सीहगती चेव तुरिए तुरियगती चेव से तेणट्ठेणं गोयमा एवं वुच्चति-देवे णं महिड्डीए जाव महाणुभागे पुव्वामेव पोग्गलं खिवित्ता पभू तमेव अनुपरियट्ठित्ताणं गेण्हित्तए देवे णं भंते महिड्डीए जाव महाणुभागे बहिरए पोग्गले अपरियाइत्ता बालं अच्छेत्ता अभेत्ता पभू गढित्तए नो इणट्ठे समट्ठे देवे णं भंते महिड्डीए जाव महाणुभागे बाहिरए पोग्गले अपरियाइत्ता बालं छेत्ता भेत्ता पभू गढित्तए नो इणट्ठे समट्ठे देवे णं भंते महिड्डीए जाव महाणुभागे बाहिरए पोग्गले परियाइत्ता बालं अच्छेत्ता अभेत्ता पभू गढित्तए नो इणट्ठे समट्ठे देवे णं भंते महिड्डीए जाव महाणुभागे बाहिरए पोग्गले परियाइत्ता बालं छेत्ता भेत्ता पभू गढित्तए हंतापभू तं चेव णं गंठि छउमत्थे मणूसे णं जाणति न पासति एसुहुमं च णं गढेज्जा देवे णं भंते महिड्डीए जाव महाणुभागे बाहिरए पोग्गले अपरियाइत्ता बालं अच्छेत्ता अभेत्ता पभू दीहीकरित्तए वा हस्सीकरित्तए वा नो इणट्ठे समट्ठे [देवे णं भंते महिड्डीए जाव महाणुभागे बाहिरए पोग्गले अपरियाइत्ता बालं छेत्ता भेत्ता पभू दीहीकरित्तए वा हस्सी करित्तए वा नो इणट्ठे समट्ठे देवे णं भंते महिड्डीए जाव महाणुभागे बाहिरए पोग्गले परियाइत्ता बालं अच्छेत्ता अभेत्ता पभू दीहीकरित्तए वा हस्सी करित्तए वा नो इणट्ठे समट्ठे देवे णं भंते महिड्डीए जाव महाणुभागे बाहिरए पोग्गले परियाइत्ता बालं छेत्ता भेत्ता पभू दीहीकरित्तए वा हस्सीकरित्तए वा हंता पभू] तं चेव णं गंठि छउमत्थे मणूसे ने जाणति न पासति एसुहुमं च णं दीहीकरेज्ज वा [हस्सीकरेज्जवा] ।

पडिवत्ति-३

[] जोइस-उद्देसओ []

[३०८] अत्थि णं भंते चंदिम-सूरियाणं हेड्विंपि तारारूवा अणुं पि तुल्लावि समं पि तारारूवा तुल्लावि उप्पिं पि तारारूवा अणुं पि तुल्लावि हंता अत्थि से केणद्वेणं भंते एवं वुच्चति-अत्थि णं चंदिम-सूरियाणं जाव उप्पिं पि तारारूवा अणुं पि तुल्लावि गोयमा जहा- जहा णं तेसि दे देवाणं तव-नियम-बंधेराइं उस्सियाइं भवंति तहा तहा णं तेसिं देवाणं एवं पन्नायति अणुत्ते वा तुल्लत्ते वा से तेणद्वेणं गोयमा एवं वुच्चति-अत्थि णं चंदिम-सूरियाणं जाव उप्पिं पि तारारूवा अणुं पि तुल्लावि ।

[३०९] एगमेगस्स णं भंते चंदिम-सूरियस्स केवतिया नक्खत्ता परिवारो पन्नत्तो केवतिया महग्गहा परिवारो पन्नत्तो केवतिया तारागणकोडिकोडीओ परिवारो पन्नत्तो गोयमा एगमेगस्स णं चंदिम-सूरियस्स-

[३१०] अट्ठासीतिं च गहा अट्ठावीसं च होइ नक्खत्ता ।

एगससीपरिवारो एत्तो ताराणं वोच्छामि ॥

[३११] छावट्ठि सहस्साइं नव य सताइं पंच सयराइं ।

एगससीपरिवारो तारागणकोडिकोडीणं ॥

[३१२] जंबुद्धीवे णं भंते दीवे मंदरस्स पव्वयस्स केवतियं अबाहाए जोतिसं चारं चरति गोयमा एक्कारस एक्कवीसे जोयणसते अबाहाए जोतिसं चारं चरति लोगंताओ भंते केवतियं अबाहाए जोतिसे पन्नत्ते गोयमा एक्कारस एक्कारे जोयणसते अबाहाए जोतिसे पन्नत्ते इमीसे णं भंते रयणप्पभाए पुढवीए बहुसमरमणिज्जाओ भूमिभागाओ केवतियं अबाहाए हेड्विल्ले तारारूवे चारं चरति केवतियं अबाहाए उवरिल्ले तारारूवे चारं चरति गोयमा सत्त नउते जोयणसते अबाहाए हेड्विल्ले तारारूवे चारं चरति अट्ठ जोयणसताइं अबाहाए सूरविमाणे चारं चरति अट्ठ असीते जोयणसते अबाहाए चंदविमाणे चारं चरति नव जोयणसयाइं अबाहाए उवरिल्ले तारारूवे चारं चरति हेड्विल्लाओ णं भंते तारारूवाओ केवतियं अबाहाए सूरविमाणे चारं चरति केवड्यं अबाहाए चंदविमाणे चारं चरति केवतियं अबाहाए उवरिल्ले तारारूवे चारं चरति गोयमा दसहिं जोयणेहिं अबाहाए सूरविमाणे चारं चरति नउतीए जोयणेहिं अबाहाए चंदविमाणे चारं चरति दसुत्तरे जोयणसते अबाहाए उवरिल्ले तारारूवे चारं चरति सूरविमाणाओ णं भंते केवतियं अबाहाए चंदविमाणे चारं चरति केवतियं अबाहाए उवरिल्ले तारारूवे चारं चरति गोयमा असीए जोयणेहिं अबाहाए-चंदविमाणे चारं चरति जोयणसए अबाहाए उवरिल्ले तारारूवे चारं चरति चंदविमाणाओ णं भंते केवतियं अबाहाए उवरिल्ले तारारूवे चारं चरति गोयमा वीसाए जोयणेहिं अबाहाए उवरिल्ले तारारूवे चारं चरति गोयमा वीसाए जोयणेहिं अबाहाए उवरिल्ले तारारूवे चारं चरति एवामेव सपुव्वावरेणं दसुत्तरजोयणसतबाहल्ले तिरियमसंखेज्जे जोतिसविसए पन्नत्ते [जोतिसे चारं चरति] ।

[३१३] जंबुद्धीवे णं भंते दीवे कयरे नक्खत्ते सव्वब्भित्तिल्लं चारं चरति कयरे नक्खत्ते सव्वबाहिरिल्लं चारं चरति कयरे नक्खत्ते सव्वउवरिल्लं चारं चरति कयरे नक्खत्ते सव्वहेड्विल्लं चारं चरति गोयमा अभिइनक्खत्ते सव्वब्भित्तिल्लं चारं चरति मूले नक्खत्ते सव्वबाहिरिल्लं चारं चरति साती नक्खत्ते सव्वोवरिल्लं चारं चरति भरणीनक्खत्ते सव्वहेड्विल्लं चारं चरति ।

[३१४] चंदविमाणे णं भंते किसंठिते पन्नत्ते गोयमा अद्धकविट्ठगसंठाणसंठिते सव्वफालि-पडिवत्ति-३

यामए अब्भुग्गतमूसितपहलसिते वण्णओ एवं सूरविमाणेवि नक्खत्तविमाणेवि गहविमाणेवि ताराविमाणेवि, चंदविमाणे णं भंते केवतियं आयाम-विक्खंभेणं केवतियं परिकखेवेणं केवतियं बाह-ल्लेणं पन्नत्ते गोयमा छप्पन्ने एगसद्धिभागे जोयणस्स आयाम-विक्खंभेणं तं तिगुणं सविसेसं परिकखेवेणं अट्ठावीसं एगसद्धिभागे जोयणस्स बाहल्लेणं पन्नत्ते, सूरविमाणस्सवि सच्चेव पुच्छा गोयमा अट्ठावीसं एगसद्धिभागे जोयणस्स आयाम-विक्खंभेणं तं तिगुणं सविसेसं परिकखेवेणं चट्ठीवीसं एगसद्धिभागे जोयणस्स बाहल्लेणं पन्नत्ते एवं गहविमाणेवि अट्ठजोयणं आयाम-विक्खंभेणं तं तिगुणं सविसेसं परिकखेवेणं कोसं बाहल्लेणं पन्नत्ते नक्खत्तविमाणे णं कोसं आयाम-विक्खंभेणं तं तिगुणं सविसेसं परिकखेवेणं अट्ठकोसं बाहल्लेणं पन्नत्ते, ताराविमाणे णं अट्ठकोसं आयाम-विक्खंभेणं तं तिगुणं सविसेसं परिकखेवेणं पंचधणुसयाइं बाहल्लेणं पन्नत्ते ।

[३१५] चंदविमाणे णं भंते कति देवसाहस्सीओ परिवहंति गोयमा चंदविमाणस्स णं पुरच्छिमेणं सेयाणं सुभगाणं सुप्पभाणं संखतलविमलनिम्मलदधिधणगोखीरफेणरययणिगरप्पगासाणं थिर-लट्ठपउट्ठवट्ठपीवरसुसिलिद्धविसिद्धतिकखदाढाविडंबितमुहाणं रत्तुप्पलपत्तमउयसुमालतालुजी-हाणं मधु-गुलियपिंगलक्खाणं पसत्थसत्थवेरुलियभिसंतक्ककडनहाणं विसालपीवरुपडिपुन्नविउलखंधाणं मिउविसय-पसत्थसुहुमलक्खणविच्छिण्णकेसरसडोवसोभिताणं चंकमितललियपुलितधवलगव्वितगतीणं उस्सियसु-णिम्मियसुजायअप्फोडियणंगूलाणं वडरामयनक्खाणं वडरामयदंताणं वयरामयदाढाणं तवणिज्जजीहाणं तव-णिज्जतालुयाणं तवणिज्जजोत्तगसुजोतिताणं कामगमाणं पीतिगमाणं मनोगमाणं मनोरमाणं मनोहराणं अमीयगतीणं अमियबलवीरियपुरिस्सकारपरक्कमाणं महता अप्फोडियसीहनाइबोलकलयलवरेणं महुरेण मनहरेण य पूरंता अंबरं दिसाओ य सोभयंता चत्तारि देवसाहस्सीओ सीहरूवधारीणं देवाणं पुरच्छिमिल्लं बाहं परिवहंति चंदविमाणस्स णं दक्खिणेणं सेयाणं सुभगाणं सुप्पभाणं संखतलविमलनिम्मलदधि-गोखीरफेणरययणियरप्पभासाणं वडरामयकुंभजुयलसुद्धितपीवरवरडरसौंडवियदित्तसुरत्तपउमप्पकासाणं अब्भुण्णयमुहाणं तवणिज्जविसालचंचलचलंतचवलक्खणविमुलज्जलाणं मधुवण्णभिसंतणिद्धपिंगलपत्तल-तिवण्णमणिरयणलोयणाणं अब्भुग्गतमउलमल्लियाणं धवलसरिससंठितणिव्वणदढमसिण फालियामयसु-जायदंतमुसलोवसोभिताणं कंचणकोसीपविद्धदंतगगविमलमणिरयणरुडरपेरंतचित्तरूवगविरायिताणं तवणिज्ज-विसालतिलगपमुहपरिमंडिताणं नाणामणिरयणगुलियगेवेज्जबद्धगलयवरभूसणाणं वेरुलियविचित्तदंडनिम्मलव-डरामयतिकखलट्ठअंकुसकुंभजुयलंतरोडियाणं तवणिज्जसुबद्धकच्छदप्पियबलुद्धदुराणं जंबूनयविमलधण-मंडलवडरामयलालालियतालनानामणिरयणघंटपासगरयतामयरज्जबद्धंबितघंटाजुयलमहुरसरमणहराणं अ-ल्लीणपमाणजुत्तवट्ठियसुजातलक्खणपसत्थरमणिज्जवालगतपरिपुंछणाणं ओयवियपडिपुन्नकुम्मचलण-लहुविककमाणं अंकामयणक्खाणं तवणिज्जतालुयाणं तवणिज्जजीहाणं तवणिज्जजोत्तगसुजोतियाणं कामक-माणं पीतिकमाणं मनोगमाणं मनोरमाणं मनोहराणं अमियगतीणं अमियबलवीरियपुरिस्सकारपरक्कमाणं महया गंभीरगुलगुलाइयरवेणं महुरेणं मनहरेणं पूरंता अंबरं दिसाओ य सोभयंता चत्तारि देवसाहस्सीओ गयरूवधारीणं देवाणं दक्खिणिल्लं बाहं परिवहंति ।

चंदविमाणस्स णं पच्चत्थिमेणं सेताणं सुभगाणं सुप्पभाणं चंकमियललियपुलितचलचव-लककुदसालीणं सण्णयपासाणं संगयपासाणं सुजायपासाणं मियमाइतपीणरइतपासाणं झसविहगसुजात-कुच्छीणं पसत्थणिद्धमधुगुलितभिसंतपिंगलक्खाणं विलासपीवरुपडिपुन्नविपुलखंधाणंवट्ठपडिपुन्नविपुल-

कवो ककिताणं इसिं आणयवसणोवद्वाणं घणनिचित सुबद्ध लक्खणुण्णत चंकमितल लितपुलियचक्कवाल-
चवलगव्वितगतीणं पीवरोरुवट्टिय सुसंठितक-डीणं ओलंबपलंबलक्खणपसत्थरमणिज्जवालगंडाणं समखुर-
वालघाणाणं समलिहिततिकखग्ग सिंगाणं तणुसुहुम-सुजातणिद्धलोमच्छविधराणं उलवचितमंसलविसाल-
पडिपुन्नखंधपमुहुपुंडराणं वेरुलियभिसंतकडक्खसुणिरिक्खाणाणं जुत्तप्पमाणप्पधाणलक्खणपसत्थरमणिज्ज-
गग्गरगलसोभिताणं घग्घरगसुबद्धकण्ठपरिमंडियाणं नानामणिकणगरयणघण्टेवेयपच्छगसुकयरतियमालियाणं
वरघंटागलगलियसोभंतसस्सिरीयाणं पउमुप्पलसगलसुरभिमालाविभूसिताणं वडरखुराणं विविधखुराणं फालि-
यामयदंताणं तवणिज्जजीहाणं तवणिज्जतालुयाणंतणिज्जजोत्तगसुजोत्तियाणं कामकमाणं पीतिकमाणं
मनो-गमाणं मनोरमाणं मनोहराणं अमितगतीणं अमियबलवीरियपुरिसयारपरक्कमाणं महया
गंभीरगज्जियरवेणं मधुरेणं मनहरेण पूरंता अंबरं दिसाओ य सोभयंता चत्तारि देवसाहस्सीओ
वसभरूवाधारीणं देवाणं पच्चत्थिमिल्लं बाहं परिवहंति ।

चंदविमाणस्स णं उत्तरेणं सेयाणं सुभगाणं सुप्फभाणं जच्चाणंतरमल्लिहायणाणं
हरिमेलाम-उलमल्लियच्छाणं धणणिचितसुबद्धलक्खणुण्णताचंकमियललियपुलियचवलचंचलगतीणं
लंघणवग्गधावण धारणतिवड्जडणसिक्खितगईणं सण्णतपासाणं संगतपासाणं सुजायपासाणं
मितमायितपीणरइयपासाणं झसविहगसुजातकुच्छीणं पीणपीवरवट्टितसुसंठितकडीणं
ओलंबपलंबलक्खणपसत्थरमणिज्जवालगंडाणं तणुसुहुमसुजायणिद्धलोमच्छविधराणं
मिउविसयपसत्थसुहुमलक्खणविकिण्णकेसरवालिधराणं ललियस-विलासगतिलाडवरभूसणाणं
मुहुमंडगोचूलचमरथासगपरिमंडियकडीणं तवणिज्जखुराणं तवणिज्जजीहाणं तवणिज्जतालुयाणं
तवणिज्जजोत्तगसुजोत्तियाणं कामकमाणं जाव चत्तारि देवसाहस्सीओ हयरूवधारीणं देवाणं उत्तरिल्लं बाहं
परिवहंति एवं सूरविमाणस्सवि पुच्छा गोयमा सोलस देवसाहस्सीओ परिवहंति पुव्वकमेणं एवं
गहविमाणस्सवि पुच्छा गोयमा अट्ट देवसाहस्सीओ परिवहंति तं जहा- सीहरूवधारीणं दो देवाणं साहस्सीओ
पुरत्थिमिल्लं बाहं परिवहंति गयरूवधारीणं दो देवाणं साहस्सीओ दक्खिणिल्लं दो देवाणं साहस्सीओ
उसभरूवधारीणं पच्चत्थिमं दो देवसाहस्सीओ तुरगरूवधारीणं उत्तरिल्लं बाहं परिवहंति एवं
नक्खत्तविमास्सवि पुच्छा गोयमा चत्तारि देवसाहस्सीओ परिवहंति तं जहा- सीहरूवधारीणं देवाणं एग्गा
देवसाहस्सी पुरत्थिमिल्लं बाहं एवं चउदिसिंपि एवं तारगाणवि नवरिं दो देवसाहस्सीओ परिवहंति तं जहा
सीहरूवधारीणं देवाणं पंचदेवसता पुरत्थिमिल्लं बाहं परिवहंति एवं चउदिसिंपि ।

[३१६] एतेसि णं भंते चंदिमसूरियगहणनक्खत्तातारारूवाणं कयरे कयरेहिंतो अप्पगती व
सिग्घगती वा गोयमा चंदेहिंतो सूरु सिग्घगती, सूरुहिंतो गहा सिग्घगती, गहेहिंतो नक्खत्ता सिग्घगती
नक्खत्तेहिंतो तारा सिग्घगती, सव्वप्पगती चंदा सव्वसिग्घगती ताराओ ।

[३१७] एतेसि णं भंते चंदिम जाव तारारूवाणं कयरे कयरेहिंतो अप्पिड्ढिया वा महिड्ढिया
वा गोयमा तारारूवेहिंतो नक्खत्ता महिड्ढिया, नक्खत्तेहिंतो गहा महिड्ढिया, गहेहिंतो सूरु महिड्ढिया,
सूरुहिंतो चंदामहिड्ढिया, सव्वप्पिड्ढिया तारारूवासव्वमहिड्ढिया चंदा ।

[३१८] जंबूद्वीवे णं भंते दीवे तारारूवस्स य तारारूवस्स य एस णं केवतियं अबाधाए अंतरे
पन्नत्ते गोयमा दुविहे अंतरे पन्नत्ते तं जहा- बाघाइमे य निव्वाघाइमे य तत्थ णं जेसे निव्वाघातिमे से

जहन्नेणं पंचधणुसयाइं उक्कोसेणं दो गाउयाइं तारारूवस्स य तारारूवस्स य अबाहाए अंतरे तत्थ णं जेसे वाघातिमे से जहण्णेणं दोण्णि य छावट्ठे जोयणसए उक्कोसेणं बारस जोयणसहस्साइं दोण्णि य बायाले पडिवत्ति-३

जोयणसए तारारूवस्स य तारारूवस्स य अबाहाए अंतरे ।

[३१९] चंदस्स णं भंते जोतिसिंदस्स जोतिसरण्णो कति अग्गमहिंसीओ पन्नत्ताओ गोयमा चत्तारि अग्गमहिंसीओ पन्नत्ताओ तं जहा- चंदप्पभा दोसिणाभा अच्चिमाली पभंकरा तत्थ णं एगमेगाए देवीए चत्तारि-चत्तारि देविसहस्सा परिवारो पन्नत्तो पभू णं ततो एगमेगा देवी अण्णाइं चत्तारि-चत्तारि देविसहस्साइं परिवारं विउव्वित्तए एवामेव सपुव्वावरेणं सोलस देविसहस्सा पन्नत्ता से तं तुडियं ।

[३२०] पभू णं भंते चंदे जोतिसिंदे जोतिसराया चंदवडेंसए विमाणे सभाए सुधम्मए चंदंसि सीहासणंसि तुडिएणं सद्धिं दिव्वाइं भोगभोगाइं भुंजमाणे विहरित्तए नो तिणट्ठे समट्ठे से केणट्ठेणं भंते एवं वुच्चति नो पभू चंदे जोतिसिंदे जोतिसराया चंदवडेंसए विमाणे सभाए सुधम्मए चंदंसि सीहासणंसि तुडिएणं सद्धिं दिव्वाइं भोगभोगाइं भुंजमाणे विहरित्तए गोयमा चंदस्स जोतिसिंदस्स जोतिसरण्णो चंदवडेंसए विमाणे सभाए सुधम्मए माणगंसि चेतियखंभंसि वडरामएसु गोलवट्टसमुग्गएसु बहुयाओ जिणसकहाओ सण्णिखित्ताओ चिट्ठंति जाओ णं चंदस्स जोतिसिंदस्स जोतिसरण्णो अण्णेसिं च बहूणं जोतिसियाणं देवाण य देवीण य अच्चणिज्जाओ जाव पज्जुवासणिज्जो तासिं पणिहाए नो पभू चंदे जोतिसिंदे जोतिसराया चंदवडेंसए विमाणे सभाए सुधम्मए चंदंसि सीहासणंसि जाव भुंजमाणे विहरित्तए से एणट्ठेणं गोयमा एवं वुच्चति-नो पभू चंदे जोतिसिंदे जोतिसराया चंदवडेंसए विमाणे सभाए सुधम्मए चंदंसि सीहासणंसि तुडिएण सद्धिं दिव्वाइं भोगभोगाइं भुंजमाणे विहरित्तए पभू णं गोयमा चंदे जोतिसिंदे जोतिसराया चंदवडेंसए विमाणे सभाए सुधम्मए चंदंसि सीहासणंसि चउहिं सामाणियसाहस्सीहिं जाव सोलसहिं आयरक्खदेवसाहस्सीहिं अण्णेहिं बहूहिं जोतिसिएहिं देवेहिंदेवीहिं य सद्धिं संपुरिवडे महयाहय-नट्ट-गीय-वाईय-तंती-तल-ताल-तुडीय-धण-मुडंग-पडुप्पवाइयरवेणं दिव्वाइं भोगभोगाइं भुंजमाणे विहरित्तए केवलं परियारणिड्ढीए नो चेव णं मेहुणवत्तियं ।

[३२१] सूरस्स णं भंते जोतिसिंदस्स जोतिसरण्णो कति अग्गमहिंसीओ पन्नत्ताओ गोयमा चत्तारि अग्गमहिंसीओ पन्नत्ताओ तं जहा- सूरप्पभा आयावाभा अच्चिमाली पभंकरा एवं अवसेसं जहा चंदस्स नवरिं-सूरवडेंसए विमाणे सूरंसि सीहासणंसि तहेव सव्वंसि गहाइं चत्तारि अग्गमहिंसीओ तं जहा-विजया वेजयंति जयिं अपराजिया तेसिं पि तहेव ।

[३२२] चंदविमाणे णं भंते देवाणं केवतियं कालं ठिती पन्नत्ता एवं जहा ठिती पए तहा भाणियव्वा जाव ताराणं [गोयमा जहण्णेणं चउब्भागपलिओवमं उक्कोसेणं पलिओवमं वाससयसहस्स-मब्भहियं देवीणं जहण्णेणं चउब्भागपलिओवमं उक्कोसेणं अद्धपलिओवमं पन्नासाए वासस-हस्सेहिं अब्भहियं सूरविमाणे देवाणं जहण्णेणं चउब्भागपलिओवमं उक्कोसेणं पलिओवमं वासस-हस्समब्भहियं देवीणं जहण्णेणं चउब्भागपलिओवमं उक्कोसेणं अद्धपलिओवमं पंचहिं वाससतेहिब्भहियं गहविमाणे देवाणं जहण्णेणं चउब्भागपलिओवमं उक्कोसेणं पलिओवमं देवीमं जहण्णेणं चउब्भागपलिओवमं उक्कोसेणं अद्धपलिओवमं नक्खत्तविमाणे देवाणं जहण्णेमं चउब्भागपलिओवमं उक्कोसेणं अद्धपलिओवमं देवीणं जहण्णेणं चउब्भागपलिओवमं उक्कोसेणं सातिरेगं चउब्भागपलिओवमं ताराविमाणे देवाणं जहण्णेणं

अद्विभागपलिओवमं उक्कोसेणं चउब्भागपलिओवमं देवीणं जहन्नेणं अद्विभागपलिओवमं उक्कोसेणं सातिरेणं अद्विभागपलिओवमं] ।

[३२३] एतेसि णं भंते चंदिमसूरियगहनकखत्ततारारूवाणं कयरे कयरेहिंतो अप्पा वा बहुया वा
पडिवत्ति-३

तुल्ला वा विसेसाहिया वा गोयमा चंदिमसूरिया एते णं दोण्णिवि तुल्ला सव्वत्थोवा नकखत्ता संखेज्जगुणा गहा संखेज्जगुणा ताराओ [संखेज्जगुणाओ] ।

◦ तच्चाए पडिवत्तिए जोइस उद्देसओ समत्तो ◦

[] वेमाणिय- पढमो उद्देसओ []

[३२४] कहि णं भंते वेमाणियाणं देवाणं विमाणा पन्नत्ता कहि णं भंते वेमाणिया देवा परिवसंति गोयमा इमीसे रयणप्पभाए पुढवीए बहुसमरणणिज्जाओ भूमिभागाओ उड्ढं चंदिमसूरियगहनकखत्ततारारूवाणं बहूइं जोयणाइं बहूइं जोयणसताइं बहूइं जोयणसहस्साइं बहूइं जोयणसयसहस्साइं बहूइं जोयणकोडीओ बहूइं जोयणकोडाकोडीओ उड्ढं दूरं उप्पइत्ता सोहम्मीसाणंजाव अनुत्तरेसु य एत्थ णं वेमाणियाणं चतुरासीतिं विमाणा-वाससतसहस्सा सत्तानउतिं च सहस्सा तेवीसं च विमाणा भवंतीति मक्खाया ते णं विमाणा सव्वरयणामया अच्छा जाव पडिरूवा एत्थ णं बहवे वेमाणिया देवा परिवसंति सोधम्मीसाण जाव अनुत्तरा य देवा मिग-महिस-वराह-सिंह-छगल-ददुर-जाव आयरकखदेव-साहस्सीणं विहरंति, कहि णं भंते सोधम्मगाणं देवाणं विमाणा कहि णं भंते सोधम्मगा देवा परिवसंति, जंबुदीवे दीवे मंदरस्स पव्वयस्स दाहिणे णं इमीसे रयणप्पभाए जाव एत्थ णं सोधम्मं नामं कप्पे, पाईणपडिणायते उदीणदाहिणवित्थिण्णे जाव एत्थ णं सोधम्माणं देवाणं बत्तीसं विमाणावाससयसहस्सा पन्नत्ता ते णं विमाणा सव्व-रयणामया अच्छा जाव पडिरूवा तेसि णं विमाणाणं बहुमज्झदेसभाए पंच वडंसगा पन्नत्ता तत्थ णं बहवे सोधम्मगा देवा परिवसंति जाव विहरंति सक्के यत्थ देविंदे देवराया मघवं पागसासणे जाव विहरंति ।

[३२५] सक्कस्स णं भंते देविंदस्स देवरण्णो कति परिसाओ पन्नत्ताओ गोयमा तओ परिसाओ पन्नत्ताओ तं जहा- समिता चंडा जाता अब्भित्तारिया समिया मज्झिमिया चंडा बाहिरिया जाता सक्कस्स णं भंते देविंदस्स देवरण्णो अब्भित्तारियाए परिसाए कति देवसाहस्सीओ पन्नत्ताओ मज्झिमियाएपरिसाए तहेव बाहिरियाए पुच्छा गोयमा सक्कस्स णं देविंदस्स देवरण्णो अब्भित्तारिया परिसाए बारस देवसाहस्सीओ पन्नत्ताएओ मज्झिमियाए परिसाए चोदस देवसाहस्सीओ पन्नत्ताओ बाहिरियाए परिसाए सोलस देवसाहस्सीओ पन्नत्ताओ तहा अब्भित्तारियाए परिसा सत्त देवीसयाणि मज्झिमियाए छत्त देवीसयाणि बाहिरियाए पंच देवीसयाणि पन्नत्ताइं सक्कस्स णं भंते देविंदस्स देवरण्णो अब्भित्तारियाए परिसाए देवाणं केवइयं कालं ठिई पन्नत्ता एवं मज्झिमियाए बाहिरियाएवि गोयमा सक्कस्स देविंदस्स देवरण्णो अब्भित्तारिया परिसाए पंच पलिओवमाइं ठिती पन्नत्ता मज्झिमियाए परिसाए चत्तारि पलिओवमाइं ठिती पन्नत्ता बाहिरियाए परिसाए देवाणं तिण्णि पलिओवमाइं ठिती पन्नत्ता देवीणं ठिती-अब्भित्तारियाए परिसाए देवीणं तिण्णि पलिओवमाइं ठिती पन्नत्ता मज्झिमियाए दुण्णि पलिओवमाइं ठिती पन्नत्ता बाहिरियाए परिसाए एगं पलिओवमाइं ठिती पन्नत्ता अद्वो सो चेव जहा

भवणवासीणं कहि णं भंते ईसाणगाणं देवाणं विमाणा पन्नत्ता तहेव सव्वं जाव ईसाणे एत्थ देविंदे देवराया जाव विहरति ।

ईसाणस्स णं भंते देविंदस्स देवरण्णो कति परिसाओ पन्नत्ताओ गोयमा तओ परिसाओ पन्नत्ताओ तं जहा- समिता चंडा तहेव सव्वं नवरं-अब्भितरियाए परिसाए दस देवसाहस्सीओ पन्नत्ताओ मज्झिमियाए परिसाए बारस देवसाहस्सीओ बाहिरियाए चोदस देवसाहस्सीओ देवीणं पुच्छा अब्भितरियाए पडिवत्ति-३

नव देवीसता पन्नत्ता मज्झिमियाए परिसाए अट्ठ देवीसता पन्नत्ता बाहिरियाए परिसाए सत्त देविसता पन्नत्ता देवाणं ठिती पुच्छा अब्भितरियाए परिसाए देवाणं सत्त पलिओवमाइं ठिती पन्नत्ता मज्झिमियाए छ पलि-ओवमाइं बाहिरियाए पंच पलिओवमाइं ठिती पन्नत्ता देवीणं पुच्छा अब्भितरियाए पंच पलिओवमाइं मज्झिमियाए परिसाए चत्तारि पलिओवमाइं ठिती पन्नत्ता बाहिरियाए परिसाए तिण्णि पलिओव-माइं ठिती पन्नत्ता अट्ठो तहेव भाणियव्वो सणकुमाराणं पुच्छा तहेव ठाणपदगमेणं जाव-सणकुमारस्स तओ परिसाओ समिताइं तहेव नवरं-अब्भितरियाए परिसाए अट्ठ देवसाहस्सीओ पन्नत्ताओ मज्झिमियाए परिसाए दस देवसाहस्सीओ पन्नत्ताओ बाहिरियाए परिसाए बारस देवसाहस्सीओ पन्नत्ताओ अब्भितरियाए परिसाए देवाणं ठितीअद्धपंचमाइं सागरोवमाइं पंच पलिओवमाइं ठिती पन्नत्ता मज्झिमियाए परिसाए अद्धपंचमाइं सागरोवमाइं चत्तारि पलि-ओवमाइं ठिती पन्नत्ता बाहिरियाए परिसाए अद्धपंचमाइं सागरोवमाइं तिण्णि पलिओवमाइं ठिती पन्नत्ता अट्ठो सो चेव एवं माहिंदस्सवि तहेव तओ परिसाओ नवरंअब्भितरिया परिसाए छद्देवसाहस्सीओ पन्नत्ताओ मज्झिमियाए परिसाए अट्ठ देवसाहस्सीओ पन्नत्ताओ बाहिरियाए दस देवसाहस्सीओ पन्नत्ताओ ठिती देवाणं-अब्भितरियाए परिसाए अद्धपंचमाइं सागरोवमाइं सत्त य पलिओवमाइं ठिती पन्नत्ता मज्झिमियाए परिसाए अद्धपंचमाइं सागरोवमाइं छत्त पलिओवमाइं बाहिरियाए परिसाए अद्धपंचमाइं सागरोवमाइं पंच य पलिओवमाइं ठिती पन्नत्ता ।

तहेव सव्वेसि इंदाणं ठाणपयगमेणं विमाणा नेतव्वा ततो पच्छा परिसाओ पत्तेयं-पत्तेयं वुच्चति-बंधस्सवितओ परिसाओ पन्नत्ताओ-अब्भितरियाए चत्तारि देवसाहस्सीओ मज्झिमियाए छ देवसाहस्सीओ बाहिरियाए अट्ठ देवसाहस्सीओ देवाणं ठिती-अब्भितरियाए परिसाए अद्धनवमाइं सागरोवमाइं पंच पलिओवमाइं मज्झिमियाए परिसाए अद्धनवमाइं सागरोवमाइं चत्तारि य पलिओवमाइं बाहिरि-याए अद्धनवमाइं सागरोवमाइं तिण्णि य पलिओवमाइं अट्ठो सो चेव, लंतगस्सवि जाव तओ परिसाओ जाव अब्भितरियाए परिसाए दो देवसाहस्सीओ मज्झिमियाए चत्तारि देवसाहस्सीओ पन्नत्ताओ बाहिरियाए छद्देवसाहस्सीओ पन्नत्ताओ ठिति भाणियव्वाअब्भितरियाए परिसाए बारस सागरोवमाइं सत्त पलिओवमाइं ठिती पन्नत्ता मज्झिमियाए परिसाए बारस सागरोवमाइं छत्त पलिओवमाइं ठिती पन्नत्ता बाहिरियाए परिसाए बारस सागरोवमाइं पंच पलिओवमाइं ठिती पन्नत्ता महासुक्कस्सवि जाव तओ परिसाओ जाव अब्भितरियाए एगं देवसाहस्सं मज्झिमियाए दो देवसाहस्सीओ पन्नत्ताओ बाहिरियाए चत्तारि देवसाहस्सीओ अब्भितरियाए परिसाए अद्धसोलस सागरोवमाइं पंच पलिओवमाइं मज्झिमियाए अद्धसोलस सागरोवाइं चत्तारि पलिओवमाइं बाहिरियाए अद्धसोलस सागरोवमाइं तिण्णि पलिओवमाइं अट्ठो चेव सहस्सारे पुच्छा जाव अब्भितरियाए परिसाए पंच देवसाया मज्झिमियाए परिसाए एगा देवसाहस्सी बाहिरियाए दो देवसाहस्सीओ पन्नत्ताओ ठिती-अब्भितरियाए अद्धद्वारस सागरोवमाइं सत्त पलिओवमाइं

ठिती पन्नत्ता एवं मज्झिमियाए अद्दहारस छप्पिओवमाइं बाहिरियाए अद्दहारस सागरोवमाइं पंच पलिओवमाइं अद्दो सो चेव ।

आणयपाणयस्सवि पुच्छा जाव तओ परिसाओ नवरि-अब्भितरियाए अड्ढाइज्जा देवसया मज्झिमियाए पंच देवसया बाहिरियाए एगा देवसाहस्सी ठिती-अब्भितरियाए एगूणवीसं सागरोवमाइं पंच य पलिओवमाइं एवं मज्झिमियाए एगूणवीसं सागरोवमाइं चत्तारि य पलि-ओवमाइं बाहिरियाए परिसाए एगूणवीसं सागरोवमाइं तिण्णि य पलिओवमाइं ठिती अद्दो सो चेव कहिं णं भंते आरणअच्चुयाणं देवाणं पडिवत्ति-३

तहेव अच्चुए सपरिवारे जाव विहरति अच्चुयस्स णं देविंदस्स तओ परिसाओ पन्नत्ताओ अब्भितरपरिसाए देवाणं पणवीसं सयं मज्झिमपरिसाए अड्ढाइज्जा सया बाहिरपरिसाए पंचसया अब्भितरियाए एककवीसं सागरोवमाइं सत्त य पलिओवमाइं मज्झिमियाए एककवीसं सागरोवमाइं छप्पलिओवमाइं बाहिरपरिसाए एकवीसं सागरोवमाइं पंच य पलिओवमाइं ठिती पन्नत्ता कहिं णं भंते हेट्ठिमगेवेज्जगाणं देवाणं विमाणा पन्नत्ता कहिं णं भंते हेट्ठिमगेवेज्जगा देवा परिवसंति जहेव ठाणपए तहेव एवं मज्झिमगेवेज्जा उवरिमगेवेज्जगा अनुत्तरा य जाव अहमिंदा नामं ते देवा पन्नत्ता समणाउसो ।

◦ तच्चाए पडिवत्तीए वेमाणियस्स पढमो उद्देसओ समत्तो ◦

[[वेमाणिय -बीओ उद्देसो]]

[३२६] सोहम्मीसाणेसु कप्पेसु विमाणपुढवी किंपइट्ठिया पन्नत्ता गोयमा घणोदहिपइट्ठिया पन्नत्ता सणंकुमार-माहिंदेसु कप्पेसु विमाणपुढवी किंपइट्ठिया पन्नत्ता गोयमा घणवायपइट्ठिया पन्नत्ता बंभलोए णं भंते कप्पे विमाणपुढीव णं पुच्छा घणवायपइट्ठिया पन्नत्ता लंतए तदुभयपइट्ठिया पन्नत्ता महासुक्क-सहस्सारेसुवि तदुभयपइट्ठिया आणय जाव अच्चुएसु णं भंते कप्पेसु पुच्छा ओवासंतरपइट्ठिया पन्नत्ता गेवेज्जविमाणपुढवीणं भंते पुच्छा गोयमा ओवासंतरपइट्ठिया पन्नत्ता अनुत्तरोववाइयपुच्छा ओवासंतरपइट्ठिया पन्नत्ता ।

[३२७] सोहम्मीसाणकप्पेसु विमाणपुढवी केवइयं बाहल्लेणं पन्नत्ता गोयमा सत्तावीसं जोयणसयाइं बाहल्ले पन्नत्ता एवं पुच्छा-सणंकुमार-माहिंदेसु छवीसं जोयणसयाइं बंभ-लंतएसु पंचवीसं महासुक्क-सहस्सारेसु चउवीसं आणय-पाणयारणाच्चुएसु तेवीसं सयाइं गेवेज्जविमाणपुढवी बावीसं अनुत्तरविमाणपुढवी एककवीसं जोयणसयाइं बाहल्लेणं ।

[३२८] सोहम्मीसाणेसु णं भंते कप्पेसु विमाणा केवइयं उड्ढं उच्चत्तेणं गोयमा पंचजोयणसयाइं उड्ढं उच्चत्तेणं सणंकुमार-माहिंदेसु छ जोयणसयाइं बंभ-लंतएसु सत्त महासुक्कसहस्सारेसु अद्द आणय-पाणयारणाच्चुएसु नव, गेवेज्जविमाणाणं भंते केवइयं उड्ढं उच्चत्तेणं गोयमा दस जोयणसयाइं अनुत्तरविमाणाणं एककारस जोयणसयाइं उड्ढं उच्चत्तेणं ।

[३२९] सोहम्मीसाणेणं भंते कप्पेसु विमाणा किसंठिया पन्नत्ता गोयमा दुविहा पन्नत्ता तं जहा- आवलियापविट्ठा य आवलियाबाहिरा य तत्थ णं जेते आवलियापविट्ठा ते तिविहा पन्नत्ता तं जहा- वट्ठा तंसा चउरंसा तत्थ णं जेते आवलियाबाहिरा ते णं नानासंठाणसंठिया पन्नत्ता एवं जाव गेवेज्जविमाणा अनुत्तरविमाणा दुविहा पन्नत्ता तं जहा- वट्ठे य तंसा य ।

[३३०] सोहम्मीसाणेसु णं भंते कप्पेसु विमाणा केवतियं आयाम-विक्खंभेणं केवतियं परिकखेवेणं पन्नत्ता गोयमा दुविहा पन्नत्ता तं जहा- संखेज्जवित्थडा य असंखेज्जवित्थडा य तत्थ णं जेते संखेज्जवित्थडा ते णं संखेज्जाइं जोयणसहस्साइं आयाम-विक्खंभेणं संखेज्जाइं जोयणसहस्साइं परिकखेवेणं तत्थ णं जेते असंखेज्जवित्थडा ते णं असंखेज्जाइं जोयणसहस्साइं आयाम-विक्खंभेणं असंखेज्जाइं जोयणसहस्साइं परिकखेवेणं एवं जाव गेवेज्जविमाणा, अनुत्तरविमाणा पुच्छा गोयमा दुविहा पन्नत्ता तं जहा- संखेज्जवित्थडे य असंखेज्जवित्थडा य तत्थ णं जेसे संखेज्जवित्थडे से एगं जोयणसयसहस्सं जंबुद्धीवप्पमाणे जाव अद्धगुलंगं च तत्थ णं जेते असंखेज्जवित्थडा ते णं असंखेज्जाइं पडिवत्ति-३

जोणसहस्साइं जाव परिकखेवेणं पन्नत्ता सोहम्मीसाणेसु णं भंते विमाणा कतिवण्णा पन्नत्ता गोयमा पंचवण्णा पन्नत्ता तं जहा- किण्हा नील लोहिया हालिद्धा सुक्किला, सणंकुमारमाहिंदेसु चउवण्णा-नीला जाव सुक्किला, बंभलोग-लंतएसु तिवण्णा-लोहिया हालिद्धा सुक्किला, महासुक्क-सहस्सारसु दुवण्णा-हालिद्धा य सुक्किला य आणय-पाणतारणच्चुएसु सुक्किला गेवेज्जविमाणा सुक्किला अनुत्तरोववातियविमाणा परमसुक्किला वण्णेणं पन्नत्ता ।

सोहम्मीसाणेसु णं भंते कप्पेसु विमाणा केरिसया पभाए पन्नत्ता गोयमा निच्चालोया निच्चज्जोया सयंपभाए पन्नत्ता जाव अनुत्तरविमाणा सोहम्मीसाणेसु णं भंते कप्पेसु विमाणा केरिसया गंधेणं पन्नत्ता गोयमा से जहनामए-कोट्टपुडाण वा जाव एत्तो इट्ठरा चेवजाव अनुत्तरविमाणा, सोहम्मीसाणेसु णं भंते कप्पेसु विमाणा केरिसया फासेणं पन्नत्ता गोयमा से जहा- नामए-आईणेति वा जाव एतो इट्ठरा चेव जाव अनुत्तरविमाणा सोहम्मीसाणेसु णं भंते कप्पेसु विमाणा केमहालया पन्नत्ता गोयमा अयण्णं जंबुद्धीवे दीवे जहा निरयुद्धेसे जाव छम्मासेणं वीइवएज्जा-अत्थेगतिए वीतिवएज्जा अत्तगतिए नो वीतिवएज्जा एमहालया णं गोयमा एवं जाव अनुत्तरविमाणा, सोहम्मीसाणेसु णं भंते कप्पेसु विमाणा किंमया पन्नत्ता गोयमा सव्वरयणामया अच्छा जाव पडिरूवा तत्थ णं बहवे जीवा य पोग्गला य वक्कमंति विउक्कमंति चयंति उववज्जंति सासया णं ते विमाणा दव्वद्वयाए वण्णपज्जवेहिं जाव फासपज्जवेहिं य असासया एवं जाव अनुत्तरविमाणा सोहम्मीसाणेसु णं भंते कप्पेसु देवा कओहिंतो उववज्जंति उववातो जहा वक्कंतीए जाव अनुत्तरविमाणा, सोहम्मीसाणेसु णं भंते कप्पेसु देवा एगसमएणं केवतिया उव-वज्जंति गोयमा जहण्णेणं एक्को वा दो वा तिण्णि वा उक्कोसेणं संखेज्जा वा असंखेज्जा वा उववज्जंति एवं जाव सहस्सारे ।

आणतादी गेवेज्जा अनुत्तरा य जहण्णेणं एक्को वा दो वा तिण्णि वा उक्कोसेणं संखेज्जा उववज्जंति सोहम्मीसाणेसु णं भंते कप्पेसु देवा समए-समए अवहीरमाणा-अवहीरमाणा केवतिएणं कालेणं अवहिया सिया गोयमा ते णं असंखेज्जा समए-समए अवहीरमाणा-अवहीरमाणा असंखेज्जाहिं उस्सप्पिणी-ओसप्पिणीहिं अवहीरंति नो चेव णं अवहिया सिया जाव सहस्सारो आणतादिसु चउसु कप्पेसु देवा पुच्छा गोयमा ते णं असंखेज्जा समए-समए अवहीरमाणा-अवहीरमाणा पलिओवमस्स असंखेज्जतिभागमेत्तेणं कालेणं अवहीरंति नो चेव णं अवहिया सिया एवं जाव अनुत्तरविमाणा सोहम्मीसाणेसु णं भंते कप्पेसु देवाणं केमहालिया सरीरोगाहणा पन्नत्ता गोयमादुविहा पन्नत्ता तं जहा- भवधारणिज्जा य उत्तरवेउव्विया य तत्थ णं जासा भवधारणिज्जा सा जहण्णेणं अंगुलस्स असंखेज्जतिभागो उक्कोसेणं सत्त रयणीओ तत्थ णं जासा उत्तरवेउव्विया सा जहण्णेणं अंगुलस्स संखेज्जतिभागो उक्कोसेणं जोयणसतसहस्सं एवं

एक्केक्का ओसारेत्ताणं जाव अनुत्तरा णं एक्का रयणी गेविज्जनुत्तराणं एग भवधारणिज्जे सरीरे उत्तरवेउव्विया नत्थि [सणकुमार-माहिंदेसु भवधारणिज्जा उत्तरवेउव्विया भवधारणिज्जा छरयणीओ उत्तरवेउव्विया तधेव बंभ-लंतएसु पंच रयणीओ महासुक्क-सहस्सारेसु चत्तारि रयणीओ आणतपातारणच्चुएसु तिण्णि रयणीओ उत्तरवेउव्विया तधेव जोयणसतसहस्सं सव्वेसिं, गेवेज्जादेवामं भंते केमहालिया सरीरोगाहणा पन्नत्ता गोयमा गेवेज्जादेवाणं एगे भवधारणिज्जे सरीरे पन्नत्ते-से जहण्णेमं अंगुलस्स असंखेज्जतिभागे उक्कोसेणं दो रयणीओ अनुत्तरदेवाणं एगा रयणी पा.]

[३३१] सोहम्मीसाणेसु णं भंते कप्पेसु देवाणं सरीरगा किंसंघयणी पन्नत्ता गोयमा छण्हो पडिवत्ति-३

संघयणाणं असंघयणी-नेवद्धि नेव छिरा नेव ण्हारूजे पोग्गला इद्धा कंता पिया सुभा मणुण्णा मणामा ते तेसिं सरीरसंघातत्ताए परिणमंति एवं जाव अनुत्तरोववातिया सोहम्मीसाणेसु णं भंते कप्पेसु देवाणं सरीरगा किंसंठिता पन्नत्ता गोयमा दुविहा सरीरा पन्नत्ता तं जहा- भवधारणिज्जा य उत्तरवेउव्विया य तत्थ णं जेते भवधारणिज्जा ते समचउरससंठाणसंठिता पन्नत्ता तत्थ णं जेते उत्तरवेउव्विया ते नानासंठाणसंठिता पन्नत्ता जाव अच्चुओ अवेउव्विया गेविज्जनुत्तरा भवधारणिज्जा समचउरससंठाणसंठिता उत्तरवेउव्विया नत्थि [गेवेज्जादेवामण भंते सरीरा किंसंठिता पन्नत्ता गोयमा एगे भवधारणिज्जे सरीरे समचउरस-संठाणसंठिते एवं अनुत्तराणवि पा. ।

[३३२] सोहम्मीसाणेसु णं भंते कप्पेसु देवाणं सरीरगा केरिसया वण्णेणं पन्नत्ता गोयमा कणगत्तयरत्ताभा वण्णेणं पन्नत्ता सणकुमार-माहिंदेसु णं पउमपम्हगोरा वण्णेणं पन्नत्ता एवं बंभेवि लंतए णं भंते गोयमा सुक्किला वण्णेमं पन्नत्ता एवं जाव गेवेज्जा अनुत्तरोववातिया परमसुक्किला वण्णेणं पन्नत्ता सोहम्मीसाणेसु णं भंते कप्पेसु देवाणं सरीरगा केरिसया गंधेणं पन्नत्ता जहा विमाणाणं गंधो जाव अनुत्तरोववाइयाणं, सोहम्मीसाणेसु णं भंते कप्पेसु देवाणं सरीरगा केरिसया फासेणं पन्नत्ता गोयमा थिरमउणिद्धसुकुमालफासेणं पन्नत्ता एवं जाव अनुत्तरोववातियाणं, सोहम्मीसाणेसु णं भंते कप्पेसु देवाणं केरिसया पोग्गला उस्सासत्ताए परिणमंति गोयमा जे पोग्गला इद्धा कंता पिया सुभा मणुण्णा मणामा ते तेसिं उस्सासत्ताए परिणमंति जाव अनुत्तरोववातियाणं, एवं आहारत्ताए वि सोहम्मीसाणेसु णं भंते कप्पेसु देवाणं कति लेस्साओ पन्नत्ताओ गोयमा एगा तेउलेस्सा पन्नत्ता सणकुमार-माहिंदेसु एगा पम्हलेस्सा एवं बंभलोए वि लंतए एगा सुक्कलेस्सा जाव गेवेज्जा ताव सुक्कलेस्सा, अनुत्तरे एगा परमसुक्कलेस्सा, सोहम्मीसाणेसु णं भंते कप्पेसु देवा किं सम्मद्धिद्वी मिच्छादिद्वी सम्मामिच्छादिद्वी गोयमा सम्मदिद्वीवि मिच्छादिद्वीवि सम्मामिच्छादिद्वीवि एवं जाव गेवेज्जा अनुत्तरोववातिया सम्मद्धिद्वी नो मिच्छादिद्वी नो सम्मामिच्छादिद्वी, सोहम्मीसाणेसु णं भंते कप्पेसु देवा किं नाणी अन्नाणी नाणीवि अन्नाणीवि जे नाणी ते नियमा तिन्नाणी तं जहा- आभिणिबोहियनाणी सुयनाणी अवधिनाणी जे अन्नाणी ते नियमा तिअन्नाणी तं जहा- मतिअन्नाणी सुयअन्नाणी विभंगनाणी य एवं जाव गेवेज्जा अनुत्तरोववातिया नाणी नो अन्नाणी नियमा तिन्नाणी सोहम्मीसाणेसु णं भंते कप्पेसु देवा किं मणजोगी वइजोगी कायजोगी गोयमा मणजोगीवि वइजोगीवि कायजोगीवि जाव अनुत्तरा, सोहम्मीसाणेसु णं भंते कप्पेसु देवा किं सागरोवउत्ता अणागारोवउत्ता गोयमा दुविहावि जाव अनुत्तरा ।

[३३३] सोहम्मीसाणेसु णं भंते कप्पेसु देवा ओहिणा केवतियं खेत्तं जाणंति पासंति गोयमा जहण्णेमं अंगुलस्स असंखेज्जतिभागं उक्कोसेणं अधे जाव इमीसे रयणप्पभाए पुढवीए हेढिल्ले चरिमंते उड्ढं जाव सगाइं विमाणाइं तिरियं जाव असंखेज्जा दीवसमुद्धा एवं-

[३३४] सककीसाणा पढमं दोच्चं च सणंकुमारमाहिंदा ।

तच्चं च बंभ लंगत सुक्कसहस्सारगा चउत्थी ॥

[३३५] आणयपाणयकप्पे देवा पासंति पंचमिं पुढवीं ।

तं चेव आरणच्चुय ओहीनाणेण पासंति ॥

[३३६] छट्ठीं हेढिममज्झिमगेवेज्जा सत्तमिं च उवरिल्ला ।

संभिन्नलोगनालिं पासंति अनुत्तरा देवा ॥

पडिवत्ति-३

[३३७] सोहम्मीसाणेसु णं भंते कप्पेसु देवाणं कति समुग्धाया पन्नत्ता गोयमा पंच समुग्धाया पन्नत्ता तं जहा- वेदणासमुग्धाते कसायसमुग्धाते मारणंतियसमुग्धाते वेउव्वियसमुग्धाते तेजससमुग्धाते एवं जाव अच्चुया गेवेज्जनुत्तराणं पुच्छा गोयमा पंच-वेदणासमुग्धाते जाव तेजससमुग्धाते नो चेव णं वेउव्वियसमुग्धातेणं वा तेयासमुग्धातेणं वा समोहणिंसु वा समोहणंति वा, समोहणिस्संति वा सोहम्मीसाणेसु णं भंते कप्पेसु देवा केरिसयं खुह-पिवासं पच्चणुभवमाणा विहरंति गोयमा तेसि णं देवाणं नत्थि खुह-पिवासा एवं जाव अनुत्तरोववातिया सोहम्मीसाणेसु णं भंते कप्पेसु देवा किं एगत्तं पभू विउव्वित्तए पुहत्तं पभूविउव्वित्तए गोयमा एगत्तंपि पभू विउव्वित्तए पुहत्तंपि पभू विउव्वित्तए एगत्तं विउव्वेमाणा एगिंदियरूवं वा जाव पंचेदियरूवं वा विउव्वंति पुहत्तं विउव्वेमाणा एगिंदियरूवाणि वा जाव पंचेदियरूवाणि वा ताइं संखेज्जाइं पि असंखेज्जाइंपि सरिसाइंपि असरिसाइं पि संबद्धाइं पि असंबद्धाइं पि रूवाइं विउव्वंति विउव्वित्ता ततो पच्छा जहिच्छित्ताइं कज्जाइं करंति एवं जाव अच्चुओ, गेवेज्जादेवा किं एगत्तं पभू विउव्वित्तए पुहत्तं पभू विउव्वित्तए गोयमा एगत्तं पि पभू विउव्वित्तए पुहत्तं पि पुभू विउव्वित्तए नो चेव णं संपत्तीए विउव्विंसु वा विउव्वंति वा विउव्विस्संति वा एवं अनुत्तरोववातिया सोहम्मीसाणेसु णं भंते कप्पेसु देवा केरिसयं सातासोक्खं पच्चणुभवमाणा विहरंति जाव गेवेज्जा अनुत्तरोववातिया पुच्छा गोयमा अनुत्तरासद्धा जाव अनुत्तरोफासा पच्चणुभवमाणा विहरंति सोहम्मीसाणेसु णं भंते कप्पेसु देवा केरिसगा इड्ढीए पन्नत्ता गोयमा महिड्ढीया महज्जुड्ढया महाबला महायसा महेसक्खा महाणुभागा जाव अच्चुओ गेवेज्जा देवा पुच्छा गोयमा सव्वे समिड्ढीया समज्जुड्ढया समबला समयसा समाणुभागा समसोक्खा अणिंदा अप्पेसा अपुरोहिया अहमिंदा नामं ते देवगणा पन्नत्ता समणाउसो [एवं अनुत्तरावि] ।

[३३८] सोहम्मीसाणेसु णं भंते कप्पेसु देवा केरिसया विभूसाए पन्नत्ता गोयमा दुविहा पन्नत्ता तं जहा- भवधारणिज्जा य उत्तरवेउव्विया य तत्थ णं जेते भवधारणिज्जा ते णं आभरणवसणरहिता पगतित्था विभूसाए पन्नत्ता तत्थ णं जेते उत्तरवेउव्विया ते णं हारविराइयवच्छा जाव दस दिसाओ उज्जोवेमाणा पभासेमाणा पासाईया दरिसणिज्जा अभिरूवा पडिरूवा विभूसाए पन्नत्ता सोहम्मीसाणेसु णं भंते कप्पेसु देवीओ केरिसियाओ विभूसाए पन्नत्ताओ गोयमा दुविधाओ पन्नत्ताओ तं जहा- भव-धारणिज्जाओ य उत्तरवेउव्वियाओ य तत्थ णं जाओ भवधारणिज्जाओ ताओ णं आभरणवसणरहिताओ पगतित्थाओ विभूसाए पन्नत्ताओ तत्थ णं जाओ उत्तरवेउव्वियाओ ताओ णं

अच्छराओ सुवण्णसद्दालाओ सुवण्मसद्दालाइं वत्थाइं पवर परिहिताओ चंदाननाओ चंदविलासिणीओ चंदद्वसमनिडालाओ चंदाहियसोमदंसणओ उक्का विव उज्जोवेमाणीओ विज्जुघणमरीइसूरदिप्पंततेय-अहियरसणिकासाओ सिंगारागारचारूवेसाओ पासादीयो दरिसणिज्जाओ अभिरूवाओ पडिरूवाओ सेसेसु देवादेवीओ नत्थि जाव अच्युतो गेवेज्जादेवा केरिसया विभूसाए पन्नत्ता गोयमा गेवेज्जादेवाणं एगे भवधारणिज्जे सरीए आभरणवसणरहिते पगतित्थे विभूसाए पन्नत्ते एवं अनुत्तरावि ।

[३३९] सोहम्मीसाणेसु णं भंते कप्पेसु देवा केरिए कामभोगे पच्चणुभवमाणा विहरंति गोयमा इट्ठेसद्धे इट्ठेगंधे इट्ठेरसे इट्ठेफासे पच्चणुभवमाणा विहरंति एवं जाव गेवेज्जा अनुत्तरोववातियाणं अनुत्तरा सद्धा जाव अनुत्तरा फासा ।

[३४०] ठिती सव्वेसिं भाणियव्वा देवीणवि, अनंतरं चयं चइत्ता जे जहिं गच्छंति तं भाणियव्वं ।

पडिवत्ति-३

[३४१] सोहम्मे णं भंते कप्पे बत्तीसाए विमाणावाससतसहस्सेसु एगमेगंसि विमाणावासंसि सव्वपाणा सव्वभूया सव्वजीवा सव्वसत्ता पुढवीक्कइत्ताए देवत्ताए देवित्ताए आसणसयण-खंभ-भंडमत्तोवकरणत्ताए उववण्णपुव्वा हंता गोयमा असइं अदुवा अनंतखुत्तो एवमीसाणेवि, सणंकुमारे पुच्छा हंता गोयमा असइं अदुवा अनंतखुत्तो नो चेव णं देवित्ताए जाव गेवेज्जा पंचसु णं भंते महतिमहालएसु अनुत्तरविमाणेसु सव्वपाणा जाव देवत्ताए देवित्ताए आसण जाव हंता गोयमा असइं अदुवा अनंतखुत्तो नो चेव णं देवित्ताए वा देवित्ताए से तं देवा ।

[३४२] नेरइयाणं भंते केवतिकालं ठिती जहन्नेणं दसवाससहस्साइं उक्कोसेणं तेत्तीसं सागरोवमाइं तिरिक्खजोणियाणं पुच्छा जहन्नेणं अंतोमुहुत्तं उक्कोसेणं तिण्णि पलिओवमाइं एवं मणुस्सा देवा जहा नेरइया, नेरइए णं भंते नेरइयत्ता कालतो केवच्चिरं होति जहा कायद्विती देवाणवि एवं चेव तिरिक्खजोणिए णं भंते तिरिक्खजोणियत्ताए कालतो केवच्चिरं जहन्नेणं अंतोमुहुत्तं उक्कोसेणं वणस्सति-कालं णुस्से णं भंते मणुस्सेत्ति कालतो केवच्चिरं होति गोयमा जहण्णेणं अंतोमुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं नेरइयस्स णं भंते केवतिकालं अंतरं जहन्नेणं अंतोमुहुत्तं उक्कोसेणं वणस्सतिकालं तिरिक्खजोणियस्स णं भंते केवतिकालं अंतरं जहन्नेणं अंतोमुहुत्तं उक्कोसेणं सागरोवम-सतपुहत्तं सातिरेगं ।

[३४३] एतेसि णं भंते नेरइयाणं तिरिक्खजोणियाणं मणुस्साणं देवाण य कतरे कतरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा मणुस्सा नेरइया असंखेज्जगुणा देवा असंखेज्जगुणा तिरिक्खजोणिया अनंतगुणा सेत्तं चउव्विहा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च तईआ पडिवत्ति समत्ता •

[चउत्थी पडिवती-पंचविह पडिवती]

[३४४] तत्थ णं जेते एवमाहंसु-पंचविहा संसारसमावण्णगा जीवा पन्नत्ता ते एवमाहंसु तं जहा- एगिंदिया [बेइंदिया तेइंदिया चउरिंदिया] पंचिंदिया से किं तं एगिंदिया एगिंदिया दुविहा पन्नत्ता तं जहा- पज्जत्तगा य अपज्जत्तगा य एवं जाव पंचिंदिया दुविहा-पज्जत्तगा य अपज्जत्तगा य एगिंदियस्स णं भंते केवइयं कालं ठिती पन्नत्ता गोयमा जहण्णेमं अंतोमुहुत्तं उक्कोसेणं बावीसं वाससहस्साइं बेइंदिया

जहन्नेणं अंतोमुहुत्तं उक्कोसेणं बारस संवच्छराणि एवं तेइंदियस्स एगूणपण्णं राइंदियाणं चउरिंदियस्स छम्मासा पंचिंदियस्स तेत्तीसं सागरोवमाइं, एगिंदियअपज्जत्तगस्स णं केवतियं कालं ठिती पन्नत्ता गोयमा जहन्नेणं अंतोमुहुत्तं उक्कोसेवि अंतोमुहुत्तं एवं पंचण्हवि, एगिंदियपज्जत्तगस्स णं जाव पंचिंदियाणं पुच्छा गोयमा जहन्नेणं अंतोमुहुत्तं उक्कोसेणं बावीस वाससहस्साइं अंतोमुहुत्तूणाइं एवं उक्कोसियावि ठिती अंतोमुहुत्तूणा सव्वेसिं पज्जत्ताणं कायव्वा एगिंदए णं भंते एगिंदिएत्ती कालओ केवचिरं होइ गोयमा जहन्नेणं अंतोमुहुत्तं उक्कोसेणं वणस्सतिकालो बेइंदियस्स णं भंते बेइंदिएत्ति कालओ केवचिरं होइ गोयमा जहन्नेणं अंतोमुहुत्तं उक्कोसेणं संखेज्जं कालं जाव चउरिंदिए संखेज्जं कालं, पंचेंदिए णं भंते पंचिंदिएत्ति कालओ केवचिरं होइ गोयमा जहन्नेणं अंतोमुहुत्तं उक्कोसेणं सागरोवमसहस्सं सातिरेगं एगिंदियअपज्जत्तए णं भंते कालओ केवचिरं होति गोयमा जहन्नेणं अंतोमुहुत्तं उक्कोसेणवि अंतोमुहुत्तं जाव पंचिंदिय-अपज्जत्तए, एगिंदियपज्जत्तए णं भंते कालओ केवचिरं होति गोयमा जहन्नेणं अंतोमुहुत्तं उक्कोसेणं

गोयमा जहन्नेणं अंतोमुहुत्तं उक्कोसेणं

पडिवत्ति-४

संखिज्जाइं वाससहस्साइं एवं बेइंदिएवि नवरिं-संखेज्जाइं वासाइं तेइंदिए णं भंते संखेज्जा राइंदिया चउरिंदिए णं संखेज्जा मासा पंचिंदिए सागरोवमसयपुहत्तं सातिरेगं, एगिंदियस्स णं भंते केवतियं कालं अंतरं होति गोयमा जहन्नेणं अंतोमुहुत्तं उक्कोसेणं दो सागरोवमसहस्साइं संखेज्जवासमब्भियाइं बेइंदियस्स णं केवतियं कालं अंतरं होति गोयमा जहन्नेणं अंतोमुहुत्तं उक्कोसेणं वणस्सइकालो एवं तेइंदियस्स चउरिंदियस्स पंचेंदियस्स अपज्जत्तगाणं एवं चेव पज्जत्तगाणवि एवं चेव ।

[३४५] एसि णं भंते एगिंदियाणं बेइंदियामं तेइंदियाणं चउरिंदियाणं पंचिंदियाणं य कयरे कयरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा पंचेंदिया, चउरिंदिया विसेसाहिया, तेइंदिया विसेसाहिया, बेइंदिया विसेसाहिया, एगिंदिया अनंतगुणा, एवं अपज्जत्तगाणं-सव्वत्थोवा पंचेंदिया अपज्जत्तगा, चउरिंदिया अपज्जत्तगा विसेसाहिया, तेइंदिया अपज्जत्तगा विसेसाहिया, बेइंदिया अपज्जत्तगा विसेसाहिया, एगिंदिया अपज्जत्तगा अनंतगुणा, सव्वत्थोवा चतुरिंदिया पज्जत्तगा, पंचेंदियापज्जत्तगा विसेसाहिया, बेइंदियापज्जत्तगा विसेसाहिया, तेइंदियापज्जत्तगा विसेसाहिया, एगिंदिया पज्जत्तगा अनंतगुणा, एतेसि णं भंते एगिंदियाणं पज्जत्तआपज्जत्तगामं कयरे कयरेहिंतो अप्पा वा जाव विसेसाहिया वा गोयमा सव्वत्थोवा एगिंदिया अपज्जत्तग, एगिंदिया पज्जत्तगा संखेज्जगुणा, एतेसि णं भंते बेइंदियाणं पज्जत्ताअपज्जत्तगाणं अप्पाबहुं गोयमा सव्वत्थोवा बेइंदिया पज्जत्तगा अपज्जत्तगा असंखेज्जगुणा एवं तेइंदिय-चउरिंदिय-पंचिंदिय वि, एतेसि णं भंते एगिंदियाणं जाव पंचिंदियाणं य पज्जत्तगाण य अपज्जत्तगाण य कयरे कयरेहिंतो अप्पा वा जाव विसेसाहिया वा गोयमा सव्वत्थोवा चउरिंदिया पज्जत्तगा, पंचिंदियापज्जत्तगा विसेसाहिया, बेइंदिया-पज्जत्तगा विसेसाहिया, तेइंदियापज्जत्तगा विसेसाहिया, पंचिंदियाअपज्जत्तगा असंखेज्जगुणा, चउरिंदियाअपज्जत्ता विसेसाहिया, तेइंदिया अपज्जत्ता विसेसाहिया, वेइंदिया अपज्जत्ता विसेसाहिया, एगिंदियाअपज्जता अनंतगुणा, एगिंदिया पज्जत्ता संखेज्जगुणा सेत्तं पंचविधा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च चउत्थी पडिवत्ति समत्ता •

॥ पंचमी पडिवत्ती-(छव्विह पडिवत्ती) ॥

[३४६] तत्थ णं जेते एवमाहंसु छव्विहा संसारसमावण्णगा जीवा ते एवमाहंसु तं जहा- पुढविकाइया आउक्काइया तेउक्काइया वाउकाइया वणस्सतिकाइया तसकाइया, से किं तं पुढविकाइया पुढविकाइया दुविहा पन्नत्ता तं जहा- सुहुमपुढविकाइया बदरपुढविकाइया य, सुहुमपुढविकाइया दुविहा- पज्जत्तगा य अपज्जत्तगा य एवं बादरपुढविकाइयावि एवं जाव वणस्सतिकाइया से किं तं तसकाइया तसकाइया दुविहा तं जहा- पज्जत्तगा य अपज्जत्तगा य ।

[३४७] पुढविकाइयस्स णं भंते केवतियं कालं ठिती पन्नत्ता गोयमा जहण्णेणं अंतोमुहुत्तं उकाइयस्स तिण्णि राइंदियाइं वाउकाइयस्स तिण्णि वाससहस्साइं वणस्सतिकाइयस्स दस वाससहस्साइं तसकाइयस्स तेत्तीसं सागरोवमाइं अपज्जत्तगाणं सव्वेसिं जहण्णेणवि उक्कोसेणवि अंतोमुहुत्तं पज्जत्तगाणं सव्वेसिं उक्कोसिया ठिती अंतोमुहुत्तूणा कायव्वा ।

[३४८] पुढविकाइए णं भंते पुढविकायत्ति कालतो केवच्चिरं होइ गोयमा जहण्णेणं अंतोमुहुत्तं उक्कोसेणं असंखेज्जं कालं - [असंखेज्जाओ उस्सप्पिणि-ओसप्पिणीओ कालओ खेत्तओ] असंखेज्जा लोया पडिवत्ति-५

एवं आउ-तेउ-वाउक्काइयाणं, असंखेज्जा लोया एवं आउ-तेउ-वाउक्काइयाणं, वणस्सइकाइयाणं अनंतं कालं- [अनंताओ उस्सप्पिणी-ओसप्पिणीओ कालओ खेत्तओ अनंता लोगा-असंखेज्जा पोग्गलपरियट्ठा ते णं पोग्गलपरियट्ठा] आवलियाए असंखेज्जतिभागे, तसकाइए णं भंते तसकाइयत्ति कालतो केवच्चिरं होइ गोयमा जहण्णेणं अंतोमुहुत्तं उक्कोसेणं दो सागरोवमसहस्साइं संखेज्जवासब्भहियाइं अपज्जत्तगाणं छण्हवि जहण्णेणवि उक्कोसेणवि अंतोमुहुत्तं पज्जत्तगाणं ।

[३४९] वाससहस्सा संखा पुढविदगाणिलतरूण पज्जत्ता ।

तेऊ राइंदिसंखा तससागरसपुहत्तमब्भहियं ॥

[३५०] पज्जत्तगाणं सव्वेसिं एवं पुढविकाइयस्स णं भंते केवतियं कालं अंतरं होति गोयमा जहण्णेणं अंतोमुहुत्तं उक्कोसेणं वणस्सतिकालो एवं आउ-तेउ-वाउकाइयाणं वणस्सइकालो तसकाइयाणवि वणस्सइकाइयस्स पुढविकाइयकालो एवं अपज्जत्तगाणवि वणस्सइकालो वणस्सईणं पुढविकालो, पज्जत्तगाणवि एवं चेव वणस्सइकालो पज्जत्तवणस्सईणं पुढविकालो [पुढविकाइपज्जत्तए णं भंते पुढविकाइयपज्जत्तएत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं संखेज्जाइं वाससहस्साइं एवं आऊवि तेउक्काइयपज्जत्तए णं भंते तेउक्काइयपज्जत्तएत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं संखेज्जाइं राइंदियाइं वाउक्काइयपज्जत्तए णं भंते वाउक्काइयपज्जत्तएत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं संखेज्जाइं वाससहस्साइं वणस्सइकाइय-पज्जत्तए णं भंते वणस्सइकाइयपज्जत्तएत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं संखेज्जाइं वाससहस्साइं तसकाइयपज्जत्तए णं भंते तसकाइयपज्जत्तएत्ति कालओ केवच्चिरं होइ गोयमा जहण्णेणं अंतोमुहुत्तं उक्कोसेणं सागरोवमस-यपुहत्तं सातिरेगं अंतरं पुच्छा गोयमा पुढवीणं वणस्सतिकालो जाव वाऊणं वणस्सतीणं पुढविकालो तसस्स वणस्सतिकालो एवं अपज्जत्ताणं एवं पज्जत्ताणं अंतरं पा. ।

[३५१] अप्पाबहुयं-सव्वत्थोवा तसकाइया तेउक्काइया असंखेज्जगुणा पुढविकाइयाविसेसाहिया आउकाइयाविसेसाहिया वाउक्काइयाविसेसाहिया वणस्सतिकाइयाअनंतगुणा एवं अपज्जत्तगावि

पज्जत्तगावि एतेसि णं भंते पुढविकाइयाणं पज्जत्तगाण अपज्जत्तगाण य कयरे कयरेहिंतो अप्पा वा जाव विसेसाहिया वा गोयमा सव्वत्थोवा पुढविकाइया अपज्जत्तगा पुढविकाइयापज्जत्तगा संखेज्जगुणा, सव्वत्थोवा आउक्काइयाअपज्जत्तगा पज्जत्तगा संखेज्जगुणा जाव वणस्सतिकाइयावि सव्वत्थोवा तसकाइय पज्जत्तगा तसकाइया अपज्जत्तगा असंखेज्जगुणा एसि णं भंते पुढविकाइयाणं जाव तसकाइयाणं पज्जत्तग-अपज्जत्तगाण य कयरे कयरेहिंतो अप्पा वा जाव विसेसाहिया वा गोयमा सव्वत्थोवा तसकाइया पज्जत्तगा, तसकाइया अपज्जत्तगा असंखेज्जगुणा, तेउक्काइया अपज्जत्तगा असंखेज्जगुणा, पुढविकाइया आउक्काइया वाउक्काइया अपज्जत्तगा विसेसाहिया, तेउक्काइयापज्जत्तगा संखेज्जगुणा पुढवि-आउ-वाउपज्जत्तगा विसेसाहिया वणस्सतिकाइया अपज्जत्तगा अनंतगुणा वणस्सतिकाइया पज्जत्तगा [संखेज्जगुणा] विसेसाहिय ।

[३५२] सुहुमस्स णं भंते केवतियं कालं ठिती पन्नत्ता गोयमा जहण्णेणं अंतोमुहुत्तं उक्कोसेणवि अंतोमुहुत्तं एवं जाव सुहुमणिओयस्सं एवं अपज्जत्तगाणवि पज्जत्तगाणवि जहण्णेणवि उक्कोसेणवि अंतोमुहुत्तं ।

[३५३] सुहुमे णं भंते सुहुमेत्ति कालतो केवचिरं होति गोयमा जहण्णेणं अंतोमुहुत्तं उक्कोसेणं पडिवत्ति-५

असंखेज्जकालं जाव असंखेज्जा लोया सव्वेसिं पुढविकालो जाव सुहुमणिओयस्स पुढविकालो अपज्जत्तगाणं सव्वेसिं जहण्णेणवि उक्कोसेणवि अंतोमुहुत्तं एवं पज्जत्तगाणवि सव्वेसिं जहण्णेणवि उक्कोसेणवि अंतोमुहुत्तं ।

[३५४] सुहुमस्स णं भंते केवतियं कालं अंतरं होति गोयमा जहण्णेणं अंतोमुहुत्तं उक्कोसेणं असंखेज्जं कालं-असंखेज्जाओ उस्सप्पिणी-ओसप्पिणीओ कालओ खेत्तओ अंगुलस्स असंखेज्जतिभागे सुहुमपुढविकाइयस्स णं भंते केवतियं कालं अंतरं होति गोयमा जहन्नेणं अंतोमुहुत्तं उक्कोसेणं अनंतं कालं जाव आवलियाए असंखेज्जतिभागे एवं जाव वाउ सुहुमवणस्सति-सुहुम-निओगस्स अंतरं जहन्नेणं अंतोमुहुत्तं उक्कोसेणं जहा ओहियस्स अंतरं एवं अपज्जत्ता-पज्जत्तगाणवि [अंतरं] ।

[३५५] एवं अप्पाबहुगं-सव्वत्थोवा सुहुमतेउकाइया सुहुमपुढविकाइया विसेसाहिया सुहुमआउ-वाउ विसेसाहिया, सुहुमणिओया असंखेज्जगुणा सुहुमवणस्सतिकाइया अनंतगुणा सुहुमा विसेसाहिया एवं अपज्जत्तगाणं पज्जत्तगाणवि एवं चेव एतेसि णं भंते सुहुमाणं पज्जत्तापज्जत्ताणं कयरे कयरेहिंतो अप्पा वा जाव विसेसाहिया वा सव्वत्थोवा सुहुमा अपज्जत्तगा, सुहुमा पज्जत्ता संखेज्जगुणा एवं जाव सुहुमणिगोया, एसि णं भंते सुहुमाणं सुहुमपुढविकाइयाणं जाव सुहुमणिओयाण य पज्जत्ता-पज्जत्ताण य कयरे कयरहिंतो अप्पा वा जाव विसेसाहिया वा सव्वत्थोवा सुहुमतेउकाइया अपज्जत्तगा सुहुमपुढविकाइयाअपज्जत्तगा विसेसाहिया सुहुमआउ-काइयाअपज्जत्ता विसेसाहिया सुहुमवाउकाइया अपज्जत्ता विसेसाहिया सुहुमतेउका-इयापज्जत्तगा संखेज्जगुणा सुहुमपुढवि-आउ-वाउपज्जत्तगा विसेसाहिया सुहुमणिओयाअपज्जत्तगा असंखेज्ज-गुणासुहुमणिओया पज्जत्तगा संखेज्जगुणा सुहुमवणस्सतिकाइया अपज्जत्तगा अनंतगुणा सुहुमअपज्जत्ता विसेसाहिया सुहुमवणस्सइकाइया पज्जत्तगा संखेज्जगुणा सुहुमा पज्जत्ता विसेसाहिया ।

[३५६] बायरस्स णं भंते केवतियं कालं ठिती पन्नत्ता गोयमा जहण्णेणं अंतो मुहुत्तं उक्कोसेणं तेत्तीसं सागरोवमाइं ठिई पन्नत्ता एवं बायरतसकाइयस्सवि बायरपुढवीकाइयस्स बावीस वाससहस्साइं बायरआउस्स सत्तवाससहस्सं बायरतेउस्स तिण्णि राइंदिया बायरवुस्स तण्णि वाससहस्साइं बायरवण दस वाससहस्साइं एवं पत्तेयसरीरबादरस्सवि निओयस्स जहण्णेणवि उक्कोसेणवि अंतोमु, एवं बायरनिओयस्सवि अपज्जत्तगाणं सव्वेसिं अंतोमुहुत्तं पज्जत्तगाणं उक्कोसिया ठिई अंतोमुहुत्तूणा कायव्वा सव्वेसिं [बादरपुढविकाइयस्स बावीसं वाससहस्साइं बादरआउकाइयस्स सत्त वाससहस्साइं बादरतेउक्काइ-यस्स तिण्णि राइंदियाइं बादरवाउकाइयस्स तिण्णि वाससहस्साइं बादरवणस्सतिकाइयस्स दसवाससहस्साइं पत्तेयबादरवणस्सतिकाइयस्स दस वाससहस्साइं निओदस्स बादरनिओदस्स य अंतोमुहुत्तं जहण्णुक्कस्सं बादरतसकियस्स तेत्तीसं सागरोवमाइं अपज्जत्ताणं सव्वेसिं अंतोमुहुत्तं पज्जत्ताणं उक्कोसा अंतोमुहुत्तूणा निओदस्स बादरणिओदस्स य पज्जत्ताणं अंतोमुहुत्तं जहण्णेणवि उक्कोसेणवि पा. ।

[३५७] बायरे णं भंते बायरेत्तिं कालओ केवचिरं होति गोयमा जहन्नेणं अंतोमुहुत्तं उक्कोसेणं असंखेज्जं कालं-असंखेज्जाओ उस्सप्पिणी-ओसप्पिणीओ कालओ खेत्तओ अंगुलस्स असंखेज्जतिभागो बायरपुढविकाइयाआउतेउ-वाउपत्तेयसरीरबादरवणस्सइकाइयस्स बायर-निओयस्स एतेसिं जहण्णेणं अंतोमुहुत्तं उक्कोसेणं सत्तरि सागरोवमकोडाकोडीओ संखातीयाओ समाओ अंगुलभागे तहा असंखेज्जा ओहे य बायरतरु-अनुबंधो सेसओ वोच्छं [बादरपुढविसंचिद्धणा जहण्णेणं अंतोमुहुत्तं उक्कोसेणं सत्तरिसागरोवम-कोडाकोडीओ जाव बादरवाऊ बादरवणस्सिकाइयस्स जहा ओहियओ बादरपत्तेयवणस्सतिकाइयस्स जहा पडिवत्ति-५

बादरपुढवी निओते जहण्णेणं अंतोमुहुत्तं उक्कोसेणं अनंतं कालं-अनंताओ उस्सप्पिणी-ओसप्पिणीओ कालओ खेत्तओ अइडाइज्जा पोग्गलपरियट्ठा बादरणिओते जहा बादरपुढवी बादरतसकाइयस्स दो सागरोवम-सहस्साइं संखेज्जवासमब्भहियाइं अपज्जत्ताणं सव्वेसिं अंतोमुहुत्तं बादरपज्जत्ताणं संचिद्धाणा जहण्णेणं अंतोमुहुत्तं उक्कोसेणं सागरोवमसयपुहत्तं सातिरेगं बादरपुढविकाइयस्स संखेज्जाइं वाससहस्साइं एवं आऊ तेउकाइयस्स संखेज्जइं राइंदियाइं वुकाइयस्स संखेज्जाइं वाससहस्साइं एवं बादरवणस्सतिपज्जत्तए पत्तेगबादरवणस्सतिकाइयस्सवि बादरणिओदपज्जत्तए जहन्नेणं अंतोमुहुत्तं उक्कोसेणवि अंतोमुहुत्तं निओदपज्जत्तए वि अंतोमुहुत्तं बादरतसकाइयपज्जत्तए सागरोवमसतपुहत्तं सातिरेगं पा ।

[३५८] उस्सप्पिणि-ओसप्पिणी अइडाइय पोग्गलाम परियट्ठा ।

बेउदधिसहस्सा खलु साधिया होंति तसकाए ॥

[३५९] अंतोमुहुत्तकालो होइ अपज्जत्तगाण सव्वेसि ।

पज्जत्तबायरस्स य बायरतसकाइयस्सावि ॥

[३६०] तेउस्स संख राइंदिया दुविहणिओए मुहुत्तमद्धं तु ।

सेसाणं संखेज्जा वाससहस्सा य सव्वेसिं ॥

[३६१] बादरस्स णं भंते केवतियं कालं अंतरं होति गोयमा जहण्णेणं अंतोमुहुत्तं उक्कोसेणं बादरपुढविकाइयस्स वणस्सतिकालो जाव बादरवाउकाइयस्स बादरवणस्सतिकाइयस्स पुढविकालो

पत्तेयादर-वणस्सइकायस्स वणस्सतिकालो निओदो बदरनिओदो य जहा बादरो ओहिओ बादरतसकाइयस्स वणस्स-तिकालो [अपज्जत्ताणं पज्जत्ताणं च एसेव विही] ।

[३६२] अप्पाबहुयाणि-सव्वत्थोवा बादरतसकाइया बादरतेउकाइया असंखेज्जगुणा पत्तेयसरीर-बादरवणस्सतिकाइया असंखेज्जगुणा बादरनिओया असंखेज्जगुणा बादरपुढविकाइया असंखेज्जगुणा आउवा-उकाइया असंखेज्जगुणा बादरवणस्सतिकाइया अनंतगुणा बादरा विसेसाहिया एवं अपज्जत्तगाणवि पज्जत्त-गाणं सव्वत्थोवा बायरतेउक्काइया अनंतगुणा बादरा विसेसाहिया एवं अपज्जत्तगाणवि पज्जत्तगाणं सव्वत्थोवा बायरतेउक्काइया बायरतसकाइया असंखेज्जगुणा पत्तेयसरीरबायरा असंखेज्जगुणा सेसा तहेव जाव बादरा विसेसाहिया एतेसि णं भंते बायराणं पज्जत्तापज्जत्ताणं कयरे कयरेहिंतो अप्पा वा जाव वीसेसाहिया वा सव्वत्थोवा बायरा पज्जत्ता, बायरा अपज्जत्तगा असंखेज्जगुणा एवं सव्वे जाव बायरतसकाइया एतेसि णं भंते बायराणं बायरपुढविकाइयाणं जाव बायरतसकाइयाणं य पज्जत्तापज्जत्ताणं कयरे कयरेहिंतो अप्पा वा जाव विसेसाहिया वा सव्वत्थोवा बायरतेउक्काइया पज्जत्तगा बादरतसकाइया पज्जत्तगा असंखेज्जगुणा बायरतसकाइया अपज्जत्तगा असंखेज्जगुणा पत्तेयसरीरबायरवणस्सतिकाइया पज्जत्तगा असंखेज्जगुणा बायरतेउकाइया अपज्जत्तगा असंखेज्जगुणा पत्तेयसरीरबायर वणस्सतिकाइया अपज्जत्तगा असंखेज्जगुणा बायरा निओगा अपज्जत्तगा असंखेज्जगुणा बायरपुढवि-आउ-वाउकाइया अपज्जत्तगा असंखेज्जगुणा बायरवणस्सइकाइया पज्जत्तगा अनंतगुणा बायरपज्जत्तगा विसेसाहिया बायर-वणस्सतिकाइया अपज्जत्तगा असंखेज्जगुणा बायरा अपज्जत्तगा विसेसाहिया बायरा विसेसाहिया ।

एतेसि णं भंते सुहुमाणं सुहुमपुढविकाइयाणं जाव सुहुमनिगोदाणं बायराणं बायरपुढ-विकाइयाणं जाव बादरतसकाइयाणं य कयरे कयरेहिंतो अप्पा वा जाव विसेसाहिया वा गोयमा सव्वत्थोवा बादरतसकाइया, बायरतेउकाइया असंखेज्जगुणा, पत्तेयसरीरबायरवणस्सइ-काइया असंखेज्जगुणा तहेव जाव

पडिवत्ति-५

बायरवाउकाइया असंखेज्जगुणा सुहुमतेउक्काइया असंखेज्जगुणा सुहुमपुढविकाइया विसेसाहिया सुहुम-आउकाइया सुहुमवाउकाइया विसेसाहिया सुहुमनिओया असंखेज्जगुणा बायरवणस्सतिकाइया अनंतगुणा बायरा विसेसाहिया सुहुमवणस्सइकाइया असंखेज्जगुणा सुहुमविसेसाहिया एवं अपज्जत्तगावि पज्जत्तगावि नवरि-सव्वत्थोवा बायरतेउक्काइया पज्जत्ता बायरतसकाइया पज्जत्ता असंखेज्जगुणा पत्तेयसरीरबायर-वणस्सइकाइया असंखेज्जगुणा सेसं तहेव जाव सुहुमा पज्जत्ताणं अपज्जत्ताणं य कयरे कयरेहिंतो अप्पा वा जाव विसेसाहिया वा गोयमा सव्वत्थोवा बादरा पज्जत्ता, बादरा अपज्जत्ता असंखेज्जगुणा सव्वत्थोवा सुहुमा अपज्जत्ता, सुहुमपज्जत्ता संखेज्जगुणा एवं सुहुमपुढविबायरपुढवि जाव सुहुमनिओया बायरनिओया-नवरं-पत्तेयसरीरबायरवणस्सतिकाइया सव्वत्थोवा पज्जत्ता, अपज्जत्ता असंखेज्जगुणा एवं बादरतसकाइयावि, सव्वेसिं पज्जत्तअपज्जत्तगाणं कयरे कयरेहिंतो अप्पा वा जाव विसेसाहिया वा सव्वत्थोवा बायरतेउक्काइया पज्जत्ता, बायरतसकाइया पज्जत्तगा असंखेज्जगुणा ते चेव अपज्जत्तगा असंखेज्जगुणा पत्तेयसरीरबायर-वणस्सइकाइया अपज्जत्तगा असंखेज्जगुणा बायरणिओया पज्जत्ता असंखेज्जगुणा बायरपुढविकाइया असंखेज्जगुणा आउवाउकाइया पज्जत्ता असंखेज्जगुणा बायरतेउकाइया अपज्जत्तगा असंखेज्जगुणा पत्तेय-सरीरबायरवणस्सइकाइया असंखेज्जगुणा बायरतेउकाइया अपज्जत्तगा असंखेज्जगुणा पत्तेयसरीरबायर-वणस्सइकाइया असंखेज्जगुणा बायरणिओया

पज्जत्ता असंखेज्जगुणा बायरपुढवि-आउ-वाउकाइया अपज्जत्तगा असंखेज्जगुणा सुहुमतेउकाइया पज्जत्तगा संखेज्जगुणा सुहुमणिगोया पज्जत्ताग संखेज्जगुणा बायरवणस्सतिकाइया पज्जत्तगा अनंत-गुणा बायरा पज्जत्तगा विसेसाहिया बायरवणस्सइकाइया अपज्जत्ता असंखेज्जगुणा बायरा अपज्जत्ता विसेसाहिया बायरा विसेसाहिया सुहुमवणस्सतिकाइया अपज्जत्तगा असंखेज्जगुणा सुहुमा अपज्जत्ता विसेसाहिया सुहुमवणस्सइकाइया पज्जत्ता संखेज्जगुणा सुहुमा पज्जत्तगा वसेसाहिया सुहुमा विसे-साहिया ।

[३६३] कतिविधा णं भंत निओदा पन्नत्ता गोयमा दुविहा पन्नत्ता तं जहा- निओदा य निओदजीवा य निओदा णं भंते कतिविहा पन्नत्ता गोयमा दुविहा पन्नत्ता तं जहा- सुहुमनिओदा य बायरणिओदा य सुहुमनिओदा णं भंते कतिविहा पन्नत्ता गोयमा दुविहा पन्नत्ता तं जहा- पज्जत्ता य अपज्जता य बादरनिओदावि दुविहा पन्नत्ता तं जहा- पज्जत्ता य अपज्जत्ता य ।

[३६४] निओदा णं भंते दव्वट्टयाए किं संखेज् असंखेज्जा अनंता गोयमा नो संखेज्जा असंखेज्जा नो अनंता अपज्जत्ता णं भंते निओदा दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता, पज्जत्ता णं भंते निओदा दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता सुहुमाणिओदा णं भंते दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता अपज्जत्ता णं भंते सुहुमणिओदा दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता पज्जत्ता णंभंते सुहुमणिओदा दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता बादरणिओदा णं भंते दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता अपज्जत्ता णं भंते बादरणिओदा दव्वट्टयाए किं संखेज्जा असंखेज्जा अनंता गोयमा नो संखेज्जा असंखेज्जा नो अनंता निओदा णं भंते पदेसट्टयाए किं संखेज्जा असंखेज्जा अनंता गोयमा नो संखेज्जा नो असंखेज्जा अनंता एवं पज्जत्तगावि अपज्जत्तगावि एवं सुहुमाणवि तिण्णि आलावगा पदेसट्टयाए सव्वे य अनंता एवं पडिवत्ति-५

पदेसट्टयाए बादराणवि तिण्णि आलावगा सव्वे य अनंता एमेए दव्वपदेसेहिं अट्टारस आलागवगा एतेसि णं भंते निओदाणं सुहुमाणं बादराणं पज्जत्ताणं अपज्जत्ताणं दव्वट्टयाणं पदेसट्टयाए दव्वट्टपदेसट्टयाए कतरे कतरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा बादरणिओदा पज्जत्ता दव्वट्टयाए, बादरणिओदा अपज्जत्ता दव्वट्टयाए असंखेज्जगुणा सुहुमणिओदा अपज्जत्ता दव्वट्टयाए असंखेज्जगुणा सुहुमणिओदा पज्जत्ता दव्वट्टयाए संखेज्जगुणा पदेसट्टयाएसव्वत्थोवा बादरणिओदा पज्जत्ता पदेसट्टयाए बादरणिओदा अपज्जत्ता पदेसट्टयाए असंखेज्जगुणा सुहुमणिओदा अपज्जत्ता पदेसट्टयाए असंखेज्जगुणा सुहुमणिओदा पज्जत्ता पदेसट्टयाए संखेज्जगुणा दव्वट्ट-पदेसट्टयाए-सव्वत्थोवा बादरणिओदा पज्जत्ता दव्वट्टयाए बादरणिओदा अपज्जत्ता दव्वट्टयाए असंखेज्जगुणा सुहुमणिओदा दव्वट्टयाए असंखेज्जगुणा सुहुमनिओदा पज्जत्ता दव्वट्टयाए संखेज्जगुणा सुहुमणिओदेहिंतो पज्जत्तएहितो दव्वट्टयाए बादरणिओदा पज्जत्ता पदेसट्टयाए अनंतगुणा बादरणिओदा अपज्जत्ता पदेसट्टयाए असंखेज्जगुणा सुहुमणिओदा अपज्जत्ता पदेसट्टयाए असंखेज्जगा सुहुमणिओदा पज्जत्ता पदेसट्टयाए संखेज्जगुणा ।

निओदजीवा णं भंते कतिविहा पन्नत्ता गोयमा दुविहा पन्नत्ता तं जहा- सुहुमणिओदजीवा य बादरणिओदजीवा य सुहुमणिओदजीवा णं भंते कतिविहा पन्नत्ता गोयमा दुविहा पन्नत्ता तं जहा- पज्जत्ता य अपज्जत्ता य बादरणिओदजीवा णं भंते कतिविहा पन्नत्ता गोयमा दुविहा पन्नत्ता तं जहा- पज्जत्ता य अपज्जत्ता य निगोदजीवा णं भंते दव्वट्ठयाए किं संखेज्जा असंखेज्जा अनंता गोयमा नो संखेज्जा नो असंखेज्जा अनंता एवं अपज्जत्तावि अनंता पज्जत्तावि अनंता एवं सुहुमावि पज्जत्ता अपज्जत्ता तिविधावि अनंता बादरणिओदजीवा णं भंते दव्वट्ठयाए किं संखेज्जा असंखेज्जा अनंता गोयमा नो संखेज्जा नो असंखेज्जा अनंता एवं अपज्जत्तावि एवं पज्जत्तावि एवेते नोदजीवेसु दव्वट्ठयाए नव आलावगासव्वेवि अनंता एव पदेसट्ठयाएवि नव आलावगा सव्वेवि अनंता एवमेते निओदजीवेसु सुहुम- बादरेसु दव्वट्ठयाए-पदेसट्ठयाए अट्ठारस आलावगा अनंता एतेसि णं भंते निओदजीवाणंसुहुमाणं बादराणं पज्जत्ताणं अपज्जत्ताणं दव्वट्ठयाए पदेसट्ठयाए दव्वट्ठ-पदेसट्ठयाए कतरे कतरेहिंतो अप्पा वबहुया वा तुल्ला वा विसेसाहिय वा गोयमा सव्वत्थोवा बादरनिओद जीवा पज्जत्ता दव्वट्ठयाए बादरणिओदजीवा अपज्जत्ता दव्वट्ठयाए असंखेज्जगुणा सुहुमनिओदजीवा अपज्जत्ता दव्वट्ठयाए असंखेज्जगुणा सुहुमनिओदजीवा पज्जत्ता दव्वट्ठयाए संखेज्जगुणा पदेसट्ठयाएसव्वत्थोव बादरनिओदजीव पज्जत्ता पदेसट्ठयाए बादरनिओदजीवा अपज्जत्ता पदेसट्ठयाए असंखेज्जगुणा सुहुमनिओदजीवा अपज्जत्ता पदेसट्ठयाए असंखेज्जगुणा सुहुमणिओ-दजीवा पज्जत्ता पदेसट्ठयाए संखेज्जगुणा दव्वट्ठ-पदेसट्ठयाए-सव्वत्थावा बादरणिओदजीवा पज्जत्ता दव्वट्ठयाए बादरणओदजीवा अपज्जत्ता दव्वट्ठयाए असंखेज्जगुणा सुहुमणिओदजीवा अपज्जत्ता दव्वट्ठयाए असंखेज्जगुणा सुहुमणिओदजीवा पज्जत्ता दव्वट्ठयाए संखेज्जगुणा सुहुमणिओदजीवेहिंतो पज्जत्तेहिंतो दव्वट्ठयाए बादरणिओदजीवा पज्जत्ता पदेसट्ठयाए असंखेज्जगुणा बादरणिओदजीवा अपज्जत्ता पदेसट्ठयाए असंखेज्जगुणा सुहुमणिओदजीवा अपज्जत्ता पदेसट्ठयाए असंखेज्जगुणा सुहुमणिओदजीवापज्जत्ता पदेसट्ठयाए संखेज्जगुणा ।

[illegible]

दव्वद्वयाए अनंतगुणा बादरणिओदजीवा अपज्जत्ता दव्वद्वयाए असंखेज्जगुणा सुहुमणिओदजीवाअपज्जत्ता
दव्वद्वयाए असंखेज्जगुणा सुहुमणिओदजीवा पज्जत्ता दव्वद्वयाए संखेज्जगुणा सुहुमणिओदजीवेहिंतो
पज्जत्तएहिंतो दव्वद्वयाए बादरणिओदजीवा पज्जत्ता पदेसद्वयाए असंखेज्जगुणाबादरणिओदजीवा
अपज्जत्तापदेसद्वयाए असंखेज्जगुणा सुहुमणिओदजीवा अपज्जत्ता पदेसद्वयाए
असंखेज्जगुणासुहुमणिओदजीवा पज्जत्ता पदेसद्वयाए संखेज्जगुणा सुहुमणोदजीवेहिंतो पज्जत्तएहिंतो
पदेसद्वयाए बादरणिओदा पज्जत्ता पदेसद्वयाए अनंतगुणा बादरणिओद अपज्जत्ता पदेसद्वयाए
असंखेज्जगुणा सुहुमणिओदा अपज्जत्ता पदेसद्वयाए असंखेज्जगुणा सुहुमणिओदा पज्जत्ता पदेसद्वयाए
संखेज्जगुणा सेत्तं छव्विहा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च पंचमी पडिवत्ति समत्ता •

॥ छद्दी पडिवत्ती-(सत्तविह-पडिवत्ती) ॥

[३६५] तत्थ णं जेते एवमाहंसु सत्तविहा सत्तविहा संसारसमावण्णगा जीवा ते एवमाहंसु तं
जहा- नेरइया तिरिक्खा तिरिक्खजोणिणीओ मणुस्सा मणुस्सीओ देवा देवीओ, नेरइयस्स ठितो जहण्णेणं
दसवाससहस्साइं उक्कोसेणं तेत्तीसं सागरोवमाइं तिरिक्खजोणियस्स जहण्णेणं अंतोमुहुत्तं उक्कोसेणं
तिण्णि पलिओवमाइं एवं तिरिक्खजोणिणीएवि मणुस्साणवि मणुस्सीणवि देवाणं ठिती तहा नेरइयाणं
देवीणं जहण्णेणं ठिता तहा नेरइयाणं देवीणं जहन्नेणं दसवाससहस्साइं उक्कोसेणं पणपन्नपलिओवमाणि,
नेरइय-देव-देवीणं जच्चेव ठिती सच्चेव संचिद्वणा तिरिक्खजोणिणं भंते तिरिक्खजोणिणत्ति कालओ
केवचिरं होइ गोयमा जहण्णेणं अंतोमुहुत्तं उक्कोसेणं वणस्सतिकालो तिरिक्खजोणिणीणं जहण्णेणं अंतो-
मुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं एवं मणुस्सस्स मणुस्सीएवि, नेरइयस्स
अंतरं जहण्णेणं अंतोमुहुत्तं उक्कोसेणं वणस्सतिकालो एवं सव्वाणं तिरिक्खजोणियवज्जाणं तिरिक्ख-
जोणियाणं जहन्नेणं अंतोमुहुत्तं उक्कोसेणं सागरोवमसतपुहत्तं सातिरेगं अप्पाबहुयं-सव्वत्थोवाओ मणुस्सी-
पडिवत्ति-७

ओ, मणुस्सा असंखेज्जगुणा नेरइया असंखेज्जगुणा तिरिक्खजोणिणीओ असंखेज्जगुणाओ देवा असंखेज्ज-
गुणा देवीओ संखेज्जगुणाओ, तिरिक्खजोणिया अनंतगुणा सेत्तं सत्तविहा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च छद्दी पडिवत्ति समत्ता •

॥ सत्तमी पडिवत्ती-(अद्विह पडिवत्ती) ॥

[३६६] तत्थ जेते णं एवमाहंसु अद्विहा संसारसमावण्णगा जीवा ते एवमाहंसु-पढम-
समयनेरइया अपढमसमयनेरइया पढमसमयतिरिक्खजोणिया अपढमसमयतिरिक्खजोणिया पढमसमय-
मणुस्सा अपढमसमयमणुस्सा पढमसमयदेवा अपढमसमयदेवा, पढमसमयनेरइयस्स णं भंते केवतियं
कालं ठिती पन्नत्ता गोयमा एगं समयं ठिती पन्नत्ता अपढमसमयनेरइयस्स जहन्नेणं दसवाससहस्साइं
समयूणाइं उक्कोसेणं तेत्तीसं सागरोवमाइं समयूणाइं एवं सव्वेसिं पढमसमयगाणं एगं समयं
अपढमसमयतिरिक्खजोणियाणं जहण्णेणं खुड्डागं भवग्गहणं समयूणं उक्कोसेणं तिण्णि पलिओवमाइं
समयूणाइं मणुस्साणं जहण्णेणं खुड्डागं भवग्गहणं समयूणं उक्कोसेणं तिण्णि पलिओवमाइं समयूणाइं
देवाणं जहा नेरइयाणं नेरइय-देवाणं जच्चेव ठिती सच्चेव संचिद्वणावि पढमसमयतिरिक्ख-जोणिणं णं भंते

पढमसमयतिरिखजोणिएत्ति कालओ केवचिरं होती गोयमा एक्कं समयं अपढमसमय-तिरिखजोणियाणं जहण्णेणं खुड्डागं भवग्गहणं समयूणं उक्कोसेणं वणस्सतिकालो पढमसमयमणुस्साणं एक्कं समयं अपढमसमयमणुस्साणं जहण्णेणं खुड्डागं भवग्गहणं समयूणं उक्कोसेणं तिण्णि पलिओवमाइं पुव्वकोडि-पुहत्तमब्भहियाइं अंतरंपढमसमयणेइयस्स जहण्णेणं दसवाससहस्साइं अंतोमुहुत्तमब्भहियाइं उक्कोसेणं वणस्सतिकालो अपढमसमयणेइयस्स जहण्णेणं अंतोमुहुत्तं उक्कोसेणं वणस्सतिकालो पढम-समयति-रिखजोणियस्स जहण्णेणं खुड्डागं भवग्गहणं समयाहियं उक्कोसेणं सागरोवमसतपुहत्तं सातिरेगं पढम-समयमणुस्सस्स जहण्णेणं दो खुड्डाइं भवग्गहणाइं समयूणाइं उक्कोसेणं वणस्सतिकालो अपढम-समय-मणुस्सस्स जहण्णेणं खुड्डागं भवग्गहणं समयाहियं उक्कोसेणं वणस्सतिकालो, देवा जहा नेरइया ।

अप्पाबहुगं-एतेसि णं भंते पढमसमयनेरइयाणं जाव पढमसमयदेवाण य कतरे कतरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा पढमसमयमणुस्सा, पढमसमयनेरइया असंखेज्जगुणा पढमसमयदेवा असंखेज्जगुणा पढमसमयतिरिखजोणिया असंखेज्जगुणा, अपढमसमय-नेरइयाणं जाव अपढमसमयदेवाणं एवं चेव अप्पाबहुं नवरिं-अपढमसमयतिरिखजोणिया अनंतगुणाएतेसिं पढमसमयनेरइयाणं अपढमसमयनेरइयाणं य कयरे कयरेहिंतो अप्पा वा बहुया वा तुल्ला वा विसेसाहिया वा सव्वत्थोवा पढमसमयनेरइया, अपढमसमयनेरइया असंखेज्जगुणा एवं सव्वे नवरं-अपढमसमय-तिरिखजोणिया अनंतगुणा पढमसमयनेरइयाणं जाव अपढमसमयदेवाण य कयरे कयरेहिंतो अप्पा वा बहुया वा तुल्ला वा विसेसाहिया वा सव्वत्थोवा पढमसमयमणुस्सा, अपढमसमयमणुस्सा असंखेज्जगुणा पढमसमयनेरइया असंखेज्जगुणा पढमसमयदेवा असंखेज्जगुणापढमसमयतिरिखजोणिया असंखेज्जगुणा अपढमसमयनेरइयाअसंखेज्जगुणा अपढमसमयदेवाअसंखेज्जगुणाअपढमसमयतिरिखजोणियाअनंतगुणा सेत्तं अट्ठविहा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च सत्तमी पडिवत्ति समत्ता •

पडिवत्ति-८

[[अट्ठमी पडिवत्ती-(नवविह पडिवत्ती)]]

[३६७] तत्थ णं जेते एवमाहंसु नवविधा संसारसमावण्णगा जीवा ते एवमाहंसु-पुढविक्काइया आउक्काइया तेउक्काइया वाउक्काइया वणस्सइकाइया बेइंदिया तेइंदिया चउरिंदिया पंचेंदिया, ठिती सव्वेसिं भाणियच्चा, पुढविक्काइयाणं संचिट्ठणा पुढविकालो जाव वाउक्काइयाणं वणस्सईणं वणस्सतिकालो बेइंदिया तेइंदिया चउरिंदिया संखेज्जं कालं पंचेंदियाणं सागरोवमहस्सं सातिरेगं अंतरं सव्वेसिं अनंतं कालं वणस्सतिकाइयाणं असंखेज्जं कालं अप्पाबहुगं-सव्वत्थोवा पंचेंदिया, चउरिंदिया विसेसाहिया, तेइंदिया विसेसाहिया, बेइंदिया विसेसाहिया, तेउक्काइया असंखेज्जगुणा, पुढविकाइया विसेसाहिया, आउकाइया विसेसाहिया, वाउकाइया विसेसाहिया, वणस्सतिकाइया अनंतगुणा, सेत्तं नवविधा संसारसमावण्णगा जीवा ।

• मुनि दीपरत्नसागरेण संशोधिताः सम्पादिताश्च अट्ठमी पडिवत्ति समत्ता •

[[नवमी पडिवत्ती-(दसविह पडिवत्ती)]]

[३६८] तत्थ णं जेते एवमाहंसु दसविधा संसारसमावण्णगा जीवा ते एवमाहंसु तं जहा-
 पढमसमयएगिंदिया अपढमसमयएगिंदिया पढमसमयबेइंदिया अपढमसमयबेइंदिया पढमसमयतेइंदिया
 अपढमसमयतेइंदिया पढमसमयचउरिंदिया अपढमसमयचउरिंदिया पढमसमयपंचिंदिया अपढमसमय-
 पंचिंदिया, पढमसमयएगिंदियस्स णं भंते केवतियंकालं ठिती पन्नत्ता गोयमा एगं समयं अपढमसमयए-
 गिंदियस्स जहण्णेणं खुड्डागं भवग्गहणंसमयूणं उक्कोसेणं बावीसं वाससहस्साइं समयूणाइं एवं सव्वेसिं
 पढमसमयिकाणं एगं समयं अपढमसमयिकाणं जहण्णेमं खुड्डागं भवग्गहणं समयूणं उक्कोसेणं जाव
 जस्स ठिती सा समयूणा जाव पंचिंदियाणं तेत्तीसं सागरोवमाइं समयूणाइं, संचिद्धणा-पढमसमयइयस्स एगं
 समयं अपढमसमयिकाणं जहण्णेणं खुड्डागं भवग्गहणं समयूणं उक्कोसेणं एगिंदियाणं वणस्सतिकालो
 बेइंदिय-तेइंदिय-चउरिंदियाणं संखेज्जं कालं पंचिंदियाणं सागरोवमसहस्सं सातिरेगं पढमसमएगिंदियाणं
 केवतियं अंतरं होति गोयमा जहण्णेणं दो खुड्डागाइं भवग्गहणाइं समयूणाइं उक्कोसेणं वणस्सतिकालो
 अपढमसमयएगिंदियाणं अंतरं जहण्णेणं खुड्डागं भवग्गहणं समयाहियं उक्कोसेणं दो सागरोवमसहस्साइं
 संखेज्जवासमब्भहियाइं सेसाणं सव्वेसिं पढमसमयिकाणं अंतरं जहण्णेणं दो खुड्डागाइं भवग्गहणाइं
 समयूणाइं उक्कोसेणं वणस्सतिकालो अपढमसमयिकाणं सेसाणं जहण्णेमं खुड्डागं भवग्गहणं समयाहियं
 उक्कोसेणं वणस्सतिकालो पढमसमइयाणं सव्वेसिं सव्वत्थोवा पढमसमयपंचेइंदिया, पढमसमयचउरिंदिया
 विसेसाहिया, पढमसमयतेइंदिया विसेसाहिया, पढमसमयबेइंदिया विसेसाहिया, पढमसमयएगिंदिया
 विसेसाहिया, एवं अपढमसमयिकावि नवरिं-अपढमसमयएगिंदिया अनंतगुणा, दोण्हं अप्पबहुयं-सव्वत्थोवा
 पढमसमयएगिंदिया, अपढमसमयएगिंदिया अनंतगुणा, सेसाणं सव्वत्थोवा पढमसमयिगा अपढमसमयिगा
 असंखेज्जगुणा एतेसि णं भंते पढमसमयएगिंदियाणं अपढमसमयएगिंदियाणं जाव अपढमसमयपंचेइंदियाणं
 य कयरे कयरेहिंतो अप्पा वा बहुया वा तुल्ला वा विसेसाहिया वा सव्वत्थोवा पढमसमयपंचेइंदिया,
 पढमसमय-चउरिंदिया विसेसाहिया, पढमसमयतेइंदिया विसेसाहिया, पढमसमयबेइंदियाविसेसाहिया,
 पढमसमयएगिंदिया विसेसाहिया, अपढमसमयपंचेइंदिया असंखेज्जगुणा, अपढमसमयचउरिंदिया विसेसाहिया,
 पडिवत्ति-९

जाव अपढमसमयएगिंदिया अनंतगुणा, सेत्तं दसविहा संसारसमावण्णगा जीवा सेत्तं संसारसमावण्णग-
 जीवाभिगमे ।

• मुनि दीपरत्नसागरेण संशोधिताः सम्पादिताश्च नवमी पडिवत्ति समत्ता •

[[पढमा सव्वजीवा-पडिवत्ती]]

[३६९] से किं तं सव्वजीवाभिगमे सव्वजीवेसु णं इमाओ नव पडिवत्तीओ एवमाहिज्जंति
 एगे एवमाहंसु-दुविहा सव्वजीवा पन्नत्ता जाव दसविहा सव्वजीवा पन्नत्ता तत्थ णं जेते एवमाहंसु दुविहा
 सव्वजीवा पन्नत्ता ते एवमाहंसु तं जहा- सिद्धा चेव असिद्धा चेव, सिद्धे णं भंते सिद्धेति कालओ केवचिरं
 होति गोयमा साइए अपज्जवसिए, असिद्धे णं भंते असिद्धेति कालओ केवचिरं होति गोयमा असिद्धे दुविहे
 पन्नत्ते तं जहा- अणाइए वा अपज्जवसिए, अणाइए वा सपज्जवसिए सिद्धस्स णं भंते केवतिकालं अंतरं
 होति गोयमा साइयस्स अपज्जवसियस्स नत्थि अंतरं असिद्धस्स णं भंते केवइयं अंतरं, होइ गोयमा
 अणाइयस्स अपज्जवसियस्स नत्थि अंतरं अणाइयस्स सपज्जवसियस्स नत्थि अंतरं एएसि णं भंते

सिद्धाणं असिद्धाणं य कयरे कयरेहिंतो अप्पावा बहुया वा तुल्लावा विसेसाहिया वा गोयमा सव्वत्थोवा सिद्धा, असिद्धा अनंतगुणा ।

[३७०] अहवा दुविहा सव्वजीवा पन्नत्ता तं जहा- सइंदियाचेव अणिंदिया चेव सइंदिए णं भंते सइंदिएत्तिं कालतो केवचिरं होइ गोयमा सइंदिए दुविहे दुविहे पन्नत्ते-अणाइए वा अपज्जवसिए अणाइए वा सपज्जवसिए अणिंदिए साइए वा अपज्जवसिए दोण्हवि अंतरं नत्थि, अप्पाबहुयंसव्वत्थोवा अणिंदिया, सइंदिया अनंतगुणा अहवा दुविहा सव्वजीवा पन्नत्ता तं जहा- सकाइया चेव अकाइया चेव सकाइयस्स संचिद्धणंतरं जहा असिद्धस्स अकाइयस्स जहा सिद्धस्स, अप्पाबहुयंसव्वत्थोवा अकाइया, सकाइया अनंतगुणा अहवा दुविहा सव्वजीवा पन्नत्ता तं जहा- अजोगी य सजोगी य तघेव अहवा दुविहा सव्वजीवा पन्नत्ता तं जहा- सवेदगा चेव अवेदगाचे सवेदए णं भंते सवेदएत्ति कालतो केवचिरं होति गोयमा सवेदए तिविहे पन्नत्ते तं जहा- अणादीए वा अपज्जवसिते अणादीए वा सपज्जवसिए साइए वा सपज्जवसिए तत्थ णं जेसे साइए सपज्जवसिए से जहण्णेणं अंतोमुहुत्तं उक्कोसेणं अनंतकालं-अनंताओ उस्सप्पिणी-ओसप्पिणीओ कालओ खेत्तओ अवड्ढं पोग्गलपरियट्ठं देसूणं, अवदेए णं भंते अवेदएत्ति कालओ केवचिरं होति गोयमा अवेदए दुविहए पन्नत्ते तं जहा- साइए वा अपज्जवसिते साइएवा सपज्जवसिते तत्थ णं जेसे सादीए सपज्जवसिते से जहण्णेणं एककं समयं उक्कोसेणं अंतोमुहुत्तं, सवेदगस्स णं भंते केवतियं कालं अंतरं होति गोयमा अणादियस्स अपज्जवसियस्स नत्थि अंतरं अणादियस्स सपज्जवसियस्स नत्थि अंतरं सादीयस्स सपज्जवसियस्स जहण्णेणं एककं समयं उक्कोसेणं अंतोमुहुत्तं, अवेदगस्स णं भंते केवतियं कालं अंतरं होइ गोयमा साइयस्स अपज्जवसियस्स नत्थि अंतरं साइयस्स सपज्जवसियस्स जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं, अप्पाबहुयंसव्वत्थोवा अवेदगा, सवेदगा अनंतगुणा अहव दुविहा सव्वजीवा-सकसाई य अकसाई य सकसाई जहा सवेदए अकसाई जहा अवेदए, सव्वत्थोवा अकसाई, सकसाई अनंतगुणा अहवा दुविहा सव्वजीवा-सलेसा य अलेसा य जहा असिद्धा सिद्धा सव्वत्थोवा अलेसा सलेसा अनंतगुणा ।

[३७१] अहवा दुविहा सव्वजीवा पन्नत्ता तं जहा नाणी चेव अन्नाणी चेव नाणी णं भंते पडिवत्ति-१०/१

नाणीत्ति कालओ केवचिरं होति गोयमा नाणी दुविहे पन्नत्ते-सादीए वा अपज्जवसिए सादीए वा सपज्जवसे तत्थ णं जेसे सादीए सपज्जवसिते से जहण्णेणं अंतोमुहुत्तं उक्कोसेणं छावट्ठिसागरोवमाइं सातिरेगाइं अन्नाणी तिविहे जहा सवेदए, नाणिस्स णं भंते केवतियं कालं अंतरं होति गोयमा सादीयस्स अपज्जवसियस्स नत्थि अंतरं सादीयस्स सपज्जवसियस्स जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं, अन्नाणिस्स अंतरं अणादीयस्स अपज्जवसियस्स नत्थि अंतरं अणादीयस्स सपज्जवसियस्स नत्थि अंतरं सादीयस्स सपज्जवसियस्स जहण्णेणं अंतोमुहुत्तं उक्कोसेणं छावट्ठिं सागरोवमाइं साइरेगाइं अप्पाबहुयंसव्वत्थोवा नाणी, अन्नाणी अनंतगुणा अहवा दुविहा सव्वजीवा पन्नत्ता-सागरोवउत्ता य अनागरोवउत्ता य संचिद्धणा अंतरं जहण्णेणं उक्कोसेणवि अंतोमुहुत्तं अप्पाबहुंसव्वत्थोवा अणागरोवउत्ता, सागरोवउत्ता संखेज्जगुणा ।

[३७२] अहवा दुविहा सव्वजीवा पन्नत्ता तं जहा- आहारगा चेव अणाहारगा चेव आहारए णं भंते आहारएत्ति कालओ केवचिरं होति गोयमा आहारए दुविहे पन्नत्ते तं जहा- छउमत्थ आहारए य केवलि आहारए य छउमत्थआहारगस्स जहण्णेणं खुड्डागं भवग्गहणं दुसमयूणं उक्कोसेणं असंखेज्जं कालं-

असंखेज्जाओ उस्सप्पिणि-ओसप्पिणीओ कालओ खेत्तओ अंगुलस्स असंखेज्जतिभागं केवलिआहारए णं [भंते केवलिआहारएत्ति कालओ] केवचिरं होइ गोयमा जहन्नेणं अंतोमुहुत्तं उक्कोसेणं देसूणा पुव्वकोडी, अणाहारए णं भंते अणाहारएत्ति कालओ केवचिरं होति गोयमा अणाहारए दुविहे पन्नत्ते तं जहा-छउमत्थअणाहारए य केवलिअणाहारए य छउमत्थ अणाहारए णं [भंते छउमत्थअणाहारएत्ति कालओ] केवचिरं होति गोयमा जहण्णेणं एककं समयं उक्कोसेणं दो समया केवलिअणाहारए णं भंते केवलिअणाहारएत्ति कालओ केवचिरं होति गोयमा केवलिअणाहारए दुविहए पन्नत्ते तं जहा-सिद्धकेवलिअणाहारए य भवत्थकेवलिअणाहारए य सिद्धकेवलिअणाहारए णं भंते सिद्धकेवलिअणाहारएत्ति कालओ केवचिरं होति गोयमा साइए अपज्जवसिए,

भवत्थकेवलिअणाहारए णं भंते भवत्थकेवलिअणाहारएत्ति कालओ केवचिरं होति गोयमा भवत्थकेवलिअणाहारए दुविहे पन्नत्ते-सजोगिभवत्थकेवलिअणाहारए य अजोगिभवत्थ-केवलि-अणाहारए य अजोगिभवत्थकेवलिअणाहारए णं भंते अजोगिभवत्थकेवलिअणाहारएत्ति कालओ केवचिरं होति गोयमा जहन्नेणं अंतोमुहुत्तं उक्कोसणावि अंतोमुहुत्तं सजोगिभवत्थ-केवलिअमाहारए णं भंते सजोगिभवत्थकेवलि-अणाहारएत्ति कालओ केवचिरं होइ अजहण्ण-मणुक्कोसेणं तिण्णि समया छउमत्थआहारगस्स केवतियं कालं अंतरं होइ गोयमा जहन्नेणं एककं समयं उक्कोसेणं दो समया केवलिआहारगस्स अंतरं अजहण्ण-मणुक्कोसेणं तिण्णि समया छउमत्थअणाहारगस्स अंतरं जहण्णेणं खुड्डागभवग्गहणं दुसमयूणं उक्कोसेणं असंखेज्जं कालं जाव अंगुलस्स असंखज्जतिभागं सजोगिभवत्थकेवलिअणाहारगस्स णं भंते अंतरं केवतियं कालं होइ गोयमा जहन्नेणं अंतोमुहुत्तं उक्कोसणावि अंतोमुहुत्तं अजोगिभवत्थकेवलिअणाहारगस्स नत्थि अंतरं सिद्धकेवलिअणाहारगस्स साइयस्स अपज्जवसियस्स नत्थि अंतरं एएसि णं भंते आहारगाणं अणाहारगाण य कयरे कयरेहिंतो अप्पा वा बहुया वा तुल्ला वा विसेसाहिया वा गोयमा सव्वत्थोवा अणाहारगा आहारगा असंखेज्जगुणा ।

[३७३] अहवा दुविहा सव्वजीवा पन्नत्ता तं जहा- भासगा य अभासगा य भासए णं भंते भासएत्तिकालओ केवचिरं होति गोयमा जहण्णेणं एककं समयं उक्कोसेणं अंतोमुहुत्तं अभासए णं भंते अभा-
पडिवत्ति-१०/१

सएत्ति कालओ केवचिरं होति गोयमा अभासए दुविहे पन्नत्ते-साइए वा अपज्जवसिए साइए वा सपज्जवसिए तत्थ णं जेसे साइए सपज्जवसिए से जहण्णेणं अंतोमुहुत्तं उक्कोसेणं वणस्सतिकालो अभासगस्स साइयस्स अपज्जवसियस्स नत्थि अंतरं साइयस्स सपज्जवसियस्स जहण्णेणं एककं समयं उक्कोसेणं अंतोमुहुत्तं अप्पाबहुयं-सव्वत्थोवा भासगा अभासगा अनंतगुणा अहवा दुविहा सव्वजीवा ससरीरी य असरीरी य ससरीरी जहा असिद्धा असरीरी जहा सिद्धा सव्वत्थोवा असरीरी ससरीरी अनंतगुणा ।

[३७४] अहवा दुविहा सव्वजीवा पन्नत्ता तं जहा- चरिमा चेव अचरिमा चेव चरिमे णं भंते चरिमेत्ति कालतो केवचिरं होति गोयमा चरिमे अणादीए सपज्जवसिए अचरिमे दुविहे पन्नत्ते-अणाइए वा अपज्जवसिए साइए वा अपज्जवसिए दोण्हं पि नत्थि अंतरं अप्पाबहुयं-सव्वत्थोवा अचरिमा, चरिमा अनंतगुणा सेत्तं दुविहा सव्वजीवा सिद्धसइंदियकाए जोए वेए कसायलेसा य नाणुवओगाहारा भाससरीरी य चरिमे य ।

• मुनि दीपरत्नसागरेण संशोधिताः सम्पादिताश्च पठमा सव्वजीवा पडिवत्ती समत्ता •

॥ दोच्चा सव्वजीवा-पडिवत्ती ॥

[३७५] तत्थ णं जेते एवमाहंसु तिविहा सव्वजीवा पन्नत्ता ते एवमाहंसु तं जहा- सम्मदिट्ठी मिच्छादिट्ठी सम्मामिच्छादिट्ठी, सम्मदिट्ठी णं भंते सम्मदिट्ठीत्ति कालओ केवचिरं होति गोयमा सम्मदिट्ठी दुविहे पन्नत्ते तं जहा- साइए वा अपज्जवसिए साइए वा सपज्जवसिए तत्थ जेसे साइए सपज्जवसिते से जहण्णेणं अंतोमुहुत्तं उक्कोसेमं छावडिं सागरोवमाइं सातिरेगाइं, मिच्छादिट्ठी तिविहे पन्नत्ते अणा-इए वा अपज्जवसिते अणाइए वा सपज्जवसिते साइए वा सपज्जवसिए तत्थ जेसे साइए सपज्जवसिए से जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं सम्मामिच्छा-दिट्ठी जहण्णेणं अंतोमुहुत्तं उक्कोसेणं अंतोमुहुत्तं सम्मदिट्ठिस्स अंतरं साइयस्स अपज्जवसियस्स नत्थि अंतरं साइयस्स सपज्जवसियस्स जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं मिच्छादिट्ठिस्स जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं मिच्छादिट्ठिस्स अणादीयस्स अपज्जवसियस्स नत्थि अंतरं अणादीयस्स सपज्जव-सियस्स नत्थि अंतरं साइयस्स सपज्जवसियस्स जहण्णेणं अंतोमुहुत्तं उक्कोसेणं छावडिं सागरो-वमाइं सातिरेगाइं सम्मामिच्छादिट्ठीस्स जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं अप्पाबहुयं-सव्वत्थोवा सम्मामिच्छादिट्ठी, सम्मदिट्ठी अनंतगुणा मिच्छादिट्ठी अनंतगुणा ।

[३७६] अहवा तिविहा सव्वजीवा पन्नत्ता-परित्ता अपरित्ता नोपरित्ता-नोअपरित्ता परित्ते णं भंते परित्तेति कालतो केवचिरं होति परित्ते दुविहे पन्नत्ते-कायपरित्ते य संसारपरित्ते य कायरपरित्ते णं भंते कायपरित्तेति कालतो केवचिरं होति गोयमा जहण्णेणं अंतोमुहुत्तं उक्कोसेणं पुढविकालो, संसारपरित्ते णं भंते संसारपरित्तेत्ति कालओ केवचिरं होति गोयमा जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं, अपरित्ते णं भंते अपरित्तेत्ति कालओ केवचिरं होति अपरित्ते दुविहे पन्नत्ते-कायअपरित्ते य संसारअपरित्ते य कायअपरित्ते जहण्णेणं अंतोमुहुत्तं उक्कोसेणं वणस्सतिकालो संसारापरित्ते दुविहे पन्नत्ते तं जहा- अणादीए वा अपज्जवसिते अणादीए वा सपज्जवसिते नोपरित्ते-नोअपरित्ते सादीए अपज्जवसिते, कायपरित्तस्स जहण्णेणं अंतरं अंतोमुहुत्तं उक्कोसेणं वणस्सतिकालो संसारपरित्तस्स नत्थि पडिवत्ति-१०/२

अंतरं कायपरित्तस्स जहण्णेणं अंतोमुहुत्तं उक्कोसेणं पुढविकालो संसारापरित्तस्स अणाइयस्स अपज्जव-सियस्स नत्थि अंतरं अणाइयस्स सपज्जवसियस्स नत्थि अंतरं नोपरित्त-नोअपरित्तस्सवि नत्थि अंतरं, अप्पाबहुयं-सव्वत्थोवा परित्ता नोपरित्ता-नोअपरित्ता अनंतगुणा अपरित्ता अनंतगुणा ।

[३७७] अहवा तिविहा सव्वजीवा पन्नत्ता तं जहा- पज्जत्तगा अपज्जत्तगा नोपज्जत्तग-नोअपज्जत्तगा पज्जत्तगे णं भंते पज्जत्तगेत्ति कालो केवचिरं होति गोयमा जहण्णेणं अंतोमुहुत्तं उक्कोसेणं सागरोवमसतपहुत्तं साइरेगं, अपज्जत्तगे णं भंते अपज्जत्तगेत्ति कालओ केवचिरं होति गोयमा जहण्णेणं अंतोमुहुत्तं उक्कोसेणवि अंतोमुहुत्तं नोपज्जत्त-नोअपज्जत्तए साइए अपज्जवसिते पज्जत्तगस्स अंतरं जहण्णेणं अंतोमुहुत्तं उक्कोसेणवि अंतोमुहुत्तं अपज्जत्तगस्स अंतरं जहण्णेणं उक्कोसेणवि अंतोमुहुत्तं अपज्जत्तगस्स अंतरं जहण्णेणं अंतोमुहुत्तं उक्कोसेणं सागरोवमसयपुहुत्तं

साइरेगं नोपज्जत्तग-नोअपज्ज-त्तगस्स नत्थि अंतरं अप्पाबहुयं-सव्वत्थोवा नोपज्जत्तग-नोअपज्जत्तगा, अपज्जत्तगा अनंतगुणा, पज्जत्तगा संखेज्जगुणा ।

[३७८] अहवा तिविहा सव्वजीवा पन्नत्ता तं जहा- सुहुमा बायरा नोसुहुमनोबायरा सुहुमे णं भंते सुहुमेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं पुढविकालो बायर णं भंते बायरेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं असंखेज्जं कालंअसंखेज्जाओ उस्सप्पिणी-ओसप्पिणीओ कालओ खेत्तओ अंगुलस्स असंखेज्जइभागो नोसुहुमनोबायरे साइए अपज्जवसिए सुहुमस्स अंतरं बायरकालो बायरस्स अंतरं सुहुमकालो नोसुहुमनोबायरस्स अंतरं नत्थि अप्पाबहुयं-सव्वत्थोवा नोसुहुम-नोबायरा, बायरा अनंतगुणा सुहुमा असंखेज्जगुणा ।

[३७९] अहवा तिविहा सव्वजीवा पन्नत्ता तं जहा- सण्णी असण्णी नोसण्णी-नोअसण्णी सण्णी णं भंते सण्णीत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं सागरोवमसतपुहत्तं सातिरेगं असण्णी णं भंते असण्णीत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं वणस्सतिकालो नोसण्मी-नोअसण्णी साइए अपज्जवसिते सण्णिस्स अंतरं जहण्णेणं अंतोमुहुत्तं उक्कोसेणं वणस्सतिकालो असण्णिस्स अंतरं जहन्नेणं अंतोमुहुत्तं उक्कोसेणं सागरोवमसयपुहत्तं सातिरेगं नोसण्णी-नोअसण्णिस्स नत्थि अंतरं अप्पाबहुयं-सव्वत्थोवा सण्णी नोसण्णी, नोअसण्णी अनंतगुणा, असण्णी अनंतगुणा ।

[३८०] अहवा तिविहा सव्वजीवा पन्नत्ता तं जहा- भवसिद्धिया अभवसिद्धिया नोभवसिद्धिय-नोअभवसिद्धिया भवसिद्धिए अणादीए सपज्जवसिए अभवसिद्धिए अणादीए अपज्जवसिए नोभवसिद्धिय-नोअभवसिद्धिए सादीए अपज्जवसिए भवसिद्धियस्स नत्थि अंतरं अभवसिद्धियस्स नत्थि अंतरं नोभवसिद्धिय-नोअभवसिद्धियस्स नत्थि अंतरं अप्पाबहुयं-सव्वत्थोवा अभवसिद्धिया, नोभवसिद्धिय-नोअभवसिद्धिया अनंतगुणा, भवसिद्धिया अनंतगुणा ।

[३८१] अहवा तिविहा सव्व जीवा तं जहा तसा थावरा नोतसानोथावरा तसे णं भंते कालओ अजहण्णेणं अंतोमुहुत्तं उक्कोसेणं दो सागरोवमसहस्साइं साइरेगाइं थावरस्स संचिट्ठणा वणस्सतिकालो नोतसनोथावरा सातीए अपज्जवसिए तसस्स अंतरं वणस्सतिकालो थावरस्स तसकालो नोतसनोथावरस्स नत्थि अंतरं अप्पाबहुगं सव्वत्थोवा तसा, नोतसानोथावरा अनंतगुणा, थावरा अनंत गुणा, से तं तिविधा सव्व जीवा ।

पडिवत्ति-१०/२

• मुनि दीपरत्नसागरेण संशोधिताः सम्पादिताश्च दोच्चा सव्वजीवा पडिवत्ती समत्ता •

॥ तच्चा सव्वजीवा-पडिवत्ती ॥

[३८२] तत्थ णं जेते एवमाहंसु चउव्विहा सव्वजीवा पन्नत्ता ते एवमाहंसु तं जहा मणजोगी वइजोगी कायजोगी अजोगी, मणजोगी णंभंते मणजोगित्ती कालओ केवचिरं होइ गोयमा जहण्णेणं एककं समयं उक्कोसेणं अंतोमुहुत्तं एवं वइजोगीवि, कायजोगी णं भंते कायजोगित्ति कालओ केवचिरंहोइ गोयमा जहण्णेणं अंतोमुहुत्तं उक्कोसेणं वणस्सतिकालो, अजोगी साइए अपज्जवसिए मणजोगिस्स अंतरं जहण्णेणं अंतोमुहुत्तं उक्कोसेणं वणस्सइकालो एवं वइजोगिस्स वि, कायजोगिस्स जहण्णेणं एककं समयं

उक्कोसेणं अंतोमुहुत्तं, अयोगिस्स नत्थि अंतरं अप्पाबहुयं-सव्वत्थोवा मणजोगी, वड्जोगी असंखेज्जगुणा, अजोगी अनंतगुणा कायजोगी अनंतगुणा ।

[३८३] अहवा चउव्विहा सव्वजीवा पन्नत्ता तं जहा- इत्थिवेयगा पुरिसवेयगा नपुंसगवेयगा अवेयगा, इत्थिवेयं णं भंते इत्थिवेयएत्ति कालओ केवचिरं होति गोयमा एगेणं आएसेणं जहा कायद्वितीए पुरिसवेदस्स जहण्णेणं अंतोमुहुत्तं उक्कोसेणं सागरोवमसयपुहत्तं सातिरेगं नपुंसगवेदस्स जहण्णेणं एककं समयं उक्कोसेणं वणस्सतिकालो अवेयए दुविहे पन्नत्ते-साइए वा अपज्जवसिते साइए वा सपज्जवसिए तत्थ णं जेसे सादीए सपज्जवसिते से जहन्नेणं एककं समयं उक्कोसेणं अंतोमुहुत्तं इत्थिवेदस्स अंतरं जहण्णेणं अंतोमुहुत्तं उक्कोसेणं वणस्सतिकालो पुरिसवेदस्स अंतरं जहण्णेणं एगे समयं उक्कोसेणं वणस्सइकालो नपुंसगवेदस्स अंतरं जहण्णेणं अंतोमुहुत्तं उक्कोसेणं सागरोवमसयपुहत्तं सातिरेगं अवेदगो जहा हेद्वा अप्पाबहुयं-सव्वत्थोवा पुरिसवेदगा, इत्थिवेदगा संखेज्जगुणा अवेदगा संखेज्जगुणा नपुंसगवेदगा अनंतगुणा ।

[३८४] अहवा चउव्विहा सव्वजीवा पन्नत्ता तं जहा- चक्खुदंसणी अचक्खुदंसणी ओहिदंसणी केवलदंसणी, चक्खुदंसणी णं भंते चक्खुदंसणीत्ति कालओ केवचिरं होति गोयमा जहण्णेणं अंतोमुहुत्तं उक्कोसेणं सागरोवमसहस्सं सातिरेगं, अचक्खुदंसणी दुविहे पन्नत्ते अणादिए वा अपज्जवसिए अणादिए वा सपज्जवसिए, ओहिदंसणी जहण्णेणं एककं समयं उक्कोसेणं दो छावट्ठीओ सागरोवमाणं साइरेगाओ, केवलदंसणी साइए अपज्जवसिए चक्खुदंसणिस्स अंतरं जहण्णेणं अंतोमुहुत्तं उक्कोसेणं वणस्सतिकालो, अचक्खुदंसणिस्स दुविधस्स नत्थि अंतरं, ओहिदंसणिस्स जहन्नेणं एककं समयं उक्कोसेणं वणस्सतिकालो केवलदंसणिस्स नत्थि अंतरं अप्पाबहुयं-सव्वत्थोवा ओहिदंसणी, चक्खुदंसणी असंखेज्जगुणा, केवलदंसणी अनंतगुणा, अचक्खुदंसणी अनंतगुणा ।

[३८५] अहवा चउव्विहा सव्वजीवा पन्नत्ता तं जहा- संजया असंजया संजयासंजया नोसंजया-नोअसंजया-नोसंजयासंजया, संजए णं भंते संजएत्ति कालओ केवचरं होति गोयमा जहण्णेणं एककं समयं उक्कोसेणं देसूणा पुव्वकोडी असंजया जहा नाणी संजयासंजए जहण्णेणं अंतोमुहुत्तं उक्कोसेणं देसूणा पुव्वकोडी नोसंजत-नोअसंजत-नोसंजतासंजते साइए अपज्जवसिए संजयस्स संजयासंजयस्स दोण्हवि अंतरं जहण्णेणं अंतोमुहुत्तं उक्कोसेणं अवड्ढं पोग्गलपरियट्ठं देसूणं असंजयस्स आदि दुवे नत्थि अंतरं साइयस्स सपज्जवसियस्स जहण्णेणं एककं समयं उक्कोसेणं देसूणा पुव्वकोडी चउत्थगस्स नत्थि अंतरं अप्पाबहुयं-सव्वत्थोवा संजया, संजयासंजया असंखेज्जगुणा, नोसंजय-नोअसंजय-नोसंजयासंजया पडिवत्ति-१०/३

अनंतगुणा, असंजया अनंतगुणा सेत्तं चउव्विहा सव्वजीवा ।

• मुनि दीपरत्नसागरेण संशोधिताः सम्पादिताश्च तच्चा सव्वजीवा पडिवत्ती समत्ता •

□ चउत्थी सव्वजीवा-पडिवती □

[३८६] तत्थ जेते एवमाहंसु पंचविधा सव्वजीवा पन्नत्ता ते एवमाहंसु तं जहा- कोहकसाई माणकसाई मायाकसाई लोभकसाई अकसाई, कोहकसाई मानकसाई मायाकसाई णं जहण्णेणं अंतोमुहुत्तं उक्कोसेणवि अंतोमुहुत्तं, लोभकसाइस्स जहण्णेणं एकं समयं उक्कोसेणं अंतोमुहुत्तं अकसाई दुविहे जहा

हेढा, कोहकसाई मानकसाई मायाकसाई णं अंतरं जहण्णेणं एककं समयं उक्कोसेणं अंतोमुहुत्तं लोहकसाइस्स अंतरं जहण्णेणं अंतोमुहुत्तं उक्कोसेणवि अंतोमुहुत्तं, अकसाई तहेव जहा हेढा [अप्पाबाहुयं]

[३८७] अकसाइणो सव्वत्थोवा मानकसाई तहा अनंतगुणा ।

कोहे माया लोभे विसेसमहिया मुणेयव्वा ॥

[३८८] अहवा पंचविहा सव्वजीवा पन्नत्ता तं जहा- नेरइया तिरिक्खजोणिया मणुस्सा देवा सिद्धा, संचिद्धणंतराणि जह हेढा भणियाणि अप्पाबाहुयं-सव्वत्थोवा मणुस्सा, नेरइया असंखेज्जगुणा देवा असंखेज्जगुणा सिद्धा अनंतगुणा तिरिया अनंतगुणा सेत्तं पंचविहा सव्वजीवा ।

• मुनि दीपरत्नसागरेण संशोधिताः सम्पादिताश्च चउत्थी सव्वजीवा पडिवत्ती समत्ता •

[[पंचमी सव्वजीवा-पडिवत्ती]]

[३८९] तत्थ णं जेते एवमाहंसु छव्विहा सव्वजीवा पन्नत्ता ते एवमाहंसु तं जहा आभिणिबोहियानाणी सुयनाणी ओहिनाणी मणपज्जवनाणी केवलनाणी, अन्नाणीआभिणिबोहियानाणी णं भंते आभिणिबोहियानाणित्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं छावडिं सागरोवमाइं साइरेगाइं एवं सुयनाणीवि, ओहिनाणी णं भंते ओहिनाणीत्ति कालओ केवचिरं होइ गोयमा जहण्णेणं एककं समयं उक्कोसेणं छावडिसागरोवमाइं साइरेगाइं, मणपज्जवनाणी णं भंते मणपज्जवनाणीत्ति कालओ केवचिरं होइ गोयमा जहण्णेणं एककं समयं उक्कोसेणं देसूणा पुव्वकोडी, केवलनाणी णं भंते केवलनाणीत्ति कालओ केवचिरं होइ गोयमा सादीए अपज्जवसिए अन्नाणिणो तिविहा पन्नत्ता तं जहा- अणाइए वा अपज्जवसिए, अणाइए वा सपज्जवसिए, साइए वा सपज्जवसिए जहण्णेणं अंतोमुहुत्तं उक्कोसेणं अनंतं कालं अवड्ढं पोग्गलपरियट्ठं देसूणं अंतरंआभिणिबोहियानाणिस्सं जहण्णेणं अंतोमुहुत्तं उक्कोसेणं अनंतं कालं अवड्ढं पोग्गलपरियट्ठं देसूणं एवं सुयनाणिस्सवि ओहिनाणिस्सवि मणपज्जवनाणिस्सवि केवलनाणिणो नत्थि अंतरं अन्नाणिस्स साइय-सपज्जवसियस्स जहण्णेणं अंतोमुहुत्तं उक्कोसेणं छावडिं सागरोवमाइं साइरेगाइं, अप्पाबाहुयं-सव्वत्थोवा मणपज्जवनाणी, ओहिनाणी असंखेज्जगुणा आभिणिबोहियानाणी सुयनाणी सट्ठाणे दोवि तुल्ला विसेसाहिया केवलनाणी अनंतगुणा अन्नाणी अनंतगुणा ।

[३९०] अहवा छव्विहा सव्वजीवा पन्नत्ता तं जहा- एगिंदिया बेइंदिया तेइंदिया चउरिंदिया पंचेदिया अणिंदिया, संचिद्धणंतरं जहा हेढा, अप्पाबाहुयं-सव्वत्थोवा पंचेदिया, चउरिंदिया विसेसाहिया पडिवत्ति-१०/५

तेइंदिया विसेसाहिया बेइंदिया विसेसाहिया अणिंदिया अनंतगुणा, एगिंदिया अनंतगुणा, अहवा छव्विहा सव्वजीवा पन्नत्ता तं जहा- ओरालियसरीरी वेउव्वियसरीरी आहारगसरीरी तेयगसरीरी कम्मगसरीरी असररीरी, ओरालियसरीरी णं भंते ओरालियसरीरीत्ति कालओ केवचिरं होइ गोयमा जहण्णेणं खुड्डागं भवग्गहणं दुसमऊणं उक्कोसेणं असंखेज्ज कालं जाव अंगुलस्स असंखेज्जतिभागं वेउव्वियसरीरी जहण्णेणं एककं समयं उक्कोसेणं तेत्तीसं सागरोवमाइं अंतोमुहुत्तमब्भहियाइं आहारगसरीरी जहण्णेणं अंतोमुहुत्तं उक्कोसेणवि अंतोमुहुत्तं तेयगसरीरी कम्मगसरीरी य पत्तेयं दुविहे तं जहा- अणादीए वा अपज्जवसिए अमादीए वा सपज्जवसिए असरीरी साइए अपज्जवसिए ओरालियसरीरीरस्स अंतरं जहण्णेणं एककं समयं उक्कोसेणं तेत्तीसं सागरोवमाइं अंतोमुहुत्तमब्भहियाइं वेउव्वियसरीरीरस्स अंतरं जहण्णेणं अंतोमुहुत्तं

उक्कोसेणं वणस्सतिकालो आहारगसरीरस्स जहण्णेणं अंतोमुहुत्तं उक्कोसेणं अनंत कालं जाव अवड्ढं पोग्गलपरियट्ठं देसूणं तेयग-कम्मगाणं दोण्हवि अणाइय-अपज्जवसियाणं नत्थि अंतरं अणाइयसपज्जवसियाणं नत्थि अंतरं असरीरिस्स साइय-अपज्जवसियस्स नत्थि अंतरं अप्पाबहुयं-सव्वत्थोवा आहारगसरीरी वेउव्वियसरीरी असंखेज्जगुणा ओरालियसरीरीअसंखेज्जगुणा असरीरीअनंतगुणा तेयाकम्मसरीरी दोवि तुल्ला अनंतगुणा सेत्तं छव्विहा सव्वजीवा ।

• मुनि दीपरत्नसागरेण संशोधिताः सम्पादिताश्च पंचमी सव्वजीवा पडिवत्ती समत्ता •

❑ छट्ठी सव्वजीवा-पडिवत्ती ❑

[३९१] तत्थ णं जेते एवमाहंसु सत्तविधा सव्वजीवा पन्नत्ता ते एवमाहंसु तं जहा-पुढविकाइया आउकाइया तेउकाइया वउकाइया वणस्सतिकाइया तसकाइया अकाइया, संचिट्ठणंतरा जहा हेट्ठा अप्पाबहुयं-सव्वत्थोवा तसकाइया, तेउकाइया असंखेज्जगुणा पुढविकाइया विसेसाहिया आउकाइया विसेसाहिया वाउकाइया विसेसाहिया अकाइया अनंतगुणा वणस्सइकाइया अनंतगुणा ।

[३९२] अहवा सत्तविहा सव्वजीवा पन्नत्ता तं जहा- कण्हलेस्सा नीललेस्सा काउलेस्सा तेउलेस्सा पम्हलेस्सा सुक्कलेस्सा अलेस्सा, कण्हलेसे णं भंते कण्हलेसत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं तेत्तीसं सागरोवमाइं अंतोमुहुत्तमब्भहियाइं नीललेस्से णं भंते नीललेस्सत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं दस सागरोवमाइं पलिओवमस्स असंखेज्जतिभागमब्भहियाइं काउलेस्से णं भंते काउलेस्सेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं तिण्णि सागरोवमाइं पलिवओमस्स असंखेज्जतिभागमब्भहियाइं तेउलेस्से णं भंते तेउलेस्सेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं दोण्णि सागरोवमाइं पलिओवमस्स असंखेज्जइभागमब्भहियाइं, पम्हलेसे णंभंते पम्हलेसेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं दस सागरोवमाइं अंतोमुहुत्तमब्भहियाइं, सुक्कलेसे णं भंते सुक्कलेसेत्ति कालओ केवचिरं होइ गोयमा जहण्णेणं अंतोमुहुत्तं उक्कोसेणं तेत्तीसं सागरोवमाइं अंतोमुहुत्तमब्भहियाइं अलेस्से णं भंते सादीए अपज्जवसिते कण्हलेसस्स णं भंते अंतरं कालओ केवचिरं होति गोयमा जहण्णेणं अंतोमुहुत्तं उक्कोसेणं तेत्तीसं सागरोवमाइं अंतोमुहुत्तमब्भहियाइं एवं नीललेसस्सवि काउलेस्सवि तेउ-पम्हसुक्काणं अंतरं जहण्णेणं अंतोमुहुत्तं उक्कोसेणं वणस्सतिकालो अलेसस्स णं भंते अंतरं कालओ केवचिरं होइ गोयमा सादीयस्स अपज्जवसियस्स नत्थि अंतरं अप्पाबहुयं-सव्वत्थोवा सुक्कलेस्सा, पम्ह-पडिवत्ति-१०/६

लेस्सा संखेज्जगुणा, तेउलेस्सा संखेज्जगुणा, अलेस्सा अनंतगुणा, काउलेस्सा अनंतगुणा, नीललेस्सा विसेसा-हिया, कम्हलेस्सा विसेसाहिया सेत्तं सत्तविहा सव्वजीवा ।

• मुनि दीपरत्नसागरेण संशोधिताः सम्पादिताश्च छट्ठी सव्वजीवा पडिवत्ती समत्ता •

❑ सत्तमी सव्वजीवा-पडिवत्ती ❑

[३९३] तत्थ णं जेते एवमाहंसु अट्ठविहा सव्वजीवा पन्नत्ता ते एवमाहंसु तं जहा-आभिणिबोहियनाणी सुयनाणी ओहिनाणी मणपज्जवनाणी केवलनाणी मतिअन्नाणी सुयअन्नाणी विभंगनाणी, आभिणिबोहियनाणी णं भंते आभिणिबोहियनाणित्ति कालओ केवचिरं होति गोयमा जहण्णेणं

अंतोमुहुत्तं उक्कोसेणं छावट्टिसागरोवमाइं सातिरेगाइं एवं सुयनाणीवि ओहिनाणी णं भंते ओहिनाणित्ति कालओ केवचिरं होति गोयमा जहण्णेणं एक्कं समयं उक्कोसेणं छावट्टिसागरोवमाइं सातिरेगाइं मणपज्जवनाणी णं भंते मणपज्जवनाणित्ति कालओ केवचिरं होइ गोयमा जहन्नेणं एक्कं समयं उक्कोसेणं देसूणा पुव्वकोडी केवलनाणी णं भंते केवलनाणित्ति कालओ केवचिरं होति गोयमा सादीए अपज्जवसिते मतिअन्नाणी णं भंते अमतिअन्नाणित्ति कालओ केवचिरं होति गोयमा मइअन्नाणी तिविहे पन्नत्ते तं जहा- अणादी एवा अपज्जवसिए अणादीए वा सपज्जवसिए सादीए वा सपज्जवसिते तत्थ णं जेसे सादीए सपज्जवसिते से जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं सुयअन्नणी एवं चेव, विभंगनाणी णं भंते विभंगनाणित्ति कालओ केवचिरं होति गोयमा जहण्णेणं एक्कं समयं उक्कोसेणं तेत्तीसं सागरोवमाइं देसूणाए पुव्वकोडीए अब्भहियाइं आभिणिबोहियनाणिस्स णं भंते अंतरं कालओ केवचिरं होइ गोयमा जहण्णेणं अंतोमुहुत्तं उक्कोसेणं अनंतं कालं जाव अवड्ढं पोग्गलपरियट्ठं देसूणं एवं सुयनाणिस्सवि ओहिनाणिस्सवि मणपज्जवनाणिस्सवि केवलनाणिस्स णं भंते अंतरं कालओ केवचिरं होति गोयमा सादीयस्स अपज्जवसियस्स नत्थि अंतरं मइअन्नाणियस्स णं भंते अंतरं कालओ केवचिरं होति गोयमा अमादियस्स अपज्जवसियस्स नत्थि अंतरं अमादीयस्स सपज्जवसियस्स नत्थि अंतरं सादीयस्स सपज्जवसियस्स जहन्नेणं अंतोमुहुत्तं उक्कोसेणं छावट्टि सागरोवमाइं सातिरेगाइं एवं सुयअन्नाणिस्स वि, विभंगनाणिस्स णं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो अप्पाबहुयं-सव्वत्थोवा जीवा मणपज्जवनाणी, ओहिनाणी असंखेज्जगुणा आभिणिबोहियनाणी सुयनाणी सट्ठाणे दोवि तुल्ला विसेसाहिया, विभंगनाणी असंखेज्जगुणा केवलनाणी अनंतगुणा मइअन्नाणी सुयअन्नाणी य सट्ठाणे दोवि तुल्ला अनंतगुणा ।

[३९४] अहवा अट्ठविहा सव्वजीवा पन्नत्ता तं जहा- नेरइया तिरिक्खजोणिया तिरिक्खजोणिणीओ मणुस्सा मणुस्सीओ देवा देवीओ सिद्धा, नेरइए णं भंते नेरइयत्ति कालओ केवचिरं होति गोयमा जहण्णेणं दस वाससहस्साइं उक्कोसेणं तेत्तीसं सागरोवमाइं, तिरिक्खजोणिए णं भंते तिरिक्खजोणिएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो तिरिक्खजोणिणी णं भंते तिरिक्खजोणिएति कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो तिरिक्खजोणिणी णं भंते तिरिक्खजोणिणीत्ति कालओ केवचिरं होति गोयमा जहण्णेणं अंतोमुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं एवं मणूसे मणूसी देवे जहा नेरइए देवी णं भंते देवीत्ति कालओ केवचिरं होति गोयमा जहण्णेणं दस वाससहस्साइं उक्कोसेणं पणपन्नं पलि- पडिवत्ति-१०/७

ओमाइं, सिद्धे णं भंते सिद्धेत्ति कालओ केवचिरं होति गोयमा सादीए अपज्जवसिए, नेरइयस्स णं भंते भंते अंतरं कालओ केवचिरं होति गोयमा जहण्णेणं अंतोमुहुत्तं उक्कोसेणं वणस्सतिकालो, तिरिक्खजोणियस्स णं भंते अंतरं कालओ केवचिरं होति गोयमा जहण्णेणं अंतोमुहुत्तं उक्कोसेणं सागरोवमसतपुहत्तं सातिरेगं, तिरिक्खोणिणी णं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो एवं मणुस्सस्सवि मणुस्ससीएवि देवस्सवि देवीएवि सिद्धस्स णं भंते अंतरं कालओ केवचिरं होति गोयमा सादीयस्स अपज्जवसियस्स नत्थि अंतरं अप्पाबहुयं-सव्वत्थोवा मणुस्सीओ, मणुस्सा असंखेज्जगुणा नेरइया असंखेज्जगुणा तिरिक्खजोणिणीओ असंखेज्जगुणाओ देवा

असंखेज्जगुणा देवीओ संखेज्ज-गुणाओ सिद्धा अनंतगुणा तिरिक्खजोणिया अनंतगुणा सेत्तं अट्ठविहा सव्वजीवा ।

• मुनि दीपरत्नसागरेण संशोधिताः सम्पादिताश्च सत्तमी सव्वजीवा पडिवत्ती समत्ता •

[] अट्ठमी सव्वजीवा-पडिवत्ती []

[३९५] तत्थ णं जेते एवमाहंसु नवविधा सव्वजीवा पन्नत्ता ते एवमाहंसु तं जहा एगिंदिया बेइंदिया तेइंदिया चउरिंदिया नेरइया पंचेंदियतिरिक्खजोणिया मणूसा देवा सिद्धा, एगिंदिए णं भंते एगिंदियत्ति कालओ केवचिरं होइ गोयमा जहन्नेणं अंतोमुहुत्तं उक्कोसेणं वणस्सतिकालो बेइंदिए णं भंते बेइंदिएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं संखेज्ज कालं एवं तेइंदिएवि चउरिंदिएवि, नेरइए णं भंते नेरइएत्ति कालओ केवचिरं होति गोयमा जहन्नेणं दस वाससहस्साइं उक्कोसेणं तेत्तीसं सागरोवमाइं पंचेंदियतिरिक्खजोणिए णं भंते पंचेंदियतिरिक्खजोणिएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं तिण्णि पलिओवमाइं पुव्वकोडिपुहत्तमब्भहियाइं एवं मणूसेवि देवा जहा नेरइया, सिद्धे णं भंते सिद्धेत्ति कालओ केवचिरं होति गोयमा सादीए अपज्जवसिए, एगिंदियस्सणं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं दो सागरोवमसहस्साइं संखेज्जवासमब्भहियाइं, बेइंदियस्स णं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं दो सागरोवमसहस्साइं संखेज्जवासमब्भहियाइं, एवं तेइंदियस्सवि चउरिंदियस्सवि नेरइयस्सवि पंचेंदियतिरिक्खजोणियस्सवि मणूसस्सवि देवस्सवि सव्वेसिमेवं अंतरं भाणियव्वं सिद्धस्स णं भंते अंतरं कालओ केवचिरं होति गोयमा सादीयस्स अपज्जवसियस्स नत्थि अंतरं अप्पाबहुयं-सव्वत्थोवा मणुस्सा, नेरइया असंखेज्जगुणा देवा असंखेज्जगुणा पंचेंदियतिरिक्खजोणिया असंखेज्जगुणा चउरिंदिया विसेसाहिया तेइंदिया विसेसाहिया बेइंदिया विसेसाहिया सिद्धा अनंतगुणा एगिंदिया अनंतगुणा ।

[३९६] अहवा नवविधा सव्वजीवा पन्नत्ता तं जहा- पढमसमयनेरइया अपढम समयनेरइया पढमसमयतिरिक्खजोणिया अपढमसमयतिरिक्खजोणिया पढमसमयमणूसा अपढमसमयमणूसा पढमसमयदेवा अपढमसमयदेवा सिद्धा य, पढमसमयनेरइया णं भंते पढमसमयनेरइएत्ति कालओ केवचिरं होति गोयमा एककं समयं अपढमसमयनेरइए णं भंते अपढमसमयनेरइएत्ति काल-ओ केवचिरं होति गोयमा जहन्नेणं दस वाससहस्साइं समयूणाइं उक्कोसेणं तेत्तीसं सागरोवमाइं समयूणाइं पढमसमयतिरिक्खजोणिए णं भंते पढमसमयतिरिक्खजोणिएत्ति कालओ केवचिरं होति गोयमा एककं समयं अपढमसमय-तिरिक्खजोणि णं भंते अपढमसमयतिरिक्खजोणिएत्ति कालओ केवचिरं होति गोयमा जहन्नेणं खुड्डागं भवग्गहणं समयूणं उक्कोसेणं वणस्सतिकालो, पढमसमयमणूसे णं भंते पढमसमयमणूसेत्ति कालओ

पडिवत्ति-१०/८

केवचिरं होति गोयमा एककं समयं अपढमसमयमणूसे णं भंते अपढमसमयमणूसेत्ति कालओ केवचिरं होति गोयमा जहन्नेणं खुड्डागं भवग्गहणं समयूणं उक्कोसेणं तिण्णि पलिओवमाइं पुव्वकोडिपुहत्तमब्भहियाइं देवे जहा नेरइए ।

सिद्धे णं भंते सिद्धेत्ति कालओ केवचिरं होति गोयमा सादीए अपज्जवसिते पढमसमयनेर-
इयस्स णं भंते अंतरं कालओ केवचिरं होति गोयमा जहण्णेणं दस वाससहस्साइं अंतोमुहुत्तमब्भहियाइं
उक्कोसेणं वणस्सतिकालो अपढमसमयनेरइयस्स णं भंते अंतरं कालओ केवचिरं होति गोयमा जहण्णेणं
अंतोमुहुत्तं उक्कोसेणं वणस्सतिकालो पढमसमयतिरिक्खजोणियस्स णं भंते अंतरं कालओ केवचिरं होति
गोयमा जहण्णेणं दो खुड्डागाइं भवग्गहणाइं समयूणाइं उक्कोसेणं वणस्सतिकालो अपढमसमयतिरिक्ख-
जोणियस्स णं भंते अंतरं कालओ केवचिरं होति गोयमा जहण्णेणं खुड्डागं भवग्गहणं समयाहियं
उक्कोसेणं सागरोवमसयपुहत्तं सातिरेगं पढमसमयमणूसस्स जहा पढमसमयतिरिक्खजोणियस्स अपढम-
समयमणूसस्स णं भंते अंतरं कालओ केवचिरं होति गोयमा जहन्नेणं खुड्डागं भवग्गहणं समयाहियं
उक्कोसेणं वणस्सतिकालो पढमसमयमदेवस्स जहा पढमसमयनेरइयस्स अपढमसमयदेवस्स जहा
अपढमसमयनेरइयस्स, सिद्धस्स णं भंते अंतरं कालओ केवचिरं होति गोयमा सादीयस्स अपज्जवसियस्स
नत्थि अंतरं एसि णं भंते पढमसमयनेरइयाणं पढमसमयतिरिक्खजोणियाणं पढमसमयमणूसाणं
पढमसमयदेवाण य कयरे कयरेहिंतो अप्पा वा बहुया वा तुल्ला वा विसेसाहिया वा गोयमा सव्वथोवा
पढमसमयमणूसा, पढमसमयनेरइयाअसंखेज्जगुणा पढमसमयदेवा असंखेज्जगुणा पढमसमयतिरिक्ख-
जोणिया असंखेज्जगुणा एसि णं भंते अपढमसमयनेरइयाणं अपढमसमयतिरिक्खजोणियाणं अपढम-
समयमणूसाणं अपढमसमयदेवाण य कयरे कयरेहिंतो अप्पा वा बहुया वा तुल्ला वा विसेसाहिया वा
गोयमा सव्वथोवा अपढमसमयमणूसा, अपढमसमयनेरइया असंखेज्जगुणा अपढमसमयदेवा असंखेज्जगुणा
अपढमसमयतिरिक्खजोणिया अनंतगुणा ।

एसि णं भंते पढमसमयनेरइयाणं अपढमसमयनेरइयाणं य कयरे कयरेहिंतो अप्पा वा
जाव विसेसाहिया वा गोयमा सव्वथोवा पढमसमयनेरइया, अपढमसमयनेरइया असंखेज्जगुणा एसि णं
भंते पढमसमयतिरिक्खजोणियाणं अपढमसमयतिरिक्खजोणियाण य कतरे कतरेहिंतो अप्पा वा जाव
गोयमा सव्वथोवा पढमसमयतिरिक्खजोणिया अपढमसमयतिरिक्खजोणिया अनंतगुणा, मणुयदेवाणं
अप्पाबहुयं जहा नेरियाणं एसि णं भंते पढमसमयनेरइयाणं पढमसमयतिरिक्खजोणियामं पढमसमय-
मणूसाणं पढमसमयदेवाणं अपढमसमयनेरइयाणं अपढमसमयतिरिक्खजोणियाणं अपढमसमयमणूसाणं
अपढमसमयदेवाणं सिद्धाण य कयरे कयरेहिंतो अप्पा वा जाव गोयमा सव्वथोवा पढमसमयणूसा,
अपढमसमयमणूसा असंखेज्जगुणा पढमसमयनेरइया असंखेज्जगुणा पढमसमयदेवा असंखेज्जगुणा पढम-
समयतिरिक्खजोणिया असंखेज्जगुणा अपढमसमयनेरइया असंखेज्जगुणा अपढमसमयदा असंखेज्जगुणा
सिद्धा अनंतगुणा अपढमसमयतिरिक्खजोणिया अनंतगुणा सेत्तं नवविहा सव्वजीवा ।

• मुनि दीपरत्नसागरेण संशोधिताः सम्पादिताश्च अङ्गमी सव्वजीवा पडिवत्ती समत्ता •

॥ नवमी सव्वजीवा-पडिवत्ती ॥

[३९७] तत्थ णं जेते एवमाहंसु दसविधा सव्वजीवा पन्नत्ता ते एवमाहंसु तं जहा- पुढविका-
पडिवत्ति-१०/९

इया आउकाइया तेउकाइया वाउकाइया वणस्सतिकाइया बेइंदिया तेइंदिया चउरिंदिया पंचेदिया अणिंदिया,
पुढविकाइए णं भंते पुढविकाइएत्ति कालओ केवचिरं होति गोयमा जहण्णेणं अंतोमुहुत्तं उक्कोसेणं
असंखेज्जं कालं-असंखेज्जाओ उस्सप्पिणी-ओसप्पिणीओ कालओ खेत्तओ असंखेज्जा लोया एवं आउ-तेउ-

वाउकाइए, वणस्सतिकाइए णं भंते वणस्सतिकाइएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं अनंतं कालं बेइंदिए णं भंते बेइंदिएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं संखेज्जं कालं एवं तेइंदिएवि चउरिंदिएवि, पंचेदिए णं भंते पंचेदिएत्ति कालओ केवचिरं होति गोयमा जहन्नेणं अंतोमुहुत्तं उक्कोसेणं सागरोवमसमहस्स सातिरेगं, अणिंदिए णं भंते अणिंदिएत्ति कालओ केवचिरं होति गोयमा सादीए अपज्जवसिए, पुढविकाइयस्स णं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो एवं आउकाइयस्स तेउकाइयस्स वाउकाइयस्स, वणसइकाइयस्स णं भंते अंतरं कालओ केवचिरं होति गोयमा जा चेव पुढविकाइयस्स संचिदुणा, बेइंदिय-तेइंदिय-चउरिंदिया-पंचेदियाणं एतिसिं चउण्हं पि अंतरं जहन्नेणं अंतोमुहुत्तं उक्कोसेणं वणस्सइकालो अणिंदियस्स णं भंते अंतरं कालो केवचिरं होति गोयमा सादीयस्स अपज्जवसियस्स नत्थि अंतरं अप्पा-बहुयं-सव्वत्थोवा पंचेदिया, चउरिंदिया विसेसाहिया तेइंदिया विसेसाहिया बेइंदिया विसेसाहिया तेउकाइया असंखेज्जगुणा पुढविकाइया विसेसाहिया आउकाइया विसेसाहिया वाउकाइया विसे-साहिया, अणिंदिया अनंतगुणा वणस्सतिकाइया अनंतगुणा ।

[३९८] अहवा दसविहा सव्वजीवा पन्नत्ता तं जहा- पढमसमयनेरइया अपढमसमयनेरइया पढमसमयतिरिक्खजोणिया अपढमसमयतिरिक्खजोणिया पढमसमयमणूसा अपढमसमयमणूसा पढम-समयदेवा अपढमसमयदेवा पढमसमयसिद्धा अपढमसमयसिद्धा, पढमसमयनेरइए णं भंते पढमसमय-नेरइएत्ति कालओ केवचिरं होति गोयमा एक्कं समयं अपढमसमयनेरइए णं भंते अपढमसमयनेरइएत्ति कालओ केवचिरं होति गोयमा जहन्नेणं दस वाससहस्साइं समयूणाइं उक्कोसेणं तेत्तीसं सागरोवमाइं समयूणाइं पढमसमयतिरिक्खजोणिए णं भंते पढमसमयतिरिक्खजोणिएत्ति कालओ केवचिरं होति गोयमा एक्कं समयं अपढमसमयतिरिक्खजोणिए णं भंते अपढमसमयतिरिक्खजोणिएत्ति कालओ केवचिरं होति गोयमा जहन्नेणं खुड्डाणं भवग्गहणं समयूणं उक्कोसेणं वणस्सइकालो पढमसमयमणूसे णं भंते पढमसमयमणूसेत्ति कालओ केवचिरं होति गोयमा एक्कं समयं अपढमसमयमणूसे णं भंते अपढमसमयमणूसेत्ति कालओ केवचिरं होति गोयमा जहन्नेणं खुड्डागं भवग्गहणं समयूणं उक्कोसेणं तिणिण पलिओवमाइं पुव्वकोडिपुहत्तमब्भहियाइं देवे जहा नेरइए पढमसमयसिद्धे णं भंते पढमसमयसिद्धेत्ति कालओ केवचिरं होति गोयमा एक्कं समयं अपढमसमयसिद्धे णं भंते अपढमसमयसिद्धेत्ति कालओ केवचिरं होति गोयमा सादीए अपज्जवसिए पढमसमयनेरइयस्स णं भंते अंतरं कालो केवचिरं होति गोयमा जहन्नेणं दस वाससहस्साइं अंतोमुहुत्तमब्भहियाइं उक्कोसेणं वणस्सतिकालो अपढमसमयनेरइयस्स णं भंते अंतरं कालओ केवचिरं होति गोयमा जहन्नेणं अंतोमुहुत्तं उक्कोसेणं वणस्सतिकालो ।

पढमसमयतिरिक्खजोणियस्स णं भंते अंतरं कालो केवचिरं होइ गोयमा जहन्नेणं दो खुड्डागभवग्गहणिं समयूणाइं उक्कोसेणं वणस्सतिकालो अपढमसमयतिरिक्खजोणियस्स णं भंते अंतरं कालओ केवचिरं होति गोयमा जहन्नेणं खुड्डागभवग्गहणं समयाहियं उक्कोसेणं सागरोवमसयपुहुत्तं सातिरेगं पढमसमयमणूस्स णं भंते अंतरं कालओ केवचिरं होति गोयमा जहन्नेणं दो खुड्डागभवग्ग-पडिवत्ति-१०/९

हणाइं समयूणाइं उक्कोसेणं वणस्सतिकालो अपढमसमयमणूस्स णं भंते अंतरं कालओ केवचिरं होति गोयमा जहन्नेणं खुड्डागं भवग्गहणं समयाहियं उक्कोसेणं वणस्सतिकालो देवस्स णं अंतरं जहा

नेरइयस्स पढमसमयसिद्धस्स णं भंते अंतरं कालओ केवचिरं होति गोयमा नत्थि अंतरं अपढमसमय-
सिद्धस्स णं भंते अंतरं कालो केवचिरं होति गोयमा सादीयस्स अपज्जवसियस्स नत्थि अंतरं, एतेसि णं
भंते पढमसमयनेरइयाणं पढमसमयतिरिक्खजोणियाणं पढमसमयमणूसाणं पढमसमयदेवाणं पढमसमय-
सिद्धाणं य कयतरे कतरेहिंतो अप्पा वा जाव गोयमा सव्वत्थोवा पढमसमयसिद्धा, पढमसमयमणूसा-
असंखेज्जगुणा, पढमसमयनेरइया, असंखेज्जगुणा पढमसमयदेवाअसंखेज्जगुणा पढमसमयतिरिक्ख-
जोणियाअसंखेज्जगुणा एतेसि णं भंते अपढमसमयनेरइयाणं जाव अपढमसमयसिद्धाणं य कतरे कतरेहिंतो
जाव विसेसाहिया वा गोयमा सव्वत्थोवा अपढमसमयमणूसा, अपढमसमयनेरइयाअसंखेज्जगुणा अपढम-
समयदेवाअसंखेज्जगुणा अपढमसमयसिद्धाअनंतगुणा अपढमसमयतिरिक्खजोणिया अनंतगुणा, एतेसि णं
भंते पढमसमयनेरइयाणं अपढमसमयनेरइयाणं य कतरे कतरेहिंतो जाव विसेसाहिया वा गोयमा
सव्वत्थोवा पढमसमयनेरइया, अपढमसमयनेरइयाअसंखेज्जगुणा, एतेसि णं भंते पढमसमयतिरिक्ख-
जोणियाणं अपढमसमयतिरिक्खजोणियाणं य कतरे कतरेहिंतो जाव विसेसाहिया वा गोयमा सव्वत्थोवा
पढमसमयतिरिक्ख-जोणिया अपढमसमयतिरिक्खजोणिया अनंतगुणा एतेसि णं भंते पढमसमयमणूसाणं
अपढमसमयमणूसाणं य कतरे कतरेहिंतो जाव विसेसाहिया वा गोयमा सव्वत्थोवा पढमसमयमणूसा,
अपढमसमयमणूसाअसंखेज्जगुणा एतेसि णं भंते पढमसमयदेवाणं अपढमसमयदेवाणं य कतरे कतरेहिंतो
जाव विसेसाहिया वा गोयमा सव्वत्थोवा पढमसमयदेवा, अपढमसमयदेवाअसंखेज्जगुणा ।

एतेसि णं भंते पढमसमयसिद्धाणं अपढमसमयसिद्धाणं य कयरे कयरेहिंतो जाव गोयमा
सव्वत्थोवा पढमसमयसिद्धा, अपढमसमयसिद्धाअनंतगुणा एतेसि णं भंते पढमसमयनेरइयाणं अपढमसमय-
नेरइयाणं पढमसमयतिरिक्खजोणियाणं अपढमसमयतिरिक्खजोणियाणं पढमसमयमणूसाणं अपढमसमय-
मणूसाणं पढमसमयदेवाणं अपढमसमयदेवाणं पढमसमयसिद्धाणं अपढमसमय-सिद्धाणं य कतरे कतरेहिंतो
जाव गोयमा सव्वत्थोवा पढमसमय सिद्धा, पढमसमयमणूसाअसंखेज्जगुणा अपढमसमयमणूसाअ-
संखेज्जगुणा पढमसमयनेरइयाअसंखेज्जगुणा पढमसमयदेवाअसंखेज्जगुणा पढमसमयतिरिक्खजोणिया-
असंखेज्जगुणा अपढमसमयनेरइया असंखेज्जगुणा अपढमसमयदेवाअसंखेज्जगुणा अपढमसमयसिद्धा-
अनंतगुणा अपढमसमयतिरिक्खजोणियाअनंतगुणा सेत्तंदसविहा सव्वजीवा सेत्तं सव्वजीवाभिगमे ।

• मुनि दीपरत्नसागरेण संशोधिताः सम्पादिताश्च नवमी सव्वजीवा पडिवत्ती समत्ता •

• मुनिदीपरत्नसागरेण संशोधितः सम्पादित्तश्च जीवाजीवाभिगमं
समत्ता•

१४

जीवाजीवाभिगमं -तइयं उवंगं समत्तं

Proof correction is not done